

宿雨清幾句


朝陽展帝城

望奔人樂業

瓊上踏歌行



全唐詩十



中华古典精华文库

全唐 诗

(第十部)

第三百四十一卷

卷 341_1【符读书城南】

韩愈

木之就规矩，在梓匠轮輿。人之能为人，由腹有诗书。
诗书勤乃有，不勤腹空虚。欲知学之力，贤愚同一初。
由其不能学，所入遂异间。两家各生子，提孩巧相如。
少长聚嬉戏，不殊同队鱼。年至十二三，头角稍相疏。
二十渐乖张，清沟映污渠。三十骨骼成，乃一龙一猪。
飞黄腾踏去，不能顾蟾蜍。一为马前卒，鞭背生虫蛆。
一为公与相，潭潭府中居。问之何因尔，学与不学欤。
金璧虽重宝，费用难贮储。学问藏之身，身在则有余。
君子与小人，不系父母且。不见公与相，起身自犁鉏。
不见三公后，寒饥出无驴。文章岂不贵，经训乃菑畬。
潢潦无根源，朝满夕已除。人不通古今，马牛而襟裾。
行身陷不义，况望多名誉。时秋积雨霁，新凉入郊墟。
灯火稍可亲，简编可卷舒。岂不旦夕念，为尔惜居诸。
恩义有相夺，作诗劝踌躇。

卷 341_2 【示爽】

韩愈

宣城去京国，里数逾三千。念汝欲别我，解装具盘筵。
日昏不能散，起坐相引牵。冬夜岂不长，达旦灯烛然。
座中悉亲故，谁肯舍汝眠。念汝将一身，西来曾几年。
名科掩众俊，州考居吏前。今从府公召，府公又时贤。
时辈千百人，孰不谓汝妍。汝来江南近，里闾故依然。
昔日同戏儿，看汝立路边。人生但如此，其实亦可怜。
吾老世味薄，因循致留连。强颜班行内，何实非罪愆。
才短难自力，惧终莫洗湔。临分不汝诳，有路即归田。

卷 341_3 【人日城南登高】

韩愈

初正候才兆，涉七气已弄。霭霭野浮阳，晖晖水披冻。
圣朝身不废，佳节古所用。亲交既许来，子姝亦可从。
盘蔬冬春杂，尊酒清浊共。令征前事为，觞咏新诗送。
扶杖凌圯阯，刺船犯枯葑。恋池群鸭回，释峤孤云纵。
人生本坦荡，谁使妄倥偬。直指桃李阑，幽寻宁止重。

卷 341_4 【病鸱】

韩愈

屋东恶水沟，有鸱堕鸣悲。青泥掩两翅，拍拍不得离。
君童叫相召，瓦砾争先之。计校生平事，杀却理亦宜。
夺攘不愧耻，饱满盘天嬉。晴日占光景，高风恣追随。
遂凌鸾凤群，肯顾鸿鹄卑。今者命运穷，遭逢巧丸儿。
中汝要害处，汝能不得施。于吾乃何有，不忍乘其危。
丐汝将死命，浴以清水池。朝餐辍鱼肉，暝宿防狐狸。
自知无以致，蒙德久犹疑。饱入深竹丛，饥来傍阶基。
亮无责报心，固以听所为。昨日有气力，飞跳弄藩篱。
今晨忽径去，曾不报我知。侥幸非汝福，天衢汝休窥。
京城事弹射，竖子不易欺。勿讳泥坑辱，泥坑乃良规。

卷 341_5 【华山女】

韩愈

街东街西讲佛经，撞钟吹螺闹宫庭。广张罪福资诱胁，
听众狎恰排浮萍。黄衣道士亦讲说，座下寥落如明星。
华山女儿家奉道，欲驱异教归仙灵。洗妆拭面著冠帔，
白咽红颊长眉青。遂来升座演真诀，观门不许人开扃。
不知谁人暗相报，訇然振动如雷霆。扫除众寺人迹绝，
骅骝塞路连辚辚。观中人满坐观外，后至无地无由听。

抽簪脱钿解环佩，堆金叠玉光青荧。天门贵人传诏召，
六宫愿识师颜形。玉皇颔首许归去，乘龙驾鹤来青冥。
豪家少年岂知道，来绕百匝脚不停。云窗雾阁事恍惚，
重重翠幕深金屏。仙梯难攀俗缘重，浪凭青鸟通丁宁。

卷 341_6 【读皇甫湜公安园池诗书其后二首】

韩愈

晋人目二子，其犹吹一呷。区区自其下，顾肯挂牙舌。
春秋书王法，不诛其人身。尔雅注虫鱼，定非磊落人。
湜也困公安，不自闲穷年。枉智思掎抚，
粪壤污秽岂有臧。诚不如两忘，但以一概量。

我有一池水，蒲苇生其间。虫鱼沸相嚼，日夜不得闲。
我初往观之，其后益不观。观之乱我意，不如不观完。
用将济诸人，舍得业孔颜。百年讵几时，君子不可闲。

卷 341_7 【路傍堠】

韩愈

堆堆路傍堠，一双复一只。迎我出秦关，送我入楚泽。
千以高山遮，万以远水隔。吾君勤听治，照与日月敌。
臣愚幸可哀，臣罪庶可释。何当迎送归，缘路高历历。

卷 341_8 【食曲河驿】

韩愈

晨及曲河驿，凄然自伤情。群乌巢庭树，乳燕飞檐楹。
而我抱重罪，子子万里程。亲戚顿乖角，图史弃纵横。
下负明义重，上孤朝命荣。杀身谅无补，何用答生成。

卷 341_9 【过南阳】

韩愈

南阳郭门外，桑下麦青青。行子去未已，春鸠鸣不停。
秦商邈既远，湖海浩将经。孰忍生以戚，吾其寄余龄。

卷 341_10 【泷吏】

韩愈

南行逾六旬，始下昌乐泷。险恶不可状，船石相舂撞。
往问泷头吏，潮州尚几里。行当何时到，土风复何似。
泷吏垂手笑，官何问之愚。譬官居京邑，何由知东吴。
东吴游宦乡，官知自有由。潮州底处所，有罪乃窜流。
依幸无负犯，何由到而知。官今行自到，那遽妄问为。

不虞卒见困，汗出愧且骇。吏曰聊戏官，侂尝使往罢。
岭南大抵同，官去道苦辽。下此三千里，有州始名潮。
恶溪瘴毒聚，雷电常汹汹。鳄鱼大于船，牙眼怖杀侂。
州南数十里，有海无天地。飓风有时作，掀簸真差事。
圣人于天下，于物无不容。比闻此州囚，亦有生还侂。
官无嫌此州，固罪人所徙。官当明时来，事不待说委。
官不自谨慎，宜即引分往。胡为此水边，神色久懔懔。
瓶大瓶罍小，所任自有宜。官何不自量，满溢以取斯。
工农虽小人，事业各有守。不知官在朝，有益国家不。
得无虱其间，不武亦不文。仁义饬其躬，巧奸败群伦。
叩头谢吏言，始惭今更羞。历官二十余，国恩并未酬。
凡吏之所诃，嗟实颇有之。不即金木诛，敢不识恩私。
潮州虽云远，虽恶不可过。于身实已多，敢不持自贺。

卷 341_11【赠别元十八协律六首】

韩愈

知识久去眼，吾行其既远。瞢瞢莫訾省，默默但寝饭。
子兮何为者，冠珮立宪宪。何氏之从学，兰蕙已满畹。
于何玩其光，以至岁向晚。治惟尚和同，无俟于谗谄。
或师绝学贤，不以艺自辍。子兮独如何，能自媚婉婉。
金石出声音，宫室发关键。何人识章甫，而知骏蹄踠。
惜乎吾无居，不得留息偃。临当背面时，裁诗示缱绻。

英英桂林伯，实惟文武特。远劳从事贤，来吊逐臣色。

南裔多山海，道里屡纡直。风波无程期，所忧动不测。
子行诚艰难，我去未穷极。临别且何言，有泪不可拭。

吾友柳子厚，其人艺且贤。吾未识子时，已览赠子篇。
寤寐想风采，于今已三年。不意流窜路，旬日同食眠。
所闻昔已多，所得今过前。如何又须别，使我抱悁悁。

势要情所重，排斥则埃尘。骨肉未免然，又况四海人。
嶷嶷桂林伯，矫矫义勇身。生平所未识，待我逾交亲。
遗我数幅书，继以药物珍。药物防瘴疠，书劝养形神。
不知四罪地，岂有再起辰。穷途致感激，肝胆还轮囷。

读书患不多，思义患不明。患足已不学，既学患不行。
子今四美具，实大华亦荣。王官不可阙，未宜后诸生。
嗟我摈南海，无由助飞鸣。

寄书龙城守，君骥何时秣。峡山逢飓风，雷电助撞掣。
乘潮簸扶胥，近岸指一发。两岩虽云牢，水石互飞发。
屯门虽云高，亦映波浪没。余罪不足惜，子生未宜忽。
胡为不忍别，感谢情至骨。

卷 341_12【初南食贻元十八协律】

韩愈

鲙实如惠文，骨眼相负行。蠔相黏为山，百十各自生。

蒲鱼尾如蛇，口眼不相营。蛤即是虾蟆，同实浪异名。
章举马甲柱，斗以怪自呈。其余数十种，莫不可叹惊。
我来御魑魅，自宜味南烹。调以咸与酸，芼以椒与橙。
腥臊始发越，咀吞面汗骍。惟蛇旧所识，实惮口眼狞。
开笼听其去，郁屈尚不平。卖尔非我罪，不屠岂非情。
不祈灵珠报，幸无嫌怨并。聊歌以记之，又以告同行。

卷 341_13【宿曾江口示侄孙湘二首】

韩愈

云昏水奔流，天水濆相围。三江灭无口，其谁识涯圻。
暮宿投民村，高处水半扉。犬鸡俱上屋，不复走与飞。
篙舟入其家，暝闻屋中唏。问知岁常然，哀此为生微。
海风吹寒晴，波扬众星辉。仰视北斗高，不知路所归。
舟行忘故道，屈曲高林间。林间无所有，奔流但潺潺。
嗟我亦拙谋，致身落南蛮。茫然失所诣，无路何能还。

卷 341_14【答柳柳州食虾蟆】

韩愈

虾蟆虽水居，水特变形貌。强号为蛙哈，于实无所校。
虽然两股长，其奈脊皴皲。跳踯虽云高，意不离泞淖。
鸣声相呼和，无理只取闹。周公所不堪，洒灰垂典教。

我弃愁海滨，恒愿眠不觉。叵堪朋类多，沸耳作惊爆。
端能败笙磬，仍工乱学校。虽蒙勾践礼，竟不闻报效。
大战元鼎年，孰强孰败桡。居然当鼎味，岂不辱钓罩。

余初不下喉，近亦能稍稍。常惧染蛮夷，失平生好乐。
而君复何为，甘食比豢豹。猎较务同俗，全身斯为孝。
哀哉思虑深，未见许回棹。

卷 341_15【别赵子】

韩愈

我迁于揭阳，君先揭阳居。揭阳去京华，其里万有余。
不谓小郭中，有子可与娱。心平而行高，两通诗与书。
婆娑海水南，簸弄明月珠。及我迁宜春，意欲携以俱。

摆头笑且言，我岂不足欤。又奚为于北，往来以纷如。
海中诸山中，幽子颇不无。相期风涛观，已久不可渝。
又尝疑龙虾，果谁雄牙须。蚌羸鱼鳖虫，瞿瞿以狙狙。

识一已忘十，大同细自殊。欲一穷究之，时岁屡谢除。
今子南且北，岂非亦有图。人心未尝同，不可一理区。
宜各从所务，未用相贤愚。

卷 341_16 【除官赴阙至江州寄鄂岳李大夫】

韩愈

盆城去鄂渚，风便一日耳。不枉故人书，无因帆江水。
故人辞礼闱，旌节镇江圻。而我窜逐者，龙钟初得归。
别来已三岁，望望长迢递。咫尺不相闻，平生那可计。
我齿落且尽，君鬓白几何。年皆过半百，来日苦无多。
少年乐新知，衰暮思故友。譬如亲骨肉，宁免相可不。
我昔实愚蠢，不能降色辞。子犯亦有言，臣犹自知之。
公其务贯过，我亦请改事。桑榆尚可收，愿寄相思字。

卷 341_17 【南山有高树行赠李宗闵】

韩愈

南山有高树，花叶何衰衰。上有凤凰巢，凤凰乳且栖。
四旁多长枝，群鸟所托依。黄鹄据其高，众鸟接其卑。
不知何山鸟，羽毛有光辉。飞飞择所处，正得众所希。
上承凤凰恩，自期永不衰。中与黄鹄群，不自隐其私。
下视众鸟群，汝徒竟何为。不知挟丸子，心默有所规。
弹汝枝叶间，汝翅不觉摧。或言由黄鹄，黄鹄岂有之。
慎勿猜众鸟，众鸟不足猜。无人语凤凰，汝屈安得知。
黄鹄得汝去，婆娑弄毛衣。前汝下视鸟，各议汝瑕疵。
汝岂无朋匹，有口莫肯开。汝落蒿艾间，几时复能飞。

哀哀故山友，中夜思汝悲。路远翅翎短，不得持汝归。

卷 341_18【猛虎行】

韩愈

猛虎虽云恶，亦各有匹侪。群行深谷间，百兽望风低。
身食黄熊父，子食赤豹麋。择肉于熊豹，肯视兔与狸。
正昼当谷眠，眼有百步威。自矜无当对，气性纵以乖。
朝怒杀其子，暮还食其妃。匹侪四散走，猛虎还孤栖。
狐鸣门两旁，乌鹊从噪之。出逐猴入居，虎不知所归。
谁云猛虎恶，中路正悲啼。豹来衔其尾，熊来攫其颐。
猛虎死不辞，但惭前所为。虎坐无助死，况如汝细微。
故当结以信，亲当结以私。亲故且不保，人谁信汝为。

卷三百四十二

卷 342_1【雪后寄崔二十六丞公】

韩愈

蓝田十月雪塞关，我兴南望愁群山。攒天嵬嵬冻相映，
君乃寄命于其间。秩卑俸薄食口众，岂有酒食开容颜。
殿前群公赐食罢，骅骝蹋路骄且闲。称多量少鉴裁密，
岂念幽桂遗榛菅。几欲犯严出荐口，气象硤兀未可攀。
归来殒涕掩关卧，心之纷乱谁能删。诗翁憔悴斲荒棘，
清玉刻佩联玦环。脑脂遮眼卧壮士，大弨挂壁无由弯。
乾坤惠施万物遂，独于数子怀偏悭。朝欷暮喟不可解，
我心安得如石顽。

卷 342_2【送僧澄观】

韩愈

浮屠西来何施为，扰扰四海争奔驰。构楼架阁切星汉，
夸雄斗丽止者谁。僧伽后出淮泗上，势到众佛尤恢奇。
越商胡贾脱身罪，珪璧满船宁计资。清淮无波平如席，

栏柱倾扶半天赤。火烧水转扫地空，突兀便高三百尺。
影沈潭底龙惊遁，当昼无云跨虚碧。借问经营本何人，
道人澄观名籍籍。愈昔从军大梁下，往来满屋贤豪者。
皆言澄观虽僧徒，公才吏用当今无。后从徐州辟书至，
纷纷过客何由记。人言澄观乃诗人，一座竞吟诗句新。
向风长叹不可见，我欲收敛加冠巾。洛阳穷秋厌穷独，
丁丁啄门疑啄木。有僧来访呼使前，伏犀插脑高颊权。
惜哉已老无所及，坐睨神骨空潸然。临淮太守初到郡，
远遣州民送音问。好奇赏俊直难逢，去去为致思从容。

卷 342_3 【山南郑相公、樊员外酬答为诗，其末咸有见及语，
樊封以示愈，依赋十四韵以献】

韩愈

梁维西南屏，山厉水刻屈。稟生肖剿刚，难谐在民物。
茱公鼎轴老，烹斡力健倔。帝咨女予往，牙纛前忿拂。
威风挟惠气，盖壤两勳拂。茫漫华黑间，指画变恍欸。
诚既富而美，章汇霍炳蔚。日廷讲大训，龟判错袞黻。
樊子坐宾署，演孔刮老佛。金舂撼玉应，厥臭剧蕙郁。
遗我一言重，跼受惕斋慄。辞慙义卓阔，呀豁疚拊掘。
如新去町疃，雷霆逼颺飏。缀此岂为训，俚言绍庄屈。

卷 342_4【奉和武相公镇蜀时咏使宅韦太尉所养孔雀】

韩愈

穆穆鸾凤友，何年来止兹。飘零失故态，隔绝抱长思。
翠角高独耸，金华焕相差。坐蒙恩顾重，毕命守阶墀。

卷 342_5【感春三首】

韩愈

偶坐藤树下，暮春下旬间。藤阴已可庇，落蕊还漫漫。
= = 新叶大，珑珑晚花乾。青天高寥寥，两蝶飞翻翻。
时节适当尔，怀悲自无端。

黄黄芜菁花，桃李事已退。狂风簸枯榆，狼藉九衢内。
春序一如此，汝颜安足赖。谁能驾飞车，相从观海外。

晨游百花林，朱朱兼白白。柳枝弱而细，悬树垂百尺。
左右同来人，金紫贵显剧。娇童为我歌，哀响跨箏笛。
艳姬蹋筵舞，清眸刺剑戟。心怀平生友，莫一在燕席。
死者长眇芒，生者困乖隔。少年真可喜，老大百无益。

卷 342_6【早赴街西行香赠卢李二中舍人】

韩愈

天街东西异，祇命遂成游。月明御沟晓，蝉吟堤树秋。
老僧情不薄，僻寺境还幽。寂寥二三子，归骑得相收。

卷 342_7【晚寄张十八助教周郎博士】

韩愈

日薄风景旷，出归偃前檐。晴云如擘絮，新月似磨镰。
田野兴偶动，衣冠情久厌。吾生可携手，叹息岁将淹。

卷 342_8【题张十八所居】

韩愈

君居泥沟上，沟浊萍青青。蛙欢桥未扫，蝉嚙门长扃。
名秩后千品，诗文齐六经。端来问奇字，为我讲声形。

卷 342_9【奉酬卢给事云夫四兄曲江荷花行见寄，并呈上钱七兄阁老张十八助教】

韩愈

曲江千顷秋波净，平铺红云盖明镜。大明宫中给事归，
走马来看立不正。遗我明珠九十六，寒光映骨睡骊目。

我今官闲得婆娑，问言何处芙蓉多。撑舟昆明度云锦，
脚敲两舷叫吴歌。太白山高三百里，负雪崔嵬插花里。

玉山前却不复来，曲江汀滢水平杯。我时相思不觉一回首，
天门九扇相当开。上界真人足官府，
岂如散仙鞭笞鸾凤终日相追陪。

卷 342_10【奉和钱七兄曹长盆池所植】

韩愈

翻翻江浦荷，而今生在此。擢擢菰叶长，芳根复谁徙。
露涵两鲜翠，风荡相磨倚。但取主人知，谁言盆盎是。

卷 342_11【记梦】

韩愈

夜梦神官与我言，罗缕道妙角与根。挈携陬维口澜翻，
百二十刻须臾间。我听其言未云足，舍我先度横山腹。
我徒三人共追之，一人前度安不危。我亦平行蹋）*，
神完骨蹯脚不掉。侧身上视溪谷盲，杖撞玉版声彭>。
神官见我开颜笑，前对一人壮非少。石坛坡陀可坐卧，
我手承颔肘拄座。隆楼杰阁磊嵬高，天风飘飘吹我过。
壮非少者哦七言，六字常语一字难。我以指撮白玉丹，
行且咀嚙行诘盘。口前截断第二句，绰虐顾我颜不欢。
乃知仙人未贤圣，护短凭愚邀我敬。我能屈曲自世间，
安能从汝巢神山。

卷 342_12【南内朝贺归呈同官】

韩愈

薄云蔽秋曦，清雨不成泥。罢贺南内衙，归凉晓凄凄。
绿槐十二街，涣散驰轮蹄。余惟戇书生，孤身无所赍。
三黜竟不去，致官九列齐。岂惟一身荣，佩玉冠簪犀。
滉荡天门高，著籍朝厥妻。文才不如人，行又无町畦。
问之朝廷事，略不知东西。况于经籍深，岂究端与倪。
君恩太山重，不见酬稗埤。所职事无多，又不自提撕。

明庭集孔鸾，曷取于鳬鹭。树以松与柏，不宜间蒿藜。
婉娈自媚好，几时不见挤。贪食以忘躯，鲜不调盐醢。
法吏多少年，磨淬出角圭。将举汝愆尤，以为己阶梯。
收身归关东，期不到死迷。

卷 342_13【朝归】

韩愈

峨峨进贤冠，耿耿水苍佩。服章岂不好，不与德相对。
顾影听其声，赧颜汗渐背。进乏犬鸡效，又不勇自退。
坐食取其肥，无堪等蜚蠊。长风吹天墟，秋日万里晒。
抵暮但昏眠，不成歌慷慨。

卷 342_14【杂诗四首】

韩愈

朝蝇不须驱，暮蚊不可拍。蝇蚊满八区，可尽与相格。
得时能几时，与汝恣啖咋。凉风九月到，扫不见踪迹。

鹊鸣声楂楂，乌噪声护护。争斗庭宇间，持身博弹射。
黄鹄能忍饥，两翅久不擘。苍苍云海路，岁晚将无获。

截橑为櫓，斫楹以为楫。束蒿以代之，小大不相权。

虽无风雨灾，得不覆且颠。解辔弃骐驎，蹇驴鞭使前。
昆仑高万里，岁尽道苦遄。停车卧轮下，绝意于神仙。

雀鸣朝营食，鸠鸣暮觅群。独有知时鹤，虽鸣不缘身。
暗蝉终不鸣，有抱不列陈。蛙黾鸣无谓，閤閤只乱人。

卷 342_15 【读东方朔杂事】

韩愈

严严王母宫，下维万仙家。噫欠为飘风，濯手大雨沱。
方朔乃竖子，骄不加禁诃。偷入雷电室，鞞掉狂车。
王母闻以笑，卫官助呀呀。不知万万人，生身埋泥沙。
簸顿五山踣，流漂八维蹉。曰吾儿可憎，奈此狡狴何。
方朔闻不喜，褫身络蛟蛇。瞻相北斗柄，两手自相授。
群仙急乃言，百犯庸不科。向观睥睨处，事在不可赦。
欲不布露言，外口实喧哗。王母不得已，颜嚬口赍嗟。
颔头可其奏，送以紫玉珂。方朔不惩创，挟恩更矜夸。
诋欺刘天子，正昼溺殿衙。一旦不辞诀，摄身凌苍霞。

卷 342_16 【谴疟鬼】

韩愈

屑屑水帝魂，谢谢无余辉。如何不肖子，尚奋疟鬼威。

乘秋作寒热，翁妪所骂讪。求食欧泄间，不知臭秽非。
医师加百毒，熏灌无停机。灸师施艾炷，酷若猎火围。

诅师毒口牙，舌作霹雳飞。符师弄刀笔，丹墨交横挥。
咨汝之胄出，门户何巍巍。祖轩而父顼，未沫于前徽。

不修其操行，贱薄似汝稀。岂不忝厥祖，醜然不知归。
湛湛江水清，归居安汝妃。清波为裳衣，白石为门畿。

呼吸明月光，手掉芙蓉旂。降集随九歌，饮芳而食菲。
赠汝以好辞，咄汝去莫违。

卷 342_17【示儿】

韩愈

始我来京师，止携一束书。辛勤三十年，以有此屋庐。
此屋岂为华，于我自有余。中堂高且新，四时登牢蔬。
前荣饌宾亲，冠婚之所于。庭内无所有，高树八九株。
有藤娄络之，春华夏阴敷。东堂坐见山，云风相吹嘘。
松果连南亭，外有瓜芋区。西偏屋不多，槐榆翳空虚。
山鸟旦夕鸣，有类涧谷居。主妇治北堂，膳服适戚疏。
恩封高平君，子孙从朝裾。开门问谁来，无非卿大夫。
不知官高卑，玉带悬金鱼。问客之所为，峨冠讲唐虞。
酒食罢无为，棋檟以相娱。凡此座中人，十九持钧枢。
又问谁与频，莫与张樊如。来过亦无事，考评道精粗。

跼跼媚学子，墙屏日有徒。以能问不能，其蔽岂可祛。
嗟我不修饰，事与庸人俱。安能坐如此，比肩于朝儒。
诗以示儿曹，其无迷厥初。

卷 342_18【庭楸】

韩愈

庭楸止五株，共生十步间。各有藤绕之，上各相钩联。
下叶各垂地，树颠各云连。朝日出其东，我常坐西偏。
夕日在其西，我常坐东边。当昼日在上，我在中央间。
仰视何青青，上不见纤穿。朝暮无日时，我且八九旋。
濯濯晨露香，明珠何联联。夜月来照之，萋萋自生烟。
我已自顽钝，重遭五楸牵。客来尚不见，肯到权门前。
权门众所趋，有客动百千。九牛亡一毛，未在多少间。
往既无可顾，不往自可怜。

卷 342_19【玩月喜张十八员外以王六秘书至】

韩愈

前夕虽十五，月长未满规。君来晤我时，风露渺无涯。
浮云散白石，天宇开青池。孤质不自憊，中天为君施。
玩玩夜遂久，亭亭曙将披。况当今夕圆，又以嘉客随。
惜无酒食乐，但用歌嘲为。

卷 342_20 【和李相公摄事南郊，览物兴怀，呈一二知旧】

韩愈

灿灿辰角曙，亭亭寒露朝。川原共澄映，云日还浮飘。
上宰严祀事，清途振华镳。圆丘峻且坦，前对南山标。
村树黄复绿，中田稼何饶。顾瞻想岩谷，兴叹倦尘嚣。
惟彼颠瞑者，去公岂不辽。为仁朝自治，用静兵以销。
勿惮吐捉勤，可歌风雨调。圣贤相遇少，功德今宣昭。

卷 342_21 【和裴仆射相公假山十一韵】

韩愈

公乎真爱山，看山旦连夕。犹嫌山在眼，不得着脚历。
枉语山中人，勾我涧侧石。有来应公须，归必载金帛。
当轩乍骈罗，随势忽开坼。有洞若神剜，有岩类天划。
终朝岩洞间，歌鼓燕宾戚。孰谓衡霍期，近在王侯宅。
傅氏筑已卑，磻溪钓何激。逍遥功德下，不与事相撻。
乐我盛明朝，于焉傲今昔。

卷 342_22 【与张十八同效阮步兵一日复一夕】

韩愈

一日复一日，一朝复一朝。只见有不如，不见有所超。
食作前日味，事作前日调。不知久不死，悯悯尚谁要。
富贵自縶拘，贫贱亦煎焦。俯仰未得所，一世已解镳。
譬如笼中鹤，六翮无所摇。譬如兔得蹄，安用东西跳。
还看古人书，复举前人瓢。未知所究竟，且作新诗谣。

卷 342_23 【送诸葛觉往随州读书】

韩愈

邺侯家多书，插架三万轴。一一悬牙签，新若手未触。
为人强记览，过眼不再读。伟哉群圣文，磊落载其腹。
行年五十余，出守数已六。京邑有旧庐，不容久食宿。
台阁多官员，无地寄一足。我虽官在朝，气势日局缩。
屡为丞相言，虽愚不见录。送行过浚水，东望不转目。
今子从之游，学问得所欲。入海观龙鱼，矫翮逐黄鹄。
勉为新诗章，月寄三四幅。

卷 342_24【南溪始泛三首】

韩愈

榜舟南山下，上上不得返。幽事随去多，孰能量近远。
阴沈过连树，藏昂抵横坂。石粗肆磨砺，波恶厌牵挽。
或倚偏岸渔，竟就平洲饭。点点暮雨飘，稍稍新月偃。
余年懔无几，休日怆已晚。自是病使然，非由取高蹇。

南溪亦清驶，而无楫与舟。山农惊见之，随我劝不休。
不惟儿童辈，或有杖白头。馈我笼中瓜，劝我此淹留。
我云以病归，此已颇自由。幸有用余俸，置居在西畴。
囷仓米谷满，未有旦夕忧。上去无所得，下来亦悠悠。
但恐烦里闾，时有缓急投。愿为同社人，鸡豚燕春秋。

足弱不能步，自宜收朝迹。羸形可舆致，佳观安事掷。
即此南坂下，久闻有水石。拖舟入其间，溪流正清激。
随波吾未能，峻濑乍可刺。鹭起若导吾，前飞数十尺。
亭亭柳带沙，团团松冠壁。归时还尽夜，谁谓非事役。

卷三百四十三

卷 343_1【题楚昭王庙】

韩愈

丘坟满目衣冠尽，城阙连云草树荒。
犹有国人怀旧德，一间茅屋祭昭王。

卷 343_2【宿龙宫滩】

韩愈

浩浩复汤汤，滩声抑更扬。奔流疑激电，惊浪似浮霜。
梦觉灯生晕，宵残雨送凉。如何连晓语，一半是思乡。

卷 343_3【叉鱼招张功曹】

韩愈

叉鱼春岸阔，此兴在中宵。大炬然如昼，长船缚似桥。

深窥沙可数，静撈水无摇。刃下那能脱，波间或自跳。
中鳞怜锦碎，当目讶珠销。迷火逃翻近，惊人去暂遥。
竞多心转细，得隼语时嚣。潭罄知存寡，舷平觉获饶。
交头疑凑饵，骈首类同条。濡沫情虽密，登门事已辽。
盈车欺故事，饲犬验今朝。血浪凝犹沸，腥风远更飘。
盖江烟雾幂，拂棹影寥寥。獭去愁无食，龙移惧见烧。
如棠名既误，钓渭日徒消。文客惊先赋，篙工喜尽谣。
脍成思我友，观乐忆吾僚。自可捐忧累，何须强问鸮。

卷 343_4【李员外寄纸笔】

韩愈

题是临池后，分从起草余。兔尖针莫并，茧净雪难如。
莫怪殷勤谢，虞卿正著书。

卷 343_5【次同冠峡】

韩愈

今日是何朝，天晴物色饶。落英千尺堕，游丝百丈飘。
泄乳交岩脉，悬流揭浪标。无心思岭北，猿鸟莫相撩。

卷 343_6 【答张十一功曹】

韩愈

山净江空水见沙，哀猿啼处两三家。筼筻竞长纤纤笋，
踯躅闲开艳艳花。未报恩波知死所，莫令炎瘴送生涯。
吟君诗罢看双鬓，斗觉霜毛一半加。

卷 343_7 【郴州祈雨】

韩愈

乞雨女郎魂，炰羞洁且繁。庙开鼯鼠叫，神降越巫言。
旱气期销荡，阴官想骏奔。行看五马入，萧飒已随轩。

卷 343_8 【湘中酬张十一功曹】

韩愈

休垂绝徼千行泪，共泛清湘一叶舟。
今日岭猿兼越鸟，可怜同听不知愁。

卷 343_9【郴口又赠二首】

韩愈

山作剑攒江写镜，扁舟斗转疾于飞。
回头笑向张公子，终日思归此日归。
雪飏霜翻看不分，雷惊电激语难闻。
沿涯宛转到深处，何限青天无片云。

卷 343_10【题木居士二首】

韩愈

火透波穿不计春，根如头面干如身。
偶然题作木居士，便有无穷求福人。
为神讵比沟中断，遇赏还同爨下余。
朽蠹不胜刀锯力，匠人虽巧欲何如。

卷 343_11【晚泊江口】

韩愈

郡城朝解缆，江岸暮依村。二女竹上泪，孤臣水底魂。
双双归蛰燕，一一叫群猿。回首那闻语，空看别袖翻。

卷 343_12【湘中】

韩愈

猿愁鱼踊水翻波，自古流传是汨罗。
蘋藻满盘无处奠，空闻渔父扣舷歌。

卷 343_13【别盈上人】

韩愈

山僧爱山出无期，俗士牵俗来何时。
祝融峰下一回首，即是此生长别离。

卷 343_14【喜雪献裴尚书】

韩愈

宿云寒不卷，春雪堕如簷。骋巧先投隙，潜光半入池。
喜深将策试，惊密仰檐窥。自下何曾污，增高未觉危。
比心明可烛，拂面爱还吹。妒舞时飘袖，欺梅并压枝。
地空迷界限，砌满接高卑。浩荡乾坤合，霏微物象移。
为祥矜大熟，布泽荷平施。已分年华晚，犹怜曙色随。
气严当酒换，洒急听窗知。照曜临初日，玲珑滴晚澌。

聚庭看岳耸，扫路见云披。阵势鱼丽远，书文鸟篆奇。
纵欢罗艳黠，列贺拥熊螭。履敝行偏冷，门扃卧更羸。
悲嘶闻病马，浪走信娇儿。灶静愁烟绝，丝繁念鬓衰。
拟盐吟旧句，授简慕前规。捧赠同燕石，多惭失所宜。

卷 343_15【春雪】

韩愈

看雪乘清旦，无人坐独谣。拂花轻尚起，落地暖初销。
已讶陵歌扇，还来伴舞腰。洒篁留密节，著柳送长条。
入镜鸾窥沼，行天马度桥。遍阶怜可掬，满树戏成摇。
江浪迎涛日，风毛纵猎朝。弄闲时细转，争急忽惊飘。
城险疑悬布，砧寒未捣绡。莫愁阴景促，夜色自相饶。

卷 343_16【闻梨花发赠刘师命】

韩愈

桃溪惆怅不能过，红艳纷纷落地多。
闻道郭西千树雪，欲将君去醉如何。

卷 343_17【春雪间早梅】

韩愈

梅将雪共春，彩艳不相因。逐吹能争密，排枝巧妒新。
谁令香满座，独使净无尘。芳意饶呈瑞，寒光助照人。
玲珑开已遍，点缀坐来频。那是俱疑似，须知两逼真。
荧煌初乱眼，浩荡忽迷神。未许琼华比，从将玉树亲。
先期迎献岁，更伴占兹晨。愿得长辉映，轻微敢自珍。

卷 343_18【早春雪中闻莺】

韩愈

朝莺雪里新，雪树眼前春。带涩先迎气，侵寒已报人。
共矜初听早，谁贵后闻频。暂啖那成曲，孤鸣岂及辰。
风霜徒自保，桃李讵相亲。寄谢幽栖友，辛勤不为身。

卷 343_19【梨花下赠刘师命】

韩愈

洛阳城外清明节，百花寥落梨花发。
今日相逢瘴海头，共惊烂漫开正月。

卷 343_20 【和归工部送僧约】

韩愈

早知皆是自拘囚，不学因循到白头。

汝既出家还扰扰，何人更得死前休。

卷 343_21 【入关咏马】

韩愈

岁老岂能充上驷，力微当自慎前程。

不知何故翻骧首，牵过关门妄一鸣。

卷 343_22 【木芙蓉】

韩愈

新开寒露丛，远比水间红。艳色宁相妒，嘉名偶自同。

采江官渡晚，攀木古祠空。愿得勤来看，无令便逐风。

卷 343_23 【题张十一旅舍三咏·榴花】

韩愈

五月榴花照眼明，枝间时见子初成。

可怜此地无车马，颠倒青苔落绛英。

卷 343_24 【题张十一旅舍三咏·井】

韩愈

贾谊宅中今始见，葛洪山下昔曾窥。

寒泉百尺空看影，正是行人渴死时。

卷 343_25 【题张十一旅舍三咏·蒲萄】

韩愈

新茎未遍半犹枯，高架支离倒复扶。

若欲满盘堆马乳，莫辞添竹引龙须。

卷 343_26 【峡石西泉】

韩愈

居然鳞介不能容，石眼环环水一钟。
闻说旱时求得雨，只疑科斗是蛟龙。

卷 343_27 【梁国惠康公主挽歌二首】

韩愈

定谥芳声远，移封大国新。巽宫尊长女，台室属良人。
河汉重泉夜，梧桐半树春。龙輶非厌翟，还辗禁城尘。

秦地吹箫女，湘波鼓瑟妃。佩兰初应梦，奔月竟沦辉。
夫族迎魂去，宫官会葬归。从今沁园草，无复更芳菲。

卷 343_28 【和崔舍人咏月二十韵】

韩愈

三秋端正月，今夜出东溟。对日犹分势，腾天渐吐灵。
未高烝远气，半上霁孤形。赫奕当躔次，虚徐度杳冥。
长河晴散雾，列宿曙分萤。浩荡英华溢，萧疏物象冷。

池边临倒照，檐际送横经。花树参差见，皋禽断续聆。
牖光窥寂寞，砧影伴娉婷。幽坐看侵户，闲吟爱满庭。
辉斜通壁练，彩碎射沙星。清洁云间路，空凉水上亭。
净堪分顾兔，细得数飘萍。山翠相凝绿，林烟共冪青。
过隅惊桂侧，当午觉轮停。属思摛霞锦，追欢罄缥瓶。
郡楼何处望，陇笛此时听。右掖连台座，重门限禁扃。
风台观滉漾，冰砌步青荧。独有虞庠客，无由拾落萸。

卷 343_29【咏雪赠张籍】

韩愈

只见纵横落，宁知远近来。飘飘还自弄，历乱竟谁催。
座暖销那怪，池清失可猜。坳中初盖底，垤处遂成堆。
慢有先居后，轻多去却回。度前铺瓦陇，发本积墙隈。
穿细时双透，乘危忽半摧。舞深逢坎井，集早值层台。
砧练终宜捣，阶纨未暇裁。城寒装睥睨，树冻裹莓苔。
片片匀如剪，纷纷碎若掇。定非煇鹖鹭，真是屑琼瑰。
纬繵观朝萼，冥茫瞩晚埃。当窗恒凛凛，出户即皑皑。
压野荣芝菌，倾都委货财。娥嬉华荡漾，胥怒浪崔嵬。
磧迴疑浮地，云平想辗雷。随车翻缟带，逐马散银杯。
万屋漫汗合，千株照曜开。松篁遭挫抑，粪壤获饶培。
隔绝门庭遽，挤排陛级才。岂堪裨岳镇，强欲效盐梅。
隐匿瑕疵尽，包罗委琐该。误鸡宵呃喔，惊雀暗裴回。
浩浩过三暮，悠悠匝九垓。鲸鲵陆死骨，玉石火炎灰。
厚虑填溟壑，高愁e斗魁。日轮埋欲侧，坤轴压将颓。

岸类长蛇搅，陵犹巨象豕。水官夸杰黠，木气怯胚胎。
著地无由卷，连天不易推。龙鱼冷蛰苦，虎豹饿号哀。

巧借奢华便，专绳困约灾。威贪陵布被，光肯离金罍。
赏玩捐他事，歌谣放我才。狂教诗碨砢，兴与酒陪醅。

惟子能谄耳，诸人得语哉。助留风作党，劝坐火为媒。
雕刻文刀利，搜求智网恢。莫烦相属和，传示及提孩。

卷 343_30 【酬王二十舍人雪中见寄】

韩愈

三日柴门拥不开，阶平庭满白皑皑。
今朝蹋作琼瑶迹，为有诗从凤沼来。

卷 343_31 【送侯喜】

韩愈

已作龙钟后时者，懒于街里蹋尘埃。
如今便别长官去，直到新年衙日来。

卷 343_32 【学诸进士作精卫衔石填海】

韩愈

鸟有偿冤者，终年抱寸诚。口衔山石细，心望海波平。
渺渺功难见，区区命已轻。人皆讥造次，我独赏专精。
岂计休无日，惟应尽此生。何惭刺客传，不著报讎名。

卷 343_33 【奉酬振武胡十二丈大夫】

韩愈

倾朝共羨宠光频，半岁迁腾作虎臣。戎旆暂停辞社树，
里门先下敬乡人。横飞玉盏家山晓，远蹀金珂塞草春。
自笑平生夸胆气，不离文字鬓毛新。

卷 343_34 【奉和库部卢四兄曹长元日朝回】

韩愈

天仗宵严建羽旄，春云送色晓鸡号。金炉香动螭头暗，
玉佩声来雉尾高。戎服上趋承北极，儒冠列侍映东曹。
太平时节难身遇，郎署何须叹二毛。

卷 343_35【寒食直归遇雨】

韩愈

寒食时看度，春游事已违。风光连日直，阴雨半朝归。
不见红球上，那论彩索飞。惟将新赐火，向曙著朝衣。

卷 343_36【送李六协律归荆南】

韩愈

早日羁游所，春风送客归。柳花还漠漠，江燕正飞飞。
歌舞知谁在，宾僚逐使非。宋亭池水绿，莫忘蹋芳菲。

卷 343_37【题百叶桃花】

韩愈

百叶双桃晚更红，窥窗映竹见玲珑。
应知侍史归天上，故伴仙郎宿禁中。

卷 343_38 【春雪】

韩愈

新年都未有芳华，二月初惊见草芽。
白雪却嫌春色晚，故穿庭树作飞花。

卷 343_39 【戏题牡丹】

韩愈

幸自同开俱阴隐，何须相倚斗轻盈。陵晨并作新妆面，
对客偏含不语情。双燕无机还拂掠，游蜂多思正经营。
长年是事皆抛尽，今日栏边暂眼明。

卷 343_40 【盆池五首】

韩愈

老翁真个似童儿，汲水埋盆作小池。
一夜青蛙鸣到晓，恰如方口钓鱼时。

莫道盆池作不成，藕稍初种已齐生。
从今有雨君须记，来听萧萧打叶声。

瓦沼晨朝水自清，小虫无数不知名。
忽然分散无踪影，惟有鱼儿作队行。

泥盆浅小讵成池，夜半青蛙圣得知。
一听暗来将伴侣，不烦鸣唤斗雄雌。

池光天影共青青，拍岸才添水数瓶。
且待夜深明月去，试看涵泳几多星。

卷 343_41【芍药】

韩愈

浩态狂香昔未逢，红灯烁烁绿盘笼。
觉来独对情惊恐，身在仙宫第几重。

卷 343_42【奉和虢州刘给事使君三堂新题二十一咏·新亭】

韩愈

湖上新亭好，公来日出初。水文浮枕簟，瓦影荫龟鱼。

卷 343_43 【奉和虢州刘给事使君三堂新题二十一咏·流水】

韩愈

汨汨几时休，从春复到秋。只言池未满，池满强交流。

卷 343_44 【奉和虢州刘给事使君三堂新题二十一咏·竹洞】

韩愈

竹洞何年有，公初斫竹开。洞门无锁钥，俗客不曾来。

卷 343_45 【奉和虢州刘给事使君三堂新题二十一咏·月台】

韩愈

南馆城阴阔，东湖水气多。直须台上看，始奈月明何。

卷 343_46 【奉和虢州刘给事使君三堂新题二十一咏·渚亭】

韩愈

自有人知处，那无步往踪。莫教安四壁，面面看芙蓉。

卷 343_47【奉和虢州刘给事使君三堂新题二十一咏·竹溪】

韩愈

蔼蔼溪流慢，梢梢岸筱长。穿沙碧竿净，落水紫苞香。

卷 343_48【奉和虢州刘给事使君三堂新题二十一咏·北湖】

韩愈

闻说游湖棹，寻常到此回。应留醒心处，准拟醉时来。

卷 343_49【奉和虢州刘给事使君三堂新题二十一咏·花岛】

韩愈

蜂蝶去纷纷，香风隔岸闻。欲知花岛处，水上觅红云。

卷 343_50【奉和虢州刘给事使君三堂新题二十一咏·柳溪】

韩愈

柳树谁人种，行行夹岸高。莫将条系缆，著处有蝉号。

卷 343_51【奉和虢州刘给事使君三堂新题二十一咏·西山】

韩愈

新月迎宵挂，晴云到晚留。为遮西望眼，终是懒回头。

卷 343_52【奉和虢州刘给事使君三堂新题二十一咏·竹径】

韩愈

无尘从不扫，有鸟莫令弹。若要添风月，应除数百竿。

卷 343_53【奉和虢州刘给事使君三堂新题二十一咏·荷池】

韩愈

风雨秋池上，高荷盖水繁。未谙鸣撼撼，那似卷翻翻。

卷 343_54【奉和虢州刘给事使君三堂新题二十一咏·稻畦】

韩愈

罽布畦堪数，枝分水莫寻。鱼肥知已秀，鹤没觉初深。

卷 343_55【奉和虢州刘给事使君三堂新题二十一咏·柳巷】

韩愈

柳巷还飞絮，春馀几许时。吏人休报事，公作送春诗。

卷 343_56【奉和虢州刘给事使君三堂新题二十一咏·花源】

韩愈

源上花初发，公应日日来。丁宁红与紫，慎莫一时开。

卷 343_57【奉和虢州刘给事使君三堂新题二十一咏·北楼】

韩愈

郡楼乘晓上，尽日不能回。晚色将秋至，长风送月来。

卷 343_58【奉和虢州刘给事使君三堂新题二十一咏·镜潭】

韩愈

非铸复非熔，泓澄忽此逢。鱼虾不用避，只是照蛟龙。

卷 343_59【奉和虢州刘给事使君三堂新题二十一咏·孤屿】

韩愈

朝游孤屿南，暮戏孤屿北。所以孤屿鸟，与公尽相识。

卷 343_60【奉和虢州刘给事使君三堂新题二十一咏·方桥】

韩愈

非阁复非船，可居兼可过。君欲问方桥，方桥如此作。

卷 343_61【奉和虢州刘给事使君三堂新题二十一咏·梯桥】

韩愈

乍似上青冥，初疑蹑菡萏。自无飞仙骨，欲度何由敢。

卷 343_62【奉和虢州刘给事使君三堂新题二十一咏·月池】

韩愈

寒池月下明，新月池边曲。若不妒清妍，却成相映烛。

卷 343_63【游城南十六首·赛神】

韩愈

白布长衫紫领巾，差科未动是闲人。

麦苗含穠桑生葢，共向田头乐社神。

卷 343_64【游城南十六首·题于宾客庄】

韩愈

榆荚车前盖地皮，蔷薇蘸水笋穿篱。

马蹄无入朱门迹，纵使春归可得知。

卷 343_65【游城南十六首·晚春】

韩愈

草树知春不久归，百般红紫斗芳菲。

杨花榆荚无才思，惟解漫天作雪飞。

卷 343_66【游城南十六首·落花】

韩愈

已分将身著地飞，那羞践踏损光辉。

无端又被春风误，吹落西家不得归。

卷 343_67【游城南十六首·楸树二首】

韩愈

几岁生成为大树，一朝缠绕困长藤。
谁人与脱青罗帔，看吐高花万万层。

幸自枝条能树立，可烦萝蔓作交加。
傍人不解寻根本，却道新花胜旧花。

卷 343_68【游城南十六首·风折花枝】

韩愈

浮艳侵天难就看，清香扑地只遥闻。
春风也是多情思，故拣繁枝折赠君。

卷 343_69【游城南十六首·赠同游】

韩愈

唤起窗全曙，催归日未西。无心花里鸟，更与尽情啼。

卷 343_70【游城南十六首·赠张十八助教】

韩愈

喜君眸子重清朗，携手城南历旧游。

忽见孟生题竹处，相看泪落不能收。

卷 343_71【游城南十六首·题韦氏庄】

韩愈

昔者谁能比，今来事不同。寂寥青草曲，散漫白榆风。

架倒藤全落，篱崩竹半空。宁须惆怅立，翻覆本无穷。

卷 343_72【游城南十六首·晚雨】

韩愈

廉纤晚雨不能晴，池岸草间蚯蚓鸣。

投竿跨马蹋归路，才到城门打鼓声。

卷 343_73【游城南十六首·出城】

韩愈

暂出城门蹋青草，远于林下见春山。

应须韦杜家家到，只有今朝一日闲。

卷 343_74【游城南十六首·把酒】

韩愈

扰扰驰名者，谁能一日闲。我来无伴侣，把酒对南山。

卷 343_75【游城南十六首·嘲少年】

韩愈

直把春偿酒，都将命乞花。只知闲信马，不觉误随车。

卷 343_76【游城南十六首·楸树】

韩愈

青幢紫盖立童童，细雨浮烟作彩笼。

不得画师来貌取，定知难见一生中。

卷 343_77【游城南十六首·遣兴】

韩愈

断送一生惟有酒，寻思百计不如闲。

莫忧世事兼身事，须著人间比梦间。

卷三百四十四

卷 344_1【送李尚书赴襄阳八韵得长字】

韩愈

帝忧南国切，改命付忠良。壤画星摇动，旗分兽簸扬。
五营兵转肃，千里地还方。控带荆门远，飘浮汉水长。
赐书宽属郡，战马隔邻疆。纵猎雷霆迅，观棋玉石忙。
风流岷首客，花艳大堤倡。富贵由身致，谁教不自强。

卷 344_2【和席八十二韵】

韩愈

绛阙银河曙，东风右掖春。官随名共美，花与思俱新。
绮陌朝游间，绫衾夜直频。横门开日月，高阁切星辰。
庭变寒前草，天销霁后尘。沟声通苑急，柳色压城匀。
纶綍谋猷盛，丹青步武亲。芳菲含斧藻，光景畅形神。
傍砌看红药，巡池咏白蘋。多情怀酒伴，余事作诗人。
倚玉难藏拙，吹竽久混真。坐惭空自老，江海未还身。

卷 344_3 【和武相公早春闻莺】

韩愈

早晚飞来入锦城，谁人教解百般鸣。

春风红树惊眠处，似妒歌童作艳声。

卷 344_4 【游太平公主山庄】

韩愈

公主当年欲占春，故将台榭押城闉。

欲知前面花多少，直到南山不属人。

卷 344_5 【晚春】

韩愈

谁收春色将归去，慢绿妖红半不存。

榆荚只能随柳絮，等闲撩乱走空园。

卷 344_6【大行皇太后挽歌词三首】

韩愈

一纪尊名正，三时孝养荣。高居朝圣主，厚德载群生。
武帐虚中禁，玄堂掩太平。秋天笳鼓歇，松柏遍山鸣。

威仪备吉凶，文物杂军容。配地行新祭，因山托故封。
凤飞终不返，剑化会相从。无复临长乐，空闻报晓钟。

追攀万国来，警卫百神陪。画翥登秋殿，容衣入夜台。
云随仙驭远，风助圣情哀。只有朝陵日，妆奁一暂开。

卷 344_7【广宣上人频见过】

韩愈

三百六旬长扰扰，不冲风雨即尘埃。久惭朝士无裨补，
空愧高僧数往来。学道穷年何所得，吟诗竟日未能回。
天寒古寺游人少，红叶窗前有几堆。

卷 344_8 【闲游二首】

韩愈

雨后来更好，绕池遍青青。柳花闲度竹，菱叶故穿萍。
独坐殊未厌，孤斟讵能醒。持竿至日暮，幽咏欲谁听。

兹游苦不数，再到遂经旬。萍盖污池净，藤笼老树新。
林乌鸣讶客，岸竹长遮邻。子云只自守，奚事九衢尘。

卷 344_9 【酬马侍郎寄酒】

韩愈

一壶情所寄，四句意能多。秋到无诗酒，其如月色何。

卷 344_10 【和侯协律咏笋】

韩愈

竹亭人不到，新笋满前轩。乍出真堪赏，初多未觉烦。
成行齐婢仆，环立比儿孙。验长常携尺，愁乾屡侧盆。
对吟忘膳饮，偶坐变朝昏。滞雨膏腴湿，骄阳气候温。
得时方张王，挟势欲腾骞。见角牛羊没，看皮虎豹存。

攒生犹有隙，散布忽无垠。讵可持筹算，谁能以理言。
纵横公占地，罗列暗连根。狂剧时穿壁，横强几触藩。
深潜如避逐，远去若追奔。始讶妨人路，还惊入药园。
萌芽防浸大，覆载莫偏恩。已复侵危砌，非徒出短垣。
身宁虞瓦砾，计拟掩兰荪。且叹高无数，庸知上几番。
短长终不校，先后竟谁论。外恨苞藏密，中仍节目繁。
暂须回步履，要取助盘飧。穰穰疑翻地，森森竞塞门。
戈矛头戢戢，蛇虺首掀掀。妇懦咨料拣，儿痴谒尽髡。
侯生来慰我，诗句读惊魂。属和才将竭，呻吟至日暾。

卷 344_11【过鸿沟】

韩愈

龙疲虎困割川原，亿万苍生性命存。
谁劝君王回马首，真成一掷赌乾坤。

卷 344_12【送张侍郎】

韩愈

司徒东镇驰书谒，丞相西来走马迎。
两府元臣今转密，一方逋寇不难平。

卷 344_13 【赠刑部马侍郎】

韩愈

红旗照海压南荒，征入中台作侍郎。

暂从相公平小寇，便归天阙致时康。

卷 344_14 【奉和裴相公东征途经女几山下作】

韩愈

旗穿晓日云霞杂，山倚秋空剑戟明。

敢请相公平贼后，暂携诸吏上峥嵘。

卷 344_15 【郾城晚饮奉赠副使马侍郎及冯、李二员外】

韩愈

城上赤云呈胜气，眉间黄色见归期。

幕中无事惟须饮，即是连镳向阙时。

卷 344_16 【酬别留后侍郎】

韩愈

为文无出相如右，谋帅难居郤縠先。

归去雪销湊洧动，西来旌旆拂晴天。

卷 344_17 【同李二十八夜次襄城】

韩愈

周楚仍连接，川原乍屈盘。云垂天不暖，尘涨雪犹乾。

印绶归台室，旌旗别将坛。欲知迎候盛，骑火万星攒。

卷 344_18 【同李二十八员外从裴相公野宿西界】

韩愈

四面星辰著地明，散烧烟火宿天兵。

不关破贼须归奏，自趁新年贺太平。

卷 344_19【过襄城】

韩愈

郾城辞罢过襄城，颍水嵩山刮眼明。

已去蔡州三百里，家人不用远来迎。

卷 344_20【宿神龟招李二十八冯十七】

韩愈

荒山野水照斜晖，啄雪寒鸦趁始飞。

夜宿驿亭愁不睡，幸来相就盖征衣。

卷 344_21【次硖石】

韩愈

数日方离雪，今朝又出山。试凭高处望，隐约见潼关。

卷 344_22 【和李司勋过连昌宫】

韩愈

夹道疏槐出老根，高甍巨桷压山原。

宫前遗老来相问，今是开元几叶孙。

卷 344_23 【次潼关先寄张十二阁老使君】

韩愈

荆山已去华山来，日出潼关四扇开。

刺史莫辞迎候远，相公亲破蔡州回。

卷 344_24 【次潼关上都统相公】

韩愈

暂辞堂印执兵权，尽管诸军破贼年。

冠盖相望催入相，待将功德格皇天。

卷 344_25 【桃林夜贺晋公】

韩愈

西来骑火照山红，夜宿桃林腊月中。
手把命珪兼相印，一时重叠赏元功。

卷 344_26 【送李员外院长分司东都】

韩愈

去年秋露下，羁旅逐东征。今岁春光动，驱驰别上京。
饮中相顾色，送后独归情。两地无千里，因风数寄声。

卷 344_27 【晋公破贼回重拜台司，以诗示幕中宾客，愈奉和】

韩愈

南伐旋师太华东，天书夜到册元功。将军旧压三司贵，
相国新兼五等崇。鹓鹭欲归仙仗里，熊羆还入禁营中。
长惭典午非材职，得就闲官即至公。

卷 344_28【独钓四首】

韩愈

侯家林馆胜，偶入得垂竿。曲树行藤角，平池散芡盘。
羽沈知食驶，缙细觉牵难。聊取夸儿女，榆条系从鞍。

一径向池斜，池塘野草花。雨多添柳耳，水长减蒲芽。
坐厌亲刑柄，偷来傍钓车。太平公事少，吏隐讵相赊。

独往南塘上，秋晨景气醒。露排四岸草，风约半池萍。
鸟下见人寂，鱼来闻饵馨。所嗟无可召，不得倒吾瓶。

秋半百物变，溪鱼去不来。风能坼芡觜，露亦染梨腮。
远岫重叠出，寒花散乱开。所期终莫至，日暮与谁回。

卷 344_29【枯树】

韩愈

老树无枝叶，风霜不复侵。腹穿人可过，皮剥蚁还寻。
寄托惟朝菌，依投绝暮禽。犹堪持改火，未肯但空心。

卷 344_30 【元日酬蔡州马十二尚书去年蔡州元日见寄之什】

韩愈

元日新诗已去年，蔡州遥寄荷相怜。
今朝纵有谁人领，自是三峰不敢眠。

卷 344_31 【咏灯花同侯十一】

韩愈

今夕知何夕，花然锦帐中。自能当雪暖，那肯待春红。
黄里排金粟，钗头缀玉虫。更烦将喜事，来报主人公。

卷 344_32 【祖席前字】

韩愈

祖席洛桥边，亲交共黯然。野晴山簇簇，霜晓菊鲜鲜。
书寄相思处，杯衔欲别前。淮阳知不薄，终愿早回船。

卷 344_33 【秋字】

韩愈

淮南悲木落，而我亦伤秋。况与故人别，那堪羁宦愁。
荣华今异路，风雨昔同忧。莫以宜春远，江山多胜游。

卷 344_34 【送郑尚书赴南海】

韩愈

番禺军府盛，欲说暂停杯。盖海旂幢出，连天观阁开。
衙时龙户集，上日马人来。风静鶺鴒去，官廉蚌蛤回。
货通师子国，乐奏武王台。事事皆殊异，无嫌屈大才。

卷 344_35 【答道士寄树鸡】

韩愈

软湿青黄状可猜，欲烹还唤木盘回。
烦君自入华阳洞，直割乖龙左耳来。

卷 344_36 【左迁至蓝关示侄孙湘】

韩愈

一封朝奏九重天，夕贬潮州路八千。欲为圣朝除弊事，
肯将衰朽惜残年。云横秦岭家何在，雪拥蓝关马不前。
知汝远来应有意，好收吾骨瘴江边。

卷 344_37 【武关西逢配流吐番】

韩愈

嗟尔戎人莫惨然，湖南地近保生全。
我今罪重无归望，直去长安路八千。

卷 344_38 【次邓州界】

韩愈

潮阳南去倍长沙，恋阙那堪又忆家。心讶愁来惟贮火，
眼知别后自添花。商颜暮雪逢人少，邓鄙春泥见驿赊。
早晚王师收海岳，普将雷雨发萌芽。

卷 344_39 【题临泂寺】

韩愈

不觉离家已五千，仍将衰病入泂船。
潮阳未到吾能说，海气昏昏水拍天。

卷 344_40 【晚次宣溪，辱韶州张端公使君惠书叙别，酬以绝句二章】

韩愈

韶州南去接宣溪，云水苍茫日向西。
客泪数行先自落，鹧鸪休傍耳边啼。

兼金那足比清文，百首相随愧使君。
俱是岭南巡管内，莫欺荒僻断知闻。

卷 344_41 【题秀禅师房】

韩愈

桥夹水松行百步，竹床莞席到僧家。
暂拳一手支头卧，还把鱼竿下钓沙。

卷 344_42 【将至韶州先寄张端公使君借图经】

韩愈

曲江山水闻来久，恐不知名访倍难。
愿借图经将入界，每逢佳处便开看。

卷 344_43 【过始兴江口感怀】

韩愈

忆作儿童随伯氏，南来今只一身存。
目前百口还相逐，旧事无人可共论。

卷 344_44 【韶州留别张端公使君】

韩愈

来往再逢梅柳新，别离一醉绮罗春。久钦江总文才妙，
自叹虞翻骨相屯。鸣笛急吹争落日，清歌缓送款行人。
已知奏课当征拜，那复淹留咏白蘋。

卷 344_45 【从潮州量移袁州，张韶州端公以诗相贺，因酬之】

韩愈

明时远逐事何如，遇赦移官罪未除。北望讵令随塞雁，
南迁才免葬江鱼。将经贵郡烦留客，先惠高文谢起予。
暂欲系船韶石下，上宾虞舜整冠裾。

卷 344_46 【次石头驿寄江西王十中丞阁老】

韩愈

凭高试回首，一望豫章城。人由恋德泣，马亦别群鸣。
寒日夕始照，风江远渐平。默然都不语，应识此时情。

卷 344_47 【游西林寺题萧二兄郎中旧堂】

韩愈

中郎有女能传业，伯道无儿可保家。
偶到匡山曾住处，几行衰泪落烟霞。

卷 344_48【自袁州还京行次安陆，先寄随州周员外】

韩愈

行行指汉东，暂喜笑言同。雨雪离江上，蒹葭出梦中。
面犹含瘴色，眼已见华风。岁暮难相值，酣歌未可终。

卷 344_49【题广昌馆】

韩愈

白水龙飞已几春，偶逢遗迹问耕人。
丘坟发掘当官路，何处南阳有近亲。

卷 344_50【寄随州周员外】

韩愈

陆孟丘杨久作尘，同时存者更谁人。
金丹别后知传得，乞取刀圭救病身。

卷 344_51【酒中留上襄阳李相公】

韩愈

浊水污泥清路尘，还曾同制掌丝纶。眼穿长讶双鱼断，
耳热何辞数爵频。银烛未销窗送曙，金钗半醉座添春。
知公不久归钧轴，应许闲官寄病身。

卷 344_52【去岁自刑部侍郎以罪贬潮州刺史，乘驿赴任，其后家亦谴逐，小女道死，殡之层峰驿旁山下，蒙恩还朝过其墓，留题驿梁】

韩愈

数条藤束木皮棺，草殡荒山白骨寒。惊恐入心身已病，
扶舁沿路众知难。绕坟不暇号三匝，设祭惟闻饭一盘。
致汝无辜由我罪，百年惭痛泪阑干。

卷 344_53【贺张十八秘书得裴司空马】

韩愈

司空远寄养初成，毛色桃花眼镜明。落日已曾交辔语，
春风还拟并鞍行。长令奴仆知饥渴，须着贤良待性情。

旦夕公归伸拜谢，免劳骑去逐双旌。

卷 344_54【杏园送张彻侍御归使】

韩愈

东风花树下，送尔出京城。久抱伤春意，新添惜别情。
归来身已病，相见眼还明。更遣将诗酒，谁家逐后生。

卷 344_55【雨中寄张博士籍、侯主簿喜】

韩愈

放朝还不报，半路蹋泥归。雨惯曾无节，雷频自失威。
见墙生菌遍，忧麦作蛾飞。岁晚偏萧索，谁当救晋饥。

卷 344_56【奉和兵部张侍郎酬郢州马尚书祗召途中见寄开
缄之日马帅已再领郢州之作】

韩愈

来朝当路日，承诏改辕时。再领须句国，仍迁少昊司。
暖风抽宿麦，清雨卷归旗。赖寄新珠玉，长吟慰我思。

卷 344_57【早春与张十八博士籍游杨尚书林亭，寄弟三阁老兼呈冯二阁老兼呈白冯二阁老】

韩愈

墙下春渠入禁沟，渠冰初破满渠浮。
凤池近日长先暖，流到池时更不流。

卷 344_58【奉使常山，早次太原，呈副使吴郎中】

韩愈

朗朗闻街鼓，晨起似朝时。翻翻走驿马，春尽是归期。
地失嘉禾处，风存蟋蟀辞。暮齿良多感，无事涕垂颐。

卷 344_59【夕次寿阳驿题吴郎中诗后】

韩愈

风光欲动别长安，春半城边特地寒。
不见园花兼巷柳，马头惟有月团团。

卷 344_60 【镇州初归】

韩愈

别来杨柳街头树，摆弄春风只欲飞。
还有小园桃李在，留花不发待郎归。

卷 344_61 【同水部张员外籍曲江春游，寄白二十二舍人】

韩愈

漠漠轻阴晚自开，青天白日映楼台。
曲江水满花千树，有底忙时不肯来。

卷 344_62 【和水部张员外宣政衙赐百官樱桃诗】

韩愈

汉家旧种明光殿，炎帝还书本草经。岂似满朝承雨露，
共看传赐出青冥。香随翠笼擎初到，色映银盘写未停。
食罢自知无所报，空然惭汗仰皇扃。

卷 344_63 【早春呈水部张十八员外二首】

韩愈

天街小雨润如酥，草色遥看近却无。
最是一年春好处，绝胜烟柳满皇都。

莫道官忙身老大，即无年少逐春心。
凭君先到江头看，柳色如今深未深。

卷 344_64 【送桂州严大夫同用南字】

韩愈

苍苍森八桂，兹地在湘南。江作青罗带，山如碧玉簪。
户多输翠羽，家自种黄甘。远胜登仙去，飞鸾不假骖。

卷 344_65 【奉酬天平马十二仆射暇日言怀见寄之作】

韩愈

天平篇什外，政事亦无双。威令加徐土，儒风被鲁邦。
清为公论重，宽得士心降。岁晏偏相忆，长谣坐北窗。

卷 344_66 【奉使镇州，行次承天行营，奉酬裴司空】

韩愈

窜逐三年海上归，逢公复此著征衣。

旋吟佳句还鞭马，恨不身先去鸟飞。

卷 344_67 【镇州路上谨酬裴司空相公重见寄】

韩愈

衔命山东抚乱师，日驰三百自嫌迟。

风霜满面无人识，何处如今更有诗。

卷 344_68 【奉和仆射裴相公感恩言志】

韩愈

文武功成后，居为百辟师。林园穷胜事，钟鼓乐清时。

摆落遗高论，雕镌出小诗。自然无不可，范蠡尔其谁。

卷 344_69【和仆射相公朝回见寄】

韩愈

尽瘁年将久，公今始暂闲。事随忧共减，诗与酒俱还。
放意机衡外，收身矢石间。秋台风日迥，正好看前山。

卷 344_70【奉和李相公题萧家林亭】

韩愈

山公自是林园主，叹惜前贤造作时。
岩洞幽深门尽锁，不因丞相几人知。

卷 344_71【奉和杜相公太清宫纪事陈诚上李相公十六韵】

韩愈

耒耜兴姬国，輶橐建夏家。在功诚可尚，于道讵为华。
象帝威容大，仙宗宝历赊。卫门罗戟槊，图壁杂龙蛇。
礼乐追尊盛，乾坤降福遐。四真皆齿列，二圣亦肩差。
阳月时之首，阴泉气未牙。殿阶铺水碧，庭炬坼金葩。

紫极观忘倦，青词奏不哗。噌吰宫夜辟，嘈囂鼓晨挝。
褻味陈奚取，名香荐孔嘉。垂祥纷可录，俾寿浩无涯。
贵相山瞻峻，清文玉绝瑕。代工声问远，摄事敬恭加。
皎洁当天月，葳蕤捧日霞。唱妍酬亦丽，俯仰但称嗟。

卷三百四十五

卷 345_1【郢州谿堂诗】

韩愈

帝奠九廛，有叶有年。有荒不条，河岱之间。及我宪考，一收正之。视邦选侯，以公来尸。公来尸之，人始未信。

公不饮食，以训以徇。孰饥无食，孰呻孰叹。孰冤不问，不得分愿。孰为邦蠹，节根之螟。羊很狼贪，以口覆城。

吹之煦之，摩手拊之。箴之石之，膊而磔之。凡公四封，既富以强。谓公吾父，孰违公令。可以师征，不宁守邦。

公作谿堂。播播流水。浅有蒲莲，深有葭苇。公以宾燕，其鼓駉駉。公燕谿堂，宾校醉饱。流有跳鱼，岸有集鸟。

既歌以舞，其鼓考考。公在谿堂，公御琴瑟。公暨宾赞，稽经诹律。施用不差，人用不屈。谿有蘋苽，有龟有鱼。公在中流，右诗左书。无我斲遗，此邦是庥。

卷 345_2 【送张道士】

韩愈

大匠无弃材，寻尺各有施。况当营都邑，杞梓用不疑。
张侯嵩高来，面有熊豹姿。开口论利害，剑锋白差差。
恨无一尺捶，为国苔羌夷。诣阙三上书，臣非黄冠师。
臣有胆与气，不忍死茅茨。又不媚笑语，不能伴儿嬉。
乃著道士服，众人莫臣知。臣有平贼策，狂童不难治。
其言简且要，陛下幸听之。天空日月高，下照理不遗。
或是章奏繁，裁择未及斯。宁当不俟报，归袖风披披。
答我事不尔，吾亲属吾思。昨宵梦倚门，手取连环持。
今日有书至，又言归何时。霜天熟柿栗，收拾不可迟。
岭北梁可构，寒鱼下清伊。既非公家用，且复还其私。
从容进退间，无一不合宜。时有利不利，虽贤欲奚为。
但当励前操，富贵非公谁。

卷 345_3 【送郑十校理得洛字】

韩愈

相公倦台鼎，分正新邑洛。才子富文华，校讎天禄阁。
寿觞佳节过，归骑春衫薄。鸟哢正交加，杨花共纷泊。
亲交谁不羨，去去翔寥廓。

卷 345_4【送陆歙州参】

韩愈

我衣之华兮，我佩之光。陆君之去兮，谁与翱翔。
敛此大惠兮，施于一州。今其去矣，胡不为留。
我作此诗，歌于远道。无疾其驱，天子有诏。

卷 345_5【送汴州监军俱文珍】

韩愈

奉使羌池静，临戎汴水安。冲天鹏翅阔，报国剑铓寒。
晓日驱征骑，春风咏采兰。谁言臣子道，忠孝两全难。

卷 345_6【赠崔立之】

韩愈

昔年十日雨，子桑苦寒饥。哀歌坐空室，不怨但自悲。
其友名子舆，忽然忧且思。搥裳触泥水，裹饭往食之。
入门相对语，天命良不疑。好事漆园吏，书之存雄词。

千年事已远，二字情可推。我读此篇日，正当寒雪时。
吾身固已困，吾友复何为。薄粥不足裹，深泥谅难驰。
曾无子舆事，空赋子桑诗。

卷 345_7【海水】

韩愈

海水非不广，邓林岂无枝。风波一荡薄，鱼鸟不可依。
海水饶大波，邓林多惊风。岂无鱼与鸟，巨细各不同。
海有吞舟鲸，邓有垂天鹏。苟非鳞羽大，荡薄不可能。
我鳞不盈寸，我羽不盈尺。一木有余阴，一泉有馀泽。
我将辞海水，濯鳞清冷池。我将辞邓林，刷羽蒙笼枝。
海水非爱广，邓林非爱枝。风波亦常事，鳞鱼自不宜。
我鳞日已大，我羽日已修。风波无所苦，还作鲸鹏游。

卷 345_8【赠河阳李大夫】

韩愈

四海失巢穴，两都困尘埃。感恩由未报，惆怅空一来。
裘破气不暖，马羸鸣且哀。主人情更重，空使剑锋摧。

卷 345_9 【苦寒歌】

韩愈

黄昏苦寒歌，夜半不能休。岂不有阳春，节岁聿其周，
君何爱重裘。兼味养大贤，冰食葛制神所怜。
填窗塞户慎勿出，暄风暖景明年日。

卷 345_10 【芍药歌】

韩愈

丈人庭中开好花，更无凡木争春华。翠茎红蕊天力与，
此恩不属黄钟家。温馨熟美鲜香起，似笑无言习君子。
霜刀翦汝天女劳，何事低头学桃李。娇痴婢子无灵性，
竞挽春衫来此并。欲将双颊一睇红，绿窗磨遍青铜镜。
一尊春酒甘若饴，丈人此乐无人知。花前醉倒歌者谁，
楚狂小子韩退之。

卷 345_11 【赠徐州族侄】

韩愈

我年十八九，壮气起胸中。作书献云阙，辞家逐秋蓬。

岁时易迁次，身命多厄穷。一名虽云就，片禄不足充。
今者复何事，卑栖寄徐戎。萧条资用尽，濩落门巷空。
朝眠未能起，远怀方郁惊。击门者谁子，问言乃吾宗。
白云有奇术，探妙知天工。既往怅何及，将来喜还通。
期我语非佞，当为佐时雍。

卷 345_12【嘲鼾睡】

韩愈

澹师昼睡时，声气一何猥。顽飙吹肥脂，坑谷相嵬磊。
雄哮乍咽绝，每发壮益倍。有如阿鼻尸，长唤忍众罪。
马牛惊不食，百鬼聚相待。木枕十字裂，镜面生痂瘕。
铁佛闻皱眉，石人战摇腿。孰云天地仁，吾欲责真宰。
幽寻虱搜耳，猛作涛翻海。太阳不忍明，飞御皆情怠。
乍如彭与黥，呼冤受菹醢。又如圈中虎，号疮兼吼馁。
虽令伶伦吹，苦韵难可改。虽令巫咸招，魂爽难复在。
何山有灵药，疗此愿与采。

澹公坐卧时，长睡无不稳。吾尝闻其声，深虑五藏损。
黄河弄瀆薄，梗涩连拙鲧。南帝初奋槌，凿窍泄混沌。
迥然忽长引，万丈不可忖。谓言绝于斯，继出方袞袞。
幽幽寸喉中，草木森苯尊。盗贼虽狡狴，亡魂敢窥阍。
鸿蒙总合杂，诡譎骋戾很。乍如斗呶呶，忽若怨恳恳。
赋形苦不同，无路寻根本。何能埋其源，惟有土一畚。

卷 345_13【昼月】

韩愈

玉碗不磨著泥土，青天孔出白石补。兔入臼藏蛙缩肚，
桂树枯株女闭户。阴为阳羞固自古，嗟汝下民或敢侮，
戏嘲盗视汝目瞽。

卷 345_14【赠张徐州莫辞酒】

韩愈

莫辞酒，此会固难同。请看女工机上帛，半作军人旗上红。
莫辞酒，谁为君王之爪牙？春雷三月不作响，
战士岂得来还家。

卷 345_15【辞唱歌】

韩愈

抑逼教唱歌，不解看艳词。坐中把酒人，岂有欢乐姿。
幸有伶者妇，腰身如柳枝。但令送君酒，如醉如憨痴。
声自肉中出，使人能逶随。复遣悭吝者，赠金不皱眉。
岂有长直夫，喉中声雌雌。君心岂无耻，君岂是女儿。

君教发直言，大声无休时。君教哭古恨，不肯复吞悲。
乍可阻君意，艳歌难可为。

卷 345_16【知音者诚希】

韩愈

知音者诚希，念子不能别。行行天未晓，携酒踏明月。

卷 345_17【同窦、韦寻刘尊师不遇】

韩愈

秦客何年驻，仙源此地深。还随蹑舄骑，来访驭风襟。
院闭青霞入，松高老鹤寻。犹疑隐形坐，敢起窃桃心。

卷 345_18【春雪】

韩愈

片片驱鸿急，纷纷逐吹斜。到江还作水，著树渐成花。
越喜飞排瘴，胡愁厚盖砂。兼云封洞口，助月照天涯。
暝见迷巢鸟，朝逢失辙车。呈丰尽相贺，宁止力耕家。

卷 345_19 【酬蓝田崔丞立之咏雪见寄】

韩愈

京城数尺雪，寒气倍常年。泯泯都无地，茫茫岂是天。
崩奔惊乱射，挥霍讶相缠。不觉侵堂陛，方应折屋椽。
出门愁落道，上马恐平鞮。朝鼓矜凌起，山斋酩酊眠。
吾方嗟此役，君乃咏其妍。冰玉清颜隔，波涛盛句传。
朝飧思共饭，夜宿忆同毡。举目无非白，雄文乃独玄。

卷 345_20 【潭州泊船呈诸公】

韩愈

夜寒眠半觉，鼓笛闹嘈嘈。暗浪舂楼堞，惊风破竹篙。
主人看使范，客子读离骚。闻道松醪贱，何须吝错刀。

卷 345_21 【饮城南道边古墓上逢中丞过赠礼部卫员外少室张道士】

韩愈

偶上城南土骨堆，共倾春酒三五杯。
为逢桃树相料理，不觉中丞喝道来。

卷 345_22 【池上絮】

韩愈

池上无风有落晖，杨花晴后自飞飞。
为将纤质凌清镜，湿却无穷不得归。

卷 345_23 【赠贾岛】

韩愈

孟郊死葬北邙山，从此风云得暂闲。
天恐文章浑断绝，更生贾岛著人间。

卷 345_24 【赠译经僧】

韩愈

万里休言道路赊，有谁教汝度流沙。
只今中国方多事，不用无端更乱华。

卷三百四十六

卷 346_1 【享惠昭太子庙乐章】

王涯

威仪毕陈，备乐将闋。苞茅酒缩，鬯萧香彻。宫臣展事，
肃雍在列。迎精送往，厥鉴昭晰。

卷 346_2 【望禁门松雪】

王涯

宿云开霁景，佳气此时浓。瑞雪凝清禁，祥烟幂小松。
依稀鸳瓦出，隐映凤楼重。金阙晴光照，琼枝瑞色封。
叶铺全类玉，柯偃乍疑龙。讵比寒山上，风霜老昔容。

卷 346_3 【广宣上人以诗贺放榜和谢】

王涯

延英面奉入春闱，亦选功夫亦选奇。在冶只求金不耗，
用心空学秤无私。龙门变化人皆望，莺谷飞鸣自有时。
独喜至公谁是证，弥天上人与新诗。

卷 346_4 【九月九日勤政楼下观百僚献寿】

王涯

御气黄花节，临轩紫陌头。早阳生彩仗，霁色入仙楼。
献寿皆鹓鹭，瞻天尽冕旒。菊樽过九日，凤历肇千秋。
乐奏薰风起，杯酣瑞影收。年年歌舞度，此地庆皇休。

卷 346_5 【春游曲二首】

王涯

万树江边杏，新开一夜风。满园深浅色，照在绿波中。

上苑何穷树，花间次第新。香车与丝骑，风静亦生尘。

卷 346_6 【太平词】

王涯

风俗今和厚，君王在穆清。行看采华曲，尽是泰阶平。

卷 346_7 【送春词】

王涯

日日人空老，年年春更归。相欢在尊酒，不用惜花飞。

卷 346_8 【塞上曲二首】

王涯

天骄远塞行，出鞘宝刀鸣。定是酬恩日，今朝觉命轻。
塞虏常为敌，边风已报秋。平生多志气，箭底觅封侯。

卷 346_9 【陇上行】

王涯

负羽到边州，鸣笳度陇头。云黄知塞近，草白见边秋。

卷 346_10 【思君恩】

王涯

鸡鸣天汉晓，莺语禁林春。谁入巫山梦，唯应洛水神。

卷 346_11 【春闺思】

王涯

雪尽萱抽叶，风轻水变苔。玉关音信断，又见发庭梅。

卷 346_12 【春江曲】

王涯

摇漾越江春，相将采白蘋。归时不觉夜，出浦月随人。

卷 346_13 【闺人赠远五首】

王涯

花明绮陌春，柳拂御沟新。为报辽阳客，流芳不待人。

远戍功名薄，幽闺年貌伤。妆成对春树，不语泪千行。
形影一朝别，烟波千里分。君看望君处，只是起行云。
啼莺绿树深，语燕雕梁晚。不省出门行，沙场知近远。
洞房今夜月，如练复如霜。为照离人恨，亭亭到晓光。

卷 346_14 【从军词三首】

王涯

戈甲从军久，风云识阵难。今朝拜韩信，计日斩成安。
燕颌多奇相，狼头敢犯边。寄言班定远，正是立功年。
旄头夜落捷书飞，来奏金门著赐衣。
白马将军频破敌，黄龙戍卒几时归。

卷 346_15 【塞下曲二首】

王涯

辛勤几出黄花戍，迢递初随细柳营。

塞晚每愁残月苦，边愁更逐断蓬惊。
年少辞家从冠军，金妆宝剑去邀勋。
不知马骨伤寒水，唯见龙城起暮云。

卷 346_16【平戎辞】

王涯

太白秋高助发兵，长风夜卷虏尘清。
男儿解却腰间剑，喜见从王道化平。

卷 346_17【游春词二首】

王涯

曲江绿柳变烟条，寒谷冰随暖气销。
才见春光生绮陌，已闻清乐动云韶。

经过柳陌与桃蹊，寻逐春光著处迷。
鸟度时时冲絮起，花繁衮衮压枝低。

卷 346_18 【秋思二首】

王涯

网轩凉吹动轻衣，夜听更长玉漏稀。
月度天河光转湿，鹊惊秋树叶频飞。

宫连太液见沧波，暑气微消秋意多。
一夜清风蘋末起，露珠翻尽满池荷。

卷 346_19 【汉苑行】

王涯

二月春风遍柳条，九天仙乐奏云韶。
蓬莱殿后花如锦，紫阁阶前雪未销。

卷 346_20 【秋夜曲】

王涯

桂魄初生秋露微，轻罗已薄未更衣。
银筝夜久殷勤弄，心怯空房不忍归。

卷 346_21 【献寿辞】

王涯

宫殿参差列九重，祥云瑞气捧阶浓。
微臣欲献唐尧寿，遥指南山对袞龙。

卷 346_22 【秋思赠远二首】

王涯

当年只自守空帷，梦里关山觉别离。
不见乡书传雁足，唯看新月吐蛾眉。

厌攀杨柳临清阁，闲采芙蓉傍碧潭。
走马台边人不见，拂云堆畔战初酣。

卷 346_23 【春闺思】

王涯

愁见游空百尺丝，春风挽断更伤离。
闲花落尽青苔地，尽日无人谁得知。

卷 346_24 【宫词三十首】

王涯

白人宜著紫衣裳，冠子梳头双眼长。
新睡起来思旧梦，见人忘却道胜常。

春来新插翠云钗，尚著云头踏殿鞋。
欲得君王回一顾，争扶玉辇下金阶。

五更初起觉风寒，香炷烧来夜已残。
欲卷珠帘惊雪满，自将红烛上楼看。

各将金锁锁宫门，院院青娥侍至尊。
头白监门掌来去，问频多是最承恩。

夜久盘中蜡滴稀，金刀剪起尽霏霏。
传声总是君王唤，红烛台前著舞衣。

箏翻禁曲觉声难，玉柱皆非旧处安。
记得君王曾道好，长因下辇得先弹。

一丛高鬓绿云光，官样轻轻淡淡黄。
为看九天公主贵，外边争学内家装。

宜春院里驻仙舆，夜宴笙歌总不如。
传索金笺题宠号，钿前御笔与亲书。

永巷重门渐半开，宫官著锁隔门回。
谁知曾笑他人处，今日将身自入来。

春风帘里旧青娥，无奈新人夺宠何。
寒食禁花开满树，玉堂终日闭时多。

碧绣檐前柳散垂，守门宫女欲攀时。
曾经玉辇从容处，不敢临风折一枝。

鸦飞深在禁城墙，多绕重楼复殿傍。
时向春檐瓦沟上，散开朝翅占朝光。

白雪猧儿拂地行，惯眠红毯不曾惊。
深宫更有何人到，只晓金阶吠晚萤。

百尺仙梯倚阁边，内人争下掷金钱。
风来竞看铜乌转，遥指朱干在半天。

春风摆荡禁花枝，寒食秋千满地时。
又落深宫石渠里，尽随流水入龙池。

墙墙不断接宫城，金榜皆书殿院名。
万转千回相隔处，各调弦管对闻声。

霏霏春雨九重天，渐暖龙池御柳烟。
玉辇游时应不避，千廊万屋自相连。

禁门烟起紫沉沉，楼阁当中复道深。
长入暮天凝不散，掖庭宫里动秋砧。

炎炎夏日满天时，桐叶交加覆玉墀。
向晚移镳上银簟，丛丛绿鬓坐弹棋。

瞳瞳日出大明宫，天乐遥闻在碧空。
禁树无风正和暖，玉楼金殿晓光中。

迥出芙蓉阁上头，九天悬处正当秋。
年年七夕晴光里，宫女穿针尽上楼。

教来鹦鹉语初成，久闭金笼惯认名。
总向春园看花去，独于深院笑人声。

银瓶泻水欲朝妆，烛焰红高粉壁光。
共怪满衣珠翠冷，黄花瓦上有新霜。

迎风殿里罢云和，起听新蝉步浅莎。
为爱九天和露滴，万年枝上最声多。

御果收时属内官，傍檐低压玉阑干。
明朝摘向金华殿，尽日枝边次第看。

内里松香满殿闻，四行阶下暖氤氲。
春深欲取黄金粉，绕树宫娥著绛裙。

禁树传声在九霄，内中残火独遥遥。
千官待取门犹闭，未到宫前下马桥。

卷三百四十七

卷 347_1 【御沟新柳】

贾棱

御苑阳和早，章沟柳色新。托根偏近日，布叶乍迎春。
秀质方含翠，清阴欲庇人。轻云度斜景，多露滴行尘。
袅袅堪离赠，依依独望频。王孙如可赏，攀折在芳辰。

卷 347_2 【御沟新柳】

刘遵古

韶光先禁柳，几处覆沟新。映水疑分翠，含烟欲占春。
悠悠迟日晚，袅袅好风频。吐节茸犹嫩，通条泽稍均。
远和瑶草色，暗拂玉楼尘。愿假鸾飞便，归栖及此辰。

卷 347_3【洛阳清明日雨霁】

李正封

晓日清明天，夜来嵩少雨。千门尚烟火，九陌无尘土。
酒绿河桥春，漏闲宫殿午。游人恋芳草，半犯严城鼓。

卷 347_4【咏露】

李正封

霏霏灵液重，云表无声落。沾树急玄蝉，洒池栖皓鹤。
流尘清远陌，飞月澄高阁。宵润玉堂帘，曙寒金井索。
佳人比珠泪，坐感红绡薄。

卷 347_5【夏游招隐寺暴雨晚晴】

李正封

竹柏风雨过，萧疏台殿凉。石渠写奔溜，金刹照颓阳。
鹤飞岩烟碧，鹿鸣涧草香。山僧引清楚，幡盖绕回廊。

卷 347_6 【禅门寺暮钟】

李正封

箕籥高悬于阊钟，黄昏发地殷龙宫。
游人忆到嵩山夜，叠阁连楼倚太空。

卷 347_7 【贡院楼北新栽小松】

李正封

青苍初得地，华省植来新。尚带山中色，犹含洞里春。
近楼依北户，隐砌净游尘。鹤寿应成盖，龙形未有鳞。
为梁资大厦，封爵耻嬴秦。幸此观光日，清风屡得亲。

卷 347_8 【南至隔仗望含元殿香炉】

崔立之

千官望长至，万国拜含元。隔仗炉光出，浮霜烟气翻。
飘飘萦内殿，漠漠澹前轩。圣日开如捧，卿云近欲浑。
轮囷洒宫阙，萧索散乾坤。愿倚天风便，披香奉至尊。

卷 347_9【曲池洁寒流】

崔立之

闲寻欹岸步，因向曲池看。透底何澄彻，回流乍屈盘。
稍随高树古，迥与远天寒。月入镜华转，星临珠影攒。
纤鳞时蔽石，转吹或生澜。愿假涓微效，来濡拙笔端。

卷 347_10【赋得春风扇微和】

崔立之

时令忽已变，年光俄又春。高低惠风入，远近芳气新。
靡靡才偃草，泠泠不动尘。温和乍扇物，煦妪偏感人。
去出桂林漫，来过蕙圃频。晨辉正澹荡，披拂长相亲。

卷 347_11【南至日隔仗望含元殿香炉】

郭遵

冕旒亲负扆，卉服尽朝天。暘谷移初日，金炉出御烟。
芬馨流远近，散漫入貂蝉。霜仗凝逾白，朱栏映转鲜。
如看浮阙在，稍觉逐风迁。为沐皇家庆，来瞻羽卫前。

卷 347_12 【赋得春风扇微和】

郭遵

微风飘淑气，散漫及兹晨。习习何处至，熙熙与春亲。
暖空看早辨，映日度逾频。高拂非烟杂，低垂众卉新。
霏天轻有霭，绮陌尽无尘。还似登台意，元和欲煦人。

卷 347_13 【赋得风动万年枝】

韦纾

嘉名标万祀，擢秀出深宫。嫩叶含烟霭，芳柯振惠风。
参差摇翠色，绮靡舞晴空。气稟祯祥异，荣沾雨露同。
天年方未极，圣寿比应崇。幸列华林里，知殊众木中。

卷 347_14 【赋得风动万年枝】

樊阳源

珍木罗前殿，乘春任好风。振柯方袅袅，舒叶乍濛濛。
影动丹墀上，声传紫禁中。离披偏向日，凌乱半分空。
轻拂祥烟散，低摇翠色同。长令占天眷，四气借全功。

卷 347_15 【赋得风动万年枝】

许稷

琼树偏春早，光飞处处宜。晓浮三殿日，暗度万年枝。
婀娜摇仙禁，缤翻映玉池。含芳烟乍合，拂砌影初移。
为近韶阳煦，皆先众卉垂。成阴知可待，不与众芳随。

卷 347_16 【闰月定四时】

许稷

玉律穷三纪，推为积闰期。月馀因妙算，岁遍自成时。
乍觉年华改，翻怜物候迟。六旬知不惑，四气本无欺。
月桂亏还正，阶蓂落复滋。从斯分历象，共仰定毫厘。

卷 347_17 【谢真人还旧山】

范传正

麾盖从仙府，笙歌入旧山。水流丹灶缺，云起草堂关。
白鹿行为卫，青鸾舞自闲。种松鳞未立，移石藓仍斑。
望路烟霞外，回舆岩岫间。岂唯辽海鹤，空叹令威还。

卷 347_18 【范成君击洞阴磬】

范传正

历历闻金奏，微微下玉京。为祥家谍久，偏识洞阴名。
澹伫人间听，铿锵古曲成。何须百兽舞，自畅九天情。
注目看无见，留心记未精。云霄如可托，借鹤向层城。

卷 347_19 【赋得春风扇微和】

范传正

暖暖当迟日，微微扇好风。吹摇新叶上，光动浅花中。
澹荡凝清昼，氤氲暖碧空。稍看生绿水，已觉散芳丛。
徙倚情偏适，裴回赏未穷。妍华不可状，竟夕气融融。

卷 347_20 【赋得春风扇微和】

豆卢荣

春晴生缥缈，软吹和初遍。池影动渊沦，山容发葱蒨。
迟迟入绮阁，习习流芳甸。树杪飏莺啼，阶前落花片。
韶光恐闲放，旭日宜游宴。文客拂尘衣，仁风愿回扇。

卷 347_21 【赋得春风扇微和】

邵偃

微风扇和气，韶景共芳晨。始见郊原绿，旋过御苑春。
三条开广陌，八水泛通津。烟动花间叶，香流马上人。
逶迤云彩曙，嘹唳鸟声频。为报东堂客，明朝桂树新。

卷 347_22 【赋得春风扇微和】

柳道伦

青阳初入律，淑气应春风。始辨梅花里，俄分柳色中。
依微开夕照，澹荡媚晴空。拂水生蘋末，经岩触桂丛。
稍抽兰叶紫，微吐杏花红。愿逐仁风布，将俾生植功。

卷 347_23 【赋得春风扇微和】

陈九流

喜见阳和至，遥知橐籥功。迟迟散南阳，袅袅逐东风。
暗入芳园里，潜吹草木中。兰荪才有绿，桃杏未成红。
已觉寒光尽，还看淑气通。由来荣与悴，今日发应同。

卷 347_24 【谢真人仙驾还旧山】

夏方庆

何年成道去，绰约化童颜。天上辞仙侣，人间忆旧山。
沧桑今已变，萝蔓尚堪攀。云覆瑶坛净，苔生丹灶闲。
逍遥堪白石，寂寞闭玄关。应是悲尘世，思将羽驾还。

卷三百四十八

卷 348_1【公子行】

陈羽

金羁白面郎，何处蹋青来。马娇郎半醉，踟蹰望楼台。
似见楼上人，玲珑窗户开。隔花闻一笑，落日不知回。

卷 348_2【古意】

陈羽

十三学绣罗衣裳，自怜红袖闻馨香。人言此是嫁时服，
含笑不刺双鸳鸯。郎年十九髭未生，拜官天下闻郎名。
车马骈阗贺门馆，自然不失为公卿。是时妾家犹未贫，
兄弟出入双车轮。繁华全盛两相敌，与郎年少为婚姻。
郎家居近御沟水，豪门客尽蹑珠履。雕盘酒器常不干，
晓入中厨妾先起。姑嫜严肃有规矩，小姑娇憨意难取。
朝参暮拜白玉堂，绣衣著尽黄金缕。妾貌渐衰郎渐薄，
时时强笑意索寞。知郎本来无岁寒，几回掩泪看花落。
妾年四十丝满头，郎年五十封公侯。男儿全盛日忘旧，

银床羽帐空飏飏。庭花红遍蝴蝶飞，看郎佩玉下朝时。
归来略略不相顾，却令侍婢生光辉。郎恨妇人易衰老，
妾亦恨深不忍道。看郎强健能几时，年过六十还枯槁。

卷 348_3 【长相思】

陈羽

相思长相思，相思无限极。相思苦相思，相思损容色。
容色真可惜，相思不可彻。日日长相思，相思肠断绝。
肠断绝，泪还续，闲人莫作相思曲。

卷 348_4 【送戴端公赴容州】

陈羽

分命诸侯重，葳蕤绣服香。八蛮治险阻，千骑蹋繁霜。
山断旌旗出，天晴剑珮光。还将小戴礼，远出化南方。

卷 348_5 【送殷华之洪州】

陈羽

离堂悲楚调，君奏豫章行。愁处雪花白，梦中江水清。

扣船歌月色，避浪宿猿声。还作经年别，相思湖草生。

卷 348_6 【春日晴原野望】

陈羽

东风吹暖气，消散入晴天。渐变池塘色，欲生杨柳烟。
蒙茸花向月，潦倒客经年。乡思应愁望，江湖春水连。

卷 348_7 【湘妃怨】

陈羽

舜欲省蛮貊，南巡非逸游。九山沉白日，二女泣沧洲。
目极楚云断，恨连湘水流。至今闻鼓瑟，咽绝不胜愁。

卷 348_8 【冬晚送友人使西蕃】

陈羽

驿使向天西，巡羌复入氐。玉关晴有雪，砂碛雨无泥。
落泪军中笛，惊眠塞上鸡。逢春乡思苦，万里草萋萋。

卷 348_9 【春园即事】

陈羽

水隔群物远，夜深风起频。霜中千树橘，月下五湖人。
听鹤忽忘寝，见山如得邻。明年还到此，共看洞庭春。

卷 348_10 【送友人及第归江东】

陈羽

五陵春色泛花枝，心醉花前远别离。落羽耻为关右客，
成名空羡里中儿。都门雨歇愁分处，山店灯残梦到时。
家住洞庭多钓伴，因来相贺话相思。

卷 348_11 【梓州与温商夜别】

陈羽

凤凰城里花时别，玄武江边月下逢。客舍莫辞先买酒，
相门曾忝共登龙。迎风骚屑千家竹，隔水悠扬午夜钟。
明日又行西蜀路，不堪天际远山重。

卷 348_12【长安卧病秋夜言怀】

陈羽

九重门锁禁城秋，月过南宫渐映楼。紫陌夜深槐露滴，
碧空云尽火星流。风清刻漏传三殿，甲第歌钟乐五侯。
楚客病来乡思苦，寂寥灯下不胜愁。

卷 348_13【喜雪上窦相公】

陈羽

千门万户雪花浮，点点无声落瓦沟。全似玉尘销更积，
半成冰水结还流。光添曙色连天远，轻逐春风绕玉楼。
平地已沾盈尺润，年丰须荷富人侯。

卷 348_14【宴杨驸马山亭】

陈羽

垂杨拂岸草茸茸，绣户窗前花影重。鲙下玉盘红缕细，
酒开金瓮绿醅醲。中朝驸马何平叔，南国词人陆士龙。
落日泛舟同醉处，回潭百丈映千峰。

卷 348_15【西蜀送许中庸归秦赴举】

陈羽

春色华阳国，秦人此别离。驿楼横水影，乡路入花枝。
日暖莺飞好，山晴马去迟。剑门当石隘，栈阁入云危。
独鹤心千里，贫交酒一卮。桂条攀偃蹇，兰叶藉参差。
旅梦惊蝴蝶，残芳怨子规。碧霄今夜月，惆怅上峨眉。

卷 348_16【小苑春望宫池柳色】

陈羽

宛宛如丝柳，含黄一望新。未成沟上暗，且向日边春。
袅娜方遮水，低迷欲醉人。托空芳郁郁，逐溜影鳞鳞。
弄水滋宵露，垂枝染夕尘。夹堤连太液，还似映天津。

卷 348_17【中秋夜临镜湖望月】

陈羽

镜里秋宵望，湖平月彩深。圆光珠入浦，浮照鹊惊林。
澹动光还碎，婵娟影不沉。远时生岸曲，空处落波心。
迢彻轮初满，孤明魄未侵。桂枝如可折，何惜夜登临。

卷 348_18【江上愁思二首】

陈羽

江上翁开门，开门向衰草。只知愁子孙，不觉生涯老。
江上草茎枯，茎枯叶复焦。那堪芳意尽，夜夜没寒潮。

卷 348_19【梁城老人怨】

陈羽

朝为耕种人，暮作刀枪鬼。相看父子血，共染城濠水。

卷 348_20【送灵一上人】

陈羽

十年劳远别，一笑喜相逢。又上青山去，青山千万重。

卷 348_21 【经夫差庙】

陈羽

姑苏城畔千年木，刻作夫差庙里神。

冠盖寂寥尘满室，不知箫鼓乐何人。

卷 348_22 【九月十日即事】

陈羽

汉江天外东流去，巴塞连山万里秋。

节过重阳人病起，一枝残菊不胜愁。

卷 348_23 【夏日宴九华池赠主人】

陈羽

池上凉台五月凉，百花开尽水芝香。

黄金买酒邀诗客，醉倒檐前青玉床。

卷 348_24 【长安早春言志】

陈羽

九衢日暖树苍苍，万里吴人忆水乡。

汉主未曾亲羽猎，不知将底谏君王。

卷 348_25 【读苏属国传】

陈羽

天山西北居延海，沙塞重重不见春。

肠断帝乡遥望日，节旄零落汉家臣。

卷 348_26 【吴城览古】

陈羽

吴王旧国水烟空，香径无人兰叶红。

春色似怜歌舞地，年年先发馆娃宫。

卷 348_27 【犍为城下夜泊闻夷歌】

陈羽

犍为城下牂牁路，空冢滩西贾客舟。

此夜可怜江上月，夷歌铜鼓不胜愁。

卷 348_28 【和王中丞使君春日过高评事幽居】

陈羽

风光满路旗幡出，林下高人待使君。

笑藉紫兰相向醉，野花千树落纷纷。

卷 348_29 【和王中丞中和日】

陈羽

节应中和天地晴，繁弦叠鼓动高城。

汉家分刺诸侯贵，一曲阳春江水清。

卷 348_30 【同韦中丞花下夜饮赠歌人】

陈羽

银烛煌煌半醉人，娇歌宛转动朱唇。

繁花落尽春风里，绣被郎官不负春。

卷 348_31 【若耶溪逢陆澧】

陈羽

溪上春晴聊看竹，谁言驿使此相逢。

担簦蹑屐仍多病，笑杀云间陆士龙。

卷 348_32 【夜泊荆溪】

陈羽

小雪已晴芦叶暗，长波乍急鹤声嘶。

孤舟一夜宿流水，眼看山头月落溪。

卷 348_33 【南山别僧】

陈羽

惆怅人间多别离，梅花满眼独行时。
无家度日多为客，欲共山僧何处期。

卷 348_34 【戏题山居二首】

陈羽

云盖秋松幽洞近，水穿危石乱山深。
门前自有千竿竹，免向人家看竹林。

虽有柴门长不关，片云高木共身闲。
犹嫌住久人知处，见欲移居更上山。

卷 348_35 【山中秋夜喜周士闲见过】

陈羽

青山高处上不易，白云深处行亦难。
留君不宿对秋月，莫厌山空泉石寒。

卷 348_36 【过栎阳山谿】

陈羽

众草穿沙芳色齐，蹋莎行草过春溪。

闲云相引上山去，人到山头云却低。

卷 348_37 【姑苏台怀古】

陈羽

忆昔吴王争霸日，歌钟满地上高台。

三千宫女看花处，人尽台崩花自开。

卷 348_38 【将归旧山留别】

陈羽

相共游梁今独还，异乡摇落忆空山。

信陵死后无公子，徒向夷门学抱关。

卷 348_39 【游洞灵观】

陈羽

初访西城礼少君，独行深入洞天云。
风吹青桂寒花落，香绕仙坛处处闻。

卷 348_40 【旅次沔阳，闻克复，而用师者穷兵黷武，因书简之】

陈羽

江上烟消汉水清，王师大破绿林兵。
干戈用尽人成血，韩信空传壮士名。

卷 348_41 【湘君祠】

陈羽

二妃怨处云沉沉，二妃哭处湘水深。
商人酒滴庙前草，萧索风生斑竹林。

卷 348_42 【送辛吉甫常州覲省】

陈羽

西去兰陵家不远，到家还及采兰时。

新年送客我为客，惆怅门前黄柳丝。

卷 348_43 【题舞花山大师遗居】

陈羽

西过流沙归路长，一生遗迹在东方。

空堂寂寞闭灯影，风动四山松柏香。

卷 348_44 【广陵秋夜对月即事】

陈羽

霜落寒空月上楼，月中歌吹满扬州。

相看醉舞倡楼月，不觉隋家陵树秋。

卷 348_45 【早秋浣水送人归越】

陈羽

凉叶萧萧生远风，晓鸦飞度望春宫。

越人归去一摇首，肠断马嘶秋水东。

卷 348_46 【小江驿送陆侍御归湖上山】

陈羽

鹤唳天边秋水空，荻花芦叶起西风。

今夜渡江何处宿，会稽山在月明中。

卷 348_47 【送李德舆归穿石洞山居】

陈羽

乌巾年少归何处，一片彩霞仙洞中。

惆怅别时花似雪，行人不肯醉春风。

卷 348_48 【酬幽居闲上人喜及第后见赠】

陈羽

九霄心在劳相问，四十年间岂足惊。

风动自然云出岫，高僧不用笑浮生。

卷 348_49 【洛下赠彻公】

陈羽

天竺沙门洛下逢，请为同社笑相容。

支颐忽望碧云里，心爱嵩山第几重。

卷 348_50 【观朱舍人归葬吴中】

陈羽

翩翩绛旌寒流上，行引东归万里魂。

几处州人临水哭，共看遗草有王言。

卷 348_51【题清镜寺留别】

陈羽

路入千山愁自知，雪花撩乱压松枝。

世人并道离别苦，谁信山僧轻别离。

卷 348_52【从军行】

陈羽

海畔风吹冻泥裂，枯桐叶落枝梢折。

横笛闻声不见人，红旗直上天山雪。

卷 348_53【宿淮阴作】

陈羽

秋灯点点淮阴市，楚客联樯宿淮水。

夜深风起鱼鳖腥，韩信祠堂明月里。

卷 348_54 【春日南山行】

陈羽

处处看山不可行，野花相向笑无成。
长嫌为客过州县，渐被时人识姓名。

卷 348_55 【步虚词二首】

陈羽

汉武清斋读鼎书，太官扶上画云车。
坛上月明宫殿闭，仰看星斗礼空虚。

楼殿层层阿母家，昆仑山顶驻红霞。
笙歌出见穆天子，相引笑看琪树花。

卷 348_56 【襄阳过孟浩然旧居】

陈羽

襄阳城郭春风起，汉水东流去不还。
孟子死来江树老，烟霞犹在鹿门山。

卷 348_57 【送友人游嵩山】

陈羽

嵩山归路绕天坛，雪影松声满谷寒。

君见九龙潭上月，莫辞清夜访袁安。

卷 348_58 【伏翼西洞送夏方庆】

陈羽

洞里春晴花正开，看花出洞几时回。

殷勤好去武陵客，莫引世人相逐来。

卷 348_59 【赠人】

陈羽

或棹孤舟或杖藜，寻常适意钓长溪。

草堂竹径在何处，落日孤烟寒渚西。

卷 348_60【句】

陈羽

稚子新能编笋笠，山妻旧解补荷衣。秋山隔岸清猿叫，
湖水当门白鸟飞。

卷三百四十九

卷 349_1【东风二章】

欧阳詹

东风叶时，匪沃匪飘。莫雪凝川，莫阴沍郊。
朝不谿夕乃销，东风之行地上兮。上德临慝，匪戮匪臯。
莫暴在野，莫丑在阶。以踣以歼，夕不谿朝。
陇西公来浚都兮。

东风叶时，匪啗匪穠。莫蛰在泉，莫枯在条。
宵不谿晨乃繇。东风之行地上兮。上德为政，匪食匪招。
莫顾于家，莫流于辽。以饱以回，晨不谿宵。
陇西公来浚都兮。

卷 349_2【有所恨二章】

欧阳詹

相思君子，吁嗟万里。亦既至止，曷不覿止。本不信巫，
谓巫言是履。在门五日，如待之死。有所恨兮。

相思遗衣，为忆以贻。亦既受止，曷不保持。本不欺友，谓友情是违。隔生之赠，造次亡之。有所恨兮。

卷 349_3 【玩月】

欧阳詹

八月十五夕，旧嘉蟾兔光。斯从古人好，共下今宵堂。
素魄皎孤凝，芳辉纷四扬。裴回林上头，泛滟天中央。

皓露助流华，轻风佐浮凉。清冷到肌骨，洁白盈衣裳。
惜此苦宜玩，揽之非可将。含情顾广庭，愿勿沉西方。

卷 349_4 【咏德上韦检察】

欧阳詹

少华类太华，太室似少室。亚相与丞相，亦复无异质。
渟如月临水，肃若松照日。辉影互光澄，阴森两葱郁。

连城鸾凤分，同气龟龙出。并力革夷心，通筹整师律。
英豪愿回席，蛮貊皆屈膝。中外行分途，寰瀛待清谧。

卷 349_5 【寓兴】

欧阳詹

桃李有奇质，樗栎无妙姿。皆承庆云沃，一种春风吹。
美恶苟同归，喧嚣徒尔为。相将任玄造，聊醉手中卮。

卷 349_6 【答韩十八驽骥吟】

欧阳詹

故人舒其愤，昨示驽骥篇。驽以易售陈，骥以难知言。
委曲感既深，咨嗟词亦殷。伊情有远澜，余志逊其源。
室在周孔堂，道通尧舜门。调雅声寡同，途遐势难翻。
顾兹万恨来，假彼二物云。贱贵而贵贱，世人良共然。
巴蕉一叶妖，茝葵一花妍。毕无才实资，手植阶墀前。
梗楠十围瑰，松柏百尺坚。罔念梁栋功，野长丘墟边。
伤哉昌黎韩，焉得不连遭。上帝本厚生，大君方建元。
宝将庇群甿，庶此规崇轩。班尔图永安，抡择期精专。
君看广厦中，岂有树庭萱。

卷 349_7 【益昌行】

欧阳詹

驱马至益昌，倍惊风俗和。耕夫陇上谣，负者途中歌。
处处川复原，重重山与河。人烟遍馀田，时稼无闲坡。
问业一何修，太守德化加。问身一何安，太守恩怀多。
贤哉我太守，在古无以过。爱人甚爱身，治郡如治家。
云雷既奋腾，草木遂萌芽。乃知良二千，德足为国华。
今时固精求，汉帝非徒嗟。四海有青春，众植伫扬葩。
期当作霖霖，天下同滂沱。

卷 349_8 【自淮中却赴洛途中作】

欧阳詹

惆怅策疲马，孤蓬被风吹。昨东今又西，冉冉长路岐。
岁晚树无叶，夜寒霜满枝。旅人恒苦辛，冥冥天何知。

卷 349_9 【晨装行】

欧阳詹

村店月西出，山林鹎鷯声。旅灯彻夜席，束囊事晨征。

寂寂人尚眠，悠悠天未明。岂无偃息心，所务前有程。

卷 349_10【新都行】

欧阳詹

缥缈空中丝，蒙笼道傍树。翻兹叶间吹，惹破花上露。
悠扬丝意去，苒蒨花枝住。何计脱缠绵，天长春日暮。

卷 349_11【铜雀妓】

欧阳詹

萧条登古台，回首黄金屋。落叶不归林，高陵永为谷。
妆容徒自丽，舞态阅谁目。惆怅繡帷空，歌声苦于哭。

卷 349_12【太原旅怀呈薛十八侍御齐十二奉礼】

欧阳詹

前来称英隽，有食主人鱼。后来曰贤才，又受主人车。
伊予亦投刺，恩煦胡凋疏。既睹主人面，复见主人书。
餬口百家周。赁庑三月馀。眼见寒序臻，坐送秋光除。
西日愁饥肠，北风疾絺裾。升堂有知音，此意当何如。

卷 349_13 【李评事公进示文集因赠之】

欧阳詹

风雅不坠地，五言始君先。希微嘉会章，杳冥河梁篇。
理蔓语无枝，言一意则千。往来更后人，浇荡醺前源。
倾筐实不收，朴樕华争繁。大教护微旨，哲人生令孙。
高飙激颓波，坐使横流翻。昔日越重阻，侧聆沧海传。
逮兹覩清扬，幸睹青琅编。泠泠中山醇，片片昆丘璠。
一杯有余味，再览增光鲜。对宝人皆鉴，握鞶良自妍。
吾其告先师，六义今还全。

卷 349_14 【徐十八晦落第】

欧阳詹

嘉谷不夏熟，大器当晚成。徐生非凡鸟，安得非时鸣。
汲汲有所为，驱驱无本情。懿哉苍梧凤，终见排云征。

卷 349_15 【春日途中寄故园所亲】

欧阳詹

客路度年华，故园云未返。悠悠去源水，日日只有远。

始叹秋叶零，又看春草晚。寄书南飞鸿，相忆剧乡县。

卷 349_16【蜀中将归留辞韩相公贯之】

欧阳詹

宁体即云构，方前恒玉食。贫居岂及此，要自怀归忆。
在梦关山远，如流岁华逼。明晨首乡路，迢递孤飞翼。

卷 349_17【江夏留别华二】

欧阳詹

弭棹已伤别，不堪离绪催。十年一心人，千里同舟来。
乡路我尚遥，客游君未回。将何慰两端，互勉临岐杯。

卷 349_18【送潭州陆户曹之任】

欧阳詹

三语又为掾，大家闻屈声。多年名下人，四姓江南英。
衡岳半天秀，湘潭无底清。何言驱车远，去有蒙庄情。

卷 349_19【福州送郑楚材赴京，时监察刘公亮有感激郑意】

欧阳詹

美人河岳灵，家本荥水滨。门承若兰族，身蕴如琼文。
早折青桂枝，俯窥鸿鹄群。迺来丹霄姿，远逐苍梧云。
有伊光鉴人，惜兹瑶蕙薰。中酣前激昂，四座同氛氲。
海郡梅霰晴，山邮炎景曛。回翔罢南游，鸣唳期西闻。
秦塞鸾凤征，越江云雨分。从兹一别离，伫致如尧君。

卷 349_20【初发太原，途中寄太原所思】

欧阳詹

驱马觉渐远，回头长路尘。高城已不见，况复城中人。
去意自未甘，居情谅犹辛。五原东北晋，千里西南秦。
一履不出门，一车无停轮。流萍与系匏，早晚期相亲。

卷 349_21【汝川行】

欧阳詹

汝坟春女蚕忙月，朝起采桑日西没。轻绡裙露红罗袜，
半蹋金梯倚枝歇。垂空玉腕若无骨，映叶朱唇似花发。

相欢谁是游冶郎，蚕休不得岐路旁。

卷 349_22【智达上人水精念珠歌】

欧阳詹

水已清，清中不易当其精。精华极，何宜更复加磨拭。
良工磨拭成贯珠，泓澄洞澈看如无。星辉月耀莫之逾，
骇鸡照乘徒称殊。上人念佛泛贞谛，一佛一珠以为计。
既指其珠当佛身，亦欲珠明佛像智。咨董母，访朱公。
得之玃璫群奇中，龙龕鸞岭长随躬。朝自守持纤掌透，
夜来月照红绦空。穷川极陆难为宝，孰说砗磲将玛瑙。
连连寒溜下阴轩，荧荧沚露垂秋草。皎晶晶，彰煌煌，
陆离电烓纷不常，凌眸晕目生光芒。我来借问修行术，
数日殷勤美兹物。上人视日授微言，心静如斯即诸佛。

卷 349_23【许州途中】

欧阳詹

秦川行尽颍川长，吴江越岭已同方。征途渺渺烟茫茫，
未得还乡伤近乡。随萍逐梗见春光，行乐登台斗在旁。
林间啼鸟野中芳，有似故园皆断肠。

卷 349_24 【赋得秋河曙耿耿送郭秀才应举】

欧阳詹

月没天欲明，秋河尚凝白。皔皔积光素，耿耿横虚碧。
南斗接，北辰连，空濛鸿洞浮高天。荡荡漫漫皆晶然，
实类平芜流大川。星为潭底珠，云是波中烟。
鸡唱漏尽东方作，曲渚苍苍晓霜落。雁叫疑从清浅惊，
鳬声似在沿洄泊。并州细侯直下孙，才应秋赋怀金门。
念排云汉将飞翻，仰之踊跃当华轩。夜来陪饯欧阳子，
偶坐通宵见深旨。心知慷慨日昭然，前程心在青云里。

卷 349_25 【送袁秀才下第归毗陵】

欧阳詹

羸马出都门，修途指江东。关河昨夜雨，草木非春风。
矢舍虽未中，璞全终待攻。层霄秋可翔，岂不随高鸿。

卷 349_26 【闻邻舍唱凉州有所思】

欧阳詹

有善伊凉曲，离别在天涯。虚堂正相思，所妙发邻家。

声音虽类闻，形影终以遐。因之增远怀，惆怅菖蒲花。

卷 349_27 【陪太原郑行军中丞登汾上阁。中丞诗曰：汾楼秋水阔，宛似到阊门。惆怅江湖思，唯将南客论。南客即詹也，辄书即事上答】

欧阳詹

并州汾上阁，登望似吴阊。贯郭河通路，萦村水逼乡。
城槐临枉渚，巷市接飞梁。莫论江湖思，南人正断肠。

卷 349_28 【送少微上人归德峰】

欧阳詹

不负人间累，栖身任所从。灰心闻密行，菜色见羸容。
幻世方同悟，深居愿继踪。孤云与禅诵，到后在何峰。

卷 349_29 【荆南夏夜水楼怀昭丘直上人云梦李莘】

欧阳詹

无机成旅逸，中夜上江楼。云尽月如练，水凉风似秋。
鳧声闻梦泽，黛色上昭丘。不远人情在，良宵恨独游。

卷 349_30 【酬裴十二秀才孩子咏】

欧阳詹

算日未成年，英姿已褻然。王家千里后，荀氏八龙先。
葱蒨松犹嫩，清明月渐圆。将何一枝桂，容易赏名贤。

卷 349_31 【旅次舟中对月寄姜公】

欧阳詹

中宵天色净，片月出沧洲。皎洁临孤岛，婵娟入乱流。
应同故园夜，独起异乡愁。那得休蓬转，从君上庾楼。

卷 349_32 【除夜长安客舍】

欧阳詹

十上书仍寝，如流岁又迁。望家思献寿，算甲恨长年。
虚牖传寒柝，孤灯照绝编。谁应问穷辙，泣尽更潸然。

卷 349_33 【早秋登慈恩寺塔】

欧阳詹

宝塔过千仞，登临尽四维。毫端分马颊，墨点辨蛾眉。
地迴风弥紧，天长日久迟。因高欲有赋，远意惨生悲。

卷 349_34 【太原和严长官，八月十五日夜西山童子上方玩月，寄中丞少尹】

欧阳詹

西寺碧云端，东溟白雪团。年来一夜玩，君在半天看。
素魄当怀上，清光在下寒。宜裁济江什，有阻惠连欢。

卷 349_35 【九日广陵同陈十五先辈登高怀林十二先辈】

欧阳詹

客路重阳日，登高寄上楼。风烟今令节，台阁古雄州。
泛菊聊斟酒，持萸懒插头。情人共惆怅，良久不同游。

卷 349_36 【题严光钓台】

欧阳詹

弭棹历尘迹，悄然关我情。伊无昔时节，岂有今日名。
辞贵不辞贱，是心谁复行。钦哉此溪曲，永独古风清。

卷 349_37 【送高士安下第归岷南宁覲】

欧阳詹

偕隐有贤亲，岷南四十春。栖云自匪石，观国暂同尘。
就养思儿戏，延年爱鸟伸。还看谢时去，有类颖阳人。

卷 349_38 【述德上兴元严仆射】

欧阳詹

山横碧立并雄岷，大阜洪川共降神。心合云雷清祸乱，
力回天地作阳春。非熊德愧当周辅，称杰叨惭首汉臣。
何幸腐儒无一艺，得为门下食鱼人。

卷 349_39 【及第后酬故园亲故】

欧阳詹

才非天授学非师，以此成名曩岂期。杨叶射频因偶中，
桂枝材美敢当之。称文作艺方惭德，相贺投篇料愧词。
犹著褐衣何足羨，如君即是载鸣时。

卷 349_40 【题华十二判官汝州宅内亭】

欧阳詹

高居胜景谁能有，佳意幽情共可欢。新柳绕门青翡翠，
修篁浮径碧琅玕。步兵阮籍空除屏，彭泽陶潜谩挂冠。
只在城隍也趋府，岂如吾子道斯安。

卷 349_41 【薛舍人使君观察韩判官侍御许雨晴到所居既霁
先呈即事】

欧阳詹

江皋昨夜雨收梅，寂寂衡门与钓台。西岛落花随水至，
前山飞鸟出云来。观风驷马能言驻，行县双旌许暂回。
岂不偶然聊为竹，空令石径扫莓苔。

卷 349_42 【元日陪早朝】

欧阳詹

斗柄东回岁又新，
蓬旒南面揖来宾。
和光仿佛楼台晓，
休气氛氲天地春。
仪籥不唯丹穴鸟，
称觞半是越裳人。
江皋腐草今何幸，
亦与恒星拱北辰。

卷 349_43 【和太原郑中丞登龙兴寺阁】

欧阳詹

青窗朱户半天开，
极目凝神望几回。
晋国颓墉生草树，
皇家瑞气在楼台。
千条水入黄河去，
万点山从紫塞来。
独恨侍游违长者，
不知高意是谁陪。

卷 349_44 【咏德上太原李尚书】

欧阳詹

那以公方郭细侯，
并州非复旧并州。
九重帝宅司丹地，
十万兵枢拥碧油。
锵玉半为趋閤吏，
腰金皆是走庭流。
王褒见德空知颂，
身在三千最上头。

卷 349_45 【和严长官秋日登太原龙兴寺阁野望】

欧阳詹

百丈化城楼，君登最上头。九霄回栈路，八到视并州。
烟火遗尧庶，山河启圣猷。短垣齐介岭，片白指分流。
清铎中天籁，哀鸣下界秋。境闲知道胜，心远见名浮。
岂念乘肥马，方应驾大牛。自怜蓬逐吹，不得与良游。

卷 349_46 【小苑春望宫池柳色】

欧阳詹

东风韶景至，垂柳御沟新。媚作千门秀，连为一道春。
柔荑生女指，嫩叶长龙鳞。舞絮回青岸，翻烟拂绿蘋。
王孙初命赏，佳客欲伤神。芳意堪相赠，一枝先远人。

卷 349_47 【蜀门与林蕴分路后，屡有山川似闽中，因寄林蕴。蕴亦闽人也】

欧阳詹

村步如延寿，川原似福平。无人相共识，独自故乡情。

卷 349_48 【读周太公传】

欧阳詹

论兵去商虐，讲德兴周道。屠沽未遇时，岂异兹川老。

卷 349_49 【乐津店北陂】

欧阳詹

婵娟有丽玉如也，美笑当予系予马。
罗帏碧簟岂相容，行到山头忆山下。

卷 349_50 【出蜀门】

欧阳詹

北客今朝出蜀门，邛然领得入时魂。
游人莫道归来易，三不曾闻古老言。

卷 349_51【题第五司户侍御】

欧阳詹

曾称野鹤比群公，忽作长松向府中。

骢马不骑人不识，冷然三尺别生风。

卷 349_52【建溪行待陈诒】

欧阳詹

偕行那得会心期，先者贪前后者迟。

空忆丽词能状物，每看奇异但相思。

卷 349_53【述德上兴元严仆射】

欧阳詹

推车阍外主恩新，今日梁川草遍春。

玉色据鞍双节下，扬兵百万路无尘。

卷 349_54 【许州送张中丞出临颖镇】

欧阳詹

心诵阴符口不言，风驱千骑出辕门。

孙吴去后无长策，谁敌留侯直下孙。

卷 349_55 【睹亡友题诗处】

欧阳詹

旧友亲题壁上诗，伤看缘迹不缘词。

门前犹是长安道，无复回车下笔时。

卷 349_56 【题秦岭】

欧阳詹

南下斯须隔帝乡，北行一步掩南方。

悠悠烟景两边意，蜀客秦人各断肠。

卷 349_57【自南山却赴京师，石臼岭头即事寄严仆射】

欧阳詹

鸟企蛇盘地半天，下窥千仞到浮烟。

因高回望沾恩处，认得梁州落日边。

卷 349_58【与洪孺卿自梁州回途中经骆谷，见野果有闽中悬壶子，即同采摘因呈之，洪亦闽人】

欧阳詹

青苞朱实忽离离，摘得盈筐泪更垂。

上德同之岂无意，故园山路一枝枝。

卷 349_59【韦晤宅听歌】

欧阳詹

服制虹霓鬓似云，萧郎屋里上清人。

等闲逐酒倾杯乐，飞尽虹梁一夜尘。

卷 349_60【与林蕴同之蜀，途次嘉陵江，认得越鸟声，呈林。林亦闽中人也】

欧阳詹

正是闽中越鸟声，几回留听暗沾缨。

伤心激念君深浅，共有离乡万里情。

卷 349_61【送闻上人游嵩山】

欧阳詹

二室峰峰昔愿游，从云从鹤思悠悠。

丹梯石路君先去，为上青冥最上头。

卷 349_62【永安寺照上人房】

欧阳詹

草席蒲团不扫尘，松闲石上似无人。

群阴欲午钟声动，自煮溪蔬养幻身。

卷 349_63 【山中老僧】

欧阳詹

笑向来人话古时，绳床竹杖自扶持。

秋深头冷不能剃，白黑苍然发到眉。

卷 349_64 【赠鲁山李明府】

欧阳詹

外户通宵不闭关，抱孙弄子万家闲。

若将邑号称贤宰，又是皇唐李鲁山。

卷 349_65 【泉州赴上都留别舍弟及故人】

欧阳詹

天长地阔多岐路，身即飞蓬共水萍。

匹马将驱岂容易，弟兄亲故满离亭。

卷 349_66 【送张骠骑邠宁行营】

欧阳詹

宝马雕弓金仆姑，龙骧虎视出皇都。

扬鞭莫怪轻胡虏，曾在渔阳敌万夫。

卷 349_67 【题梨岭】

欧阳詹

南北风烟即异方，连峰危栈倚苍苍。

哀猿咽水偏高处，谁不沾衣望故乡。

卷 349_68 【秋夜寄僧】

欧阳詹

尚被浮名诱此身，今时谁与德为邻。

遥知是夜檀溪上，月照千峰为一人。

卷 349_69 【观送葬】

欧阳詹

何事悲酸泪满巾，浮生共是北邙尘。

他时不见北山路，死者还曾哭送人。

卷 349_70 【宿建溪中宵即事】

欧阳詹

？ @ 一席眠还坐，蛙噪萤飞夜未央。

僮仆舟人空寂寂，隔帘微月入中仓。

卷 349_71 【题王明府郊亭】

欧阳詹

日日郊亭启竹扉，论桑劝穡是常机。

山城要得牛羊下，方与农人分背归。

卷 349_72 【塞上行】

欧阳詹

闻说胡兵欲利秋，昨来投笔到营州。

骁雄已许将军用，边塞无劳天子忧。

卷 349_73 【题别业】

欧阳詹

千山江上背斜晖，一径中峰见所归。

不信扁舟回在晚，宿云先已到柴扉。

卷 349_74 【九日广陵登高怀邵二先辈】

欧阳詹

簪萸泛菊俯平阡，饮过三杯却惘然。

十岁此辰同醉友，登高各处已三年。

卷 349_75 【题延平剑潭】

欧阳詹

想象精灵欲见难，通津一去水漫漫。

空馀昔日凌霜色，长与澄潭生昼寒。

卷 349_76 【晚泊漳州营头亭】

欧阳詹

回峰叠嶂绕庭隅，散点烟霞胜画图。

日暮华轩卷长箔，太清云上对蓬壶。

卷 349_77 【赠山南严兵马使】

欧阳詹

为雁为鸿弟与兄，如雕如鹗杰连英。

天旋地转烟云黑，共鼓长风六合清。

卷 349_78 【除夜侍酒呈诸兄示舍弟】

欧阳詹

莫叹明朝又一春，相看堪共贵兹身。

悠悠寰宇同今夜，膝下传杯有几入。

卷三百五十

卷 350_1【奉平淮夷雅表·皇武，命丞相度董师，集大功也】

柳宗元

皇耆其武，于浚于淮。既巾乃车，环蔡具来。
狡众昏嚚，甚毒于酲。狂奔叫呶，以干大刑。

皇咨于度，惟汝一德。旷诛四纪，其徯汝克。
锡汝斧钺，其往视师。师是蔡人，以宥以釐。

度拜稽首，庙于元龟。既禘既类，于社是宜。
金节煌煌，锡质雕戈。犀甲熊旂，威命是荷。

度拜稽首，出次于东。天子饯之，罍斝是崇。
鼎臠俎馔，五献百笏。凡百卿士，班以周旋。

既涉于沪，乃翼乃前。孰图厥犹，其佐多贤。
宛宛周道，于山于川。远扬迩昭，陟降连连。

我旆我旗，于道于陌。训于群帅，拳勇来格。

公曰徐之，无恃额额。式和尔容，惟义之宅。

进次于郾，彼昏卒狂。裒凶鞠顽，锋猬斧螳，
赤子匍匐，厥父是亢。怒其萌芽，以悖太阳。

王旅浑浑，是佚是怙。既获敌师，若饥得餍。
蔡凶伊窘，悉起来聚。左捣其虚，靡愆厥虑。

载辟载袂，丞相是临。弛其武刑，谕我德心。
其危既安，有长如林。曾是讙譊，化为讴吟。

皇曰来归，汝复相予。爵之成国，胙以夏区。
度拜稽首，天子圣神。度拜稽首，皇祐下人。

淮夷既平，震是朔南。宜庙宜郊，以告德音。
归牛休马，丰稼于野。我武惟皇，永保无疆。

卷 350_2【奉平淮夷雅表·方城，命愬守也。卒入蔡，得其
大丑，以平淮右】

柳宗元

方城临临，王卒峙之。匪徼匪竞，皇有正命。
皇命于愬，往舒余仁。踣彼艰顽，柔惠是驯。

懋拜即命，于皇之训。既砺既攻，以后厥刃。
王师巍巍，熊罴是式。衔勇韬力，日思予殛。

寇昏以狂，敢蹈懋疆。士获厥心，大袒高骧。
长戟酋矛，粲其绥章。右翦左屠，聿禽其良。

其良既宥，告以父母。恩柔于肌，卒贡尔有。
维彼攸恃，乃侦乃诱。维彼攸宅，乃发乃守。

其恃爰获，我功我多。阴谋厥图，以究尔讹。
雨雪洋洋，大风来加，于燠其寒，于迓其遐。

汝阴之茫，悬瓠之峨。是震是拔，大歼厥家。
狡虏既縻，输于国都。示之市人，即社行诛。

乃谕乃止，蔡有厚喜。完其室家，仰父俯子。
汝水沄沄，既清而瀾。蔡人行歌，我步逶迟。

蔡人歌矣，蔡风和矣。孰颙蔡初，胡甌尔居。
式慕以康，为愿有馀。是究是咨，皇德既舒。

皇曰咨懋，裕乃父功。昔我文祖，惟西平是庸。
内诲于家，外刑于邦。孰是蔡人，而不率从。

蔡人率止，惟西平有子。西平有子，惟我有臣。
畴允大邦，俾惠我人。于庙告功，以顾万方。

卷 350_3【唐铙歌鼓吹曲十二篇·隋乱既极，唐师起晋阳，平奸豪，为生人义主，以人兴武。为晋阳武第一】

柳宗元

晋阳武，奋义威。炀之渝，德焉归。氓毕屠，绥者谁。
皇烈烈，专天机。号以仁，扬其旗。日之升，九土晞。
斥田坼，流洪辉。有其二，翼馀隋。斫枭鷲，连熊螭。
枯以肉，勍者羸。后土荡，玄穹弥。合之育，莽然施。
惟德辅，庆无期。

卷 350_4【唐铙歌鼓吹曲十二篇·唐既受命，李密自败来归，以开黎阳，斥东土。为兽之穷第二】

柳宗元

兽之穷，奔大麓。天厚黄德，狙犷服。甲之橐，弓弭矢箛。
皇旅靖，敌逾蹙。自亡其徒，匪予戮。屈A猛，虔栗栗。
縻以尺组，啖以秣。黎之阳，土茫茫。富兵戎，盈仓箱。
乏者德，莫能享。驱豺兕，授我疆。

卷 350_5【唐饶歌鼓吹曲十二篇·太宗师讨王充，窦建德助逆，师奋击武牢下，擒之，遂降充。为战武牢第三】

柳宗元

战武牢，动河朔。逆之助，图犄角。怒馘麈，抗乔岳。
翘萌牙，傲霜雹。王谋内定，申掌握。铺施芟夷，二主缚。
惮华戎，廓封略。命之薈，卑以斫。归有德，唯先觉。

卷 350_6【唐饶歌鼓吹曲十二篇·薛举据泾以死，子仁果尤勇以暴，师平之。为泾水黄第四】

柳宗元

泾水黄，陇野茫。负太白，腾天狼。有鸟鸢立，羽翼张。
钩喙决前，鉅趯傍。怒飞饥啸，翮不可当。老雄死，
子复良。巢岐饮渭，肆翱翔。顿地纛，提天纲。

列缺掉帜，招摇耀铓。鬼神来助，梦嘉祥。脑涂原野，
魄飞扬。星辰复，恢一方。

卷 350_7【唐铙歌鼓吹曲十二篇·辅氏凭江淮，竟东海，命将平之，为奔鲸沛第五】

柳宗元

奔鲸沛，荡海垠。吐霓翳日，腥浮云。帝怒下顾，
哀垫昏。授以神柄，推元臣。手援天矛，截修鳞。

披攘蒙雾，开海门。地平水静，浮天根。羲和显耀，
乘清氛。赫炎溷畅，融大钧。

卷 350_8【唐铙歌鼓吹曲十二篇·梁之余，保荆衡巴巫，穷南越，良将取之，不以师。为苞枿第六】

柳宗元

苞枿ⁱ矣，惟恨之蟠。弥巴蔽荆，负南极以安。
曰我旧梁氏，缉绥艰难。江汉之阻，都邑固以完。圣人作，
神武用。有臣勇智，奋不以众。投迹死地，谋猷纵。

化敌为家，虑则中。浩浩海裔，不威而同。系纆降王。
定厥功。澶漫万里，宣唐风。蛮夷九译，咸来从。
凯旋金奏，象形容。震撼万国，罔不龚。

卷 350_9【唐铙歌鼓吹曲十二篇·李轨保河右，师临之，不克变，或执以降，为河右平第七】

柳宗元

河右澶漫，顽为之魁。王师如雷震，昆仑以颓。
上聋下聩，惊不可回。助仇抗有德，惟人之灾。
乃溃乃奋，执缚归厥命。万室蒙其仁，一夫则病。
濡以鸿泽，皇之圣。威畏德怀，功以定。顺之于理，
物咸遂厥性。

卷 350_10【唐铙歌鼓吹曲十二篇·突厥之大，古夷狄莫强焉。师大破之，降其国。告于庙。为铁山碎第八】

柳宗元

铁山碎，大漠舒。二虏劲，连穹庐。背北海，专坤隅。
岁来侵边。或傅于都。天子命元帅，奋其雄图。破定襄，
降魁渠。穷竟窟宅，斥余吾。百蛮破胆，边氓苏。
威武辉耀，明鬼区。利泽弥万祀，功不可逾。官臣拜手，
惟帝之谟。

卷 350_11【唐饶歌鼓吹曲十二篇·刘武周败裴寂，咸有晋地，太宗灭之。为靖本邦第九】

柳宗元

本邦伊晋，惟时不靖。根柢之摇，枯叶攸病。守臣不任，勤于神圣。惟越之兴，翦焉则定。洪惟我理，式和以敬。群顽既夷，庶绩咸正。皇谟载大，惟人之庆。

卷 350_12【唐饶歌鼓吹曲十二篇·李靖灭吐谷浑西海上，为吐谷浑第十】

柳宗元

吐谷浑盛强，背西海以夸。岁侵扰我疆，退匿险且遐。帝谓神武师，往征靖皇家。烈烈旆其旗，熊虎杂龙蛇。王旅千万人，衔枚默无哗。束刃逾山徼，张翼纵漠沙。一举刈膻腥，尸骸积如麻。除恶务本根，况敢遗萌芽。洋洋西海水，威命穷天涯。系虏来王都，犒乐穷休嘉。登高望还师，竟野如春华。行者靡不归，亲戚讙要遮。凯旋献清庙，万国思无邪。

卷 350_13【唐饶歌鼓吹曲十二篇·李靖灭高昌，为高昌第十一】

柳宗元

麹氏雄西北，别绝臣外区。既恃远且险，纵傲不我虞。
烈烈王者师，熊螭以为徒。龙旂翻海浪，駟骑驰坤隅。
赍育搏婴儿，一扫不复余。平沙际天极，但见黄云驱。

臣靖执长缨，智勇伏囚拘。文皇南面坐，夷狄千群趋。
咸称天子神，往古不得俱。献号天可汗，以覆我国都。
兵戎不交害，各保性与躯。

卷 350_14【唐饶歌鼓吹曲十二篇·既克东蛮，群臣请图蛮夷状，为周书王会。为东蛮第十二】

柳宗元

东蛮有谢氏，冠带理海中。自言我异世，虽圣莫能通。
王卒如飞翰，鹏鹞骇群龙。轰然自天坠，乃信神武功。
系虏君臣人，累累来自东。无思不服从，唐业如山崇。

百辟拜稽首，咸愿图形容。如周王会书，永永传无穷。
睢盱万状乖，咿唔九译重。广轮抚四海，浩浩知皇风。
歌诗饶鼓闲，以壮我元戎。

卷 350_15 【贞符】

柳宗元

於穆敬德，黎人皇之。惟贞厥符，浩浩将之。仁函于肤，
刃莫毕屠。泽燠于爨，沸炎以浼。殄厥凶德，乃驱乃夷。
懿其休风，是煦是吹。父子熙熙，相宁以嬉。赋彻而藏，
厚我糗粃。刑轻以清，我肌靡伤。貽我子孙，百代是康。
十圣嗣于理，仁后之子。子思孝父，易患于己。拱之戴之，
神具尔宜。载扬于雅，承天之嘏。天之诚神，宜鉴于仁。
神之曷依，宜仁之归。濮沿于北，祝栗于南。幅员西东，
祇一乃心。祝唐之纪，后天罔坠。祝皇之寿，与地咸久。
曷徒祝之，心诚笃之。神协人同，道以告之。俾弥忆万年，
不震不危。我代之延，永永毗之。仁增以崇，曷不尔思。
有号于天，金曰呜呼。咨尔皇灵，无替厥符。

卷 350_16 【视民诗】

柳宗元

帝视民情，匪幽匪明。惨或在腹，已如色声。亦无动威，
亦无止力。弗动弗止，惟民之极。帝怀民视，乃降明德，
乃生明翼。明翼者何？乃房乃杜。惟房与杜，实为民路。
乃定天子，乃开万国。万国既分，乃释蠹民，乃学与仕，
乃播与食，乃器与用，乃货与通。有作有迁，无迁无作。

士实荡荡，农实董董，工实蒙蒙，贾实融融。左右惟一，
出入惟同。摄仪以引，以遵以肆。其风既流，品物载休。
品物载休，惟天子守，乃二公之久。惟天子明，
乃二公之成。惟百辟正，乃二公之令。惟百辟谷，
乃二公之禄。二公行矣，弗敢忧纵。是获忧共，
二公居矣。弗敢泰止，是获泰已。既柔一德，四夷是则。
四夷是则，永怀不忒。

卷三百五十一

卷 351_1【同刘二十八院长述旧言怀感时书事，奉寄澧州张员外使君五十二韵之作。因其韵增至八十通赠二君子】

柳宗元

弱岁游玄圃，先容幸弃瑕。名劳长者记，文许后生夸。
鷖翼尝披隼，蓬心类倚麻。继酬天禄署，俱尉甸侯家。
宪府初收迹，丹墀共拜嘉。分行参瑞兽，传点乱宫鸦。
执简宁循枉，持书每去邪。鸾凤标魏阙，熊武负崇牙。
辨色宜相顾，倾心自不哗。金炉仄流月，紫殿启晨霞。
未竟迁乔乐，俄成失路嗟。还如渡辽水，更似谪长沙。
别怨秦城暮，途穷越岭斜。讼庭闲枳棘，候吏逐麋麋。
三载皇恩畅，千年圣历遐。朝宗延驾海，师役罢梁涯。
京邑搜贞干，南宫步渥洼。世惟材是梓，人仰骥中骅。
欵刺苗入地，仍逾赣石崖。礼容垂W瑋，戎备响鋹鍜。
宠即郎官旧，威从太守加。建旗翻鸞鸟，负弩绕文蛇。
册府荣八命，中闱盛六珈。肯随胡质矫，方恶马融奢。
褒德符新换，怀仁道并遮。俗嫌龙节晚，朝讶介圭赊。
禹贡输苞匭，周官赋秉秬。雄风吞七泽，异产控三巴。
即事观农稼，因时展物华。秋原被兰叶，春渚涨桃花。
令肃军无扰，程悬市禁贾。不应虞竭泽，宁复叹栖苴。

蹀躞驹先驾，笼铜鼓报衙。染毫东国素，濡印锦溪砂。
货积舟难泊，人归山倍畬。吴歛工折柳，楚舞旧传芭。
隐几松为曲，倾樽石作污。寒初荣橘柚，夏首荐枇杷。
祀变荆巫祷，风移鲁妇髻。已闻施恺悌，还睹正奇邪。
慕友惭连璧，言姻喜附葭。沉埋全死地，流落半生涯。
入郡腰恒折，逢人手尽叉。敢辞亲耻污，唯恐长疵瑕。
善幻迷冰火，齐谐笑柏涂。东门牛屡饭，中散虱空爬。
逸戏看猿斗，殊音辨马挝。渚行狐作孽，林宿鸟为a。
同病忧能老，新声厉似姘。岂知千仞坠，只为一毫差。
守道甘长绝，明心欲自&。贮愁听夜雨，隔泪数残葩。
皋族音常聒，豺群喙竞呀。岸芦翻毒蜃，谿竹斗狂靡。
野鹭行看弋，江鱼或共叉。瘴氛恒积润，讹火亟生煨。
耳静烦喧蚁，魂惊怯怒蛙。风枝散陈叶，霜蔓绀寒瓜。
雾密前山桂，冰枯曲沼蘼。思乡比庄舄，遁世遇眭夸。
渔舍茨荒草，村桥卧古槎。御寒衾用罽，挹水勺仍椰。
窗蠹惟潜蝎，甍涎竞缀蜗。引泉开故窦，护药插新笆。
树怪花因槲，虫怜目待虾。骤歌喉易嘎，饶醉鼻成鼾。
曳捶牵羸马，垂蓑牧艾豕。已看能类鳖，犹讶雉为鹑。
谁采中原菽，徒巾下泽车。俚儿供苦笋，伧父馈酸楂。
劝策扶危杖，邀持当酒茶。道流征短褐，禅客会袈裟。
香饭舂菰米，珍蔬折五茄。方期饮甘露，更欲吸流霞。
屋鼠从穿瓦，林狙任攫拏。春衫裁白纻，朝帽挂乌纱。
屡叹恢恢网，频摇肃肃罟。衰荣因蓂莢，盈缺几虾蟆。
路识沟边柳，城闻陇上笳。共思捐佩处，千骑拥青緺。

卷 351_2【弘农公以硕德伟材屈于诬枉左官三岁复为大僚，天监昭明，人心感悦，宗元窜伏湘浦拜贺未由，谨献诗五十韵以毕微志】

柳宗元

知命儒为贵，时中圣所臧。处心齐宠辱，遇物任行藏。
关识新安地，封传临晋乡。挺生推豹蔚，遐步仰龙骧。
干有千寻竦，精闻百炼钢。茂功期舜禹，高韵状羲黄。
足逸诗书囿，锋摇翰墨场。雅歌张仲德，颂祝鲁侯昌。
宪府初腾价，神州转耀铎。右言盈简策，左辖备条纲。
响切晨趋佩，烟浓近侍香。司仪六礼洽，论将七兵扬。
合乐来仪凤，尊祠重饗羊。卿材优柱石，公器擅岩廊。
峻节临衡峤，和风满豫章。人归父母育，郡得股肱良。
细故谁留念，烦言肯过防。璧非真盗客，金有误持郎。
龟虎休前寄，貂蝉冠旧行。训刑方命吕，理剧复推张。
直用明销恶，还将道胜刚。敬逾齐国社，恩比召南棠。
希怨犹逢怒，多容竞忤强。火炎侵琬琰，鹰击谬鸾凰。
刻木终难对，焚芝未改芳。远迁逾桂岭，中徙滞餘杭。
顾土虽怀赵，知天讵畏匡。论嫌齐物诞，骚爱远游伤。
丽泽周群品，重明照万方。斗间收紫气，台上挂清光。
福为深仁集，妖从盛德禳。秦民啼吠亩，周土舞康庄。
采绶还垂艾，华簪更截肪。高居迁鼎邑，遥傅好书王。
碧树环金谷，丹霞映上阳。留欢唱容与，要醉对清凉。
故友仍同里，常僚每合堂。渊龙过许劭，冰鲤吊王祥。
玉漏天门静，铜驼御路荒。涧瀍秋潋滟，嵩少暮微茫。

遵渚徒云乐，冲天自不遑。降神终入辅，种德会明扬。
独弃伧人国，难窥夫子墙。通家殊孔李，旧好即潘杨。
世议排张挚，时情弃仲翔。不言缁绁枉，徒恨纆徽长。
贾赋愁单阏，邹书怯大梁。炯心那自是，昭世懒佯狂。
鸣玉机全息，怀沙事不忘。恋恩何敢死，垂泪对清湘。

卷 351_3 【酬韶州裴曹长使君寄道州吕八大使，因以见示二十韵一首】

柳宗元

金马尝齐入，铜鱼亦共颁。疑山看积翠，浚水想澄湾。
标榜同惊俗，清明两照奸。乘轺参孔仅，按节服侯獬。
贾傅辞宁切，虞童发未j。秉心方的的，腾口任à à。
圣理高悬象，爰书降罚钺。德风流海外，和气满人寰。
御魅恩犹贷，思贤泪自潜。在亡均寂寞，零落间惓鰥。
夙志随忧尽，残肌触瘴l。月光摇浅濫，风韵碎枯菅。
海俗衣犹卉，山夷髻不鬟。泥沙潜虺蜮，榛莽斗豺獍。
循省诚知惧，安排只自憫。食贫甘莽卤，被褐谢斓斑。
远物裁青麕，时珍饌白鹇。长捐楚客佩，未赐大夫环。
异政徒云仰，高踪不可攀。空劳慰憔悴，妍唱剧妖嫵。

卷 351_4 【酬娄秀才将之淮南见赠之什】

柳宗元

远弃甘幽独，谁云值故人。好音怜铩羽，濡沫慰穷鳞。
困志情惟旧，相知乐更新。浪游轻费日，醉舞讵伤春。
风月欢宁间，星霜分益亲。已将名是患，还用道为邻。
机事齐飘瓦，嫌疑比拾尘。高冠余肯赋，长铗子忘贫。
晚惊移律，睽携忽此辰。开颜时不再，绊足去何因。
海上销魂别，天边吊影身。只应西涧水，寂寞但垂纶。

卷 351_5 【酬娄秀才寓居开元寺，早秋月夜病中见寄】

柳宗元

客有故园思，潇湘生夜愁。病依居士室，梦绕羽人丘。
味道怜知止，遗名得自求。壁空残月曙，门掩候虫秋。
谬委双金重，难征杂佩酬。碧霄无枉路，徒此助离忧。

卷 351_6 【初秋夜坐赠吴武陵】

柳宗元

稍稍雨侵竹，翻翻鹊惊丛。美人隔湘浦，一夕生秋风。

积雾杳难极，沧波浩无穷。相思岂云远，即席莫与同。
若人抱奇音，朱弦絙枯桐。清商激西颢，泛滟凌长空。
自得本无作，天成谅非功。希声閤大朴，聳俗何由聪。

卷 351_7【晨诣超师院读禅经】

柳宗元

汲井漱寒齿，清心拂尘服。闲持贝叶书，步出东斋读。
真源了无取，妄迹世所逐。遗言冀可冥，缮性何由熟。
道人庭宇静，苔色连深竹。日出雾露馀，青松如膏沐。
澹然离言说，悟悦心自足。

卷 351_8【赠江华长老】

柳宗元

老僧道机熟，默语心皆寂。去岁别春陵，沿流此投迹。
室空无侍者，巾屨唯挂壁。一饭不愿馀，跏趺便终夕。
风窗疏竹响，露井寒松滴。偶地即安居，满庭芳草积。

卷 351_9 【巽上人以竹闲自采新茶见赠，酬之以诗】

柳宗元

芳丛翳湘竹，零露凝清华。复此雪山客，晨朝掇灵芽。
蒸烟俯石濑，咫尺凌丹崖。圆方丽奇色，圭璧无纤瑕。
呼儿爨金鼎，馀馥延幽遐。涤虑发真照，还源荡昏邪。
犹同甘露饭，佛事薰毗耶。咄此蓬瀛侣，无乃贵流霞。

卷 351_10 【零陵赠李卿元侍御简吴武陵】

柳宗元

理世固轻士，弃捐湘之湄。阳光竟四溟，敲石安所施。
铄羽集枯干，低昂互鸣悲。朔云吐风寒，寂历穷秋时。
君子尚容与，小人守竞危。惨凄日相视，离忧坐自滋。
尊酒聊可酌，放歌谅徒为。惜无协律者，窃眇弦吾诗。

卷 351_11 【界围岩水帘】

柳宗元

界围汇湘曲，青壁环澄流。悬泉粲成帘，罗注无时休。
韵磬叩凝碧，锵锵彻岩幽。丹霞冠其巔，想像凌虚游。

灵境不可状，鬼工谅难求。忽如朝玉皇，天冕垂前旒。
楚臣昔南逐，有意仍丹丘。今我始北旋，新诏释縲囚。
采真诚眷恋，许国无淹留。再来寄幽梦，遗贮催行舟。

卷 351_12【古东门行】

柳宗元

汉家三十六将军，东方震动横阵云。鸡鸣函谷客如雾，
貌同心异不可数。赤丸夜语飞电光，徼巡司隶眠如羊。
当街一叱百吏走，冯敬胸中函匕首。凶徒侧耳潜愜心，
悍臣破胆皆杜口。魏王卧内藏兵符，子西掩袂真无辜。
羌胡羯下一朝起，敌国舟中非所拟。安陵谁辨削砺功，
韩国讵明深井里。绝咽断骨那下补，万金宠赠不如土。

卷 351_13【寄韦珩】

柳宗元

初拜柳州出东郊，道旁相送皆贤豪。回眸炫晃别群玉，
独赴异域穿蓬蒿。炎烟六月咽口鼻，胸鸣肩举不可逃。
桂州西南又千里，漓水斗石麻兰高。阴森野葛交蔽日，
悬蛇结虺如蒲萄。到官数宿贼满野，缚壮杀老啼且号。
饥行夜坐设方略，笼铜枹鼓手所操。奇疮钉骨状如箭，

鬼手脱命争纤毫。今年噬毒得霍疾，支心搅腹戟与刀。
迩来气少筋骨露，苍白漈汨盈颠毛。君今矻矻又窜逐，
辞赋已复穷诗骚。神兵庙略频破虏，四溟不日清风涛。
圣恩倘忽念地苇，十年践蹈久已劳。幸因解网入鸟兽，
毕命江海终游遨。愿言未果身益老，起望东北心滔滔。

卷 351_14【奉和杨尚书郴州，追和故李中书夏日登北楼十韵之作，依本诗韵次用】

柳宗元

郡楼有遗唱，新和敌南金。境以道情得，人期幽梦寻。
层轩隔炎暑，迥野恣窥临。凤去徽音续，芝焚芳意深。
游鳞出陷浦，唳鹤绕仙岑。风起三湘浪，云生万里阴。
宏规齐德宇，丽藻竞词林。静契分忧术，闲同迟客心。
骅骝当远步，鸚鵡莫相侵。今日登高处，还闻梁父吟。

卷 351_15【杨尚书寄郴笔，知是小生本样，令更商榷使尽其功，辄献长句】

柳宗元

截玉铓锥作妙形，贮云含雾到南溟。尚书旧用裁天诏，
内史新将写道经。曲艺岂能裨损益，微辞只欲播芳馨。
桂阳卿月光辉遍，毫末应传顾兔灵。

卷 351_16 【南省转牒欲具江国图令尽通风俗故事】

柳宗元

圣代提封尽海壖，狼荒犹得纪山川。华夷图上应初录，
风土记中殊未传。椎髻老人难借问，黄茆深峒敢留连。
南宫有意求遗俗，试检周书王会篇。

卷 351_17 【与浩初上人同看山寄京华亲故】

柳宗元

海畔尖山似剑铓，秋来处处割愁肠。
若为化得身千亿，散上峰头望故乡。

卷 351_18 【再至界围岩水帘遂宿岩下】

柳宗元

发春念长违，中夏欣再睹。是时植物秀，杳若临悬圃。
歛阳讶垂冰，白日惊雷雨。笙簧潭际起，鸛鹤云间舞。
古苔凝青枝，阴草湿翠羽。蔽空素彩列，激浪寒光聚。
的皪沉珠渊，锵鸣捐佩浦。幽岩画屏倚，新月玉钩吐。
夜凉星满川，忽疑眠洞府。

卷 351_19 【诏追赴都回寄零陵亲故】

柳宗元

每忆纤鳞游尺泽，翻愁弱羽上丹霄。
岸傍古堠应无数，次第行看别路遥。

卷 351_20 【过衡山见新花开却寄弟】

柳宗元

故国名园久别离，今朝楚树发南枝。
晴天归路好相逐，正是峰前回雁时。

卷 351_21 【汨罗遇风】

柳宗元

南来不作楚臣悲，重入修门自有期。
为报春风汨罗道，莫将波浪枉明时。

卷 351_22 【朗州窦常员外寄刘二十八诗，见促行骑走笔酬赠】

柳宗元

投荒垂一纪，新诏下荆扉。疑比庄周梦，情如苏武归。

赐环留逸响，五马助征騑。不羨衡阳雁，春来前后飞。

卷 351_23 【离觞不醉，至驿却寄相送诸公】

柳宗元

无限居人送独醒，可怜寂寞到长亭。

荆州不遇高阳侣，一夜春寒满下厅。

卷 351_24 【北还登汉阳北原题临川驿】

柳宗元

驱车方向阙，回首一临川。多垒非余耻，无谋终自怜。

乱松知野寺，馀雪记山田。惆怅樵渔事，今还又落然。

卷 351_25 【善谑驿和刘梦得酹淳于先生】

柳宗元

水上鹄已去，亭中鸟又鸣。辞因使楚重，名为救齐成。

荒垄遽千古，羽觞难再倾。刘伶今日意，异代是同声。

卷 351_26 【诏追赴都二月至灞亭上】

柳宗元

十一年前南渡客，四千里外北归人。

诏书许逐阳和至，驿路开花处处新。

卷 351_27 【李西川荐琴石】

柳宗元

远师驺忌鼓鸣琴，去和南风愜舜心。

从此他山千古重，殷勤曾是奉徽音。

卷 351_28 【同刘二十八哭吕衡州，兼寄江陵李元二侍御】

柳宗元

衡岳新摧天柱峰，士林憔悴泣相逢。只令文字传青简，
不使功名上景钟。三亩空留悬磬室，九原犹寄若堂封。
遥想荆州人物论，几回中夜惜元龙。

卷 351_29 【奉酬杨侍郎丈因送八叔拾遗，戏赠诏追南来诸
宾二首】

柳宗元

贞一来时送彩笺，一行归雁慰惊弦。
翰林寂寞谁为主，鸣凤应须早上天。
一生判却归休，谓著南冠到头。
冶长虽解縲绁，无由得见东周。

卷 351_30 【商山临路有孤松往来斫以以为明，好事者怜之，
编竹成援遂其生植，感而赋诗】

柳宗元

孤松停翠盖，托根临广路。不以险自防，遂为明所误。

幸逢仁惠意，重此藩篱护。犹有半心存，时将承雨露。

卷 351_31【衡阳与梦得分路赠别】

柳宗元

十年憔悴到秦京，谁料翻为岭外行。伏波故道风烟在，
翁仲遗墟草树平。直以慵疏招物议，休将文字占时名。
今朝不用临河别，垂泪千行便濯缨。

卷 351_32【重别梦得】

柳宗元

二十年来万事同，今朝岐路忽西东。
皇恩若许归田去，晚岁当为邻舍翁。

卷 351_33【三赠刘员外】

柳宗元

信书成自误，经事渐知非。今日临岐别，何年待汝归。

卷 351_34 【再上湘江】

柳宗元

好在湘江水，今朝又上来。不知从此去，更遣几年回。

卷 351_35 【清水驿丛竹天水赵云余手种一十二茎】

柳宗元

檐下疏篁十二茎，襄阳从事寄幽情。
只应更使伶伦见，写尽雌雄双凤鸣。

卷 351_36 【长沙驿前南楼感旧】

柳宗元

海鹤一为别，存亡三十秋。今来数行泪，独上驿南楼。

卷 351_37 【桂州北望秦驿，手开竹径至钓矶，留待徐容州】

柳宗元

幽径为谁开，美人城北来。王程尚馀暇，一上子陵台。

卷 351_38 【登柳州城楼寄漳汀封连四州】

柳宗元

城上高楼接大荒，海天愁思正茫茫。惊风乱飐芙蓉水，
密雨斜侵薜荔墙。岭树重遮千里目，江流曲似九回肠。
共来百越文身地，犹自音书滞一乡。

卷 351_39 【柳州寄丈人周韶州】

柳宗元

越绝孤城千万峰，空斋不语坐高舂。印文生绿经旬合，
砚匣留尘尽日封。梅岭寒烟藏翡翠，桂江秋水露鰕鳙。
丈人本自忘机事，为想年来憔悴容。

卷三百五十二

卷 352_1 【登柳州峨山】

柳宗元

荒山秋日午，独上意悠悠。如何望乡处，西北是融州。

卷 352_2 【得卢衡州书因以诗寄】

柳宗元

临蒸且莫叹炎方，为报秋来雁几行。林邑东回山似戟，
牂牁南下水如汤。蒹葭淅沥含秋雾，橘柚玲珑透夕阳。
非是白蘋洲畔客，还将远意问潇湘。

卷 352_3 【答刘连州邦字】

柳宗元

连璧本难双，分符刺小邦。崩云下漓水，劈箭上浔江。

负弩啼寒狖，鸣枹惊夜猿。遥怜郡山好，谢守但临窗。

卷 352_4 【岭南江行】

柳宗元

瘴江南去入云烟，望尽黄茆是海边。山腹雨晴添象迹，
潭心日暖长蛟涎。射工巧伺游人影，飓母偏惊旅客船。
从此忧来非一事，岂容华发待流年。

卷 352_5 【柳州峒氓】

柳宗元

郡城南下接通津，异服殊音不可亲。青箬裹盐归峒客，
绿荷包饭趁虚人。鹅毛御腊缝山罽，鸡骨占年拜水神。
愁向公庭问重译，欲投章甫作文身。

卷 352_6 【酬徐二中丞普宁郡内池馆即事见寄】

柳宗元

鹧鸪念旧行，虚馆对芳塘。落日明朱槛，繁花照羽觞。
泉归沧海近，树入楚山长。荣贱俱为累，相期在故乡。

卷 352_7 【酬贾鹏山人郡内新栽松寓兴见赠二首】

柳宗元

芳朽自为别，无心乃玄功。夭夭日放花，荣耀将安穷。
青松遗涧底，擢莳兹庭中。积雪表明秀，寒花助葱茏。
贞幽夙有慕，持以延清风。无能常闭阁，偶以静见名。
奇姿来远山，忽似人家生。劲色不改旧，芳心与谁荣。
喧卑岂所安，任物非我情。清韵动竽瑟，谐此风中声。

卷 352_8 【种柳戏题】

柳宗元

柳州柳刺史，种柳柳江边。谈笑为故事，推移成昔年。
垂阴当覆地，耸干会参天。好作思人树，惭无惠化传。

卷 352_9 【柳州二月榕叶落尽偶题】

柳宗元

宦情羁思共凄凄，春半如秋意转迷。
山城过雨百花尽，榕叶满庭莺乱啼。

卷 352_10 【浩初上人见贻绝句欲登仙人山因以酬之】

柳宗元

珠树玲珑隔翠微，病来方外事多违。
仙山不属分符客，一任凌空锡杖飞。

卷 352_11 【雨中赠仙人山贾山人】

柳宗元

寒江夜雨声潺潺，晓云遮尽仙人山。
遥知玄豹在深处，下笑羈絆泥涂间。

卷 352_12 【别舍弟宗一】

柳宗元

零落残红倍黯然，双垂别泪越江边。一身去国六千里，
万死投荒十二年。桂岭瘴来云似墨，洞庭春尽水如天。
欲知此后相思梦，长在荆门郢树烟。

卷 352_13【奉和周二十二丈，酬郴州侍郎衡江夜泊得韶州书，并附当州生黄茶一封，率然成篇代章之作】

柳宗元

丘山仰德耀，天路下征骖。梦喜三刀近，书嫌五载违。
凝情江月落，属思岭云飞。会入司徒府，还邀周掾归。

卷 352_14【殷贤戏批书后寄刘连州并示孟仑二童】

柳宗元

书成欲寄庾安西，纸背应劳手自题。
闻道近来诸子弟，临池寻已厌家鸡。

卷 352_15【重赠二首】

柳宗元

闻道将雏向墨池，刘家还有异同词。
如今试遣隈墙问，已道世人那得知。
世上悠悠不识真，姜芽尽是捧心人。
若道柳家无子弟，往年何事乞西宾。

卷 352_16【叠前】

柳宗元

小学新翻墨沼波，羨君琼树散枝柯。
左家弄玉唯娇女，空觉庭前鸟迹多。

卷 352_17【叠后】

柳宗元

事业无成耻艺成，南宫起草旧连名。
劝君火急添功用，趁取当时二妙声。

卷 352_18【铜鱼使赴都寄亲友】

柳宗元

行尽关山万里余，到时闕并是荒墟。
附庸唯有铜鱼使，此后无因寄远书。

卷 352_19 【韩漳州书报彻上人亡因寄二绝】

柳宗元

早岁京华听越吟，闻君江海分逾深。
他时若写兰亭会，莫画高僧支道林。

频把琼书出袖中，独吟遗句立秋风。
桂江日夜流千里，挥泪何时到甬东。

卷 352_20 【柳州城西北隅种柑树】

柳宗元

手种黄柑二百株，春来新叶遍城隅。方同楚客怜皇树，
不学荆州利木奴。几岁开花闻喷雪，何人摘实见垂珠。
若教坐待成林日，滋味还堪养老夫。

卷 352_21 【闻彻上人亡寄侍郎杨丈】

柳宗元

东越高僧还姓汤，几时琼佩触鸣珰。
空花一散不知处，谁采金英与侍郎。

卷 352_22 【段九秀才处见亡友吕衡州书迹】

柳宗元

交侣平生意最亲，衡阳往事似分身。

袖中忽见三行字，拭泪相看是故人。

卷 352_23 【柳州寄京中亲故】

柳宗元

林邑山连瘴海秋，牂牁水向郡前流。

劳君远问龙城地，正北三千到锦州。

卷 352_24 【种木槿花】

柳宗元

上苑年年占物华，飘零今日在天涯。

只因长作龙城守，剩种庭前木槿花。

卷 352_25 【摘樱桃赠元居士，时在望仙亭南楼与朱道士同处】

柳宗元

海上朱樱赠所思，楼居况是望仙时。

蓬莱羽客如相访，不是偷桃一小儿。

卷 352_26 【酬曹侍御过象县见寄】

柳宗元

破额山前碧玉流，骚人遥驻木兰舟。

春风无限潇湘意，欲采蘋花不自由。

卷 352_27 【法华寺石门精舍三十韵】

柳宗元

拘情病幽郁，旷志寄高爽。

愿言怀名缙，东峰旦夕仰。始欣云雨霁，尤悦草木长。

道同有爱弟，披拂恣心赏。松谿窈窕入，石栈夤缘上。

萝葛绵层甍，莓苔侵标榜。密林互对耸，绝壁俨双敞。
堑峭出蒙笼，墟险临滉漾。稍疑地脉断，悠若天梯往。
结构罩群崖，回环驱万象。小劫不逾瞬，大千若在掌。
体空得化元，观有遗细想。喧烦困蠛蠓，跼蹐疲魍魉。
寸进谅何营，寻直非所枉。探奇极遥瞩，穷妙闚清响。
理会方在今，神开庶殊曩。兹游苟不嗣，浩气竟谁养。
道异诚所希，名宾匪余仗。超摅藉外奖，俯默有内朗。
鉴尔揖古风，终焉乃吾党。潜躯委缁锁，高步谢尘坱。
蓄志徒为劳，追踪将焉仿。淹留值颓暮，眷恋睇遐壤。
映日雁联轩，翻云波决滢。殊风纷已萃，乡路悠且广。
羁木畏漂浮，离旌倦摇荡。昔人叹违志，出处今已两。
何用期所归，浮图有遗像。幽蹊不盈尺，虚室有函丈。
微言信可传，申旦稽吾颡。

卷 352_28 【游朝阳岩遂登西亭二十韵】

柳宗元

谪弃殊隐沦，登陟非远郊。所怀缓伊郁，詎欲肩夷巢。
高岩瞰清江，幽窟潜神蛟。开旷延阳景，回薄攒林梢。
西亭构其巖，反宇临呀庖。背瞻星辰兴，下见云雨交。
惜非吾乡土，得以荫菁茆。羁贯去江介，世仕尚函峤。
故墅即沔川，数亩均肥饶。台馆葺荒丘，池塘疏沉坳。
会有圭组恋，遂贻山林嘲。薄躯信无庸，琐屑剧斗筭。
囚居固其宜，厚羞久已包。庭除植蓬艾，隙牖悬蟪蛄。
所赖山川客，扁舟枉长梢。挹流敌清觞，掇野代嘉肴。

适道有高言，取乐非弦匏。逍遥屏幽昧，淡薄辞喧嚣。
晨鸡不余欺，风雨闻嘒嘒。再期永日闲，提挈移中庖。

卷 352_29【湘口馆潇湘二水所会】

柳宗元

九疑浚倾奔，临源委萦回。会合属空旷，泓澄停风雷。
高馆轩霞表，危楼临山隈。兹辰始澄霁，纤云尽褰开。
天秋日正中，水碧无尘埃。杳杳渔父吟，叫叫羁鸿哀。
境胜岂不豫，虑分固难裁。升高欲自舒，弥使远念来。
归流驶且广，泛舟绝沿洄。

卷 352_30【登蒲州石矶望横江口潭岛深迥斜对香零山】

柳宗元

隐忧倦永夜，凌雾临江津。猿鸣稍已疏，登石娱清沦。
日出洲渚静，澄明晶无垠。浮晖翻高禽，沉景照文鳞。
双江汇西奔，诡怪潜坤珍。孤山乃北峙，森爽栖灵神。
洄潭或动容，岛屿疑摇振。陶埴兹择土，蒲鱼相与邻。
信美非所安，羁心屡逡巡。纠结良可解，纡郁亦已伸。
高歌返故室，自罔非所欣。

卷 352_31【南涧中题】

柳宗元

秋气集南涧，独游亭午时。回风一萧瑟，林影久参差。
始至若有得，稍深遂忘疲。羁禽响幽谷，寒藻舞沦漪。

去国魂已远，怀人泪空垂。孤生易为感，失路少所宜。
索寞竟何事，徘徊只自知。谁为后来者，当与此心期。

卷 352_32【游石角过小岭至长乌村】

柳宗元

志适不期贵，道存岂偷生。久忘上封事，复笑升天行。
窜逐宦湘浦，摇心剧悬旌。始惊陷世议，终欲逃天刑。

岁月杀忧栗，慵疏寡将迎。追游疑所爱，且复舒吾情。
石角恣幽步，长乌遂遐征。磴回茂树断，景晏寒川明。

旷望少行人，时闻田鹤鸣。风篁冒水远，霜稻侵山平。
稍与人事闲，益知身世轻。为农信可乐，居宠真虚荣。
乔木馀故国，愿言果丹诚。四支反田亩，释志东皋耕。

卷 352_33 【与崔策登西山】

柳宗元

鹤鸣楚山静，露白秋江晓。连袂度危桥，萦回出林杪。
西岑极远目，毫末皆可了。重叠九疑高，微茫洞庭小。
迥穷两仪际，高出万象表。驰景泛颓波，遥风递寒筱。
谪居安所习，稍厌从纷扰。生同胥靡遗，寿比彭铿夭。
蹇连困颠踣，愚蒙怯幽眇。非令亲爱疏，谁使心神悄。
偶兹遁山水，得以观鱼鸟。吾子幸淹留，缓我愁肠绕。

卷 352_34 【构法华寺西亭】

柳宗元

窜身楚南极，山水穷险艰。步登最高寺，萧散任疏顽。
西垂下斗绝，欲似窥人寰。反如在幽谷，榛翳不可攀。
命童恣披翦，葺宇横断山。割如判清浊，飘若升云间。
远岫攒众顶，澄江抱清湾。夕照临轩墀，栖鸟当我还。
菡萏溢嘉色，筼筻遗清斑。神舒屏羁锁，志适忘幽孱。
弃逐久枯槁，迨今始开颜。赏心难久留，离念来相关。
北望间亲爱，南瞻杂夷蛮。置之勿复道，且寄须臾闲。

卷 352_35【夏夜苦热登西楼】

柳宗元

苦热中夜起，登楼独褰衣。山泽凝暑气，星汉湛光辉。
火晶燥露滋，野静停风威。探汤汲阴井，炀灶开重扉。
凭阑久彷徨，流汗不可挥。莫辩亭毒意，仰诉璇与玑。
谅非姑射子，静胜安能希。

卷 352_36【觉衰】

柳宗元

久知老会至，不谓便见侵。今年宜未衰，稍已来相寻。
齿疏发就种，奔走力不任。咄此可奈何，未必伤我心。
彭聃安在哉，周孔亦已沉。古称寿圣人，曾不留至今。

但愿得美酒，朋友常共斟。是时春向暮，桃李生繁阴。
日照天正绿，杳杳归鸿吟。出门呼所亲，扶杖登西林。
高歌足自快，商颂有遗音。

卷 352_37【游南亭夜还叙志七十韵】

柳宗元

夙抱丘壑尚，率性恣游遨。中为吏役牵，十祀空悵劳。
外曲徇尘辙，私心寄英髦。进乏廓庙器，退非乡曲豪。
天命斯不易，鬼责将安逃。屯难果见凌，剥丧宜所遭。
神明固浩浩，众口徒嗷嗷。投迹山水地，放情咏离骚。
再怀曩岁期，容与驰轻舠。虚馆背山郭，前轩面江皋。
重叠间浦溆，迢迢驱岩壑。积翠浮澹滟，始疑负灵鳌。
丛林留冲飙，石砾迎飞涛。旷朗天景霁，樵苏远相号。
澄潭涌沉鸥，半壁跳悬猱。鹿鸣验食野，鱼乐知观濠。
孤赏诚所悼，暂欣良足褒。留连俯楸枰，注我壶中醪。
朵颐进芟实，擢手持蟹螯。炊稻视爨鼎，脍鲜闻操刀。
野蔬盈倾筐，颇杂池沼毛。缅慕鼓枻翁，啸咏哺其糟。
退想于陵子，三咽资李膺。斯道难为偕，沉忧安所韬。
曲渚怨鸿鹄，环洲凋兰茝。暮景回西岑，北流逝滔滔。
徘徊遂昏黑，远火明连艘。木落寒山静，江空秋月高。
敛袂戒还徒，善游矜所操。趣浅戢长枻，乘深屏轻篙。
旷望援深竿，哀歌叩鸣镳。中川恣超忽，漫若翔且翱。
淹泊遂所止，野风自颼颼。涧急惊鳞奔，蹊荒饥兽噪。
入门守拘絏，凄戚增郁陶。慕士情未忘，怀人首徒搔。
内顾乃无有，德輶甚鸿毛。名窃久自欺，食浮固云叨。
问牛悲衅钟，说彘惊临牢。永遁刀笔吏，宁期簿书曹。
中兴遂群物，裂壤分鞬橐。岷凶既云捕，吴虏亦已磨。
捍御盛方虎，谟明富伊咎。披山穷木禾，驾海逾蟠桃。

重来越裳雉，再返西旅獒。左右抗槐棘，纵横罗雁羔。
三辟咸肆宥，众生均覆焘。安得奉皇灵，在宥解天弢。
归诚慰松梓，陈力开蓬蒿。卜室有鄠杜，名田占沔沔。
磻溪近余基，阿城连故濠。螟蛉愿亲煦，荼堇甘自薅。
饥食期农耕，寒衣俟蚕缲。及盱足为温，满腹宁复饕。
安将蒯及菅，谁慕梁与膏。弋林驱雀鷃，渔泽从鳅魇。
观象嘉素履，陈诗谢干旄。方托麋鹿群，敢同骐驎槽。
处贱无溷浊，固穷匪淫慆。踉跄辞束缚，悦怿换煎熬。
登年徒负版，兴役趋代轲。目眩绝浑浑，耳喧息嘈嘈。
兹焉毕余命，富贵非吾曹。长沙哀纠纆，汉阴嗤桔槔。
苟伸击壤情，机事息秋豪。海雾多蓊郁，越风饶腥臊。
宁唯迫魑魅，所惧齐焮蕉。知瑩怀褚中，范叔恋绀袍。
伊人不可期，慷慨徒忉忉。

卷 352_38 【韦道安】

柳宗元

道安本儒士，颇擅弓剑名。二十游太行，暮闻号哭声。
疾驱前致问，有叟垂华缨。言我故刺史，失职还西京。
偶为群盗得，毫缕无馀赢。货财足非吝，二女皆娉婷。
苍黄见驱逐，谁识死与生。便当此殒命，休复事晨征。
一闻激高义，眦裂肝胆横。挂弓问所往，赳捷超峥嵘。
见盗寒涧阴，罗列方忿争。一矢毙酋帅，馀党号且惊。
麾令递束缚，纆索相拄撑。彼姝久褫魄，刃下俟诛刑。
却立不亲授，谕以从父行。捃收自担肩，转道趋前程。

夜发敲石火，山林如昼明。父子更抱持，涕血纷交零。
顿首愿归货，纳女称舅甥。道安奋衣去，义重利固轻。
师婚古所病，合姓非用兵。竭来事儒术，十载所能逞。
慷慨张徐州，朱邸扬前旌。投躯获所愿，前马出王城。
辕门立奇士，淮水秋风生。君侯既即世，麾下相敬倾。
立孤抗王命，钟鼓四野鸣。横溃非所壅，逆节非所婴。
举头自引刃，顾义谁顾形。烈士不忘死，所死在忠贞。
咄嗟徇权子，翦习犹趋荣。我歌非悼死，所悼时世情。

卷 352_39【哭连州凌员外司马】

柳宗元

废逐人所弃，遂为鬼神欺。才难不其然，卒与大患期。
凌人古受氏，吴世夸雄姿。寂寞富春水，英气方在斯。
六学诚一贯，精义穷发挥。著书逾十年，幽颐靡不推。
天庭掞高文，万字若波驰。记室征西府，宏谋耀其奇。
辔轩下东越，列郡苏疲羸。宛宛凌江羽，来栖翰林枝。
孝文留弓剑，中外方危疑。抗声促遗诏，定命由陈辞。
徒隶肃曹官，征赋参有司。出守乌江浒，老迁湟水湄。
高堂倾故国，葬祭限囚羸。仲叔继幽沦，狂叫唯童儿。
一门既无主，焉用徒生为。举声但呼天，孰知神者谁。
泣尽目无见，肾伤足不持。溘死委炎荒，臧获守灵帷。
平生负国谴，骸骨非敢私。盖棺未塞责，孤旆凝寒飈。
念昔始相遇，肺腑为君知。进身齐选择，失路同瑕疵。
本期济仁义，今为众所嗤。灭名竟不试，世义安可支。

恬死百忧尽，苟生万虑滋。顾余九逝魂，与子各何之。
我歌诚自恻，非独为君悲。

卷 352_40 【旦携谢山人至愚池】

柳宗元

新沐换轻帻，晓池风露清。自谐尘外意，况与幽人行。
霞散众山迥，天高数雁鸣。机心付当路，聊适羲皇情。

卷 352_41 【独觉】

柳宗元

觉来窗牖空，寥落雨声晓。良游怨迟暮，末事惊纷扰。
为问经世心，古人难尽了。

卷 352_42 【首春逢耕者】

柳宗元

南楚春候早，馀寒已滋荣。土膏释原野，百蛰竞所营。
缀景未及郊，穠人先耦耕。园林幽鸟啭，渚泽新泉清。
农事诚素务，羁囚阻平生。故池想芜没，遗亩当榛荆。

慕隐既有系，图功遂无成。聊从田父言，款曲陈此情。
眷然抚耒耜，回首烟云横。

卷 352_43 【溪居】

柳宗元

久为簪组累，幸此南夷谪。闲依农圃邻，偶似山林客。
晓耕翻露草，夜榜响溪石。来往不逢人，长歌楚天碧。

卷 352_44 【夏初雨后寻愚溪】

柳宗元

悠悠雨初霁，独绕清溪曲。引杖试荒泉，解带围新竹。
沉吟亦何事，寂寞固所欲。幸此息营营，啸歌静炎燠。

卷 352_45 【入黄溪闻猿】

柳宗元

溪路千里曲，哀猿何处鸣。孤臣泪已尽，虚作断肠声。

卷 352_46 【韦使君黄溪祈雨见召从行至祠下口号】

柳宗元

骄阳愆岁事，良牧念菑畲。列骑低残月，鸣笳度碧虚。
稍穷樵客路，遥驻野人居。谷口寒流净，丛祠古木疏。
焚香秋雾湿，奠玉晓光初。肸蚨巫言报，精诚礼物馀。
惠风仍偃草，灵雨会随车。俟罪非真吏，翻惭奉简书。

卷 352_47 【郊居岁暮】

柳宗元

屏居负山郭，岁暮惊离索。野迥樵唱来，庭空烧烬落。
世纷因事远，心赏随年薄。默默谅何为，徒成今与昨。

卷 352_48 【秋晓行南谷经荒村】

柳宗元

杪秋霜露重，晨起行幽谷。黄叶覆溪桥，荒村唯古木。
寒花疏寂历，幽泉微断续。机心久已忘，何事惊麋鹿。

卷 352_49【雨后晓行独至愚溪北池】

柳宗元

宿云散洲渚，晓日明村坞。高树临清池，风惊夜来雨。
予心适无事，偶此成宾主。

卷 352_50【中夜起望西园值月上】

柳宗元

觉闻繁露坠，开户临西园。寒月上东岭，泠泠疏竹根。
石泉远逾响，山鸟时一喧。倚楹遂至旦，寂寞将何言。

卷 352_51【零陵春望】

柳宗元

平野春草绿，晓莺啼远林。日晴潇湘渚，云断峒嵝岑。
仙驾不可望，世途非所任。凝情空景慕，万里苍梧阴。

卷 352_52 【从崔中丞过卢少尹郊居】

柳宗元

寓居湘岸四无邻，世网难婴每自珍。蒟药闲庭延国老，
开樽虚室值贤人。泉回浅石依高柳，径转垂藤闲绿筠。
闻道偏为五禽戏，出门鸥鸟更相亲。

卷 352_53 【夏昼偶作】

柳宗元

南州溽暑醉如酒，隐几熟眠开北牖。
日午独觉无馀声，山童隔竹敲茶臼。

卷 352_54 【雨晴至江渡】

柳宗元

江雨初晴思远步，日西独向愚溪渡。
渡头水落村径成，撩乱浮槎在高树。

卷 352_55 【江雪】

柳宗元

千山鸟飞绝，万径人踪灭。孤舟蓑笠翁，独钓寒江雪。

卷 352_56 【冉溪】

柳宗元

少时陈力希公侯，许国不复为身谋。风波一跌逝万里，
壮心瓦解空縲囚。縲囚终老无余事，愿卜湘西冉溪地。
却学寿张樊敬侯，种漆南园待成器。

卷 352_57 【法华寺西亭夜饮】

柳宗元

祇树夕阳亭，共倾三昧酒。雾暗水连阶，月明花覆牖。
莫厌尊前醉，相看未白首。

卷 352_58【戏题石门长老东轩】

柳宗元

石门长老身如梦，旃檀成林手所种。坐来念念非昔人，
万遍莲花为谁用。如今七十自忘机，贪爱都忘筋力微。
莫向东轩春野望，花开日出雉皆飞。

卷三百五十三

卷 353_1【茅檐下始栽竹】

柳宗元

瘴茅葺为宇，溽暑常侵肌。适有重膇疾，蒸郁宁所宜。
东邻幸导我，树竹邀凉飈。欣然惬吾志，荷锄西岩垂。
楚壤多怪石，垦凿力已疲。江风忽云暮，舆曳还相追。
萧瑟过极浦，旖旎附幽墀。贞根期永固，贻尔寒泉滋。
夜窗遂不掩，羽扇宁复持。清冷集浓露，枕簟凄已知。
网虫依密叶，晓禽栖迥枝。岂伊纷嚣间，重以心虑怡。
嘉尔亭亭质，自远弃幽期。不见野蔓草，蓊蔚有华姿。
谅无凌寒色，岂与青山辞。

卷 353_2【种仙灵毗】

柳宗元

穷陋阙自养，疴气剧嚣烦。隆冬乏霜霰，日夕南风温。
杖藜下庭际，曳踵不及门。门有野田吏，慰我飘零魂。
及言有灵药，近在湘西原。服之不盈旬，蹙蹙皆腾羶。

笑忤前即吏，为我擢其根。蔚蔚遂充庭，英翘忽已繁。
晨起自采曝，杵臼通夜喧。灵和理内藏，攻疾贵自源。
拥覆逃积雪，伸舒委馀暄。奇功苟可征，宁复资兰荪。

我闻畸人术，一气中夜存。能令深深息，呼吸还归跟。
疏放固难效，且以药饵论。痿者不忘起，穷者宁复言。
神哉辅吾足，幸及儿女奔。

卷 353_3 【种朮】

柳宗元

守闲事服饵，采朮东山阿。东山幽且阻，疲苶烦经过。
戒徒鬪灵根，封植闕天和。违尔涧底石，彻我庭中莎。
土膏滋玄液，松露坠繁柯。南东自成亩，缭绕纷相罗。

晨步佳色媚，夜眠幽气多。离忧苟可怡，孰能知其他。
爨竹茹芳叶，宁虑瘳与瘥。留连树蕙辞，婉婉采薇歌。
悟拙甘自足，激清愧同波。单豹且理内，高门复如何。

卷 353_4 【种白蓂荷】

柳宗元

血虫化为疠，夷俗多所神。衔猜每腊毒，谋富不为仁。

蔬果自远至，杯酒盈肆陈。言甘中必苦，何用知其真。
华洁事外饰，尤病中州人。钱刀恐贾害，饥至益逡巡。

窜伏常战栗，怀故逾悲辛。庶氏有嘉草，攻禴事久泯。
炎帝垂灵编，言此殊足珍。崎岖乃有得，托以全余身。
纷敷碧树阴，眄睐心所亲。

卷 353_5【新植海石榴】

柳宗元

弱植不盈尺，远意驻蓬瀛。月寒空阶曙，幽梦彩云生。
粪壤擢珠树，莓苔插琼英。芳根閤颜色，徂岁为谁荣。

卷 353_6【戏题阶前芍药】

柳宗元

凡卉与时谢，妍华丽兹晨。欹红醉浓露，窈窕留馀春。
孤赏白日暮，暄风动摇频。夜窗蔼芳气，幽卧知相亲。
愿致溱洧赠，悠悠南国春。

卷 353_7【始见白发题所植海石榴】

柳宗元

几年封植爱芳丛，韵艳朱颜竟不同。
从此休论上春事，看成古木对衰翁。

卷 353_8【植灵寿木】

柳宗元

白华照寒水，怡我适野情。前趋问长老，重复欣嘉名。
蹇连易衰朽，方刚谢经营。敢期齿杖赐，聊且移孤茎。
丛萼中竞秀，分房外舒英。柔条乍反植，劲节常对生。
循玩足忘疲，稍觉步武轻。安能事翦伐，持用资徒行。

卷 353_9【自衡阳移桂十馀本植零陵所住精舍】

柳宗元

谪官去南裔，清湘绕灵岳。晨登蒹葭岸，霜景霁纷浊。
离披得幽桂，芳本欣盈握。火耕困烟烬，薪采久摧剥。
道旁且不愿，岑岭况悠邈。倾筐壅故壤，栖息期鸾鷟。
路远清凉宫，一雨悟无学。南人始珍重，微我谁先觉。
芳意不可传，丹心徒自渥。

卷 353_10【湘岸移木芙蓉植龙兴精舍】

柳宗元

有美不自蔽，安能守孤根。盈盈湘西岸，秋至风露繁。
丽影别寒水，秾芳委前轩。芰荷谅难杂，反此生高原。

卷 353_11【早梅】

柳宗元

早梅发高树，迥映楚天碧。朔吹飘夜香，繁霜滋晓白。
欲为万里赠，杳杳山水隔。寒英坐销落，何用慰远客。

卷 353_12【南中荣橘柚】

柳宗元

橘柚怀贞质，受命此炎方。密林耀朱绿，晚岁有馀芳。
殊风限清汉，飞雪滞故乡。攀条何所叹，北望熊与湘。

卷 353_13 【红蕉】

柳宗元

晚英值穷节，绿润含朱光。以兹正阳色，窈窕凌清霜。
远物世所重，旅人心独伤。回晖眺林际，摵摵无遗芳。

卷 353_14 【巽公院五咏 · 净土堂】

柳宗元

结习自无始，沦溺穷苦源。流形及兹世，始悟三空门。
华堂开净域，图像焕且繁。清冷焚众香，微妙歌法言。
稽首愧导师，超遥谢尘昏。

卷 353_15 【巽公院五咏 · 曲讲堂】

柳宗元

寂灭本非断，文字安可离。曲堂何为设，高士方在斯。
圣默寄言宣，分别乃无知。趣中即空假，名相与谁期。
愿言绝闻得，忘意聊思惟。

卷 353_16【巽公院五咏·禅堂】

柳宗元

发地结菁茅，团团抱虚白。山花落幽户，中有忘机客。
涉有本非取，照空不待析。万籁俱缘生，窅然喧中寂。
心境本洞如，鸟飞无遗迹。

卷 353_17【巽公院五咏·芙蓉亭】

柳宗元

新亭俯朱槛，嘉木开芙蓉。清香晨风远，溽彩寒露浓。
潇洒出人世，低昂多异容。尝闻色空喻，造物谁为工。
留连秋月晏，迢递来山钟。

卷 353_18【巽公院五咏·苦竹桥】

柳宗元

危桥属幽径，缭绕穿疏林。迸箨分苦节，轻筠抱虚心。
俯瞰涓涓流，仰聆萧萧吟。差池下烟日，嘲哳鸣山禽。
谅无要津用，栖息有余阴。

卷 353_19 【梅雨】

柳宗元

梅实迎时雨，苍茫值晚春。愁深楚猿夜，梦断越鸡晨。
海雾连南极，江云暗北津。素衣今尽化，非为帝京尘。

卷 353_20 【零陵早春】

柳宗元

问春从此去，几日到秦原。凭寄还乡梦，殷勤入故园。

卷 353_21 【田家三首】

柳宗元

蓐食徇所务，驱牛向东阡。鸡鸣村巷白，夜色归暮田。
札札耒耜声，飞飞来乌鸢。竭兹筋力事，持用穷岁年。
尽输助徭役，聊就空自眠。子孙日已长，世世还复然。

篱落隔烟火，农谈四邻夕。庭际秋虫鸣，疏麻方寂历。
蚕丝尽输税，机杼空倚壁。里胥夜经过，鸡黍事筵席。
各言官长峻，文字多督责。东乡后租期，车毂陷泥泽。

公门少推恕，鞭朴恣狼藉。努力慎经营，肌肤真可惜。
迎新在此岁，唯恐踵前迹。

古道饶蒺藜，萦回古城曲。蓼花被堤岸，陂水寒更绿。
是时收获竟，落日多樵牧。风高榆柳疏，霜重梨枣熟。
行人迷去住，野鸟竞栖宿。田翁笑相念，昏黑慎原陆。
今年幸少丰，无厌饘与粥。

卷 353_22 【行路难三首】

柳宗元

君不见夸父逐日窥虞渊，跳踉北海超昆仑。
披霄决汉出沆漭，瞥裂左右遗星辰。须臾力尽道渴死。
狐鼠蜂蚁争噬吞。北方竚人长九寸，开口抵掌更笑喧。
啾啾饮食滴与粒，生死亦足终天年。睢盱大志小成遂，
坐使儿女相悲怜。

虞衡斤斧罗千山，工命采斫杙与椽。深林土剪十取一，
百牛连鞅摧双辕。万围千寻妨道路，东西蹶倒山火焚。
遗馀毫末不见保，躏跖涧壑何当存。群材未成质已夭，
突兀哮豁空岩峦。柏梁天灾武库火，匠石狼顾相愁冤。
君不见南山栋梁益稀少，爱材养育谁复论。

飞雪断道冰成梁，侯家炽炭雕玉房。蟠龙吐耀虎喙张，
熊蹲豹踞争低昂。攒峦丛嶂射朱光，丹霞翠雾飘奇香。

美人四向回明珰，雪山冰谷晞太阳。星躔奔走不得止，
奄忽双燕栖虹梁。风台露榭生光饰，死灰弃置参与商。
盛时一去贵反贱，桃笙葵扇安可当。

卷 353_23 【闻籍田有感】

柳宗元

天田不日降皇舆，留滞长沙岁又除。
宣室无由问釐事，周南何处托成书。

卷 353_24 【跂乌词】

柳宗元

城上日出群乌飞，鸦鸦争赴朝阳枝。刷毛伸翼和且乐，
尔独落魄今何为，无乃慕高近白日，三足妒尔令尔疾。
无乃饥啼走道旁，贪鲜攫肉人所伤。翘肖独足下丛薄，
口衔低枝始能跃。还顾泥涂备蝼蚁，仰看栋梁防燕雀。
左右六翮利如刀，踊身失势不得高。支离无趾犹自免，
努力低飞逃后患。

卷 353_25 【笼鹰词】

柳宗元

凄风淅沥飞严霜，苍鹰上击翻曙光。云披雾裂虹蜺断，
霹雳掣电捎平冈。砉然劲翮翦荆棘，下攫狐兔腾苍茫。

爪毛吻血百鸟逝，独立四顾时激昂。炎风溽暑忽然至，
羽翼脱落自摧藏。草中狸鼠足为患，一夕十顾惊且伤。
但愿清商复为假，拔去万累云间翔。

卷 353_26 【放鹧鸪词】

柳宗元

楚越有鸟甘且腴，嘲嘲自名为鹧鸪。徇媒得食不复虑，
机械潜发罹罝罟。羽毛摧折触笼籬，烟火煽赫惊庖厨。

鼎前芍药调五味，膳夫攘腕左右视。齐王不忍馘鯨牛，
简子亦放邯郸鸠。二子得意犹念此，况我万里为孤囚。
破笼展翅当远去，同类相呼莫相顾。

卷 353_27 【龟背戏】

柳宗元

长安新技出宫掖，喧喧初遍王侯宅。玉盘滴沥黄金钱，
皎如文龟丽秋天。八方定位开神卦，六甲离离齐上下。
投变转动玄机卑，星流霞破相参差。四分五裂势未已，

出无入有谁能知。乍惊散漫无处所，须臾罗列已如故。
徒言万事有盈虚，终朝一掷知胜负。修门象棋不复贵，
魏宫妆奁世所弃。岂如瑞质耀奇文，愿持千岁寿吾君。
庙堂巾笏非余慕，钱刀儿女徒纷纷。

卷 353_28 【闻黄鹂】

柳宗元

倦闻子规朝暮声，不意忽有黄鹂鸣。一声梦断楚江曲，
满眼故园春意生。目极千里无山河，麦芒际天摇清波。
王畿优本少赋役，务闲酒熟饶经过。此时晴烟最深处，

舍南巷北遥相语。翻日迴度昆明飞，凌风邪看细柳翥。
我今误落千万山，身同伧人不思还。乡禽何事亦来此，
令我生心忆桑梓。闭声回翅归务速，西林紫椹行当熟。

卷 353_29 【浑鸿胪宅闻歌效白纈】

柳宗元

翠帷双卷出倾城，龙剑破匣霜月明。朱唇掩抑悄无声，
金簧玉磬宫中生。下沉秋火激太清，天高地迥凝日晶，
羽觞荡漾何事倾。

卷 353_30 【杨白花】

柳宗元

杨白花，风吹渡江水。坐令宫树无颜色，
摇荡春光千万里。茫茫晓日下长秋，哀歌未断城鸦起。

卷 353_31 【渔翁】

柳宗元

渔翁夜傍西岩宿，晓汲清湘燃楚竹。烟销日出不见人，
欸乃一声山水绿。回看天际下中流，岩上无心云相逐。

卷 353_32 【饮酒】

柳宗元

今夕少愉乐，起坐开清尊。举觞酹先酒，为我驱忧烦。
须臾心自殊，顿觉天地暄。连山变幽晦，绿水函晏温。

蔼蔼南郭门，树木一何繁。清阴可自庇，竟夕闻佳言。
尽醉无复辞，偃卧有芳荪。彼哉晋楚富，此道未必存。

卷 353_33 【读书】

柳宗元

幽沉谢世事，俯默窥唐虞。上下观古今，起伏千万途。
遇欣或自笑，感戚亦以吁。缥帙各舒散，前后互相逾。

瘴疠扰灵府，日与往昔殊。临文乍了了，彻卷兀若无。
竟夕谁与言，但与竹素俱。倦极便倒卧，熟寐乃一苏。

欠伸展肢体，吟咏心自愉。得意适其适，非愿为世儒。
道尽即闭口，萧散捐囚拘。巧者为我拙，智者为我愚。
书史足自悦，安用勤与劬。贵尔六尺躯，勿为名所驱。

卷 353_34 【感遇二首】

柳宗元

西陆动凉气，惊乌号北林。栖息岂殊性，集枯安可任。
鸿鹄去不返，勾吴阻且深。徒嗟日沉湎，丸鼓惊奇音。
东海久摇荡，南风已骎骎。坐使青天暮，小星愁太阴。

众情嗜奸利，居货捐千金。危根一以振，齐斧来相寻。
揽衣中夜起，感物涕盈襟。微霜众所践，谁念岁寒心。
旭日照寒野，鸟斯起蒿莱。啁啾有余乐，飞舞西陵隈。
回风旦夕至，零叶委陈荄。所栖不足恃，鹰隼纵横来。

卷 353_35 【咏史】

柳宗元

燕有黄金台，远致望诸君。嗷嗷事强怨，三岁有奇勋。
悠哉辟疆理，东海漫浮云。宁知世情异，嘉谷坐煨焚。

致令委金石，谁顾蠹蠕群。风波欻潜构，遗恨意纷纭。
岂不善图后，交私非所闻。为忠不顾内，晏子亦垂文。

卷 353_36 【咏三良】

柳宗元

束带值明后，顾盼流辉光。一心在陈力，鼎列夸四方。
款款效忠信，恩义皎如霜。生时亮同体，死没宁分张。
壮躯闭幽隧，猛志填黄肠。殉死礼所非，况乃用其良。
霸基弊不振，晋楚更张皇。疾病命固乱，魏氏言有章。
从邪陷厥父，吾欲讨彼狂。

卷 353_37 【咏荆轲】

柳宗元

燕秦不两立，太子已为虞。千金奉短计，匕首荆卿趋。
穷年徇所欲，兵势且见屠。微言激幽愤，怒目辞燕都。
朔风动易水，挥爵前长驱。函首致宿怨，献田开版图。
炯然耀电光，掌握罔正夫。造端何其锐，临事竟趑趄。

长虹吐白日，仓卒反受诛。按剑赫凭怒，风雷助号呼。
慈父断子首，狂走无容躯。夷城芟七族，台观皆焚污。
始期忧患弭，卒动灾祸枢。秦皇本诈力，事与桓公殊。
奈何效曹子，实谓勇且愚。世传故多谬，太史征无且。

卷 353_38 【掩役夫张进骸】

柳宗元

生死悠悠尔，一气聚散之。偶来纷喜怒，奄忽已复辞。
为役孰贱辱，为贵非神奇。一朝纆息定，枯朽无妍媸。

生平勤皂枥，剡秣不告疲。既死给槥槨，葬之东山基。
奈何值崩湍，荡析临路垂。髁然暴百骸，散乱不复支。

从者幸告余，眷之涓然悲。猫虎获迎祭，犬马有盖帷。
伫立唁尔魂，岂复识此为。畚鍤载埋瘞，沟渎护其危。

我心得所安，不谓尔有知。掩骼著春令，兹焉适其时。
及物非吾事，聊且顾尔私。

卷 353_39 【省试观庆云图诗】

柳宗元

设色既成象，卿云示国都。九天开秘祉，百辟赞嘉谟。
抱日依龙袞，非烟近御炉。高标连汗漫，迥望接虚无。
裂素荣光发，舒华瑞色敷。恒将配尧德，垂庆代河图。

· 全唐诗 ·

卷 353_40 【春怀故园】

柳宗元

九扈鸣已晚，楚乡农事春。悠悠故池水，空待灌园人。

卷三百五十四

卷 354_1 【团扇歌】

刘禹锡

团扇复团扇，奉君清暑殿。秋风入庭树，从此不相见。
上有乘鸾女，苍苍虫网遍。明年入怀袖，别是机中练。

卷 354_2 【宜城歌】

刘禹锡

野水绕空城，行尘起孤驿。荒台侧生树，石碣阳镌额。
靡靡度行人，温风吹宿麦。

卷 354_3 【顺阳歌】

刘禹锡

朝辞官军驿，前望顺阳路。野水啮荒坟，秋虫镂宫树。
曾闻天宝末，胡马西南骛。城守鲁将军，拔城从此去。

卷 354_4 【莫瑶歌】

莫瑶自生长，名字无符籍。市易杂蛟人，婚姻通木客。
星居占泉眼，火种开山脊。夜渡千仞谿，含沙不能射。

卷 354_5 【度桂岭歌】

刘禹锡

桂阳岭，下下复高高。人稀鸟兽骇，地远草木豪。
寄言迁金子，知余歌者劳。

卷 354_6 【插田歌】

刘禹锡

冈头花草齐，燕子东西飞。田塍望如线，白水光参差。
农妇白纈裙，农父绿蓑衣。齐唱郢中歌，嚶伫如竹枝。

但闻怨响音，不辨俚语词。时时一大笑，此必相嘲嗤。
水平苗漠漠，烟火生墟落。黄犬往复还，赤鸡鸣且啄。

路旁谁家郎，乌帽衫袖长。自言上计吏，年幼离帝乡。
田夫语计吏，君家侬定谿。一来长安道，眼大不相参。

计吏笑致辞，长安真大处。省门高轲峨，侬入无度数。
昨来补卫士，唯用筒竹布。君看二三年，我作官人去。

卷 354_7 【葡萄歌】

刘禹锡

野田生葡萄，缠绕一枝高。移来碧墀下，张王日日高。
分岐浩繁缛，修蔓蟠诘曲。扬翘向庭柯，意思如有属。
为之立长檠，布濩当轩绿。米液溉其根，理疏看渗漉。
繁葩组绶结，悬实珠玑蹙。马乳带轻霜，龙鳞曜初旭。
有客汾阴至，临堂瞪双目。自言我晋人，种此如种玉。
酿之成美酒，令人饮不足。为君持一斗，往取凉州牧。

卷 354_8 【蛮子歌】

刘禹锡

蛮语钩輳音，蛮衣斑斓布。熏狸掘沙鼠，时节祠盘瓠。
忽逢乘马客，恍若惊麇顾。腰斧上高山，意行无旧路。

卷 354_9 【马嵬行】

刘禹锡

绿野扶风道，黄尘马嵬驿。路边杨贵人，坟高三四尺。

乃问里中儿，皆言幸蜀时。军家诛戚族，天子舍妖姬。
群吏伏门屏，贵人牵帝衣。低回转美目，风日为无晖。
贵人饮金屑，倏忽舜英暮。平生服杏丹，颜色真如故。
属车尘已远，里巷来窥觑。共爱宿妆妍，君王画眉处。
履綦无复有，履组光未灭。不见岩畔人，空见凌波袜。
邮童爱踪迹，私手解鞶结。传看千万眼，缕绝香不歇。
指环照骨明，首饰敌连城。将入咸阳市，犹得贾胡惊。

卷 354_10【百花行】

刘禹锡

长安百花时，风景宜轻薄。无人不沽酒，何处不闻乐。
春风连夜动，微雨凌晓濯。红焰出墙头，雪光映楼角。
繁紫韵松竹，远黄绕篱落。临路不胜愁，轻烟去何托。
满庭荡魂魄，照庑成丹渥。烂熳簇颠狂，飘零劝行乐。
时节易春晚，清阴覆池阁。唯有安石榴，当轩慰寂寞。

卷 354_11【壮士行】

刘禹锡

阴风振寒郊，猛虎正咆哮。徐行出烧地，连吼入黄茅。
壮士走马去，镫前弯玉弣。叱之使人立，一发如铍交。
悍睛忽星堕，飞血溅林梢。彪炳为我席，膻腥充我庖。

里中欣害除，贺酒纷呶号。明日长桥上，倾城看斩蛟。

卷 354_12【苦雨行】

刘禹锡

悠悠飞走情，同乐在阳和。岁中三百日，常恐风雨多。
天人信遐远，时节易蹉跎。洞房有明烛，无乃酣且歌。

卷 354_13【华山歌】

刘禹锡

洪垆作高山，元气鼓其橐。俄然神功就，峻拔在寥廓。
灵迹露指爪，杀气见棱角。凡木不敢生，神仙聿来托。
天资帝王宅，以我为关钥。能令下国人，一见换神骨。
高山固无限，如此方为岳。丈夫无特达，虽贵犹碌碌。

卷 354_14【抛球乐词】

刘禹锡

五彩绣团圆，登君玳瑁筵。最宜红烛下，偏称落花前。
上客如先起，应须赠一船。春早见花枝，朝朝恨发迟。

及看花落后，却忆未开时。幸有抛球乐，一杯君莫辞。

卷 354_15【华清词】

刘禹锡

日出骊山东，裴回照温泉。楼台影玲珑，稍稍开白烟。
言昔太上皇，常居此祈年。风中闻清乐，往往来列仙。
翠华入五云，紫气归上玄。哀哀生人泪，泣尽弓剑前。
圣道本自我，凡情徒颺然。小臣感玄化，一望青冥天。

卷 354_16【送春曲三首】

刘禹锡

春向晚，春晚思悠哉。风云日已改，花叶自相催。
漠漠空中去，何时天际来。

春已暮，冉冉如人老，映叶见残花，连天是青草。
可怜桃与李，从此同桑枣。

春景去，此去何时回。游人千万恨，落日上高台。
寂寞繁花尽，流莺归莫来。

卷 354_17【初夏曲三首】

刘禹锡

铜壶方促夜，斗柄暂南回。稍嫌单衣重，初怜北户开。
西园花已尽，新月为谁来。

时节过繁华，阴阴千万家。巢禽命子戏，园果坠枝斜。
寂寞孤飞蝶，窥丛觅晚花。

绿水风初暖，青林露早晞。麦陇雉朝雊，桑野人暮归。
百舌悲花尽，平芜来去飞。

卷 354_18【捣衣曲】

刘禹锡

爽砧应秋律，繁杵含凄风。一一远相续，家家音不同。
户庭凝露清，伴侣明月中。长裾委襞积，轻珮垂璁珑。
汗余衫更馥，钿移麝半空。报寒惊边雁，促思闻候虫。
天狼正芒角，虎落定相攻。盈筐寄何处，征人如转蓬。

卷 354_19【畚田行】

刘禹锡

何处好畚田，团团缦山腹。钻龟得雨卦，上山烧卧木。
惊麋走且顾，群雉声咿喔。红焰远成霞，轻煤飞入郭。
风引上高岑，猎猎度青林。青林望靡靡，赤光低复起。
照潭出老蛟，爆竹惊山鬼。夜色不见山，孤明星汉间。
如星复如月，俱逐晓风灭。本从敲石光，遂至烘天热。
下种暖灰中，乘阳拆牙孽。苍苍一雨后，苕颖如云发。
巴人拱手吟，耕耨不关心。由来得地势，径寸有余金。

卷 354_20【鷓鴣吟】

刘禹锡

朝阳有鸣凤，不闻千万祀。鷓鴣催众芳，晨间先入耳。
秋风白露晞，从是尔啼时。如何上春日，唧唧满庭飞。

卷 354_21【观云篇】

刘禹锡

兴云感阴气，疾足如见机。晴来意态行，有若功成归。

葱茏含晚景，洁白凝秋晖。夜深度银汉，漠漠仙人衣。

卷 354_22【养鸷词】

刘禹锡

养鸷非玩形，所资击鲜力。少年昧其理，日日哺不息。
探雏网黄口，旦暮有馀食。宁知下鞲时，翅重飞不得。
毡毳止林表，狡兔自南北。饮啄既已盈，安能劳羽翼。

卷 354_23【别友人后得书因以诗赠】

刘禹锡

前时送君去，挥手青门桥。路转不相见，犹闻马萧萧。
今得出关书，行程日已遥。春还迟君至，共结芳兰苕。

卷 354_24【送华阴尉张荅赴邕府使幕】

刘禹锡

昔忝南宫郎，往来东观频。尝披燕公传，耸若窥三辰。
翊圣崇国本，像贤正朝伦。高视缅今古，清风夙无邻。
兰锜照通衢，一家十朱轮。鄴国嗣侯绝，韦卿世业贫。

夫子承大名，少年振芳尘。青袍仙掌下，矫首凌烟旻。
公冶本非罪，潘郎一为民。风霜苦摇落，坚白无缁磷。
一旦逢良时，天光烛幽沦。重为长裾客，佐彼观风臣。
分野穷禹画，人烟过虞巡。不言此行远，所乐相知新。
雨起巫山阳，鸟鸣湘水滨。离筵出苍莽，别曲多悲辛。
今朝一杯酒，明日千里人。从此孤舟去，悠悠天海春。

卷 354_25【送湘阳熊判官孺登府罢归钟陵，因寄呈江西裴中丞二十三兄】

刘禹锡

射策志未就，从事岁云除。筐留马卿赋，袖有刘弘书。
忽见夏木深，怅然忆吾庐。复持州民刺，归谒专城居。
君家诚易知，胜绝倾里闾。人言北郭生，门有卿相舆。
钟陵霭千里，带郭西江水。朱槛照河宫，旗亭绿云里。
前年初缺守，慎简由宸扆。临轩弄郡章，得人方付此。
是时左冯翊，天下第一理。贵臣持牙璋，优诏发青纸。
迎风奸吏免，先令疲人喜。何武劾腐儒，陈蕃礼高士。
昔升君子堂，腰下绶犹黄。汾阴有宝气，赤堇多奇铓。
束简下曲台，佩鞶来历阳。绮筵陪一笑，兰室袭余芳。
风水忽异势，江湖遂相忘。因君倘借问，为话老沧浪。

卷 354_26 【送韦秀才道冲赴制举】

刘禹锡

惊禽一辞巢，栖息无少安。秋扇一离手，流尘蔽霜纨。
故侣不可追，凉风日已寒。远逢杜陵士，别尽平生欢。
逐客无印绶，楚江多芷兰。因居暇时游，长铗不复弹。
阅书南轩霁，絃瑟清夜阑。万境身外寂，一杯腹中宽。
伊昔玄宗朝，冬卿冠鸳鸾。肃穆升内殿，从容领儒冠。
游夏无措词，阳秋垂不刊。至今群玉府，学者空纵观。
世人希德门，揭若攀峰峦。之子尚明训，锵如振琅玕。
一旦西上书，斑衣拂征鞍。荆台宿暮雨，汉水浮春澜。
君门起天中，多士如星攒。烟霞覆双阙，抃舞罗千官。
清漏滴铜壶，仙厨下雕槃。荧煌仰金榜，错落濡飞翰。
古来才杰士，所嗟遭时难。一鸣从此始，相望青云端。

卷 354_27 【送李策秀才还湖南，因寄幕中亲故兼简衡州吕
八郎中】

刘禹锡

深春风日净，昼长幽鸟鸣。仆夫前致词，门有白面生。
摄衣相问讯，解带坐南荣。端志见眉睫，苦言发精诚。
因出怀中文，调孤词亦清。悄如促柱弦，掩抑多不平。
乃言本蜀士，世降岷山灵。前人秉艺文，高视来上京。

曳绶司徒府，所从信国桢。析薪委宝林，善响继家声。
何处翳附郭，几人思郅成。云天望乔木，风水悲流萍。
前与计吏西，始列贡士名。森然就笔札，从试春官卿。
帝城岐路多，万足伺晨星。茫茫风尘中，工拙同有营。
寒女劳夜织，山苗荣寸茎。侯门方击钟，衣褐谁将迎。
弱羽果摧颓，壮心郁怍怍。谅无蟠木容，聊复蓬累行。
昨日讯灵龟，繇言利艰贞。当求舍拔中，必在审己明。
誓将息薄游，焦思穷笔精。蒔兰在幽渚，安得扬芬馨。
曰余摧落者，散质负华缨。一聆苦辛词，再动伊郁情。
身弃言不动，爱才心尚惊。恨无羊角风，使尔化北溟。
论罢情益亲，涉旬忘归程。日携邑中客，闲眺江上城。
昼憩命金罍，宵谈转璿衡。薰风香麈尾，月露濡桃笙。
忽被戒羸骖，薄言事南征。火云蔚千里，旅思浩已盈。
湘江含碧虚，衡岭浮翠晶。岂伊山水异，适与人事并。
油幕侣昆丘，粲然叠瑶琼。庾楼见清月，孔坐多绿醪。
复有衡山守，本自云龙庭。抗志在灵府，发越侔咸英。
一挥出荥阳，惠彼嗤嗤氓。隼旟辞灞水，居者皆涕零。
惟昔与伊人，交欢经宿龄。一从云雨散，滋我鄙吝萌。
北渚不堪愁，南音谁复听。离忧若去水，浩漾无时停。
尝闻祝融峰，上有神禹铭。古石琅玕姿，秘文螭虎形。
圣功莫远服，神物拥休祯。贤人在其下，仿佛疑蓬瀛。
君行历郡斋，大袂拂双旌。饰容遇朗鉴，肝鬲可以呈。
昔日马相如，临邛坐尽倾。勉君刷羽翰，蚤取凌青冥。

卷 354_28 【送张盩赴举诗】

刘禹锡

尔生始悬弧，我作座上宾。引箸举汤饼，祝词天麒麟。
今成一丈夫，坎坷愁风尘。长裾来谒我，自号庐山人。
道旧与抚孤，悄然伤我神。依依见眉睫，嘿嘿含悲辛。

永怀同年友，追想出谷晨。三十二君子，齐飞凌烟旻。
曲江一会时，后会已凋沦。况今三十载，阅世难重陈。
盛时一已过，来者日日新。不如摇落树，重有明年春。

火后见琼璫，霜馀识松筠。肃风乃独秀，武部亦绝伦。
尔今持我诗，西见二重臣。成贤必念旧，保贵在安贫。
清时为丞郎，气力侔陶钧。乞取斗升水，因之云汉津。

卷 354_29 【和州送钱侍御自宣州幕拜官便于华州覲省】

刘禹锡

五彩绣衣裳，当年正相称。春风旧关路，归去真多兴。
兰陔行可采，莲府犹回瞪。杨家绀幃迎，谢守瑶华赠。
御街草泛滟，台柏烟含凝。曾是平生游，无因理归乘。

卷 354_30【送僧方及南谒柳员外】

刘禹锡

昔事庐山远，精舍虎溪东。朝阳照瀑水，楼阁虹霓中。
骋望羡游云，振衣若秋蓬。旧房闭松月，远思吟江风。

古寺历头陀，奇峰扳祝融。南登小桂岭，却望归塞鸿。
衣袂贮文章，自言学雕虫。抢榆念陵厉，覆篑图穹崇。

远郡多暇日，有诗访禅宫。石门耸峭绝，竹院含空濛。
幽响滴岩溜，晴芳飘野丛。海云悬飓母，山果属狙公。

忽忆吴兴郡，白蘋正葱茏。愿言挹风采，邈若窥华嵩。
桂水夏澜急，火山宵焰红。三衣濡菌露，一锡飞烟空。
勿谓翻译徒，不为文雅雄。古来赏音者，焦爨得孤桐。

卷 354_31【送惟良上人】

刘禹锡

高斋洒寒水，是夕山僧至。玄牝无关锁，琼书舍文字。
灯明香满室，月午霜凝地。语到不言时，世间人尽睡。

卷 354_32 【翠微寺有感】

刘禹锡

吾王昔游幸，离宫云际开。朱旗迎夏早，凉轩避暑来。
汤饼赐都尉，寒冰颁上才。龙髯不可望，玉座生尘埃。

卷 354_33 【观柘枝舞二首】

刘禹锡

胡服何葳蕤，仙仙登绮墀。神飙猎红蕖，龙烛映金枝。
垂带覆纤腰，安钿当妩眉。翘袖中繁鼓，倾眸溯华榷。
燕秦有旧曲，淮南多冶词。欲见倾城处，君看赴节时。

山鸡临清镜，石燕赴遥津。何如上客会，长袖入华裈。
体轻似无骨，观者皆耸神。曲尽回身处，层波犹注人。

卷 354_34 【连州腊日观莫徭猎西山】

刘禹锡

海天杀气薄，蛮军步伍嚣。林红叶尽变，原黑草初烧。
围合繁钲息，禽兴大旆摇。张罗依道口，噉犬上山腰。

猜鹰虑奋迅，惊鹿时踟跳。瘴云四面起，腊雪半空消。
箭头余鹄血，鞍傍见雉翘。日暮还城邑，金笳发丽谯。

卷 354_35 【寄陕州姚中丞】

刘禹锡

八月天气肃，二陵风雨收。旌旗阙下来，云日关东秋。
禹迹想前事，汉台馀故丘。徘徊襟带地，左右帝王州。
留滞悲昔老，恩光荣彻侯。相思望棠树，一寄商声讴。

卷 354_36 【奉酬湖州崔郎中见寄五韵】

刘禹锡

山阳昔相遇，灼灼晨葩鲜。同游翰墨场，和乐埶簷然。
一落名宦途，浩如乘风船。行当衰暮日，卧理淮海边。
犹期谢病后，共乐桑榆年。

卷 354_37 【学阮公体三首】

刘禹锡

少年负志气，信道不从时。只言绳自直，安知室可欺。

百胜难虑敌，三折乃良医。人生不失意，焉能慕知己。
朔风悲老骥，秋霜动鹳鹑。出门有远道，平野多层阴。
灭没驰绝塞，振迅拂华林。不因感衰节，安能激壮心。
昔贤多使气，忧国不谋身。目览千载事，心交上古人。
侯门有仁义，灵台多苦辛。不学腰如磬，徒使甑生尘。

卷 354_38【秋晚题湖城驿池上亭】

刘禹锡

秋次池上馆，林塘照南荣。尘衣纷未解，幽思浩已盈。
风莲坠故萼，露菊含晚英。恨为一夕客，愁听晨鸡鸣。

卷 354_39【贾客词】

刘禹锡

贾客无定游，所游唯利并。眩俗杂良苦，乘时取重轻。
心计析秋毫，摇钩侔悬衡。锥刀既无弃，转化日已盈。
邀福祷波神，施财游化城。妻约雕金钏，女垂贯珠缨。
高赀比封君，奇货通幸卿。趋时鹗鸟思，藏镪盘龙形。
大艑浮通川，高楼次旗亭。行止皆有乐，关梁自无征。
农夫何为者，辛苦事寒耕。

卷 354_40 【调瑟词】

刘禹锡

调瑟在张弦，弦平音自足。朱弦二十五，缺一不成曲。
美人爱高张，瑶轸再三促。上弦虽独响，下应不相属。
日暮声未和，寂寥一枯木。却顾膝上弦，流泪难相续。

卷 354_41 【读张曲江集作】

刘禹锡

圣言贵忠恕，至道重观身。法在何所恨，色相斯为仁。
良时难久恃，阴谪岂无因。寂寞韶阳庙，魂归不见人。

卷 354_42 【偶作二首】

刘禹锡

终朝对尊酒，嗜兴非嗜甘。终日偶众人，纵言不纵谈。
世情闲静见，药性病多谙。寄谢嵇中散，予无甚不堪。

万卷堆床书，学者识其真。万里长江水，征夫渡要津。
养生非但药，悟佛不因人。燕石何须辨，逢时即至珍。

卷 354_43【昏镜词】

刘禹锡

昏镜非美金，漠然丧其晶。陋容多自欺，谓若他镜明。
瑕疵既不见，妍态随意生。一日四五照，自言美倾城。
饰带以纹绣，装匣以琼瑛。秦宫岂不重，非适乃为轻。

卷 354_44【咏古二首有所寄】

刘禹锡

车音想辘辘，不见綦下尘。可怜平阳第，歌舞娇青春。
金屋容色在，文园词赋新。一朝复得幸，应知失意人。
寂寥照镜台，遗基古南阳。真人昔来游，翠凤相随翔。
目成在桑野，志遂贮椒房。岂无三千女，初心不可忘。

卷 354_45【磨镜篇】

刘禹锡

流尘翳明镜，岁久看如漆。门前负局人，为我一磨拂。
萍开绿池满，晕尽金波溢。白日照空心，圆光走幽室。
山神妖气沮，野魅真形出。却思未磨时，瓦砾来唐突。

卷三百五十五

卷 355_1【登司马错古城】

刘禹锡

将军将秦师，西南奠遐服。故垒清江上，苍烟晦乔木。
登临直萧辰，周览壮前躅。堑平陈叶满，墉高秋蔓绿。
废井抽寒菜，毁台生鲁谷。耕人得古器，宿雨多遗镞。
楚塞郁重叠，蛮溪纷诘曲。留此数仞基，几人伤远目。

卷 355_2【谒柱山会禅师】

刘禹锡

我本山东人，平生多感慨。弱冠游咸京，上书金马外。
结交当世贤，驰声溢四塞。勉修贵及早，狃捷不知退。
锱铢扬芬馨，寻尺招瑕纇。淹留郢南都，摧颓羽翰碎。
安能咎往事，且欲去沉痾。吾师得真如，寄在人寰内。
哀我堕名网，有如翺飞辈。曈曈揭智烛，照使出昏昧。
静见玄关启，歆然初心会。夙尚一何微，今得信可大。
觉路明证入，便门通忏悔。悟理言自忘，处屯道犹泰。

色身岂吾宝，慧性非形碍。思此灵山期，未卜何年载。

卷 355_3 【卧病闻常山旋师，策勋宥过，王泽大洽，因寄李六侍郎】

刘禹锡

寂寂重寂寂，病夫卧秋斋。夜蛩思幽壁，槁叶鸣空阶。
南国异气候，火旻尚昏霾。瘴烟跼飞羽，沴气伤百骸。

昨闻凯歌旋，饮至酒如淮。无战陋丹水，垂仁轻槁街。
清庙既策勋，圆丘俟燔柴。车书一以混，幽远靡不怀。
逐客憔悴久，故乡云雨乖。禽鱼各有化，予欲问齐谐。

卷 355_4 【善卷坛下作】

刘禹锡

先生见尧心，相与去九有。斯民既已治，我得安林薮。
道为自然贵，名是无穷寿。瑶坛在此山，识者常回首。

卷 355_5 【武陵观火诗】

刘禹锡

楚乡祝融分，炎火常为虞。是时直突烟，发自晨炊徒。
盲风扇其威，白昼曛阳乌。操绁不暇汲，循墙还避逾。
怒如列缺光，迅与芬轮俱。联延掩四远，赫奕成洪炉。

汹疑云涛翻，飒若鬼神趋。当前迎焮焰，是物同膏腴。
金乌入梵天，赤龙游玄都。腾烟透窗户，飞焰生栾栌。
火山摧半空，星雨洒中衢。瑶坛被髹漆，宝树攒珊瑚。

光县与琴焦，旗亭无酒濡。市人委百货，邑令遗双凫。
馀势下隈隩，长燄烘舳舻。吹焚照水府，炙浪愁天吴。
灾罢云日晚，心惊视听殊。高灰辨廩庾，黑土连闾閭。

众烬合星罗，游氛铄人肤。厚地藏宿热，遥林呈骤枯。
火德资生人，庸可一日无。御之失其道，敲石弥天隅。
晋库走龙剑，吴宫伤燕雏。五行有沴气，先哲垂訏谟。

宋郑同日起，时当贤大夫。无苛自可乐，弭患非所图。
贤守恤人瘼，临烟驻骊驹。吊场色惨怛，颜失词劬愉。
下令蠲里布，指期轻市租。閤垣适未立，苫盖自相娱。
山木行剪伐，江泥宜堽途。邑臣不必曾，何用征越巫。

卷 355_6【崔元受少府自贬所还，遗山姜花，以诗答之】

刘禹锡

故人博罗尉，遗我山姜花。采从碧海上，来自谪仙家。
云涛润孤根，阴火照晨葩。静摇扶桑日，艳对瀛洲霞。

世人爱芳辛，攀撷忘幽遐。传名入帝里，飞驿辞天涯。
王济本尚味，石崇方斗奢。雕盘多不识，绮席乃增华。
驿马损筋骨，贵人滋齿牙。顾予藜藿士，持此重咨嗟。

卷 355_7【途中早发】

刘禹锡

马踏尘上霜，月明江头路。行人朝气锐，宿鸟相辞去。
流水隔远村，缦山多红树。悠悠关塞内，往来无闲步。

卷 355_8【和董庶中古散调词赠尹果毅】

刘禹锡

昔听东武吟，壮年心已悲。如何今濩落，闻君辛苦辞。
言有穷巷士，弱龄颇尚奇。读得玄女符，生当事边时。

借名游侠窟，结客幽并儿。往来长楸间，能带双鞬驰。
崩腾天宝末，尘暗燕南垂。燿火入咸阳，诏征神武师。
是时占军幕，插羽扬金羁。万夫列辕门，观射中戟支。

誓当雪国雠，亲爱从此辞。中宵倚长剑，起视蚩尤旗。
介马晨萧萧，阵云竟天涯。阴风猎白草，旗槊光参差。
勇气贯中肠，视身忽如遗。生擒白马将，虏骑不敢追。

贵臣上战功，名姓随意移。终岁肌骨苦，他人印累累。
谒者既清宫，诸侯各罢戏。上将赐甲第，门戟不可窥。
眦血下沾襟，天高问无期。却寻故乡路，孤影空相随。

行逢里中旧，扑楸昔所嗤。一言合侯王，腰佩黄金龟。
问我何自苦，可怜真数奇。迟回顾徒御，得色悬双眉。
翻然悟世途，抚己昧所宜。田园已芜没，流浪江海湄。

鸷禽毛翮摧，不见翔云姿。衰容蔽逸气，子子无人知。
寂寞草玄徒，长吟下书帷。为君发哀韵，若扣瑶林枝。
有客识其真，潺湲涕交颐。饮尔一杯酒，陶然足自怡。

卷 355_9【望衡山】

刘禹锡

东南倚盖卑，维岳资柱石。前当祝融居，上拂朱鸟翮。
青冥结精气，磅礴宣地脉。还闻肤寸阴，能致弥天泽。

卷 355_10【游桃源一百韵】

刘禹锡

沅江清悠悠，连山郁岑寂。回流抱绝巘，皎镜含虚碧。
昏旦递明媚，烟岚分委积。香蔓垂绿潭，暴龙照孤磧。
渊明著前志，子驥思远躋。寂寂无何乡，密尔天地隔。

金行太元岁，渔者偶探赜。寻花得幽踪，窥洞穿暗隙。
依微闻鸡犬，豁达值阡陌。居人互将迎，笑语如平昔。
广乐虽交奏，海禽心不忤。挥手一来归，故溪无处觅。

绵绵五百载，市朝几迁革。有路在壶中，无人知地脉。
皇家感至道，圣祚自天锡。金阙传本枝，玉函留宝历。
禁山开秘宇，复户洁灵宅。蕊检香氛氲，醺坛烟幂幂。

我来尘外躋，莹若朝星析。崖转对翠屏，水穷留画鹖。
三休俯乔木，千级扳峭壁。旭日闻撞钟，彩云迎蹑屐。
遂登最高顶，纵目还楚泽。平湖见草青，远岸连霞赤。

幽寻如梦想，绵思属空阒。夤缘且忘疲，耽玩近成癖。
清猿伺晓发，瑶草凌寒坼。祥禽舞葱茏，珠树摇率璣。
羽人顾我笑，劝我税归轂。霓裳何飘飘，童颜洁白皙。

重岩是藩屏，驯鹿受羁勒。楼居弥清霄，萝茑成翠帟。
仙翁遗竹杖，王母留桃核。姹女飞丹砂，青童护金液。

宝气浮鼎耳，神光生剑脊。虚无天乐来，僊宰鬼兵役。
丹丘肃朝礼，玉札工紉绎。枕中淮南方，床下阜乡舄。
明灯坐遥夜，幽籁听淅沥。因话近世仙，耸然心神惕。

乃言瞿氏子，骨状非凡格。往事黄先生，群儿多侮剧。
警然不屑意，元气贮肝膈。往往游不归，洞中观博弈。
言高未易信，犹复加诃责。一旦前致辞，自云仙期迫。

言师有道骨，前事常被谪。如今三山上，名字在真籍。
悠然谢主人，后岁当来覲。言毕依庭树，如烟去无迹。
观者皆失次，惊追纷络绎。日暮山径穷，松风自萧飒。

适逢修蛇见，瞋目光激射。如严三清居，不使恣搜索。
唯馀步纲势，八趾在沙砾。至今东北隅，表以坛上石。
列仙徒有名，世人非目击。如何庭虎际，白日振飞翮。

洞天岂幽远，得道如咫尺。一气无死生，三光自迁易。
因思人间世，前路何狭窄。瞥然此生中，善祝期满百。
大方播群类，秀气肖翕辟。性静本同和，物牵成阻厄。

是非斗方寸，荤血昏精魄。遂令多夭伤，犹喜见斑白。
喧喧车马驰，苒苒桑榆夕。共安缙绣荣，不悟泥途适。
纷吾本孤贱，世叶在逢掖。九流宗指归，百氏旁捃掖。

公卿偶慰荐，乡曲缪推择。居安白社贫，志傲玄纁辟。
功名希自取，簪组俟扬历。书府蚤怀铅，射宫曾发的。
起草香生帐，坐曹乌集柏。赐燕聆箫韶，侍祠阅琮璧。

尝闻履忠信，可以行蛮貊。自述希古心，忘恃干时画。
巧言忽成锦，苦志徒食蘖。平地生峰峦，深心有矛戟。
层波一震荡，弱植忽沦溺。北渚吊灵均，长岑思亭伯。
祸来昧几兆，事去空叹息。尘累与时深，流年随漏滴。
才能疑木雁，报施迷夷跖。楚奏繁钟仪，商歌劳甯戚。
稟生非悬解，对镜方感激。自从婴网罗，每事问龟策。
王正降雷雨，环玦赐迁斥。倘伏夷平人，誓将依羽客。
买山构精舍，领徒开讲席。冀无身外忧，自有闲中益。
道芽期日就，尘虑乃冰释。且欲遗姓名，安能慕竹帛。
长生尚学致，一溉岂虚掷。芝朮资糗粮，烟霞拂巾帻。
黄石履看堕，洪崖肩可拍。聊复嗟蜉蝣，何烦哀魍蜎。
青囊既深味，琼葩亦屡摘。纵无西山资，犹免长戚戚。

卷 355_11【客有为余话登天坛遇雨之状，因以赋之】

刘禹锡

清晨登天坛，半路逢阴晦。疾行穿雨过，却立视云背。
白日照其上，风雷走于内。滉漾雪海翻，嵯牙玉山碎。
蛟龙露鬣鬣，神鬼含变态。万状互生灭，百音以繁会。
俯观群动静，始觉天宇大。山顶自晶明，人间已滂沛。
豁然重昏敛，涣若春冰溃。反照入松门，瀑流飞缟带。
遥光泛物色，馀韵吟天籁。洞府撞仙钟，村墟起夕霭。
却见山下侣，已如迷世代。问我何处来，我来云雨外。

卷 355_12【秋江早发】

刘禹锡

轻阴迎晓日，霞霁秋江明。草树含远思，襟怀有馀清。
凝睇万象起，朗吟孤愤平。渚鸿未矫翼，而我已遐征。
因思市朝人，方听晨鸡鸣。昏昏恋衾枕，安见元气英。
纳爽耳目变，玩奇筋骨轻。沧洲有奇趣，浩然吾将行。

卷 355_13【有僧言罗浮事，因为诗以写之】

刘禹锡

君言罗浮上，容易见九垓。渐高元气壮，汹涌来翼身。
夜宿最高峰，瞻望浩无邻。海黑天宇旷，星辰来逼人。
是时当朏魄，阴物恣腾振。日光吐鲸背，剑影开龙鳞。
倏若万马驰，旌旗耸瀛沦。又如广乐奏，金石含悲辛。
疑其有巨灵，怪物尽来宾。阴阳迭用事，乃俾夜作晨。
咿喔天鸡鸣，扶桑色昕昕。赤波千万里，涌出黄金轮。
下视生物息，霏如隙中尘。醺鸡仰瓮口，亦谓云汉津。
世人信耳目，方寸度大钧。安知视听外，怪愕不可陈。
悠悠想大方，此乃杯水滨。知小天地大，安能识其真。

卷 355_14 【裴祭酒尚书见示春归城南青松坞别墅寄王左丞相高侍郎之什，命同作】

刘禹锡

早宦阅人事，晚怀生道机。时从学省出，独望郊园归。
野酌度春水，山花映岩扉。石头解金章，林下步绿薇。
青松郁成坞，修竹盈尺围。吟风起天籁，蔽日无炎威。
危径盘羊肠，连甍耸翠飞。幽谷响樵斧，澄潭环钓矶。
因高见帝城，冠盖扬光辉。白云难持寄，清韵投所希。
二公如长离，比翼翔太微。含情谢林壑，酬赠骖珠玑。
顾予久郎潜，愁寂对芳菲。一闻丘中趣，再抚黄金徽。

卷 355_15 【和河南裴尹侍郎宿斋天平寺诣九龙祠祈雨二十韵】

刘禹锡

有事九龙庙，洁斋梵王祠。玉箫何时绝，碧树空凉飈。
吏散埃壒息，月高庭宇宜。重城肃穆闭，涧水潺湲时。
人稀夜复闲，虑静境亦随。缅怀断鳌足，凝想乘鸾姿。
朱明盛农节，膏泽方愆期。瞻言五灵瑞，能救百谷萎。
咿喔晨鸡鸣，阑干斗柄垂。修容谒神像，注意陈正词。
惊飙起泓泉，若调雷雨师。黑烟耸鳞甲，洒液如焚丝。

丰隆震天衢，列缺挥火旗。炎空忽凄紧，高溜悬纆縻。
生物已滂沛，湿云稍离披。丹霞启南陆，白水含东菑。
熙熙飞走适，蔼蔼草树滋。浮光动宫观，远思盈川坻。
吴公敏于政，谢守工为诗。商山有病客，言贺舒庞眉。

卷 355_16【冬夜宴河中李相公中堂命箏歌送酒】

刘禹锡

朗朗鹍鸡弦，华堂夜多思。帘外雪已深，座中人半醉。
翠蛾发清响，曲尽有馀意。酌我莫忧狂，老来无逸气。

卷 355_17【重至衡阳伤柳仪曹】

刘禹锡

忆昨与故人，湘江岸头别。我马映林嘶，君帆转山灭。
马嘶循古道，帆灭如流电。千里江蓠春，故人今不见。

卷 355_18【谪居悼往二首】

刘禹锡

邑邑何邑邑，长沙地卑湿。楼上见春多，花前恨风急。

猿愁肠断叫，鹤病翘趾立。牛衣独自眠，谁哀仲卿泣。
郁郁何郁郁，长安远如日。终日念乡关，燕来鸿复还。
潘岳岁寒思，屈平憔悴颜。殷勤望归路，无雨即登山。

卷 355_19【有獺吟】

刘禹锡

有獺得嘉鱼，自谓天见怜。先祭不敢食，捧鳞望青玄。
人立寒沙上，心专眼悁悁。渔翁以为妖，举块投其咽。
呼儿贯鱼归，与獺同烹煎。关关黄金鹖，大翅摇江烟。
下见盈寻鱼，投身擘洪连。攫拏隐鳞去，哺雏林岳巅。
鸱乌欲伺隙，遥噪莫敢前。长居青云路，弹射无由缘。
何地无江湖，何水无鲋鳢。天意不宰割，菲祭徒虔虔。
空余知礼重，载在淹中篇。

卷 355_20【白太守行】

刘禹锡

闻有白太守，抛官归旧谿。苏州十万户，尽作婴儿啼。
太守驻行舟，阊门草萋萋。挥袂谢啼者，依然两眉低。
朱户非不崇，我心如重狴。华池非不清，意在寥廓栖。
夸者窃所怪，贤者默思齐。我为太守行，题在隐起珪。

卷 355_21【乐天寄洛下新诗，兼喜微之欲到，因以抒怀也】

刘禹锡

松间风未起，万叶不自吟。池上月未来，清辉同夕阴。
宫徵不独运，埙箎自相寻。一从别乐天，诗思日已沉。
吟君洛中作，精绝百炼金。乃知孤鹤情，月露为知音。
微之从东来，威凤鸣归林。羨君先相见，一豁平生心。

卷 355_22【月夜忆乐天兼寄微之】

刘禹锡

今宵帝城月，一望雪相似。遥想洛阳城，清光正如此。
知君当此夕，亦望镜湖水。展转相忆心，月明千万里。

卷 355_23【早夏郡中书事】

刘禹锡

水禽渡残月，飞雨洒高城。华堂对嘉树，帘庑含晓清。
拂镜整危冠，振衣步前楹。将吏俨成列，簿书纷来萦。
言下辨曲直，笔端破交争。虚怀询病苦，怀律操剡轻。
閤吏告无事，归来解簪纓。高帘覆朱阁，忽尔闻调笙。

卷 355_24 【酬乐天七月一日夜即事见寄】

刘禹锡

夜树风韵清，天河云彩轻。故苑多露草，隔城闻鹤鸣。
摇落从此始，别离含远情。闻君当是夕，倚瑟吟商声。
外物岂不足，中怀向谁倾。秋来念归去，同听嵩阳笙。

卷 355_25 【令狐相公见示赠竹二十韵仍命继和】

刘禹锡

高人必爱竹，寄兴良有以。峻节可临戎，虚心宜待士。
众芳信妍媚，威凤难栖止。遂于鞶鼓间，移植东南美。
封以梁国土，浇之浚泉水。得地色不移，凌空势方起。
新青排故叶，馀纷笼疏理。犹复隔墙藩，何因出尘滓。
兹辰去前蔽，永日劳瞪视。槭槭林已成，荧荧玉相似。
规摹起心匠，洗涤在颐指。曲直既了然，孤高何卓尔。
垂梢覆内屏，迸笋侵前圯。妓席拂云鬓，宾阶荫珠履。
抱琴恣闲玩，执卷堪斜倚。露下悬明珰，风来韵清徵。
坚贞贯四候，标格殊百卉。岁晚当自知，繁华岂云比。
古诗无赠竹，高唱从此始。一听清瑶音，岿然长在耳。

卷 355_26 【和令狐相公晚泛汉江书怀，寄洋州崔侍郎阆州高舍人二曹长】

刘禹锡

雨过远山出，江澄暮霞生。因浮济川舟，遂作适野行。
郊树映缙骑，水禽避红旗。田夫捐畚锸，织妇窥柴荆。

古岸夏花发，遥林晚蝉清。沿洄方玩境，鼓角已登城。
部内有良牧，望中寄深情。临觴念佳期，泛瑟动离声。
寂寞一病士，夙昔接群英。多谢谪仙侣，几时还玉京。

卷 355_27 【和乐天洛城春齐梁体八韵】

刘禹锡

帝城宜春入，游人喜意长。草生季伦谷，花出莫愁坊。
断云发山色，轻风漾水光。楼前戏马地，树下斗鸡场。

白头自为侣，绿酒亦满觞。潘园观种植，谢墅阅池塘。
至闲似隐逸，过老不悲伤。相问焉功德，银黄游故乡。

卷 355_28 【洛中早春赠乐天】

刘禹锡

漠漠复霏霏，半晴将半阴。春来自何处，无迹日以深。
韶嫩冰后木，轻盈烟际林。藤生欲有托，柳弱不自任。
花意已含蓄，鸟言尚沉吟。期君当此时，与我恣追寻。
翻愁烂熳后，春暮却伤心。

卷 355_29 【和乐天宴李周美中丞宅池上赏樱桃花】

刘禹锡

樱桃千万枝，照耀如雪天。王孙宴其下，隔水疑神仙。
宿露发清香，初阳动暄妍。妖姬满髻插，酒客折枝传。
同此赏芳月，几人有华筵。杯行勿遽辞，好醉逸三年。

卷 355_30 【酬乐天闻新蝉见赠】

刘禹锡

碧树鸣蝉后，烟云改容光。瑟然引秋气，芳草日夜黄。
夹道喧古槐，临池思垂杨。离人下忆泪，志士激刚肠。
昔闻阻山川，今听同匡床。人情便所遇，音韵岂殊常。

因之比笙竽，送我游醉乡。

卷 355_31【和乐天秋凉闲卧】

刘禹锡

暑退人体轻，雨馀天色改。荷珠贯索断，竹粉残妆在。
高僧扫室请，逸客登楼待。槐柳渐萧疏，闲门少光彩。

卷 355_32【酬乐天咏老见示】

刘禹锡

人谁不愿老，老去有谁怜。身瘦带频减，发稀冠自偏。
废书缘惜眼，多炙为随年。经事还谙事，阅人如阅川。
细思皆幸矣，下此便翛然。莫道桑榆晚，微霞尚满天。

卷 355_33【岁夜咏怀】

刘禹锡

弥年不得意，新岁又如何。念昔同游者，而今有几多。
以闲为自在，将寿补蹉跎。春色无情故，幽居亦见过。

卷 355_34 【酬牛相公独饮偶醉寓言见示】

刘禹锡

宫漏夜丁丁，千门闭霜月。华堂列红烛，丝管静中发。
歌眉低有思，舞体轻无骨。主人启酡颜，酣畅浹肌发。
犹思城外客，阡陌不可越。春意日夕深，此欢无断绝。

卷 355_35 【蓼兮吟】

刘禹锡

天涯浮云生，争蔽日月光。穷巷秋风起，先摧兰蕙芳。
万货列旗亭，恣心注明珰。名高毁所集，言巧智难防。
勿谓行大道，斯须成太行。莫吟蓼兮什，徒使君子伤。

卷 355_36 【韩十八侍御见示岳阳楼别窦司直诗，因令属和重以自述，故足成六十二韵】

刘禹锡

楚望何苍然，曾澜七百里。孤城寄远目，一写无穷已。
荡漾浮天盖，四环宣地理。积涨在三秋，混成非一水。
冬游见清浅，春望多洲沚。云锦远沙明，风烟青草靡。

火星忽南见，月硖方东迤。雪波西山来，隐若长城起。
独专朝宗路，驶悍不可止。支川让其威，蓄缩至南委。
熊武走蛮落，潇湘来奥鄙。炎蒸动泉源，积潦搜山趾。
归往无旦夕，包含通远迤。行当白露时，眇视秋光里。
曙色未昭晰，露华遥斐亹。浩尔神骨清，如观混元始。
北风忽震荡，惊浪迷津涘。怒激鼓铿訇，蹙成山岨嵚。
鵕鹖疑变化，罔象何恢诡。嘘吸写楼台，腾骧露髻尾。
景移群动息，波静繁音弭。明月出中央，青天绝纤滓。
素光淡无际，绿静平如砥。空影渡鹧鸪，秋声思芦苇。
鲛人弄机杼，贝阙骈红紫。珠蛤吐玲珑，文螭翔旖旎。
水乡吴蜀限，地势东南庑。翼轸粲垂精，衡巫屹环峙。
名雄七泽薮，国辨三苗氏。唐羿断修蛇，荆王惮青兕。
秦狩迹犹在，虞巡路从此。轩后奏宫商，骚人咏兰芷。
茅岭潜相应，橘洲傍可指。郭璞验幽经，罗含著前纪。
观津戚里族，按道侯家子。联袂登高楼，临轩笑相视。
假守亦高卧，墨曹正垂耳。契阔话凉温，壶觞慰迁徙。
地偏山水秀，客重杯盘侈。红袖花欲然，银灯昼相似。
兴酣更抵掌，乐极同启齿。笔锋不能休，藻思一何绮。
伊余负微尚，夙昔惭知己。出入金马门，交结青云士。
袭芳践兰室，学古游槐市。策慕宋前军，文师汉中垒。
陋容昧俯仰，孤志无依倚。卫足不如葵，漏川空叹蚁。
幸逢万物泰，独处穷途否。锻翮重叠伤，兢魂再三褫。
蘧瑗亦屡化，左丘犹有耻。桃源访仙宫，薜服祠山鬼。
故人南台旧，一别如弦矢。今朝会荆峦，斗酒相宴喜。
为余出新什，笑抃随伸纸。晔若观五色，欢然臻四美。
委曲风涛事，分明穷达旨。洪韵发华钟，凄音激清徵。

羊溱要共和，江淹多杂拟。徒欲仰高山，焉能追逸轨。
湘洲路四达，巴陵城百雉。何必颜光禄，留诗张内史。

卷 355_37【和郴州杨侍郎玩郡斋紫薇花十四韵】

刘禹锡

几年丹霄上，出入金华省。暂别万年枝，看花桂阳岭。
南方足奇树，公府成佳境。绿阴交广除，明艳透萧屏。
雨馀人吏散，燕语帘栊静。懿此含晓芳，翛然忘簿领。
紫茸垂组纓，金缕攒锋颖。露溽暗传香，风轻徐就影。
苒弱多意思，从容占光景。得地在侯家，移根近仙井。
开尊好凝睇，倚瑟仍回颈。游蜂驻彩冠，舞鹤迷烟顶。
兴生红药后，爱与甘棠并。不学夭桃姿，浮荣在俄顷。

卷 355_38【春日寄杨八唐州二首】

刘禹锡

淮西春草长，淮水逶迤光。燕入新村落，人耕旧战场。
可怜行春守，立马看斜桑。

漠漠淮上春，莠苗生故垒。梨花方城路，荻笋萧陂水。
高斋有谪仙，坐啸清风起。

卷 355_39 【酬冯十七舍人宿卫赠别五韵】

刘禹锡

少年为别日，隋宫杨柳阴。白首相逢处，巴江烟浪深。
使星上三蜀，春雨沾衣襟。王程促速意，夜语殷勤心。
却归天上去，遗我云间音。

卷 355_40 【酬湖州崔郎中见寄】

刘禹锡

风筝吟秋空，不肖指爪声。高人灵府间，律吕伴咸英。
昔年与兄游，文似马长卿。今来寄新诗，乃类陶渊明。
磨砢老益智，吟咏闲弥精。岂非山水乡，荡漾神机清。
渚烟蕙兰动，溪雨虹蜺生。冯君虚上舍，待余乘兴行。

卷 355_41 【秋日书怀寄河南王尹】

刘禹锡

公府想无事，西池秋水清。去年为狎客，永日奉高情。
况有台上月，如闻云外笙。不知桑落酒，今岁与谁倾。

卷 355_42 【酬留守牛相公宫城早秋寓言见寄】

刘禹锡

晓月映宫树，秋光起天津。凉风稍动叶，宿露未生尘。
星气尚芳丽，旷望感心神。挥毫成逸韵，开阁迟来宾。
摆去将相印，渐为逍遥身。如招后房宴，却要白头人。

卷 355_43 【海阳十咏·吏隐亭】

刘禹锡

结构得奇势，朱门交碧浚。外来始一望，写尽平生心。
日轩漾波影，月砌镂松阴。几度欲归去，回眸情更深。

卷 355_44 【海阳十咏·切云亭】

刘禹锡

迥破林烟出，俯窥石潭空。波摇杏梁日，松韵碧窗风。
隔水生别岛，带桥如断虹。九疑南面事，尽入寸眸中。

卷 355_45【海阳十咏·云英潭】

刘禹锡

芳幄覆云屏，石窗开碧镜。支流日飞洒，深处自疑莹。
潜去不见迹，清音常满听。有时病朝醒，来此心神醒。

卷 355_46【海阳十咏·玄览亭】

刘禹锡

潇洒青林际，夤缘碧潭隈。淙流冒石下，轻波触砌回。
香风逼人度，幽花覆水开。故令无四壁，晴夜月光来。

卷 355_47【海阳十咏·裴溪】

刘禹锡

楚客忆关中，疏溪想汾水。萦纤非一曲，意态如千里。
倒影罗文动，微波笑颜起。君今赐环归，何人承玉趾。

卷 355_48【海阳十咏·飞练瀑】

刘禹锡

晶晶掷岩端，洁光如可把。琼枝曲不折，云片晴犹下。
石坚激清响，叶动承馀洒。前时明月中，见是银河泻。

卷 355_49【海阳十咏·蒙池】

刘禹锡

潏潏幽壁下，深净如无力。风起不成文，月来同一色。
地灵草木瘦，人远烟霞逼。往往疑列仙，围棋在岩侧。

卷 355_50【海阳十咏·棼丝瀑】

刘禹锡

飞流透嵌隙，喷洒如丝棼。含晕迎初旭，翻光破夕曛。
馀波绕石去，碎响隔溪闻。却望琼沙际，逶迤见脉分。

卷 355_51【海阳十咏·双溪】

刘禹锡

流水绕双岛，碧溪相并深。浮花拥曲处，远影落中心。
闲鹭久独立，曝龟惊复沉。蘋风有时起，满谷箫韶音。

卷 355_52【海阳十咏·月窟】

刘禹锡

泫泫漱幽石，注入团圆处。有如常满杯，承彼清夜露。
岩曲月斜照，林寒春晚煦。游人不敢触，恐有蛟龙护。

卷 355_53【武夫词】

刘禹锡

武夫何洸洸，衣紫袭绛裳。借问胡为尔，列校在鹰扬。
依倚将军势，交结少年场。探丸害公吏，抽刃妒名倡。
家产既不事，顾盼自生光。酣歌高楼上，袒裼大道傍。
昔为编户人，秉耒甘哺糠。今来从军乐，跃马饫膏粱。
犹思风尘起，无种取侯王。

卷 355_54【虎丘寺路宴】

刘禹锡

青林虎丘寺，林际翠微路。立见山僧来，遥从鸟飞处。
兹峰沦宝玉，千载惟丘墓。埋剑人空传，凿山龙已去。
扪萝披翳荟，路转夕阴遽。虎啸崖谷寒，猿鸣松杉暮。
徘徊北楼上，海江穷一顾。日映千里帆，鸦归万家树。
暂因惬所适，果得捐外虑。庭暗栖还云，檐香滴甘露。
久迷空寂理，多为声华故。永欲投此山，馀生岂能误。

卷 355_55【缺题】

刘禹锡

故人日已远，窗下尘满琴。坐对一樽酒，恨多无力斟。
幕疏萤色迥，露重月华深。万境与群籁，此时情岂任。

卷 355_56【晚步扬子游南塘望沙尾】

刘禹锡

淮海多夏雨，晓来天始晴。萧条长风至，千里孤云生。
卑湿久喧浊，寥开偶虚清。客游广陵郡，晚出临江城。

郊外绿杨阴，江中沙屿明。归帆翳尽日，去棹闻遗声。
乡国殊渺漫，羁心目悬旌。悠然京华意，怅望怀远程。
薄暮大山上，翩翩双鸟征。

卷 355_57【和浙西李大夫晚下北固山，喜径松成阴，怅然怀古，偶题临江亭，并浙东元相公所和依本韵】

刘禹锡

一辞温室树，几见武昌柳。荀谢年何少，韦平望已久。
种松夹石道，纡组临沙阜。目览帝王州，心存股肱守。
叶动惊彩翰，波澄见赭首。晋宋齐梁都，千山万江口。

烟散隋宫出，涛来海门吼。风俗太伯馀，衣冠永嘉后。
江长天作限，山固壤无朽。自古称佳丽，非贤谁奄有。
八元邦族盛，万石门风厚。天柱揭东溟，文星照北斗。

高亭一骋望，举酒共为寿。因赋咏怀诗，远寄同心友。
禁中晨夜直，江左东西偶。将手握兵符，儒腰盘贵绶。
颁条风有自，立事言无苟。农野闻让耕，军人不使酒。
用材当构厦，知道宁窥牖。谁谓青云高，鹏飞终背负。

卷 355_58【始至云安，寄兵部韩侍郎中书白舍人二公，近曾远守，故有属焉】

刘禹锡

天外巴子国，山头白帝城。波清蜀棹尽，云散楚台倾。
迅濑下哮吼，两岸势争衡。阴风鬼神过，暴雨蛟龙生。
硖断见孤邑，江流照飞甍。蛮军击严鼓，笳马引双旌。
望阙遥拜舞，分庭备将迎。铜符一以合，文墨纷来萦。
暮色四山起，愁猿数处声。重关群吏散，静室寒灯明。
故人青霞意，飞舞集蓬瀛。昔曾在池籞，应知鱼鸟情。

卷三百五十六

卷 356_1【更衣曲】

刘禹锡

博山炯炯吐香雾，红烛引至更衣处。夜如何其夜漫漫，
邻鸡未鸣寒雁度。庭前雪压松桂丛，廊下点点悬纱笼。
满堂醉客争笑语，嘈囂琵琶青幕中。

卷 356_2【桃源行】

刘禹锡

渔舟何招招，浮在武陵水。拖纶掷饵信流去，
误入桃源行数里。清源寻尽花绵绵，踏花觅径至洞前。
洞门苍黑烟雾生，暗行数步逢虚明。俗人毛骨惊仙子，
争来致词何至此。须臾皆破冰雪颜，笑言委曲问人间。
因嗟隐身来种玉，不知人世如风烛。筵羞石髓劝客餐，
灯爇松脂留客宿。鸡声犬声遥相闻，晓色葱笼开五云。
渔人振衣起出户，满庭无路花纷纷。翻然恐失乡县处，
一息不肯桃源住。桃花满溪水似镜，尘心如垢洗不去。

仙家一出寻无踪，至今流水山重重。

卷 356_3【洞庭秋月行】

刘禹锡

洞庭秋月生湖心，层波万顷如熔金。孤轮徐转光不定，
游气濛濛隔寒镜。是时白露三秋中，湖平月上天地空。
岳阳楼头暮角绝，荡漾已过君山东。山城苍苍夜寂寂，
水月逶迤绕城白。荡桨巴童歌竹枝，连樯估客吹羌笛。
势高夜久阴力全，金气肃肃开星躔。浮云野马归四裔，
遥望星斗当中天。天鸡相呼曙霞出，敛影含光让朝日。
日出喧喧人不闲，夜来清景非人间。

卷 356_4【九华山歌】

刘禹锡

奇峰一见惊魂魄，意想洪炉始开辟。疑是九龙夭矫欲攀天，
忽逢霹雳一声化为石，不然何至今，悠悠亿万年，
气势不死如腾仞。云含幽兮月添冷，月凝晖兮江漾影。
结根不得要路津，迥秀长在无人境。轩皇封禅登云亭，
大禹会计临东溟。乘樛不来广乐绝，独与猿鸟愁青荧。
君不见敬亭之山黄索漠，兀如断岸无棱角。
宣城谢守一首诗，遂使声名齐五岳。九华山，九华山，

自是造化一尤物，焉能籍甚乎人间。

卷 356_5【泰娘歌】

刘禹锡

泰娘家本阊门西，门前绿水环金堤。有时妆成好天气，
走上皋桥折花戏。风流太守韦尚书，路傍忽见停隼旗。
斗量明珠鸟传意，绀幘迎入专城居。长鬟如云衣似雾，
锦茵罗荐承轻步。舞学惊鸿水榭春，歌传上客兰堂暮。
从郎西入帝城中，贵游簪组香帘栊。低鬟缓视抱明月，
纤指破拨生胡风。繁华一旦有消歇，题剑无光履声绝。
洛阳旧宅生草莱，杜陵萧萧松柏哀。妆奁虫网厚如茧，
博山炉侧倾寒灰。蕲州刺史张公子，白马新到铜驼里。
自言买笑掷黄金，月堕云中从此始。安知鵬鸟座隅飞，
寂寞旅魂招不归。秦嘉镜有前时结，韩寿香销故篋衣。
山城少人江水碧，断雁哀猿风雨夕。朱弦已绝为知音，
云鬓未秋私自惜。举目风烟非旧时，梦寻归路多参差。
如何将此千行泪，更洒湘江斑竹枝。

卷 356_6【龙阳县歌】

刘禹锡

县门白日无尘土，百姓县前挽鱼罟。主人引客登大堤，

小儿纵观黄犬怒。鸂鶒惊鸣绕篱落，橘柚垂芳照窗户。
沙平草绿见吏稀，寂历斜阳照县鼓。

卷 356_7 【墙阴歌】

刘禹锡

白日左右浮天潢，朝晡影入东西墙。昔为儿童在阴戏，
当时意小觉日长。东邻侯家吹笙簧，随阴促促移象床。
西邻田舍乏糟糠，就影汲汲舂黄粱。因思九州四海外，
家家只占墙阴内。莫言墙阴数尺间，老却主人如等闲。
君看眼前光阴促，中心莫学太行山。

卷 356_8 【踏潮歌】

刘禹锡

屯门积日无回飙，沧波不归成踏潮。轰如鞭石屹且摇，
亘空欲驾鼇鼉桥。惊湍蹙缩悍而骄，大陵高岸失岧峣。
四边无阻音响调，背负元气掀重霄。介鲸得性方逍遥，
仰鼻嘘吸扬朱翘。海人狂顾迭相招，鬻衣鬻首声哓哓。
征南将军登丽谯，赤旗指麾不敢嚣。翌日风回沴气消，
归涛纳纳景昭昭。乌泥白沙复满海，海色不动如青瑶。

卷 356_9【白鹭儿】

刘禹锡

白鹭儿，最高格。毛衣新成雪不敌，众禽喧呼独凝寂。
孤眠芊芊草，久立潺潺石。前山正无云，飞去入遥碧。

卷 356_10【平齐行二首】

刘禹锡

胡尘昔起蓟北门，河南地属平卢军。貂裘代马绕东岳，
峰阳孤桐削为角。地形十二虏意骄，恩泽含容历四朝。
鲁人皆解带弓箭，齐人不复闻箫韶。今朝天子圣神武，
手握玄符平九土。初哀狂童袭故事，文告不来方振怒。
去秋诏下诛东平，官军四合犹婴城。春来群乌噪且惊，
气如坏山堕其庭。牙门大将有刘生，夜半射落欃枪星。
帐中虏血流满地，门外三军舞连臂。驿骑函首过黄河，
城中无贼天气和。朝廷侍郎来慰抚，耕夫满野行人歌。
泰山沉寇六十年，旅祭不享生愁烟。今逢圣君欲封禅，
神使阴兵来助战。妖气扫尽河水清，日观杲杲卿云见。
开元皇帝东封时，百神受职争奔驰。千钧猛簴顺流下，
洪波涵淡浮熊羆。侍臣燕公秉文笔，玉检告天无愧词。
当今睿孙承圣祖，岳神望幸河宗舞。青门大道属车尘，
共待葳蕤翠华举。

卷 356_11【送裴处士应制举诗】

刘禹锡

裴生久在风尘里，气劲言高少知己。注书曾学郑司农，
历国多于孔夫子。往年访我到连州，无穷绝境终日游。
登山雨中试蜡屐，入洞夏里披貂裘。白帝城边又相遇，
敛翼三年不飞去。忽然结束如秋蓬，自称对策明光宫。
人言策中说何事，掉头不答看飞鸿。彤庭翠松迎晓日，
凤衔金榜云间出。中贵腰鞭立倾酒，宰臣委佩观摇笔。
古称射策如弯弧，一发偶中何时无。由来草泽无忌讳，
努力满挽当亨衢。忆得当年识君处，嘉禾驿后联墙住。
垂钩钓得王馀鱼，踏芳共登苏小墓。此事今同梦想间，
相看一笑且开颜。老大希逢旧邻里，为君扶病到方山。

卷 356_12【三乡驿楼伏睹玄宗望女几山诗，小臣斐然有感】

刘禹锡

开元天子万事足，唯惜当时光景促。三乡陌上望仙山，
归作霓裳羽衣曲。仙心从此在瑶池，三清八景相追随。
天上忽乘白云去，世间空有秋风词。

卷 356_13【城西行】

刘禹锡

城西簇簇三叛族，叛者为谁蔡吴蜀。中使提刀出禁来，
九衢车马轰如雷。临刑与酒杯未覆，雠家白官先请肉。

守吏能然董卓脐，饥乌来觇桓玄目。城西人散泰阶平，
雨洗血痕春草生。

卷 356_14【武昌老人说笛歌】

刘禹锡

武昌老人七十馀，手把庾令相问书。自言少小学吹笛，
早事曹王曾赏激。往年镇戍到蕲州，楚山萧萧笛竹秋。

当时买材恣搜索，典却身上乌貂裘。古苔苍苍封老节，
石上孤生饱风雪。商声五音随指发，水中龙应行云绝。

曾将黄鹤楼上吹，一声占尽秋江月。如今老去语尤迟，
音韵高低耳不知。气力已微心尚在，时时一曲梦中吹。

卷 356_15【西山兰若试茶歌】

刘禹锡

山僧后檐茶数丛，春来映竹抽新茸。宛然为客振衣起，
自傍芳丛摘鹰觜。斯须炒成满室香，便酌砌下金沙水。
骤雨松声入鼎来，白云满碗花徘徊。悠扬喷鼻宿醒散，
清峭彻骨烦襟开。阳崖阴岭各殊气，未若竹下莓苔地。
炎帝虽尝未解煎，桐君有箬那知味。新芽连拳半未舒，
自摘至煎俄顷馀。木兰沾露香微似，瑶草临波色不如。
僧言灵味宜幽寂，采采翘英为嘉客。不辞缄封寄郡斋，
砖井铜炉损标格。何况蒙山顾渚春，白泥赤印走风尘。
欲知花乳清冷味，须是眠云跂石人。

卷 356_16【聚蚊谣】

刘禹锡

沉沉夏夜兰堂开，飞蚊伺暗声如雷。嘈然歛起初骇听，
殷殷若自南山来。喧腾鼓舞喜昏黑，昧者不分听者惑。
露花滴沥月上天，利觜迎人著不得。我躯七尺尔如芒，
我孤尔众能我伤。天生有时不可遏，为尔设幄潜匡床。
清商一来秋日晓，羞尔微形饲丹鸟。

卷 356_17【百舌吟】

刘禹锡

晓星寥落春云低，初闻百舌间关啼。花树满空迷处所，
摇动繁英坠红雨。笙簧百啭音韵多，黄鹂吞声燕无语。
东方朝日迟迟升，迎风弄景如自矜。数声不尽又飞去，
何许相逢绿杨路。绵蛮宛转似娱人，一心百舌何纷纷。
酡颜侠少停歌听，坠珥妖姬和睡闻。可怜光景何时尽，
谁能低回避鹰隼。廷尉张罗自不关，潘郎挟弹无情损。
天生羽族尔何微，舌端万变乘春晖。南方朱鸟一朝见，
索漠无言蒿下飞。

卷 356_18【飞鸢操】

刘禹锡

鸢飞杳杳青云里，鸢鸣萧萧风四起。旗尾飘扬势渐高，
箭头舐划声相似。长空悠悠霁日悬，六翮不动凝风烟。
游鹄翔雁出其下，庆云清景相回旋。忽闻饥乌一噪聚，
瞥下云中争腐鼠。腾音砺吻相喧呼，仰天大吓疑鹙雏。
畏人避犬投高处，俯啄无声犹屡顾。青鸟自爱玉山禾，
仙禽徒贵华亭露。朴樕危巢向暮时，毵毵饱腹蹲枯枝。
游童挟弹一麾肘，臆碎羽分人不悲。天生众禽各有类，
威凤文章在仁义。鹰隼仪形蝼蚁心，虽能戾天何足贵。

卷 356_19【秋萤引】

刘禹锡

汉陵秦苑遥苍苍，陈根腐叶秋萤光。夜空寥寂金气净，
千门九陌飞悠扬。纷纶晖映互明灭，金炉星喷镫花发。
露华洗濯清风吹，低昂不定招摇垂。高丽罽毼照珠网，
斜历璇题舞罗幌。曝衣楼上拂香裙，承露台前转仙掌。
槐市诸生夜读书，北窗分明辨鲁鱼。行子东山起征思，
中郎骑省悲秋气。铜雀人归自入帘，长门帐开来照泪。
谁言向晦常自明，儿童走步娇女争。天生有光非自衒，
远近低昂暗中见。撮蚊妖鸟亦夜起，翅如车轮而已矣。

卷 356_20【伤秦姝行】

刘禹锡

长安二月花满城，插花女儿弹银筝。南宫仙郎下朝晚，
曲头驻马闻新声。马蹄逶迟心荡漾，高楼已远犹频望。
此时意重千金轻，鸟传消息绀轮迎。芳筵银烛一相见，
浅笑低鬟初目成。蜀弦铮铮指如玉，皇帝弟子韦家曲。
青牛文梓赤金簧，玫瑰宝柱秋雁行。敛蛾收袂凝清光，
抽弦缓调怨且长。八鸾锵锵渡银汉，九雏威凤鸣朝阳。
曲终韵尽意不足，馀思悄绝愁空堂。从郎镇南别城阙，
楼船理曲潇湘月。冯夷踞蹠舞绿波，鲛人出听停绡梭。

北池含烟瑶草短。万松亭下清风满。秦声一曲此时闻，
岭泉呜咽南云断。来自长陵小市东，薜华零落瘴江风。
侍儿掩泣收银甲，鹦鹉不言愁玉笼。博山炉中香自灭，
镜奁尘暗同心结。从此东山非昔游，长嗟人与弦俱绝。

卷 356_21【竞渡曲】

刘禹锡

沅江五月平堤流，邑人相将浮彩舟。灵均何年歌已矣，
哀谣振楫从此起。杨桴击节雷阗阗，乱流齐进声轰然。
蛟龙得雨鬣鬣动，螭蜃饮河形影联。刺史临流褰翠帟，
揭竿命爵分雄雌。先鸣馀勇争鼓舞，未至衔枚颜色沮。
百胜本自有前期，一飞由来无定所。风俗如狂重此时，
纵观云委江之湄。彩旂夹岸照蛟室，罗袜凌波呈水嬉。
曲终人散空愁暮，招屈亭前水东注。

卷 356_22【翰林白二十二学士见寄诗一百篇，因以答贶】

刘禹锡

吟君遗我百篇诗，使我独坐形神驰。玉琴清夜人不语，
琪树春朝风正吹。郢人斤斫无痕迹，仙人衣裳弃刀尺。
世人方内欲相寻，行尽四维无处觅。

卷 356_23 【忆春草】

刘禹锡

忆春草，处处多情洛阳道。金谷园中见日迟，
铜驼陌上迎风早。河南大君频出难，只得池塘十步看。
府门闭后满街月，几处游人草头歇。馆娃宫外姑苏台，
郁郁芊芊拨不开。无风自偃君知否，西子裙裾曾拂来。

卷 356_24 【乐天寄忆旧游，因作报白君以答】

刘禹锡

报白君，别来已渡江南春。江南春色何处好，
燕子双飞故官道。春城三百七十桥，夹岸朱楼隔柳条。
丫头小儿荡画桨，长袂女郎簪翠翘。郡斋北轩卷罗幕，
碧池逶迤绕画阁。池边绿竹桃李花，花下舞筵铺彩霞。
吴娃足情言语黠，越客有酒巾冠斜。坐中皆言白太守，
不负风光向杯酒。酒酣襞笺飞逸韵，至今传在人口。
报白君，相思空望嵩丘云。其奈钱塘苏小小，
忆君泪点石榴裙。

卷 356_25 【两如何诗谢裴令公赠别二首】

刘禹锡

一言一顾重，重何如。今日陪游清洛苑，昔年别入承明庐。
一东一西别，别何如。终期大冶再熔炼，愿托扶摇翔碧虚。

卷 356_26 【唐侍御寄游道林岳麓二寺诗，并沈中丞姚员外
所和，见征继作】

刘禹锡

湘西古刹双蹲蹲，群峰朝拱如骏奔。青松步障深五里，
龙宫黯黯神为阍。高殿呀然压苍嶺，俯瞰长江疑欲吞。
橘洲泛浮金实动，水郭缭绕朱楼鶱。语馀百响入天籁，
众奇引步轻翩翻。泉清石布博棋子，萝密鸟韵如簧言。
回廊架险高且曲，新径穿林明复昏。浅流忽浊山兽过，
古木半空天火痕。星使双飞出禁垣，元侯饯之游石门。
紫髯翼从红袖舞，竹风松雪香温餠。远持清琐照巫峡，
一戛惊断三声猿。灵山会中身不预，吟想峭绝愁精魂。
恨无黄金千万饼，布地买取为丘园。

卷 356_27【将赴汝州，途出浚下，留辞李相公】

刘禹锡

长安旧游四十载，鄂渚一别十四年。后来富贵已零落，
岁寒松柏犹依然。初逢贞元尚文主，云阙天池共翔舞。
相看却数六朝臣，屈指如今无四五。夷门天下之咽喉，
昔时往往生疮疣。联翩旧相来镇压，四海吐纳皆通流。
久别凡经几多事，何由说得平生意。千思万虑尽如空，
一笑一言真可贵。世间何事最殷勤，白头将相逢故人。
功成名遂会归老，请向东山为近邻。

卷 356_28【平蔡州三首】

刘禹锡

蔡州城中众心死，妖星夜落照壕水。汉家飞将下天来，
马箠一挥门洞开。贼徒崩腾望旗拜，有若群蛰惊春雷。
狂童面缚登槛车，太白天矫垂捷书。相公从容来镇抚，
常侍郊迎负文弩。四人归业闾里间，小儿跳浪健儿舞。

汝南晨鸡喔喔鸣，城头鼓角音和平。路傍老人忆旧事，
相与感激皆涕零。老人收泣前致辞，官军入城人不知。
忽惊元和十二载，重见天宝承平时。

九衢车马浑浑流，使臣来献淮西囚。四夷闻风失匕箸，
天子受贺登高楼。妖童擢发不足数，血污城西一抔土。
南峰无火楚泽间，夜行不锁穆陵关。策勋礼毕天下泰，
猛士按剑看恒山。

卷 356_29【送僧仲蒯东游兼寄呈灵澈上人】

刘禹锡

释子道成神气闲，住持曾上清凉山。晴空礼拜见真像，
金毛五髻卿云间。西游长安隶僧籍，本寺门前曲江碧。
松间白月照宝书，竹下香泉洒瑶席。前时学得经论成，
奔驰象马开禅局。高筵谈柄一麾拂，讲下门徒如醉醒。
旧闻南方多长老，次第来入荆门道。荆州本自重弥天，
南朝塔庙犹依然。宴坐东阳枯树下，经行居止故台边。
忽忆遗民社中客，为我衡阳驻飞锡。讲罢同寻相鹤经，
闲来共蜡登山屐。一旦扬眉望沃州，自言王谢许同游。
凭将杂拟三十首，寄与江南汤慧休。

卷 356_30【观棋歌送儂师西游】

刘禹锡

长沙男子东林师，闲读艺经工弈棋。有时凝思如入定，
暗覆一局谁能知。今年访予来小桂，方袍袖中贮新势。

山人无事秋日长，白昼懵懵眠匡床。因君临局看斗智，
不觉迟景沉西墙。自从仙人遇樵子，直到开元王长史。
前身后身付馀习，百变千化无穷已。初疑磊落曙天星，
次见搏击三秋兵。雁行布陈众未晓，虎穴得子人皆惊。
行尽三湘不逢敌，终日饶人损机格。自言台阁有知音，
悠然远起西游心。商山夏木阴寂寂，好处徘徊驻飞锡。
忽思争道画平沙，独笑无言心有适。蔼蔼京城在九天，
贵游豪士足华筵。此时一行出人意，赌取声名不要钱。

卷 356_31 【吐绶鸟词】

刘禹锡

越山有鸟翔寥廓，嗟中天绶光若若。越人偶见而奇之，
因名吐绶江南知。四明天姥神仙地，朱鸟星精钟异气。
赤玉雕成彪炳毛，红绡翦出玲珑翅。湖烟始开山日高，
迎风吐绶盘花绦。临波似染琅琊草，映叶疑开阿母桃。
花红草绿人间事，未若灵禽自然贵。鹤吐明珠暂报恩，
鹄衔金印空为瑞。春和秋霁野花开，玩景寻芳处处来。
翠幕雕笼非所慕，珠丸柘弹莫相猜。栖月啼烟凌缥缈，
高林先见金霞晓。三山仙路寄遥情，刷羽扬翘欲上征。
不学碧鸡依井络，愿随青鸟向层城。太液池中有黄鹄，
怜君长向高枝宿。如何一借羊角风，来听箫韶九成曲。

卷 356_32【八月十五日夜桃源玩月】

刘禹锡

尘中见月心亦闲，况是清秋仙府间。凝光悠悠寒露坠，
此时立在最高山。碧虚无云风不起，山上长松山下水。
群动翛然一顾中，天高地平千万里。少君引我升玉坛，
礼空遥请真仙官。云輶欲下星斗动，天乐一声肌骨寒。
金霞昕昕渐东上，轮欹影促犹频望。绝景良时难再并，
他年此日应惆怅。

卷 356_33【送鸿举游江西】

刘禹锡

禅客学禅兼学文，出山初似无心云。从风卷舒来何处，
缭绕巴山不得去。山州古寺好闲居，读尽龙王宫里书。
使君滩头拣石砚，白帝城边寻野蔬。忽然登高心瞥起，
又欲浮杯信流水。烟波浩淼鱼鸟情，东去三千三百里。
荆门峡断无盘涡，湘平汉阔清光多。庐山雾开见瀑布，
江西月净闻渔歌。钟陵八郡多名守，半是西方社中友。
与师相见便谈空，想得高斋狮子吼。

卷 356_34 【采菱行】

刘禹锡

白马湖平秋日光，紫菱如锦彩鸳翔。荡舟游女满中央，
采菱不顾马上郎。争多逐胜纷相向，时转兰桡破轻浪。
长鬟弱袂动参差，钗影钿文浮荡漾。笑语哇咬顾晚晖，
蓼花缘岸扣舷归。归来共到市桥步，野蔓系船萍满衣。
家家竹楼临广陌，下有连樯多估客。携觞荐芰夜经过，
醉踏大堤相应歌。屈平祠下沅江水，月照寒波白烟起。
一曲南音此地闻，长安北望三千里。

卷 356_35 【和牛相公南溪醉歌见寄】

刘禹锡

脱屣将相守冲谦，唯于山水独不廉。枕伊背洛得胜地，
鸣皋少室来轩檐。相形面势默指画，言下变化随顾瞻。
清池曲榭人所致，野趣幽芳天与添。有时转入潭岛间，
珍木如幄藤为帘。忽然便有江湖思，沙砾平浅草纤纤。
怪石钓出太湖底，珠树移自天台山。崇兰迎风绿泛艳，
坼莲含露红 a 檐。修廊架空远岫入，弱柳覆槛流波沾。
渚蒲抽芽剑脊动，岸荻迸笋锥头钐。携觞命侣极永日。
此会虽数心无厌。人皆置庄身不到，富贵难与逍遥兼。
唯公出处得自在，决就放旷辞炎炎。座宾尽欢恣谈讕，

愧我掉头还奋髯。能令商於多病客，亦觉自适非沉潜。

卷 356_36【和浙西李大夫霜夜对月，听小童吹觱篥歌，依本韵】

刘禹锡

海门双青暮烟歇，万顷金波涌明月。侯家小儿能觱篥，
对此清光天性发。长江凝练树无风，浏栗一声霄汉中。
涵胡画角怨边草，萧瑟清蝉吟野丛。冲融顿挫心使指，
雄吼如风转如水。思妇多情珠泪垂，仙禽欲舞双翅起。
郡人寂听衣满霜，江城月斜楼影长。才惊指下繁韵息，
已见树杪明星光。谢公高斋吟激楚，恋阙心同在羁旅。
一奏荆人白雪歌，如闻雒客扶风邬。吴门水驿按山阴，
文字殷勤寄意深。欲识阳陶能绝处，少年荣贵道伤心。

卷 356_37【叹水别白二十二】

刘禹锡

水。至清，尽美。从一勺，至千里。利人利物，
时行时止。道性净皆然，交情淡如此。君游金谷堤上，
我在石渠署里。两心相忆似流波，潺湲日夜无穷已。

卷 356_38 【同留守王仆射各赋春中一物，从一韵至七】

刘禹锡

莺。能语，多情。春将半，天欲明。始逢南陌，
复集东城。林疏时见影，花密但闻声。营中缘催短笛，
楼上来定哀箏。千门万户垂杨里，百转如簧烟景晴。

卷 356_39 【伤我马词】

刘禹锡

生于磧砺善驰走，万里南来困丘阜。青菰寒菽非适口，
病闻北风犹举首。金台已平骨空朽，投之龙渊从尔友。

卷 356_40 【清湘词二首】

刘禹锡

湘水流，湘水流，九疑云物至今愁。君问二妃何处所，
零陵香草雨中收。

斑竹枝，斑竹枝，泪痕点点寄相思。楚客欲闻瑶瑟怨，
潇湘深夜月明时。

卷 356_41【和乐天春词，依忆江南曲拍为句】

刘禹锡

春去也，多谢洛城人。弱柳从风疑举袂，
丛兰裊露似沾巾。独坐亦含嚬。
春过也，笑惜艳阳年。犹有桃花流水上，
无辞竹叶醉樽前。惟待见青天。

卷 356_42【泽宫诗】

刘禹锡

秩秩泽宫，有的维鹄。祁祁庶士，于以干禄。
彼鹄斯微，若止若翔。千里之差，起于毫芒。
我矢既直，我弓既良，依于高墉，因我不臧。
高墉伊何，维器与时。视之以心，谁谓鹄微。

卷 356_43【酬令狐相公六言见寄】

刘禹锡

已嗟别离太远，更被光阴苦催。吴苑燕辞人去，
汾川雁带书来。愁吟月落犹望，忆梦天明未回。

今日便令歌者，唱兄诗送一杯。

卷 356_44 【答乐天临都驿见赠】

刘禹锡

北固山边波浪，东都城里风尘。
世事不同心事，新人何似故人。

卷 356_45 【再赠乐天】

刘禹锡

一政政官轧轧，一年年老駸駸。
身外名何足算，别来诗且同吟。

卷 356_46 【酬杨侍郎凭见寄】

刘禹锡

十年毛羽摧颓，一旦天书召回。
看看瓜时欲到，故侯也好归来。

卷三百五十七

卷 357_1【春有情篇】

刘禹锡

为问游春侣，春情何处寻。花含欲语意，草有斗生心。
雨频催发色，云轻不作阴。纵令无月夜，芳兴暗中深。

卷 357_2【七夕二首】

刘禹锡

河鼓灵旗动，嫦娥破镜斜。满空天是幕，徐转斗为车。
机罢犹安石，桥成不碍槎。谁知观津女，竟夕望云涯。

天衢启云帐，神驭上星桥。初喜渡河汉，频惊转斗杓。
馀霞张锦幃，轻电闪红绡。非是人间世，还悲后会遥。

卷 357_3 【边风行】

刘禹锡

边马萧萧鸣，边风满碛生。暗添弓箭力，斗上鼓鼙声。
袭月寒晕起，吹云阴阵成。将军占气候，出号夜翻营。

卷 357_4 【送工部萧郎中刑部李郎中并以本官兼中丞分命充
京西京北覆粮使】

刘禹锡

霜简映金章，相辉同舍郎。天威巡虎落，星使出鸳行。
尊俎成全策，京坻阅见粮。归来虏尘灭，画地奏明光。

卷 357_5 【送太常萧博士弃官归养赴东都】

刘禹锡

兄弟尽鸳鸾，归心切问安。贪荣五彩服，遂挂两梁冠。
侍膳曾调鼎，循陔更握兰。从今别君后，长忆德星看。

卷 357_6 【送河南皇甫少尹赴絳州】

刘禹锡

祖帐临周道，前旌指晋城。午桥群吏散，亥字老人迎。
诗酒同行乐，别离方见情。从此洛阳社，吟咏属书生。

卷 357_7 【发华州留别张侍御】

刘禹锡

束简下延阁，买符驱短辕。同人惜分袂，结念醉芳樽。
切切别弦急，萧萧征骑烦。临岐无限意，相视却忘言。

卷 357_8 【奉送家兄归王屋山隐居二首】

刘禹锡

洛阳天坛上，依稀似玉京。夜分先见日，月静远闻笙。
云路将鸡犬，丹台有姓名。古来成道者，兄弟亦同行。

春来山事好，归去亦逍遥。水净苔莎色，露香芝朮苗。
登台吸瑞景，飞步翼神飙。愿荐埙簫曲，相将学玉箫。

卷 357_9 【送王师鲁协律赴湖南使幕】

刘禹锡

翩翩马上郎，驱传渡三湘。橘树沙洲暗，松醪酒肆香。
素风传竹帛，高价聘琳琅。楚水多兰芷，何人事搴芳。

卷 357_10 【送赵中丞自司金郎转官参山南令狐仆射幕府】

刘禹锡

绿树满褒斜，西南蜀路赊。驿门临白草，县道入黄花。
相府开油幕，门生逐绛纱。行看布政后，还从入京华。

卷 357_11 【送卢处士归嵩山别业】

刘禹锡

世业嵩山隐，云深无四邻。药炉烧姹女，酒瓮贮贤人。
晚日华阴雾，秋风函谷尘。送君从此去，铃阁少谈宾。

卷 357_12 【洛中送崔司业使君扶侍赴唐州】

刘禹锡

绿野芳城路，残春柳絮飞。风鸣骠驎马，日照老莱衣。
洛苑鱼书至，江村雁户归。相思望淮水，双鲤不应稀。

卷 357_13 【送李友路秀才赴举】

刘禹锡

谁怜相门子，不语望秋山。生长绮紈内，辛勤笔砚间。
荣亲在名字，好学弃官班。伫俟明年桂，高堂开笑颜。

卷 357_14 【送从弟郎中赴浙西】

刘禹锡

衔命出尚书，新恩换使车。汉庭无右者，梁苑重归欤。
又食建业水，曾依京口居。共经何限事，宾主两如初。

卷 357_15 【送元上人归稽亭】

刘禹锡

重叠稽亭路，山僧归独行。远峰斜日影，本寺旧钟声。
徒侣问新事，烟云怆别情。应夸乞食处，踏遍凤凰城。

卷 357_16 【赠别君素上人诗】

刘禹锡

穷巷唯秋草，高僧独扣门。相欢如旧识，问法到无言。
水为风生浪，珠非尘可昏。悟来皆是道，此别不销魂。

卷 357_17 【送深法师游南岳】

刘禹锡

师在白云乡，名登善法堂。十方传句偈，八部会坛场。
飞锡无定所，宝书留旧房。唯应衔果雁，相送至衡阳。

卷 357_18 【赠别约师】

刘禹锡

师逢吴兴守，相伴住禅扃。春雨同栽树，秋灯对讲经。
庐山曾结社，桂水远扬舲。话旧还惆怅，天南望柳星。

卷 357_19 【秋日过鸿举法师寺院，便送归江陵】

刘禹锡

看画长廊遍，寻僧一径幽。小池兼鹤净，古木带蝉秋。
客至茶烟起，禽归讲席收。浮杯明日去，相望水悠悠。

卷 357_20 【春日退朝】

刘禹锡

紫陌夜来雨，南山朝下看。戟枝迎日动，阁影助松寒。
瑞气转绡縠，游光泛波澜。御沟新柳色，处处拂归鞍。

卷 357_21 【蜀先主庙】

刘禹锡

天地英雄气，千秋尚凛然。势分三足鼎，业复五铢钱。
得相能开国，生儿不象贤。凄凉蜀故妓，来舞魏宫前。

卷 357_22 【经东都安国观九仙公主旧院作】

刘禹锡

仙院御沟东，今来事不同。门开青草日，楼闭绿杨风。
将犬升天路，披云赴月宫。武皇曾驻蹕，亲问主人翁。

卷 357_23 【观八阵图】

刘禹锡

轩皇传上略，蜀相运神机。水落龙蛇出，沙平鹅鹳飞。
波涛无动势，鳞介避馀威。会有知兵者，临流指是非。

卷 357_24 【八月十五日夜玩月】

刘禹锡

天将今夜月，一遍洗寰瀛。暑退九霄净，秋澄万景清。

星辰让光彩，风露发晶英。能变人间世，翛然是玉京。

卷 357_25 【太和戊申岁大有年，诏赐百僚出城观秋稼，谨书盛事以俟采诗者】

刘禹锡

长安铜雀鸣，秋稼与云平。玉烛调寒暑，金风报顺成。

川原呈上瑞，恩泽赐闲行。欲反重城掩，犹闻歌吹声。

卷 357_26 【金陵怀古】

刘禹锡

潮满冶城渚，日斜征虏亭。蔡洲新草绿，幕府旧烟青。

兴废由人事，山川空地形。后庭花一曲，幽怨不堪听。

卷 357_27 【昼居池上亭独吟】

刘禹锡

日午树阴正，独吟池上亭。静看蜂教诲，闲想鹤仪形。
法酒调神气，清琴入性灵。浩然机已息，几杖复何铭。

卷 357_28 【分司东都蒙襄阳李司徒相公书问因以奉寄】

刘禹锡

早忝金马客，晚为商洛翁。知名四海内，多病一生中。
举世往还尽，何人心事同。几时登岷首，恃旧揖三公。

卷 357_29 【门下相公荣加册命，天下同欢忝沐眷私，辄感申贺】

刘禹锡

册命出宸衷，官仪自古崇。特膺平土拜，光赞格天功。
再佩扶阳印，常乘鲍氏骢。七贤遗老在，犹得咏清风。

卷 357_30 【病中一二禅客见问，因以谢之】

刘禹锡

劳动诸贤者，同来问病夫。添炉烹雀舌，洒水净龙须。
身是芭蕉喻，行须筇竹扶。医王有妙药，能乞一丸无。

卷 357_31 【秋江晚泊】

刘禹锡

长泊起秋色，空江涵霁晖。暮霞千万状，宾鸿次第飞。
古戍见旗迥，荒村闻犬稀。轲峨艑上客，劝酒夜相依。

卷 357_32 【步出武陵东亭临江寓望】

刘禹锡

鹰至感风候，霜馀变林麓。孤帆带日来，寒江转沙曲。
戍摇旗影动，津晚橹声促。月上彩霞收，渔歌远相续。

卷 357_33【秋日送客至潜水驿】

刘禹锡

候吏立沙际，田家连竹溪。枫林社日鼓，茅屋午时鸡。
鹊噪晚禾地，蝶飞秋草畦。驿楼宫树近，疲马再三嘶。

卷 357_34【湖州崔郎中曹长寄三癖诗，自言癖在诗与琴酒，
其词逸而高，吟咏不足，昔柳吴兴亭皋陇首之句，王融书之白
团扇，故为四韵以谢之】

刘禹锡

视事画屏中，自称三癖翁。管弦泛春渚，旌旆拂晴虹。
酒对青山月，琴韵白蘋风。会书团扇上，知君文字工。

卷 357_35【为郎分司寄上都同舍】

刘禹锡

籍通金马门，家在铜驼陌。省闼昼无尘，宫树朝凝碧。
荒街浅深辙，古渡潺湲石。唯有嵩丘云，堪夸早朝客。

卷 357_36 【登陕州北楼却忆京师亲友】

刘禹锡

独上百尺楼，目穷思亦愁。初日遍露草，野田荒悠悠。
尘息长道白，林清宿烟收。回首云深处，永怀乡旧游。

卷 357_37 【途中早发】

刘禹锡

中庭望启明，促促事晨征。寒树鸟初动，霜桥人未行。
水流白烟起，日上彩霞生。隐士应高枕，无人问姓名。

卷 357_38 【陕州河亭陪韦五大夫，雪后眺望因以留别，与韦有布衣之旧，一别二纪，经迁贬而归】

刘禹锡

雪霁太阳津，城池表里春。河流添马颊，原色动龙鳞。
万里独归客，一杯逢故人。登高向西望，关路正飞尘。

卷 357_39 【城东闲游】

刘禹锡

借问池台主，多居要路津。千金买绝境，永日属闲人。

竹径萦纡入，花林委曲巡。斜阳众客散，空锁一园春。

卷 357_40 【罢郡归洛阳闲居】

刘禹锡

十年江海守，旦夕有归心。及此西还日，空成东武吟。

花间数杯酒，月下一张琴。闻说功名事，依前惜寸阴。

卷 357_41 【晚泊牛渚】

刘禹锡

芦苇晚风起，秋江鳞甲生。残霞忽变色，游雁有馀声。

戍鼓音响绝，渔家灯火明。无人能咏史，独自月中行。

卷 357_42 【宿诚禅师山房题赠二首】

刘禹锡

宴坐白云端，清江直下看。来人望金刹，讲席绕香坛。
虎啸夜林动，鼉鸣秋涧寒。众音徒起灭，心在净中观。

不出孤峰上，人间四十秋。视身如传舍，阅世似东流。
法为因缘立，心从次第修。中宵问真偈，有住是吾忧。

卷 357_43 【赠澧州高大夫司马霞寓】

刘禹锡

前年牧锦城，马蹋血泥行。千里追戎首，三军许勇名。
残兵疑鹤唳，空垒辩乌声。一误云中级，南游湘水清。

卷 357_44 【闻董评事疾因以书赠】

刘禹锡

繁露传家学，青莲译梵书。火风乖四大，文字废三馀。
欹枕昼眠静，折巾秋鬓疏。武皇思视草，谁许茂陵居。

卷 357_45 【咏庭梅寄人】

刘禹锡

早花常犯寒，繁实常苦酸。何事上春日，坐令芳意阑。
夭桃定相笑，游妓肯回看。君问调金鼎，方知正味难。

卷 357_46 【德宗神武孝文皇帝挽歌二首】

刘禹锡

出震清多难，乘时播大钧。操弦调六气，挥翰动三辰。
运偶升天日，哀深率土人。瑶池无辙迹，谁见属车尘。
凤翼拥铭旌，威迟异吉行。汉仪陈秘器，楚挽咽繁声。
驻綵辞清庙，凝笳背直城。唯应留内传，知是向蓬瀛。

卷 357_47 【敬宗睿武昭愍孝皇帝挽歌三首】

刘禹锡

宝历方无限，仙期忽有涯。事亲崇汉礼，传圣法殷家。

· 全唐诗 ·

晚出芙蓉阙，春归棠棣华。玉轮今日动，不是画云车。

任贤劳梦寐，登位富春秋。欲遂东人幸，宁虞杞国忧。
长杨收羽骑，太液泊龙舟。惟有衣冠在，年年怆月游。

讲学金华殿，亲耕钩盾田。侍臣容谏猎，方士信求仙。
虹影俄侵日，龙髯不上天。空余水银海，长照夜灯前。

卷 357_48【文宗元圣昭献孝皇帝挽歌三首】

刘禹锡

继体三才理，承颜九族亲。禹功留海内，殷历付天伦。
调露曲常在，秋风词尚新。本支方百代，先让棣华春。

月落宫车动，风凄仪仗闲。路唯瞻凤翼，人尚想龙颜。
御宇方无事，乘云遂不还。圣情悲望处，沉日下西山。

享国十五载，升天千万年。龙鑣仙路远，骑吹礼容全。
日下初陵外，人悲旧剑前。周南有遗老，掩泪望秦川。

卷 357_49【故相国燕国公于司空挽歌二首】

刘禹锡

雕弓封旧国，黑弰继前功。十年镇南雍，九命作司空。

池台乐事尽，箫鼓葬仪雄。一代英豪气，晓散白杨风。

阴山贵公子，来葬五陵西。前马悲无主，犹带朔风嘶。
汉水晋山郭，襄阳白铜鞮。至今有遗爱，日暮人凄凄。

卷 357_50 【伤丘中丞】

刘禹锡

邺下杀才子，苍茫冤气凝。枯杨映漳水，野火上西陵。
马鬣今无所，龙门昔共登。何人为吊客，唯是有青蝇。

卷 357_51 【河南观察使故相国袁公挽歌三首】

刘禹锡

五驱龙虎节，一入凤凰池。令尹自无喜，羊公人不疑。
天归京兆日，叶下洞庭时。湘水秋风至，凄凉吹素旗。

丹旌发江皋，人悲雁亦号。湘南罢亥市，汉上改词曹。
表墓双碑立，尊名一字褒。尝闻平楚狱，为报里门高。

返葬三千里，荆衡达帝畿。逢人即故吏，拜奠尽沾衣。
地得青乌相，宾惊白鹤飞。五公碑尚在，今日亦同归。

卷 357_52 【哭王仆射相公】

刘禹锡

子侯一日病，滕公千载归。门庭怆已变，风物澹无辉。
群吏谒新府，旧宾沾素衣。歌堂忽暮哭，贺雀尽惊飞。

卷 357_53 【伤韦宾客】

刘禹锡

韦公八十馀，位至六尚书。五福唯无富，一生谁得如。
桂枝攀最久，兰省出仍初。海内时流尽，何人动素车。

卷 357_54 【再经故元九相公宅池上作】

刘禹锡

故池春又至，一到一伤情。雁鹭群犹下，蛙螟衣已生。
竹丛身后长，台势雨来倾。六尺孤安在，人间未有名。

卷 357_55 【请告东归发灞桥却寄诸僚友】

刘禹锡

征徒出灞浹，回首伤如何。故人云雨散，满目山川多。
行车无停轨，流景同迅波。前欢渐成昔，感叹益劳歌。

卷 357_56 【初至长安】

刘禹锡

左迁凡二纪，重见帝城春。老大归朝客，平安出岭人。
每行经旧处，却想似前身。不改南山色，其馀事事新。

卷 357_57 【岁杪将发楚州呈乐天】

刘禹锡

楚泽雪初霁，楚城春欲归。清淮变寒色，远树含清晖。
原野已多思，风霜潜减威。与君同旅雁，北向刷毛衣。

卷 357_58 【鹤叹二首】

刘禹锡

寂寞一双鹤，主人在西京。故巢吴苑树，深院洛阳城。
徐引竹间步，远含云外情。谁怜好风月，邻舍夜吹笙。

丹顶宜承日，霜翎不染泥。爱池能久立，看月未成栖。
一院春草长，三山归路迷。主人朝谒早，贪养汝南鸡。

卷 357_59 【答白刑部闻新蝉】

刘禹锡

蝉声未发前，已自感流年。一入凄凉耳，如闻断续弦。
晴清依露叶，晚急畏霞天。何事秋卿咏，逢时亦悄然。

卷 357_60 【和裴相公寄白侍郎求双鹤】

刘禹锡

皎皎华亭鹤，来随太守船。青云意长在，沧海别经年。
留滞清洛苑，裴回明月天。何如凤池上，双舞入祥烟。

卷 357_61 【终南秋雪】

刘禹锡

南岭见秋雪，千门生早寒。闲时驻马望，高处卷帘看。
雾散琼枝出，日斜铅粉残。偏宜曲江上，倒影入清澜。

卷 357_62 【和乐天早寒】

刘禹锡

雨引苔侵壁，风驱叶拥阶。久留闲客话，宿请老僧斋。
酒瓮新陈接，书签次第排。翛然自有处，摇落不伤怀。

卷 357_63 【曲江春望】

刘禹锡

凤城烟雨歇，万象含佳气。酒后人倒狂，花时天似醉。
三春车马客，一代繁华地。何事独伤怀，少年曾得意。

卷 357_64【同乐天 and 微之深春二十首】

刘禹锡

何处深春好，春深万乘家。宫门皆映柳，辇路尽穿花。
池色连天汉，城形象帝车。旌旗暖风里，猎猎向西斜。

何处深春好，春深阿母家。瑶池长不夜，珠树正开花。
桥峻通星渚，楼暄近日车。层城十二阙，相对日西斜。

何处深春好，春深执政家。恩光贪捧日，贵重不看花。
玉馔堂交印，沙堤柱碍车。多门一已闭，直道更无斜。

何处深春好，春深大镇家。前旌光照日，后骑蹙成花。
节院收衙队，球场簇看车。广筵歌舞散，书号夕阳斜。

何处深春多，春深贵戚家。枥嘶无价马，庭发有名花。
欲进宫人食，先薰命妇车。晚归长带酒，冠盖任倾斜。

何处深春好，春深恩泽家。炉添龙脑炷，绶结虎头花。
宾客珠成履，婴孩锦缚车。画堂帘幕外，来去燕飞斜。

何处深春好，春深京兆家。人眉新柳叶，马色醉桃花。
盗息无鸣鼓，朝回自走车。能令帝城外，不敢径由斜。

何处深春好，春深刺史家。夜阑犹命乐，雨甚亦寻花。

傲客多凭酒，新姬苦上车。公门吏散后，风摆戟衣斜。

何处深春好，春深羽客家。芝田绕舍色，杏树满山花。
云是淮王宅，风为列子车。古坛操简处，一径入林斜。

何处深春好，春深小隐家。芟庭留野菜，撼树去狂花。
醉酒一千日，贮书三十车。雉衣从露体，不敢有馀斜。

何处深春好，春深富室家。唯多贮金帛，不拟负莺花。
国乐呼联辔，行厨载满车。归来看理曲，灯下宝钗斜。

何处深春好，春深豪士家。多沽味浓酒，贵买色深花。
已臂鹰随马，连催妓上车。城南踏青处，村落逐原斜。

何处深春好，春深贵胄家。迎呼偏熟客，拣选最多花。
饮饯开华幄，笙歌出钿车。兴酣樽易罄，连泻酒瓶斜。

何处深春好，春深唱第家。名传一纸榜，兴管九衢花。
荐听诸侯乐，来随计吏车。杏园抛曲处，挥袖向风斜。

何处深春好，春深少妇家。能偷新禁曲，自剪入时花。
追逐同游伴，平章贵价车。从来不堕马，故遣髻鬟斜。

何处深春好，春深幼女家。双鬟梳顶髻，两面绣裙花。
妆坏频临镜，身轻不占车。秋千争次第，牵拽彩绳斜。

何处深春好，春深兰若家。当香收柏叶，养蜜近梨花。

野径宜行乐，游人尽驻车。菜园篱落短，遥见桔槔斜。

何处深春好，春深老宿家。小栏围蕙草，高架引藤花。
四字香书印，三乘壁画车。迟回听句偈，双树晚阴斜。

何处深春好，春深种蒔家。分畦十字水，接树两般花。
栳比栽篱槿，咿哑转井车。可怜高处望，棋布不曾斜。

何处深春好，春深稚子家。争骑一竿竹，偷折四邻花。
笑击羊皮鼓，行牵犊额车。中庭贪夜戏，不觉玉绳斜。

卷 357_65【赠眼医婆罗门僧】

刘禹锡

三秋伤望眼，终日哭途穷。两目今先暗，中年似老翁。
看朱渐成碧，羞日不禁风。师有金篦术，如何为发蒙。

卷 357_66【海门潮别浩初师】

刘禹锡

前日过萧寺，看师上讲筵。都上礼白足，施者散金钱。
方便无非教，经行不废禅。还知习居士，发论侍弥天。

卷三百五十八

卷 358_1【始闻蝉，有怀白宾客，去岁白有闻蝉见寄诗，云只应催我老兼遣报君知之句】

刘禹锡

蝉韵极清切，始闻何处悲。人含不平意，景值欲秋时。

此岁方晚晚，谁家无别离。君言催我老，已是去年诗。

卷 358_2【赠乐天】

刘禹锡

一别旧游尽，相逢俱涕零。在人虽晚达，于树似冬青。

痛饮连宵醉，狂吟满坐听。终期抛印绶，共占少微星。

卷 358_3 【到郡未浹日，登西楼见乐天题诗，因即事以寄】

刘禹锡

湖上收宿雨，城中无昼尘。楼依新柳贵，池带乱苔青。

云水正一望，簿书来绕身。烟波洞庭路，愧彼扁舟人。

卷 358_4 【秋夕不寐寄乐天】

刘禹锡

洞户夜帘卷，华堂秋簟清。萤飞过池影，蛩思绕阶声。

老枕知将雨，高窗报欲明。何人谙此景，远问白先生。

卷 358_5 【冬日晨兴寄乐天】

刘禹锡

庭树晓禽动，郡楼残点声。灯挑红烬落，酒暖白光生。

发少嫌梳利，颜衰恨镜明。独吟谁应和，须寄洛阳城。

卷 358_6 【答乐天见忆】

刘禹锡

与老无期约，到来如等闲。偏伤朋友尽，移兴子孙间。
笔底心无毒，杯前胆不豚。唯馀忆君梦，飞过武牢关。

卷 358_7 【和乐天诮失婢榜者】

刘禹锡

把镜朝犹在，添香夜不归。鸳鸯拂瓦去，鹦鹉透笼飞。
不逐张公子，即随刘武威。新知正相乐，从此脱青衣。

卷 358_8 【八月十五日夜半云开然后玩月，因书一时之景寄呈乐天】

刘禹锡

半夜碧云收，中天素月流。开城邀好客，置酒赏清秋。
影透衣香润，光凝歌黛愁。斜辉犹可玩，移宴上西楼。

卷 358_9【秋日书怀寄白宾客】

刘禹锡

州远雄无益，年高健亦衰。兴情逢酒在，筋力上楼知。
蝉噪芳意尽，雁来愁望时。商山紫芝客，应不向秋悲。

卷 358_10【酬乐天初冬早寒见寄】

刘禹锡

乍起衣犹冷，微吟帽半欹。霜凝南屋瓦，鸡唱后园枝。
洛水碧云晓，吴宫黄叶时。两传千里意，书札不如诗。

卷 358_11【和令狐相公郡斋对紫薇花】

刘禹锡

明丽碧天霞，丰茸紫绶花。香闻荀令宅，艳入孝王家。
几岁自荣乐，高情方叹嗟。有人移上苑，犹足占年华。

卷 358_12 【令狐相公俯赠篇章斐然仰谢】

刘禹锡

鄂渚临流别，梁园冲雪来。旅愁随冻释，欢意待花开。

城晓乌频起，池春雁欲回。饮和心自醉，何必管弦催。

卷 358_13 【酬令狐相公早秋见寄】

刘禹锡

公来第四秋，乐国号无愁。军士游书肆，商人占酒楼。

熊罴交黑槊，宾客满青油。今日文章主，梁王不姓刘。

卷 358_14 【和令狐相公入潼关】

刘禹锡

寒光照旌节，关路晓无尘。吏谒前丞相，山迎旧主人。

东瞻军府静，西望敕书频。心共黄河水，同升天汉津。

卷 358_15 【和令狐相公寻白阁老见留小饮因赠】

刘禹锡

傲士更逢酒，乐天仍对花。文章管星历，情兴占年华。
宦达翻思退，名高却不夸。惟存浩然气，相共赏烟霞。

卷 358_16 【酬令狐相公雪中游玄都见忆】

刘禹锡

好雪动高情，心期在玉京。人披鹤氅出，马踏象筵行。
照耀楼台变，淋漓松桂清。玄都留五字，使入步虚声。

卷 358_17 【和令狐相公以司空裴相见招南亭看雪四韵】

刘禹锡

重门不下关，枢务有馀闲。上客同看雪，高亭尽见山。
瑞呈霄汉外，兴入笑言间。知是平阳会，人人带酒还。

卷 358_18 【和郢州令狐相公春晚对花】

刘禹锡

朱门退公后，高兴对花枝。望阙无穷思，看书欲尽时。
含芳朝竞发，凝艳晚相宜。人意殷勤惜，狂风岂得知。

卷 358_19 【酬令狐相公春日言怀见寄】

刘禹锡

前陪看花处，邻里近王昌。今想临戎地，旌旗出汶阳。
营飞柳絮雪，门耀戟枝霜。东望清河水，心随艑上郎。

卷 358_20 【途次大梁，雪中奉天平令狐相公书问，兼示新什，因思曩岁从此拜辞，形于短篇以申仰谢】

刘禹锡

远守宦情薄，故人书信来。共曾花下别，今独雪中回。
纸尾得新什，眉头还暂开。此时同雁鹜，池上一徘徊。

卷 358_21 【酬令狐相公秋怀见寄】

刘禹锡

寂寞蝉声静，差池燕羽回。秋风怜越绝，朔气想台骀。
相去数千里，无因同一杯。殷勤望飞雁，新自塞垣来。

卷 358_22 【酬太原令狐相公见寄】

刘禹锡

书信来天外，琼瑶满匣中。衣冠南渡远，旌节北门雄。
鹤唳华亭月，马嘶榆塞风。山川几千里，惟有两心同。

卷 358_23 【酬令狐相公岁暮远怀见寄】

刘禹锡

别侣孤鹤怨，冲天威凤归。容光一以间，梦想是耶非。
芳讯远弥重，知音老更稀。不如湖上雁，北向整毛衣。

卷 358_24 【酬令狐相公亲仁郭家花下即事见寄】

刘禹锡

荀令园林好，山公游赏频。岂无花下侣，远望眼中人。
斜日渐移影，落英纷委尘。一吟相思曲，惆怅江南春。

卷 358_25 【酬令狐相公首夏闲居书怀见寄】

刘禹锡

蕙草芳未歇，绿槐阴已成。金罍唯独酌，瑶瑟有离声。
翔泳各殊势，篇章空寄情。应怜三十载，未变使君名。

卷 358_26 【酬令狐相公庭前白菊花谢偶书所怀见寄】

刘禹锡

数丛如雪色，一旦冒霜开。寒蕊差池落，清香断续来。
思深含别怨，芳谢惜年催。千里难同赏，看看又早梅。

卷 358_27 【酬令狐相公季冬南郊宿斋见寄】

刘禹锡

坛下雪初霁，南城冻欲生。斋心祠上帝，高步领名卿。
沐浴含芳泽，周旋听佩声。犹怜广平守，寂寞竟何成。

卷 358_28 【贞元中，侍郎舅氏牧华州，时余再忝科第，前后由华觐谒，陪登伏毒寺屡焉，亦曾赋诗题于梁栋。今典冯翊暇日登楼，南望三峰浩然生思，追想昔年之事，因成篇题旧寺】

刘禹锡

曾作关中客，频经伏毒岩。晴烟沙苑树，晚日渭川帆。
昔是青春貌，今悲白雪髯。郡楼空一望，含意卷高帘。

卷 358_29 【酬令狐相公杏园花下饮有怀见寄】

刘禹锡

年年曲江望，花发即经过。未饮心先醉，临风思倍多。
三春看又尽，两地欲如何。日望长安道，空成劳者歌。

卷 358_30 【令狐相公见示，题洋州崔侍郎宅双木瓜花顷接侍郎同舍陪宴树下吟玩来什，辄成和章】

刘禹锡

金牛蜀路远，玉树帝城春。荣耀生华馆，逢迎欠主人。
帘前疑小雪，墙外丽行尘。来去皆回首，情深是德邻。

卷 358_31 【和令狐相公春早朝回盐铁使院中作】

刘禹锡

柳动御沟清，威迟堤上行。城隅日未过，山色雨初晴。
莺避传呼起，花临府署明。簿书盈几案，要自有高情。

卷 358_32 【和令狐仆射相公题龙回寺】

刘禹锡

兹地回銮日，皇家禅圣时。路无胡马迹，人识汉官仪。
天子旌旗度，法王龙象随。知怀去家叹，经此益迟迟。

卷 358_33 【令狐相公频示新什，早春南望遐想汉中，因抒短章以寄情愫】

刘禹锡

军城临汉水，旌旆起春风。远思见江草，归心看塞鸿。
野花沿古道，新叶映行宫。惟有诗兼酒，朝朝两不同。

卷 358_34 【和令狐相公咏栀子花】

刘禹锡

蜀国花已尽，越桃今已开。色疑琼树倚，香似玉京来。
且赏同心处，那忧别叶催。佳人如拟咏，何必待寒梅。

卷 358_35 【酬令狐相公新蝉见寄】

刘禹锡

相去三千里，闻蝉同此时。清吟晓露叶，愁噪夕阳枝。
忽尔弦断绝，俄闻管参差。洛桥碧云晚，西望佳人期。

卷 358_36 【酬乐天闲卧见寄】

刘禹锡

散诞向阳眠，将闲敌地仙。诗情茶助爽，药力酒能宣。
风碎竹间日，露明池底天。同年未同隐，缘欠买山钱。

卷 358_37 【酬乐天小亭寒夜有怀】

刘禹锡

寒夜阴云起，疏林宿鸟惊。斜风闪灯影，迸雪打窗声。
竟夕不能寐，同年知此情。汉皇无奈老，何况本书生。

卷 358_38 【将之官留辞裴令公留守】

刘禹锡

祖帐临伊水，前旌指渭河。风烟里数少，云雨别情多。
重叠受恩久，遭回如命何。东山与东阁，终异再经过。

卷 358_39 【酬喜相遇同州与乐天替代】

刘禹锡

旧托松心契，新交竹使符。行年同甲子，筋力羨丁夫。
别后诗成帙，携来酒满壶。今朝停五马，不独为罗敷。

卷 358_40 【闲坐忆乐天以诗问酒熟未】

刘禹锡

案头开缥帙，肘后检青囊。唯有达生理，应无治老方。
减书存眼力，省事养心王。君酒何时熟，相携入醉乡。

卷 358_41 【秋中暑退赠乐天】

刘禹锡

暑服宜秋著，清琴入夜弹。人情皆向菊，风意欲摧兰。
岁稔贫心泰，天凉病体安。相逢取次第，却甚少年欢。

卷 358_42 【乐天池馆夏景方妍，白莲初开彩舟空泊，唯邀
缙侣因以戏之】

刘禹锡

池馆今正好，主人何寂然。白莲方出水，碧树未鸣蝉。
静室宵闻磬，斋厨晚绝烟。蕃僧如共载，应不是神仙。

卷 358_43 【酬乐天感秋凉见寄】

刘禹锡

庭晚初辨色，林秋微有声。槿衰犹强笑，莲迥却多情。
檐燕归心动，鞦鹰俊气生。闲人占闲景，酒熟且同倾。

卷 358_44 【秋晚新晴夜月如练有怀乐天】

刘禹锡

雨歇晚霞明，风调夜景清。月高微晕散，云薄细鳞生。
露草百虫思，秋林千叶声。相望一步地，脉脉万重情。

卷 358_45 【新秋对月寄乐天】

刘禹锡

月露发光彩，此时方见秋。夜凉金气应，天静火星流。
蛩响偏依井，萤飞直过楼。相知尽白首，清景复追游。

卷 358_46 【酬乐天小台晚坐见忆】

刘禹锡

小台堪远望，独上清秋时。有酒无人劝，看山只自知。
幽禽啜新竹，孤莲落静池。高门勿遽掩，好客无前期。

卷 358_47 【早秋雨后寄乐天】

刘禹锡

夜云起河汉，朝雨洒高林。梧叶先风落，草虫迎湿吟。
簟凉扇恩薄，室静琴思深。且喜炎前别，安能怀寸阴。

卷 358_48 【秋晚病中乐天以诗见问力疾奉酬】

刘禹锡

耳虚多听远，展转晨鸡鸣。一室背灯卧，中宵扫叶声。
兰芳经雨败，鹤病得秋轻。肯踏衡门草，唯应是友生。

卷 358_49 【和乐天烧药不成命酒独醉】

刘禹锡

九转欲成就，百神应主持。婴啼鼎上去，老貌镜前悲。
却顾空丹灶，回心向酒卮。醺然耳热后，暂似少年时。

卷 358_50 【元日乐天见过因举酒为贺】

刘禹锡

渐入有年数，喜逢新岁来。震方天籁动，寅位帝车回。
门巷扫残雪，林园惊早梅。与君同甲子，寿酒让先杯。

卷 358_51【酬马大夫以愚献通草茛菪酒，感通拔二字，因而寄别之作】

刘禹锡

泥沙难振拔，谁复问穷通。莫讶提壶赠，家传枕曲风。
成谣独酌后，深意片言中。不进终无已，应须荀令公。

卷 358_52【奉和司空裴相公中书即事通简旧僚之作】

刘禹锡

谭笑在岩廊，人人尽所长。仪形见山立，文字动星光。
日运丹青笔，时看赤白囊。伫闻戎马息，入贺领鸳行。

卷 358_53【微之镇武昌，中路见寄蓝桥怀旧之作，凄然继和，兼寄安平】

刘禹锡

今日油幢引，他年黄纸追。同为三楚客，独有九霄期。
宿草恨长在，伤禽飞尚迟。武昌应已到，新柳映红旗。

卷 358_54【将赴苏州，途出洛阳，留守李相公累申宴饯，
宠行话旧形于篇章，谨抒下情以申仰谢】

刘禹锡

岁杪风物动，雪馀宫苑晴。兔园宾客至，金谷管弦声。
洛水故人别，吴宫新燕迎。越郎忧不浅，怀袖有琼英。

卷 358_55【牛相公留守见示，城外新墅有溪竹秋月，亲情
多往宿游，恨不得去因成四韵，兼简洛中亲故之什，兼命同作】

刘禹锡

别墅洛城外，月明村野通。光辉满地上，丝管发舟中。
堤艳菊花露，岛凉松叶风。高情限清禁，寒漏滴深宫。

卷 358_56【牛相公林亭雨后偶成】

刘禹锡

飞雨过池阁，浮光生草树。新竹开粉奁，初莲蘸香注。
野花无时节，水鸟自来去。若问知境人，人间第一处。

卷 358_57 【酬滑州李尚书秋日见寄】

刘禹锡

一入石渠署，三闻宫树蝉。丹霄未得路，白发又添年。
双节外台贵，孤箫中禁传。征黄在旦夕，早晚发南燕。

卷 358_58 【和西川李尚书汉州微月游房太尉西湖】

刘禹锡

木落汉川夜，西湖悬玉钩。旌旗环水次，舟楫泛中流。
目极想前事，神交如共游。瑶琴久已绝，松韵自悲秋。

卷 358_59 【和重题】

刘禹锡

林端落照尽，湖上远岚清。水榭芝兰室，仙舟鱼鸟情。
人琴久寂寞，烟月若平生。一泛钓璜处，再吟锵玉声。

卷 358_60 【酬李相公喜归乡国自巩县夜泛洛水见寄】

刘禹锡

巩树烟月上，清光含碧流。且无三已色，犹泛五湖舟。
鹏息风还起，凤归林正秋。虽攀小山桂，此地不淹留。

卷 358_61 【和李相公平泉潭上喜见初月】

刘禹锡

家山见初月，林壑悄无尘。幽境此何夕，清光如为人。
潭空破镜入，风动翠蛾颦。会向琐窗望，追思伊洛滨。

卷 358_62 【和李相公初归平泉过龙门南岭遥望山居即事】

刘禹锡

暂别明庭去，初随优诏还。曾为鹏鸟赋，喜过凿龙山。
新墅烟火起，野程泉石间。岩廊人望在，只得片时闲。

卷 358_63 【和李相公以平泉新墅获方外之名，因为诗以报洛中士君子兼见寄之什】

刘禹锡

业继韦平后，家依昆阆间。恩华辞北第，潇洒爱东山。
满室图书在，入门松菊闲。垂天虽暂息，一举出人寰。

卷 358_64 【发苏州后登武丘寺望海楼】

刘禹锡

独宿望海楼，夜深珍木冷。僧房已闭户，山月方出岭。
碧池涵剑彩，宝刹摇星影。却忆郡斋中，虚眠此时景。

卷 358_65 【松江送处州奚使君】

刘禹锡

吴越古今路，沧波朝夕流。从来别离地，能使管弦愁。
江草带烟暮，海云含雨秋。知君五陵客，不乐石门游。

卷 358_66 【题报恩寺】

刘禹锡

云外支硎寺，名声敌虎丘。石文留马迹，峰势耸牛头。
泉眼潜通海，松门预带秋。迟回好风景，王谢昔曾游。

卷 358_67 【罢郡姑苏北归渡扬子津】

刘禹锡

几岁悲南国，今朝赋北征。归心渡江勇，病体得秋轻。
海阔石门小，城高粉堞明。金山旧游寺，过岸听钟声。

故国荒台在，前临震泽波。绮罗随世尽，麋鹿古时多。
筑用金鎚力，摧因石鼠窠。昔年雕辇路，唯有采樵歌。

卷 358_68 【寻汪道士不遇】

刘禹锡

仙子东南秀，泠然善驭风。笙歌五云里，天地一壶中。
受篆金华洞，焚香玉帝宫。我来君闭户，应是向崆峒。

卷 358_69【谢柳子厚寄叠石砚】

刘禹锡

常时同砚席，寄砚感离群。清越敲寒玉，参差叠碧云。
烟岚餘斐亶，水墨两氛氲。好与陶贞白，松窗写紫文。

卷 358_70【元日感怀】

刘禹锡

振蛰春潜至，湘南人未归。身加一日长，心觉去年非。
燎火委虚烬，儿童衔彩衣。异乡无旧识，车马到门稀。

卷 358_71【谢宣州崔相公赐马】

刘禹锡

浮云金络膝，昨日别朱轮。衔草如怀恋，嘶风尚意频。
曾将比君子，不是换佳人。从此西归路，应容蹑后尘。

卷 358_72【南中书来】

刘禹锡

君书问风俗，此地接炎州。淫祀多青鬼，居人少白头。
旅情偏在夜，乡思岂唯秋。每羡朝宗水，门前尽日流。

卷 358_73【题招隐寺】

刘禹锡

隐士遗尘在，高僧精舍开。地形临渚断，江势触山回。
楚野花多思，南禽声例哀。殷勤最高顶，闲即望乡来。

卷 358_74【思归寄山中友人】

刘禹锡

萧条对秋色，相忆在云泉。木落病身死，潮平归思悬。
凉钟山顶寺，暝火渡头船。此地非吾土，闲留又一年。

卷 358_75 【有感】

刘禹锡

死且不自觉，其馀安可论。昨宵凤池客，今日雀罗门。
骑吏尘未息，铭旌风已翻。平生红粉爱，惟解哭黄昏。

卷 358_76 【途次敷水驿，伏睹华州舅氏昔日行县题诗处，
潜然有感】

刘禹锡

昔日股肱守，朱轮兹地游。繁华日已谢，章句此空留。
蔓草佳城闭，故林棠树秋。今来重垂泪，不忍过西州。

卷 358_77 【奉和郑相公以考功十弟山姜花俯赐篇咏】

刘禹锡

采撷黄姜蕊，封题青琐闱。共闻调膳日，正是退朝归。
响为纤筵发，情随彩翰飞。故将天下宝，万里与光辉。

卷 358_78 【题淳于髡墓】

刘禹锡

生为齐赘婿，死作楚先贤。应以客卿葬，故临官道边。
寓言本多兴，放意能合权。我有一石酒，置君坟树前。

卷三百五十九

卷 359_1【送春词】

刘禹锡

昨来楼上迎春处，今日登楼又送归。兰蕊残妆含露泣，
柳条长袖向风挥。佳人对镜容颜改，楚客临江心事违。
万古至今同此恨，无如一醉尽忘机。

卷 359_2【送李尚书镇滑州】

刘禹锡

南徐报政入文昌，东郡须才别建章。视草名高同蜀客，
拥旄年少胜荀郎。黄河一曲当城下，缙骑千重照路傍。
自古相门还出相，如今人望在岩廊。

卷 359_3【送浑大夫赴丰州】

刘禹锡

凤衔新诏降恩华，又见旌旗出浑家。故吏来辞辛属国，
精兵愿逐李轻车。毡裘君长迎风驭，锦带酋豪踏雪衙。
其奈明年好春日，无人唤看牡丹花。

卷 359_4【送源中丞充新罗册立使】

刘禹锡

相门才子称华簪，持节东行捧德音。身带霜威辞凤阙，
口传天语到鸡林。烟开鳌背千寻碧，日浴鲸波万顷金。
想见扶桑受恩处，一时西拜尽倾心。

卷 359_5【送王司马之陕州】

刘禹锡

暂辍清斋出太常，空携诗卷赴甘棠。府公既有朝中旧，
司马应容酒后狂。案牍来时唯署字，风烟入兴便成章。
两京大道多游客，每遇词人战一场。

卷 359_6 【洛中送杨处厚入关便游蜀】

刘禹锡

洛阳秋日正凄凄，君去西秦更向西。旧学三冬今转富，
曾伤六翮养初齐。王城晓入窥丹凤，蜀路晴来见碧鸡。
早识卧龙应有分，不妨从此蹑丹梯。

卷 359_7 【送周使君罢渝州归郢州别墅】

刘禹锡

君思郢上吟归去，故自渝南掷郡章。野戍岸边留画舸，
绿萝阴下到山庄。池荷雨后衣香起，庭草春深绶带长。
只恐鸣驺催上道，不容待得晚菘尝。

卷 359_8 【奉送浙西李仆射相公赴镇】

刘禹锡

建节东行是旧游，欢声喜气满吴州。郡人重得黄丞相，
童子争迎郭细侯。诏下初辞温室树，梦中先到景阳楼。
自怜不识平津阁，遥望旌旗汝水头。

卷 359_9【重送浙西李相公顷廉问江南已经七载，后历滑台
剑南两镇，遂入相，今复领旧地新加旌旄】

刘禹锡

江北万人看玉节，江南千骑引金铙。凤从池上游沧海，
鹤到辽东识旧巢。城下清波含百谷，窗中远岫列三茅。
碧鸡白马回翔久，却忆朱方是乐郊。

卷 359_10【送前进士蔡京赴学究科】

刘禹锡

耳闻战鼓带经锄，振发声名自里闾。已是世间能赋客，
更攻窗下绝编书。朱门达者谁能识，绛帐书生尽不如。
幸遇天官旧丞相，知君无翼上空虚。

卷 359_11【送唐舍人出镇闽中】

刘禹锡

暂辞鸳鹭出蓬瀛，忽拥貔貅镇粤城。闽岭夏云迎皂盖，
建溪秋树映红旗。山川远地由来好，富贵当年别有情。
了却人间婚嫁事，复归朝右作公卿。

卷 359_12 【送李中丞赴楚州】

刘禹锡

缙骑朱旗入楚城，士林皆贺振家声。儿童但喜迎宾守，
故吏犹应记姓名。万顷水田连郭秀，四时烟月映淮清。
忆君初得昆山玉，同向扬州携手行。

卷 359_13 【奉送李户部侍郎自河南尹再除本官归阙】

刘禹锡

昔年内署振雄词，今日东都结去思。宫女犹传洞箫赋，
国人先咏袞衣诗。华星却复文昌位，别鹤重归太乙池。
想到金闺待通籍，一时惊喜见风仪。

卷 359_14 【送蕲州李郎中赴任】

刘禹锡

楚关蕲水路非赊，东望云山日夕佳。薤叶照人呈夏簟，
松花满碗试新茶。楼中饮兴因明月，江上诗情为晚霞。
北地交亲长引领，早将玄鬓到京华。

卷 359_15 【送国子令狐博士赴兴元覲省】

刘禹锡

相门才子高阳族，学省清资五品官。谏院过时荣棣萼，
谢庭归去踏芝兰。山中花带烟岚晚，栈底江涵雪水寒。
伯仲到家人尽贺，柳营莲府递相欢。

卷 359_16 【送李二十九兄员外赴邠宁使幕】

刘禹锡

家袭韦平身业文，素风清白至今贫。南宫通籍新郎吏，
西候从戎旧主人。城外草黄秋有雪，烽头烟静虏无尘。
鼎门为别霜天晓，臆把离觞三五巡。

卷 359_17 【送分司陈郎中只召直史馆重修三圣实录】

刘禹锡

蝉鸣官树引行车，言自成周赴玉除。远取南朝贵公子，
重修东观帝王书。常时载笔窥金匮，暇日登楼到石渠。
若问旧人刘子政，如今白首在南徐。

卷 359_18 【送慧则法师归上都因呈广宣上人】

刘禹锡

昨日东林看讲时，都人象马蹋琉璃。雪山童子应前世，
金粟如来是本师。一锡言归九城路，三衣曾拂万年枝。
休公久别如相问，楚客逢秋心更悲。

卷 359_19 【送义舟师却还黔南】

刘禹锡

黔江秋水浸云霓，独泛慈航路不迷。猿狖窥斋林叶动，
蛟龙闻咒浪花低。如莲半偈心常悟，问菊新诗手自携。
常说摩围似灵鹫，却将山屐上丹梯。

卷 359_20 【送景玄师东归】

刘禹锡

东林寺里一沙弥，心爱当时才子诗。山下偶随流水出，
秋来却赴白云期。滩头蹑屐挑沙菜，路上停舟读古碑。
想到旧房抛锡杖，小松应有过檐枝。

卷 359_21【汉寿城春望】

刘禹锡

汉寿城边野草春，荒祠古墓对荆榛。田中牧竖烧刍狗，
陌上行人看石麟。华表半空经霹雳，碑文才见满埃尘。
不知何日东瀛变，此地还成要路津。

卷 359_22【荆门道怀古】

刘禹锡

南国山川旧帝畿，宋台梁馆尚依稀。马嘶古道行人歇，
麦秀空城野雉飞。风吹落叶填宫井，火入荒陵化宝衣。
徒使词臣庾开府，咸阳终日苦思归。

卷 359_23【朗州窦员外见示与澧州元郎中郡斋赠答长句二篇，因以继和】

刘禹锡

鸳鸯差池出建章，彩旗朱户蔚相望。新恩共理犬牙地，
昨日同含鸡舌香。白芷江边分驿路，山桃溪外接甘棠。
应怜一罢金闺籍，枉渚逢春十度伤。

卷 359_24 【早春对雪奉寄澧州元郎中】

刘禹锡

新赐鱼书墨未干，贤人暂出远人安。朝驱旌旆行时令，
夜见星辰忆旧官。梅蕊覆阶铃阁暖，雪峰当户戟枝寒。
宁知楚客思公子，北望长吟澧有兰。

卷 359_25 【窦朗州见示与澧州元郎中早秋赠答命同作】

刘禹锡

邻境诸侯同舍郎，芷江兰浦恨无梁。秋风门外旌旗动，
晓露庭中橘柚香。玉簟微凉宜白昼，金笳入暮应清商，
骚人昨夜闻鶗鴂，不叹流年惜众芳。

卷 359_26 【松滋渡望峡中】

刘禹锡

渡头轻雨洒寒梅，云际溶溶雪水来。梦渚草长迷楚望，
夷陵土黑有秦灰。巴人泪应猿声落，蜀客船从鸟道回。
十二碧峰何处所，永安宫外是荒台。

卷 359_27【衢州徐员外使君遗以缟纈兼竹书箱，因成一篇用答佳贶】

刘禹锡

烂柯山下旧仙郎，列宿来添婺女光。远放歌声分白纈，
知传家学与青箱。水朝沧海何时去，兰在幽林亦自芳。
闻说天台有遗爱，人将琪树比甘棠。

卷 359_28【唐秀才赠端州紫石砚，以诗答之】

刘禹锡

端州石砚人间重，赠我因知正草玄。阙里庙堂空旧物，
开方灶下岂天然。玉蜍吐水霞光静，彩翰摇风绛锦鲜。
此日佣工记名姓，因君数到墨池前。

卷 359_29【览董评事思归之什因以诗赠】

刘禹锡

几年油幕佐征东，却泛沧浪狎钓童。欹枕醉眠成戏蝶，
抱琴闲望送归鸿。文儒自袭胶西相，倚伏能齐塞上翁。
更说扁舟动乡思，青菰已熟奈秋风。

卷 359_30 【谢寺双桧】

刘禹锡

双桧苍然古貌奇，含烟吐雾郁参差。晚依禅客当金殿，
初对将军映画旗。龙象界中成宝盖，鸳鸯瓦上出高枝。
长明灯是前朝焰，曾照青青年少时。

卷 359_31 【寄杨八寿州】

刘禹锡

风猎红旗入寿春，满城歌舞向朱轮。八公山下清淮水，
千骑尘中白面人。桂岭雨馀多鹤迹，茗园晴望似龙鳞。
圣朝方用敢言者，次第应须旧谏臣。

卷 359_32 【洛中寺北楼见贺监草书题诗】

刘禹锡

高楼贺监昔曾登，壁上笔踪龙虎腾。中国书流尚皇象，
北朝文士重徐陵。偶因独见空惊目，恨不同时候伏膺。
唯恐尘埃转磨灭，再三珍重嘱山僧。

卷 359_33 【闻韩宾擢第归觐，以诗美之，兼贺韩十五曹长，时韩牧永州】

刘禹锡

零陵香草满郊垌，丹穴雏飞入翠屏。孝若归来成画赞，
孟阳别后有山铭。兰陔旧地花才结，桂树新枝色更青。
为报儒林丈人道，如今从此鬓星星。

卷 359_34 【宣上人远寄和礼部王侍郎放榜后诗，因而继和】

刘禹锡

礼闈新榜动长安，九陌人人走马看。一日声名遍天下，
满城桃李属春官。自吟白雪诠词赋，指示青云借羽翰。
借问至公谁印可，支郎天眼定中观。

卷 359_35 【赠东岳张炼师】

刘禹锡

东岳真人张炼师，高情雅淡世间稀。堪为列女书青简，
久事元君住翠微。金缕机中抛锦字，玉清台上著霓衣。
云衢不要吹箫伴，只拟乘鸾独自飞。

卷 359_36 【秘书崔少监见示坠马长句，因而和之】

刘禹锡

麟台少监旧仙郎，洛水桥边坠马伤。尘污腰间青襞绶，
风飘掌下紫游缰。上车著作应来问，折臂三公定送方。
犹赖德全如醉者，不妨吟咏入篇章。

卷 359_37 【寄杨虢州与之旧姻】

刘禹锡

避地江湖知几春，今来本郡拥朱轮。阮郎无复里中旧，
杨仆却为关外人。各系一官难命驾，每怀前好易沾巾。
玉城山里多灵药，摆落功名且养神。

卷 359_38 【秋日题窦员外崇德里新居】

刘禹锡

长爱街西风景闲，到君居处暂开颜。清光门外一渠水，
秋色墙头数点山。疏种碧松通月朗，多栽红药待春还。
莫言堆案无馀地，认得诗人在此间。

卷 359_39【蒙恩转仪曹郎，依前充集贤学士，举韩潮州自代，因寄七言】

刘禹锡

翔鸾阙下谢恩初，通籍由来在石渠。暂入南宫判祥瑞，
还归内殿阅图书。故人犹在三江外，同病几经二纪馀。
今日荐君嗟久滞，不惟文体似相如。

卷 359_40【途次华州，陪钱大夫登城北楼春望，因睹李崔令狐三相国唱和之什，翰林旧侣继踵华城，山水清高鸾凤翔集，皆忝宿眷，遂题此诗】

刘禹锡

城楼四望出风尘，见尽关西渭北春。百二山河雄上国，
一双旌旆委名臣。壁中今日题诗处，天上同时草诏人。
莫怪老郎呈滥吹，宦途虽别旧情亲。

卷 359_41【始闻秋风】

刘禹锡

昔看黄菊与君别，今听玄蝉我却回。五夜飕飕枕前觉，

一年颜状镜中来。马思边草拳毛动，雕眄青云睡眼开。
天地肃清堪四望，为君扶病上高台。

卷 359_42 【洛中初冬拜表有怀上京故人】

刘禹锡

凤楼南面控三条，拜表郎官早渡桥。清洛晓光铺碧簟，
上阳霜叶剪红绡。省门簪组初成列，云路鸳鸯想退朝。
寄谢殷勤九天侣，抢榆水击各逍遥。

卷 359_43 【尉迟郎中见示自南迁牵复却至洛城东旧居之作，
因以和之】

刘禹锡

曾遭飞语十年谪，新受恩光万里还。朝服不妨游洛浦，
郊园依旧看嵩山。竹含天籁清商乐，水绕庭台碧玉环。
留作功成退身地，如今只是暂时闲。

卷 359_44 【洛中酬福建陈判官见赠】

刘禹锡

潦倒声名拥肿材，一生多故苦遭回。南宫旧籍遥相管，
东洛闲门昼未开。静对道流论药石，偶逢词客与琼瑰。
怪君近日文锋利，新向延平看剑来。

卷 359_45 【和苏十郎中谢病闲居时，严常侍萧给事同过访
叹初有二毛之作】

刘禹锡

清羸隐几望云空，左掖鸳鸾到室中。一卷素书消永日，
数茎斑发对秋风。菱花照后容虽改，蓍草占来命已通。
莫怪人人惊早白，缘君尚是黑头翁。

卷 359_46 【酬淮南廖参谋秋夕见过之作】

刘禹锡

扬州从事夜相寻，无限新诗月下吟。初服已惊玄发长，
高情犹向碧云深。语馀时举一杯酒，坐久方闻四处砧。
不逐繁华访闲散，知君摆落俗人心。

卷 359_47 【题王郎中宣义里新居】

刘禹锡

爱君新买街西宅，客到如游鄠杜间。雨后退朝贪种树，
申时出省趁看山。门前巷陌三条近，墙内池亭万境闲。
见拟移居作邻里，不论时节请开关。

卷 359_48 【酬朗州崔员外与任十四兄侍御，同过鄙人旧居
见怀之什，时守吴郡】

刘禹锡

昔日居邻招屈亭，枫林橘树鹧鸪声。一辞御苑青门去，
十见蛮江白芷生。自此曾沾宣室召，如今又守阖闾城。
何人万里能相忆，同舍仙郎与外兄。

卷 359_49 【刘驸马水亭避暑】

刘禹锡

千竿竹翠数莲红，水阁虚凉玉簟空。琥珀盏红疑漏酒，
水晶帘莹更通风。赐冰满碗沉朱实，法馔盈盘覆碧笼。
尽日逍遥避烦暑，再三珍重主人翁。

卷 359_50 【述旧贺迁寄陕虢孙常侍】

刘禹锡

南宫幸袭芝兰后，左辅曾交印绶来。多病未离清洛苑，
新恩已历望仙台。关头古塞桃林静，城下长河竹箭回。
闻说随车有零雨，此时偏动子荆才。

卷 359_51 【江陵严司空见示与成都武相公唱和，因命同作】

刘禹锡

南荆西蜀大行台，幕府旌门相对开。名重三司平水土，
威雄八阵役风雷。彩云朝望青城起，锦浪秋经白帝来。
不是郢中清唱发，谁当丞相谏天才。

卷 359_52 【庙庭偃松诗】

刘禹锡

势轧枝偏根已危，高情一见与扶持。忽从憔悴有生意，
却为离披无俗姿。影入岩廊行乐处，韵含天籁宿斋时。
谢公莫道东山去，待取阴成满凤池。

卷 359_53 【赠致仕滕庶子先辈】

刘禹锡

朝服归来昼锦荣，登科记上更无兄。寿觞每使曾孙献，
胜境长携众妓行。矍铄据鞍时骋健，殷勤把酒尚多情。
凌寒却向山阴去，衣绣郎君雪里行。

卷 359_54 【哭吕衡州，时予方谪居】

刘禹锡

一夜霜风凋玉芝，苍生望绝士林悲。空怀济世安人略，
不见男婚女嫁时。遗草一函归太史，旅坟三尺近要离。
朔方徙岁行当满，欲为君刊第二碑。

卷 359_55 【夔州窦员外使君见示悼妓诗，顾余尝识之，因命同作】

刘禹锡

前年曾见两鬟时，今日惊吟悼妓诗。凤管学成知有籍，
龙媒欲换叹无期。空廊月照常行地，后院花开旧折枝。
寂寞鱼山青草里，何人更立智琼祠。

卷 359_56 【宴夔州见寄寒食日忆故姬小红吹笙，因和之】

刘禹锡

鸾声窈眇管参差，清韵初调众乐随。幽院妆成花下弄，
高楼月好夜深吹。忽惊暮雨飘零尽，唯有朝云梦想期。
闻道今年寒食日，东山旧路独行迟。

卷 359_57 【哭庞京兆】

刘禹锡

俊骨英才气褻然，策名飞步冠群贤。逢时已自致高位。
得疾还因倚少年。天上别归京兆府，人间空数茂陵阡。
今朝總帳哭君处，前日见铺歌舞筵。

卷 359_58 【送李庚先辈赴选】

刘禹锡

一家何啻十朱轮，诸父双飞秉大钧。曾脱素衣参幕客，
却为精舍读书人。离筵雒水侵杯色，征路函关向晚尘。
今日山公旧宾主，知君不负帝城春。

卷 359_59【阳山庙观赛神】

刘禹锡

汉家都尉旧征蛮，血食如今配此山，曲盖幽深苍桧下，
洞箫愁绝翠屏间。荆巫脉脉传神语，野老娑娑起醉颜。
日落风生庙门外，几人连蹋竹歌还。

卷 359_60【送僧元暹东游】

刘禹锡

宝书翻译学初成，振锡如飞白足轻。彭泽因家凡几世，
灵山预会是前生。传灯已悟无为理，濡露犹怀罔极情。
从此多逢大居士，何人不愿解珠璎。

卷 359_61【赠日本僧智藏】

刘禹锡

浮杯万里过沧溟，遍礼名山适性灵。深夜降龙潭水黑，
新秋放鹤野田青。身无彼我那怀土，心会真如不读经。
为问中华学道者，几人雄猛得宁馨。

卷 359_62 【送元简上人适越】

刘禹锡

孤云出岫本无依，胜境名山即是归。久向吴门游好寺，
还思越水洗尘机。浙江涛惊狮子吼，稽岭峰疑灵鹫飞。
更入天台石桥去，垂珠璀璨拂三衣。

卷 359_63 【送宗密上人归南山草堂寺，因谒河南尹白侍郎】

刘禹锡

宿习修来得慧根，多闻第一却忘言。自从七祖传心印，
不要三乘入便门。东泛沧江寻古迹，西归紫阁出尘喧。
河南白尹大檀越，好把真经相对翻。

卷 359_64 【西塞山怀古】

刘禹锡

西晋楼船下益州，金陵王气黯然收。千寻铁锁沉江底，
一片降幡出石头。人世几回伤往事，山形依旧枕江流。
今逢四海为家日，故垒萧萧芦荻秋。

卷 359_65【广宣上人寄在蜀与韦令公唱和诗卷，因以令公手扎，答诗示之】

刘禹锡

碧云佳句久传芳，曾向成都住草堂。振锡常过长者宅，
披衣犹带令公香。一时风景添诗思，八部人天入道场。
若许相期同结社，吾家本自有柴桑。

卷三百六十

卷 360_1【白舍人自杭州寄新诗，有柳色春藏苏小家之句，因以戏酬，兼寄浙东元相公】

刘禹锡

钱塘山水有奇声，暂谪仙官领百城。女妓还闻名小小，
使君谁许唤卿卿。鳌惊震海风雷起，蜃斗嘘天楼阁成。
莫道骚人在三楚，文星今向斗牛明。

卷 360_2【春日书怀，寄东洛白二十二杨八二庶子】

刘禹锡

曾向空门学坐禅，如今万事尽忘筌。眼前名利同春梦，
醉里风情敌少年。野草芳菲红锦地，游丝撩乱碧罗天。
心知洛下闲才子，不作诗魔即酒颠。

卷 360_3【白舍人见酬拙诗，因以寄谢】

刘禹锡

虽陪三品散班中，资历从来事不同。名姓也曾镌石柱，
诗篇未得上屏风。甘陵旧党凋零尽，魏阙新知礼数崇。
烟水五湖如有伴，犹应堪作钓鱼翁。

卷 360_4【白舍人曹长寄新诗，有游宴之盛，因以戏酬】

刘禹锡

苏州刺史例能诗，西掖今来替左司。二八城门开道路，
五千兵马引旌旗。水通山寺笙歌去，骑过虹桥剑戟随。
若共吴王斗百草，不如应是欠西施。

卷 360_5【苏州白舍人寄新诗，有叹早白无儿之句，因以赠之】

刘禹锡

莫嗟华发与无儿，却是人间久远期。雪里高山头白早，
海中仙果子生迟。于公必有高门庆，谢守何烦晓镜悲。
幸免如新分非浅，祝君长咏梦熊诗。

卷 360_6 【酬乐天扬州初逢席上见赠】

刘禹锡

巴山楚水凄凉地，二十三年弃置身。怀旧空吟闻笛赋，
到乡翻似烂柯人。沉舟侧畔千帆过，病树前头万木春。
今日听君歌一曲，暂凭杯酒长精神。

卷 360_7 【罢郡归洛途次山阳，留辞郭中丞使君】

刘禹锡

自到山阳不许辞，高斋日夜有佳期。管弦正合看书院，
语笑方酣各咏诗。银汉雪晴褰翠幕，清淮月影落金卮。
洛阳归客明朝去，容趁城东花发时。

卷 360_8 【楚州开元寺北院枸杞临井繁茂可观，群贤赋诗因以继和】

刘禹锡

僧房药树依寒井，井有香泉树有灵。翠黛叶生笼石磴，
殷红子熟照铜瓶。枝繁本是仙人杖，根老新成瑞犬形。
上品功能甘露味，还知一勺可延龄。

卷 360_9 【和乐天鹦鹉】

刘禹锡

养来鹦鹉觜初红，宜在朱楼绣户中。频学唤人缘性慧，
偏能识主为情通。敛毛睡足难销日，弹翅愁时愿见风。
谁遣聪明好颜色，事须安置入深笼。

卷 360_10 【洛中逢白监同话游梁之乐，因寄宣武令狐相公】

刘禹锡

曾经谢病各游梁，今日相逢忆孝王。少有一身兼将相，
更能四面占文章。开颜坐上催飞盏，回首庭中看舞枪。
借问风前兼月下，不知何客对胡床。

卷 360_11 【河南王少尹宅燕张常侍白舍人，兼呈卢郎中李
员外二副使】

刘禹锡

将星夜落使星来，三省清臣到外台。事重各衔天子诏，
礼成同把故人杯。卷帘松竹雪初霁，满院池塘春欲回。
第一林亭迎好客，殷勤莫惜玉山颓。

卷 360_12 【和宣武令狐相公郡斋对新竹】

刘禹锡

新竹脩脩韵晓风，隔窗依砌尚蒙笼。数间素壁初开后，
一段清光入坐中。欹枕闲看知自适，含毫朗咏与谁同。
此君若欲长相见，政事堂东有旧丛。

卷 360_13 【和乐天送鹤上裴相公别鹤之作】

刘禹锡

昨日看成送鹤诗，高笼提出白云司。朱门乍入应迷路，
玉树容栖莫拣枝。双舞庭中花落处，数声池上月明时。
三山碧海不归去，且向人间呈羽仪。

卷 360_14 【阙下待传点呈诸同舍】

刘禹锡

禁漏晨钟声欲绝，旌旗组绶影相交。殿含佳气当龙首，
阁倚晴天见凤巢。山色葱笼丹槛外，霞光泛滟翠松梢。
多惭再入金门籍，不敢为文学解嘲。

卷 360_15 【和乐天以镜换酒】

刘禹锡

把取菱花百炼镜，换他竹叶十旬杯。嚬眉厌老终难去，
蘸甲须欢便到来。妍丑太分迷忌讳，松乔俱傲绝嫌猜。
较量功力相千万，好去从空白玉台。

卷 360_16 【同乐天送河南冯尹学士】

刘禹锡

可怜五马风流地，暂辍金貂侍从才。阁上掩书刘向去，
门前修刺孔融来。嵒陵路静寒无雨，洛水桥长昼起雷。
共羡府中棠棣好，先于城外百花开。

卷 360_17 【同白二十二赠王山人】

刘禹锡

爱名之世忘名客，多事之时无事身。古老相传见来久，
岁年虽变貌常新。飞章上达三清路，受篆平交五岳神。
笑听咚咚朝暮鼓，只能催得市朝人。

卷 360_18 【题集贤阁】

刘禹锡

凤池西畔图书府，玉树玲珑景气闲。长听馀风送天乐，
时登高阁望人寰。青山云绕栏干外，紫殿香来步武间。
曾是先贤翔集地，每看壁记一惭颜。

卷 360_19 【和令狐相公初归京国赋诗言怀】

刘禹锡

凌云羽翮掞天才，扬历中枢与外台。相印昔辞东阁去，
将星还拱北辰来。殿庭捧日影纓入，阁道看山曳履回。
口不言功心自适，吟诗酿酒待花开。

卷 360_20 【和乐天南园试小乐】

刘禹锡

闲步南园烟雨晴，遥闻丝竹出墙声。欲抛丹笔三川去，
先教清商一部成。花木手栽偏有兴，歌词自作别生情。
多才遇景皆能咏，当日人传满凤城。

卷 360_21 【答乐天戏赠】

刘禹锡

才子声名白侍郎，风流虽老尚难当。诗情逸似陶彭泽，
斋日多如周太常。矻矻将心求净法，时时偷眼看春光。
知君技痒思欢宴，欲倩天魔破道场。

卷 360_22 【同乐天送令狐相公赴东都留守】

刘禹锡

尚书剑履出明光，居守旌旗赴洛阳。世上功名兼将相，
人间声价是文章。衙门晓辟分天仗，宾幕初开辟省郎。
从发坡头向东望，春风处处有甘棠。

卷 360_23 【刑部白侍郎谢病长告，改宾客分司，以诗赠别】

刘禹锡

鼎食华轩到眼前，拂衣高谢岂徒然。九霄路上辞朝客，
四皓丛中作少年。他日卧龙终得雨，今朝放鹤且冲天。
洛阳旧有衡茆在，亦拟抽身伴地仙。

卷 360_24 【和留守令狐相公答白宾客】

刘禹锡

麦陇和风吹树枝，商山逸客出关时。身无拘束起长晚，
路足交亲行自迟。官拂象筵终日待，私将鸡黍几人期。
君来不用飞书报，万户先从纸贵知。

卷 360_25 【酬郢州令狐相公官舍言怀见寄兼呈乐天】

刘禹锡

词人各在一涯居，声味虽同迹自疏。佳句传因多好事，
尽题稀为不便书。已通戎略逢黄石，仍占星文耀碧虚。
闻说朝天在来岁，霸陵春色待行车。

卷 360_26 【吟白乐天哭崔儿二篇，怆然寄赠】

刘禹锡

吟君苦调我沾缨，能使无情尽有情。四望车中心未释，
千秋亭下赋初成。庭梧已有栖雏处，池鹤今无子和声。
从此期君比琼树，一枝吹折一枝生。

卷 360_27 【答乐天所寄咏怀，且释其枯树之叹】

刘禹锡

衙前有乐饌常精，宅内连池酒任倾。自是官高无狎客，
不论年长少欢情。骊龙颔被探珠去，老蚌胚还应月生。
莫羨三春桃与李，桂花成实向秋荣。

卷 360_28 【赴苏州酬别乐天】

刘禹锡

吴郡鱼书下紫宸，长安厩吏送朱轮。二南风化承遗爱，
八咏声名蹑后尘。梁氏夫妻为寄客，陆家兄弟是州民。
江城春日追游处，共忆东归旧主人。

卷 360_29 【福先寺雪中酬别乐天】

刘禹锡

龙门宾客会龙宫，东去旌旗驻上东。二八笙歌云幕下，
三千世界雪花中。离堂未暗排红烛，别曲含凄飏晚风。
才子从今一分散，便将诗咏向吴侬。

卷 360_30 【和乐天耳顺吟兼寄敦诗】

刘禹锡

吟君新什慰蹉跎，屈指同登耳顺科。邓禹功成三纪事，
孔融书就八年多。已经将相谁能尔，抛却丞郎争奈何。
独恨长洲数千里，且随鱼鸟泛烟波。

卷 360_31 【和白侍郎送令狐相公镇太原】

刘禹锡

十万天兵貂锦衣，晋城风日斗生辉。行台仆射深恩重，
从事中郎旧路归。叠鼓蹙成汾水浪，闪旗惊断塞鸿飞。
边庭自此无烽火，拥节还来坐紫微。

卷 360_32 【酬乐天见寄】

刘禹锡

元君后辈先零落，崔相同年不少留。华屋坐来能几日，
夜台归去便千秋。背时犹自居三品，得老终须卜一丘。
若使吾徒还早达，亦应箫鼓入松楸。

卷 360_33 【乐天寄重和晚达冬青一篇，因成再答】

刘禹锡

风云变化饶年少，光景蹉跎属老夫。秋隼得时凌汗漫，
寒龟饮气受泥涂。东隅有失谁能免，北叟之言岂便无。
振臂犹堪呼一掷，争知掌下不成卢。

卷 360_34 【河南白尹有喜崔宾客归洛兼见怀长句，因而继和】

刘禹锡

几年侍从作名臣，却向青云索得身。朝士忽为方外士，
主人仍是眼中人。双鸾游处天京好，五马行时海峤春。
遥羨光阴不虚掷，肯令丝竹暂生尘。

卷 360_35 【和杨师皋给事伤小姬英英】

刘禹锡

见学胡琴见艺成，今朝追想几伤情。撚弦花下呈新曲。
放拨灯前谢改名。但是好花皆易落，从来尤物不长生。
鸾台夜直衣衾冷，云雨无因入禁城。

卷 360_36 【和乐天洛下醉吟，寄太原令狐相公，兼见怀长句】

刘禹锡

旧相临戎非称意，词人作尹本多情。从容自使边尘静，
谈笑不闻桴鼓声。章句新添塞下曲，风流旧占洛阳城。
昨来亦有吴趋咏，惟寄东都与北京。

卷 360_37 【郡斋书怀寄江南白尹，兼简分司崔宾客】

刘禹锡

谩读图书三十车，年年为郡老天涯。一生不得文章力，
百口空为饱暖家。绮季衣冠称鬓面，吴公政事副词华。
还思谢病吟归去，同醉城东桃李花。

卷 360_38 【题于家公主旧宅】

刘禹锡

树绕荒台叶满池，箫声一绝草虫悲。邻家犹学宫人髻，
园客争偷御果枝。马埽蓬蒿藏狡兔，凤楼烟雨啸愁鸱。
何郎独在无恩泽，不似当初傅粉时。

卷 360_39 【酬乐天见贻贺金紫之什】

刘禹锡

久学文章含白凤，却因政事赐金鱼。郡人未识闻谣咏，
天子知名与诏书。珍重贺诗呈锦绣，愿言归计并园庐。
旧来词客多无位，金紫同游谁得如。

卷 360_40 【乐天见示伤微之敦诗，晦叔三君子皆有深分，
因成是诗以寄】

刘禹锡

吟君叹逝双绝句，使我伤怀奏短歌。世上空惊故人少，
集中惟觉祭文多。芳林新叶催陈叶，流水前波让后波。
万古到今同此恨，闻琴泪尽欲如何。

卷 360_41 【和乐天柘枝】

刘禹锡

柘枝本出楚王家，玉面添娇舞态奢。松鬓改梳鸾凤髻，
新衫别织斗鸡纱。鼓催残拍腰身软，汗透罗衣雨点花。
画筵曲罢辞归去，便随王母上烟霞。

卷 360_42 【和乐天题真娘墓】

刘禹锡

蘼卜林中黄土堆，罗襦绣黛已成灰。芳魂虽死人不怕，
蔓草逢春花自开。幡盖向风疑舞袖，镜灯临晓似妆台。
吴王娇女坟相近，一片行云应往来。

卷 360_43 【客有话汴州新政书事寄令狐相公】

刘禹锡

天下咽喉今大宁，军城喜气彻青冥。庭前剑戟朝迎日，
笔底文章夜应星。三省壁中题姓字，万人头上见仪形。
汴州忽复承平事，正月看灯户不扃。

卷 360_44 【令狐相公见示河中杨少尹赠答，兼命继之】

刘禹锡

两首新诗百字余，朱弦玉磬韵难如。汉家丞相重征后，
梁苑仁风一变初。四面诸侯瞻节制，八方通货溢河渠。
自从却穀为元帅，大将归来尽把书。

卷 360_45 【和令狐相公送赵常盈炼师与中贵人同拜岳及天台投龙毕却赴京】

刘禹锡

银珰谒者引蜺旌，霞帔仙官到赤城。白鹤迎来天乐动，
金龙掷下海神惊。元君伏奏归中禁，武帝亲斋礼上清。
何事夷门请诗送，梁王文字上声名。

卷 360_46 【酬令狐相公赠别】

刘禹锡

越声长苦有谁闻，老向湘山与楚云。海峤新辞永嘉守，
夷门重见信陵君。田园松菊今迷路，霄汉鸳鸿久绝群。
幸遇甘泉尚词赋，不知何客荐雄文。

卷 360_47 【酬令狐相公寄贺迁拜之什】

刘禹锡

遭回二纪重为郎，洛下遥分列宿光。不见当关呼早起，
曾无侍史与焚香。三花秀色通春幌，十字清波绕宅墙。
白发青衫谁比数，相怜只是有梁王。

卷 360_48 【夏日寄宣武令狐相公】

刘禹锡

长忆梁王逸兴多，西园花尽兴如何。近来溽暑侵亭馆，
应觉清谈胜绮罗。境入篇章高韵发，风穿号令众心和。
承明欲谒先相报，愿拂朝衣逐晓珂。

卷 360_49 【酬令狐留守巡内至集贤院见寄】

刘禹锡

仙院文房隔旧宫，当时盛事尽成空。墨池半在颓垣下，
书带犹生蔓草中。巡内因经九重苑，裁诗又继二南风。
为兄手写殷勤句，遍历三台各一通。

卷 360_50 【和令狐相公言怀寄河中杨少尹】

刘禹锡

章句惭非第一流，世间才子昔陪游。吴宫已叹芙蓉死，
边月空悲芦管秋。任向洛阳称傲吏，苦教河上领诸侯。
石渠甘对图书老，关外杨公安稳不。

卷 360_51【令狐相公自天平移镇太原以诗申贺】

刘禹锡

北都留守将天兵，出入香街宿禁扃。鼙鼓夜闻惊朔雁，
旌旗晓动拂参星。孔璋旧檄家家有，叔度新歌处处听。
夷落遥知真汉相，争来屈膝看仪刑。

卷 360_52【重酬前寄】

刘禹锡

边烽寂寂尽收兵，宫树苍苍静掩扃。戎羯归心如内地，
天狼无角比凡星。新成丽句开缄后，便入清歌满坐听。
吴苑晋祠遥望处，可怜南北太相形。

卷 360_53【令狐相公自太原累示新诗，因以酬寄】

刘禹锡

飞蓬卷尽塞云寒，战马闲嘶汉地宽。万里胡天无警急，
一笼烽火报平安。灯前妓乐留宾宴，雪后山河出猎看。
珍重新诗远相寄，风情不似四登坛。

卷 360_54 【酬令狐相公使宅别斋初栽桂树见怀之作】

刘禹锡

清淮南岸家山树，黑水东边第一栽。影近画梁迎晓日，
香随绿酒入金杯。根留本土依江润，叶起寒棱映月开。
早晚阴成比梧竹，九霄还放彩雉来。

卷 360_55 【酬令狐相公见寄】

刘禹锡

才兼文武播雄名，遗爱芳尘满洛城。身在行台为仆射，
书来用里访先生。闲游占得嵩山色，醉卧高听洛水声。
千里相思难命驾，七言诗里寄深情。

卷 360_56 【郡内书情献裴侍中留守】

刘禹锡

功成频献乞身章，摆落襄阳镇洛阳。万乘旌旗分一半，
八方风雨会中央。兵符今奉黄公略，书殿曾随翠凤翔。
心寄华亭一双鹤，日陪高步绕池塘。

卷 360_57 【酬乐天衫酒见寄】

刘禹锡

酒法众传吴米好，舞衣偏尚越罗轻。动摇浮蚁香浓甚，
装束轻鸿意态生。阅曲定知能自适，举杯应叹不同倾。
终朝相忆终年别，对景临风无限情。

卷 360_58 【自左冯归洛下酬乐天兼呈裴令公】

刘禹锡

新恩通籍在龙楼，分务神都近旧丘。自有园公紫芝侣，
仍追少傅赤松游。华林霜叶红霞晚，伊水晴光碧玉秋。
更接东山文酒会，始知江左未风流。

卷 360_59 【秋斋独坐寄乐天兼呈吴方之大夫】

刘禹锡

空斋寂寂不生尘，药物方书绕病身。纤草数茎胜静地，
幽禽忽至似佳宾。世间忧喜虽无定，释氏销磨尽有因。
同向洛阳闲度日，莫教风景属他人。

卷 360_60 【和乐天斋戒月满夜对道场偶怀咏】

刘禹锡

常修清净去繁华，人识王城长者家。案上香烟铺贝叶，
佛前灯焰透莲花。持斋已满招闲客，理曲先闻命小娃。
明日若过方丈室，还应问为法来邪。

卷 360_61 【吴方之见示独酌小醉首篇，乐天续有酬答，皆含戏谑极至风流，两篇之中并蒙见属，辄呈滥吹益美来章】

刘禹锡

闲门共寂任张罗，静室同虚养太和。尘世欢娱开意少，
醉乡风景独游多。散金疏傅寻常乐，枕麹刘生取次歌。
计会雪中争挈榼，鹿裘鹤氅递相过。

卷 360_62 【酬乐天斋满日裴令公置宴席上戏赠】

刘禹锡

一月道场斋戒满，今朝华幄管弦迎。衔杯本自多狂态，
事佛无妨有佞名。酒力半酣愁已散，文锋未钝老犹争。
平阳不独容宾醉，听取喧呼吏舍声。

卷 360_63 【酬乐天偶题酒瓮见寄】

刘禹锡

从君勇断抛名后，世路荣枯见几回。门外红尘人自走，
瓮头清酒我初开。三冬学任胸中有，万户侯须骨上来。
何幸相招同醉处，洛阳城里好池台。

卷 360_64 【酬乐天请裴令公开春加宴】

刘禹锡

高名大位能兼有，恣意遨游是特恩。二室烟霞成步障，
三川风物是家园。晨窥苑树韶光动，晚度河桥春思繁。
弦管常调客常满，但逢花处即开樽。

卷 360_65 【乐天示过敦诗旧宅有感一篇，吟之泫然，追想
昔事因成继和，以寄苦怀】

刘禹锡

凄凉同到故人居，门枕寒流古木疏。向秀心中嗟栋宇，
萧何身后散图书。本营归计非无意，唯算生涯尚有馀。
忽忆前言更惆怅，丁宁相约速悬车。

卷 360_66【寄和东川杨尚书慕巢，兼寄西川继之二公，近从弟兄情分偏睦，早忝游旧，因成是诗】

刘禹锡

太华莲峰降岳灵，两川棠树接郊坰。政同兄弟人人乐，
曲奏埙篪处处听。杨叶百穿荣会府，芝泥五色耀天庭。
各抛笔砚夸旄钺，莫遣文星让将星。

卷 360_67【和乐天洛下雪中宴集寄汴州李尚书】

刘禹锡

洛城无事足杯盘，风雪相和岁欲阑。树上因依见寒鸟，
坐中收拾尽闲官。笙歌要请频何爽，笑语忘机拙更欢。
遥想兔园今日会，琼林满眼映旂竿。

卷 360_68【和牛相公游南庄醉后寓言戏赠乐天兼见示】

刘禹锡

城外园林初夏天，就中野趣在西偏。蔷薇乱发多临水，
鸂鶒双游不避船。水底远山云似雪，桥边平岸草如烟。
白家唯有杯觞兴，欲把头盘打少年。

卷 360_69【乐天以愚相访沽酒致欢，因成七言聊以奉答】

刘禹锡

少年曾醉酒旗下，同辈黄衣颔亦黄。蹴踏青云寻入仕，
萧条白发且飞觞。令征古事欢生雅，客唤闲人兴任狂。
犹胜独居荒草院，蝉声听尽到寒螿。

第三百六十一卷

卷 361_1 【和思黯忆南庄见示】

刘禹锡

丞相新家伊水头，智囊心匠日增修。化成池沼无痕迹，
奔走清波不自由。台上看山徐举酒，潭中见月慢回舟。
从来天下推尤物，合属人间第一流。

卷 361_2 【酬思黯见示小饮四韵】

刘禹锡

抛却人间第一官，俗情惊怪我方安。兵符相印无心恋，
洛水嵩云恣意看。三足鼎中知味久，百寻竿上掷身难。
追呼故旧连宵饮，直到天明兴未阑。

卷 361_3 【和仆射牛相公春日闲坐见怀】

刘禹锡

官曹崇重难频入，第宅清闲且独行。阶蚁相逢如偶语，
园蜂速去恐违程。人于红药惟看色，莺到垂杨不惜声。
东洛池台怨抛掷，移文非久会应成。

卷 361_4 【酬元九侍御赠壁竹鞭长句】

刘禹锡

碧玉孤根生在林，美人相赠比双金。初开郢客缄封后，
想见巴山冰雪深。多节本怀端直性，露青犹有岁寒心。
何时策马同归去，关树扶疏敲镫吟。

卷 361_5 【酬窦员外使君，寒食日途次松滋渡，先寄示四韵】

刘禹锡

楚乡寒食橘花时，野渡临风驻彩旗。草色连云去人住，
水纹如縠燕差池。朱轮尚忆群飞雉，青绶初县左顾龟。
非是湓城旧司马，水曹何事与新诗。

卷 361_6 【寄杨八拾遗】

刘禹锡

闻君前日独庭争，汉帝偏知白马生。忽领簿书游太学，
宁劳侍从厌承明。洛阳本自宜才子，海内而今有直声。
为谢同僚老博士，范云来岁即公卿。

卷 361_7 【酬窦员外郡斋宴客，偶命柘枝因见寄，兼呈张十一院长元九侍御】

刘禹锡

分忧余刃又从公，白羽胡床啸咏中。彩笔谕戎矜倚马，
华堂留客看惊鸿。渚宫油幕方高步，澧浦甘棠有几丛。
若问骚人何处所，门临寒水落江枫。

卷 361_8 【谢窦员外旬休早凉见示诗】

刘禹锡

新秋十日浣朱衣，铃阁无声公吏归。风韵渐高梧叶动，
露光初重槿花稀。四时苒苒催容鬓，三爵油油忘是非。
更报明朝池上酌，人知太守字玄晖。

卷 361_9【南海马大夫远示著述，兼酬拙诗，辄著微诚再有长句，时蔡戎未弭故见于篇末】

刘禹锡

汉家旄节付雄才，百越南溟统外台。身在绛纱传六艺，
腰悬青绶亚三台。连天浪静长鲸息，映日帆多宝舶来。
闻道楚氛犹未灭，终须旌旆扫云雷。

卷 361_10【和南海马大夫闻杨侍郎出守郴州因有寄上之作】

刘禹锡

忽惊金印驾朱轓，遂别鸣珂听晓猿。碧落仙来虽暂谪，
赤泉侯在是深恩。玉环庆远瞻台坐，铜柱勋高压海门。
一咏琼瑶百忧散，何劳更树北堂萱。

卷 361_11【马大夫见示浙西王侍御赠答诗因命同作】

刘禹锡

忆逐羊车凡几时，今来旧府统戎师。象筵照室会词客，
铜鼓临轩舞海夷，百越酋豪称故吏，十洲风景助新诗。
秣陵从事何年别，一见琼章如素期。

卷 361_12 【寄唐州杨八归厚】

刘禹锡

淮安古地拥州师，画角金饶旦夕吹。浅草遥迎鹧鸪马，
春风乱飏辟邪旗。谪仙年月今应满，戆谏声名众所知。
何况迁乔旧同伴，一双先入凤凰池。

卷 361_13 【寄朗州温右史曹长】

刘禹锡

暂别瑶墀鸳鹭行，彩旗双引到沅湘。城边流水桃花过，
帘外春风杜若香。史笔枉将书纸尾，朝缨不称濯沧浪。
云台公业家声在，征诏何时出建章。

卷 361_14 【酬杨司业巨源见寄】

刘禹锡

辟雍流水近灵台，中有诗篇绝世才。渤海归人将集去，
梨园弟子请词来。琼枝未识魂空断，宝匣初临手自开。
莫道专城管云雨，其如心似不然灰。

卷 361_15 【酬国子崔博士立之见寄】

刘禹锡

健笔高科早绝伦，后来无不揖芳尘。遍看今日乘轩客，
多是昔年呈卷人。胄子执经瞻讲坐，郎官共食接华茵。
烦君远寄相思曲，慰问天南一逐臣。

卷 361_16 【张郎中籍远寄长句，开缄之日已及新秋，因举目前
仰酬高韵】

刘禹锡

南宫词客寄新篇，清似湘灵促柱弦。京邑旧游劳梦想，
历阳秋色正澄鲜。云衔日脚成山雨，风驾潮头入渚田。
对此独吟还独酌，知音不见思怆然。

卷 361_17 【浙东元相公书叹梅雨郁蒸之候，因寄七言】

刘禹锡

稽山自与岐山别，何事连年鸞鷟飞。百辟商量旧相入，
九天祇候老臣归。平湖晚泛窥清镜，高阁晨开扫翠微。
今日看书最惆怅，为闻梅雨损朝衣。

卷 361_18 【酬严给事贺加五品兼简同制水部李郎中】

刘禹锡

九天雨露传青诏，八舍郎官换绿衣。初佩银鱼随仗入，
宜乘白马退朝归。雕盘贺喜开瑶席，彩笔题诗出锁闱。
闻道水曹偏得意，霞朝雾夕有光辉。

卷 361_19 【裴相公大学士见示答张秘书谢马诗，并群公属和，
因命追作】

刘禹锡

草玄门户少尘埃，丞相并州寄马来。初自塞垣衔苜蓿，
忽行幽径破莓苔。寻花缓辔威迟去，带酒垂鞭蹀躞回。
不与王侯与词客，知轻富贵重清才。

卷 361_20 【奉和裴侍中将赴汉南留别座上诸公】

刘禹锡

金貂晓出凤池头，玉节前临南雍州。暂辍洪炉观剑戟，
还将大笔注春秋。管弦席上留高韵，山水途中入胜游。
岷首风烟看未足，便应重拜富民侯。

卷 361_21 【和苏郎中寻丰安里旧居寄主客张郎中】

刘禹锡

漳滨卧起恣闲游，宣室征还未白头。旧隐来寻通德里，
新篇写出畔牢愁。池看科斗成文字，鸟听提壶忆献酬。
同学同年又同舍，许君云路并华轺。

卷 361_22 【酬浙东李侍郎越州春晚即事长句】

刘禹锡

越中蔼蔼繁华地，秦望峰前禹穴西。湖草初生边雁去，
山花半谢杜鹃啼。青油昼卷临高阁，红旆晴翻绕古堤。
明日汉庭征旧德，老人争出若耶溪。

卷 361_23 【酬淮南牛相公述旧见贻】

刘禹锡

少年曾忝汉庭臣，晚岁空馀老病身。初见相如成赋日，
寻为丞相扫门人。追思往事咨嗟久，喜奉清光笑语频。
犹有登朝旧冠冕，待公三入拂埃尘。

卷 361_24 【和仆射牛相公追感韦裴六相登庸，皆四十余未五十薨歿，岂早荣早枯之义，今年将六十犹粗强健，因亲故劝洒率然成篇并见寄之作】

刘禹锡

坐镇清朝独殷然，闲征故事数前贤。用才同践钧衡地，
禀气终分大小年。威凤本池思泛泳，仙查旧路望回旋。
犹怜绮季深山里，唯有松风与石田。

卷 361_25 【和仆射牛相公以离阙庭七年班行亲故亡歿，十无一人，再睹龙颜喜庆，虽极感叹风烛能不怆然，因成四韵，并示集贤中书二相公所和】

刘禹锡

久辞龙阙拥红旗，喜见天颜拜赤墀。三省英寮非旧侣，
万年芳树长新枝。交朋接武居仙院，幕客追风入凤池。
云母屏风即施设，可怜荣耀冠当时。

卷 361_26 【和仆射牛相公见示长句】

刘禹锡

静得天和兴自浓，不缘宦达性灵慵。大鹏六月有闲意，
仙鹤千年无躁容。流辈尽来多叹息，官班高后少过从。
唯应加筑露台上，曩见终南云外峰。

卷 361_27 【和牛相公雨后寓怀见示】

刘禹锡

金火交争正抑扬，萧萧飞雨助清商，晓看纨扇恩情薄，
夜觉纱灯刻数长。树上早蝉才发响，庭中百草已无光。
当年富贵亦惆怅，何况悲翁发似霜。

卷 361_28 【和陈许王尚书酬白少傅侍郎长句，因通简汝洛旧游之什】

刘禹锡

寥廓高翔不可追，风云失路暂相随。方同洛下书生咏，
又见军前大将旗。雪里命宾开玉帐，饮中请号驻金卮。
竹林一自王戎去，嵇阮虽贫兴未衰。

卷 361_29 【和仆射牛相公寓言二首】

刘禹锡

两度竿头立定夸，回眸举袖拂青霞。尽抛今日贵人样，
复振前朝名相家。御史定来休直宿，尚书依旧趁参衙。
具瞻尊重诚无敌，犹忆洛阳千树花。
心如止水鉴常明，见尽人间万物情。雕鹗腾空犹逞俊，
骅骝啮足自无惊。时来未觉权为祟，贵了方知退是荣。
只恐重重世缘在，事须三度副苍生。

卷 361_30 【酬太原狄尚书见寄】

刘禹锡

家声烜赫冠前贤，时望穹崇镇北边。身上官衔如座主，
幕中谭笑取同年。幽并侠少趋鞭弭，燕赵佳人奉管弦。
仍把天兵书号笔，远题长句寄山川。

卷 361_31 【酬宣州崔大夫见寄】

刘禹锡

白衣曾拜汉尚书，今日恩光到敝庐。再入龙楼称绮季，

应缘狗监说相如。中郎南镇权方重，内史高斋兴有馀。
遥想敬亭春欲暮，百花飞尽柳花初。

卷 361_32 【酬皇甫十少尹暮秋久雨喜晴有怀见示】

刘禹锡

雨馀独坐卷帘帷，便得诗人喜霁诗。摇落从来长年感，
惨舒偏是病身知。扫开云雾呈光景，流尽潢污见路岐。
何况菊香新酒熟，神州司马好狂时。

卷 361_33 【再授连州至衡阳酬柳柳州赠别】

刘禹锡

去国十年同赴召，渡湘千里又分岐。重临事异黄丞相，
三黜名惭柳士师。归目并随回雁尽，愁肠正遇断猿时。
桂江东过连山下，相望长吟有所思。

卷 361_34 【望夫山】

刘禹锡

何代提戈去不还，独留形影白云间。肌肤销尽雪霜色，

罗绮点成苔藓斑。江燕不能传远信，野花空解妒愁颜。
近来岂少征人妇，笑采蘼芜上北山。

卷 361_35 【怀妓】

刘禹锡

玉钗重合两无缘，鱼在深潭鹤在天。得意紫鸾休舞镜，
能言青鸟罢衔笺。金盆已覆难收水，玉轸长抛不续弦。
若向蘼芜山下过，遥将红泪洒穷泉。

鸾飞远树栖何处，凤得新巢想称心。红壁尚留香漠漠，
碧云初断信沉沉。情知点污投泥玉，犹自经营买笑金。
从此山头似人石，丈夫形状泪痕深。

但曾行处遍寻看，虽是生离死一般。买笑树边花已老，
画眉窗下月犹残。云藏巫峡音容断，路隔星桥过往难。
莫怪诗成无泪滴，尽倾东海也须干。

三山不见海沉沉，岂有仙踪更可寻。青鸟去时云路断，
姮娥归处月宫深。纱窗遥想春相忆，书幌谁怜夜独吟。
料得夜来天上镜，只应偏照两人心。

卷 361_36 【答东阳于令寒碧图诗】

刘禹锡

东阳本是佳山水，何况曾经沉隐侯。化得邦人解吟咏，
如今县令亦风流。新开潭洞疑仙境，远写丹青到雍州。
落在寻常画师手，犹能三伏凛生秋。

卷 361_37 【麻姑山】

刘禹锡

曾游仙迹见丰碑，除却麻姑更有谁。云盖青山龙卧处，
日临丹洞鹤归时。霜凝上界花开晚，月冷中天果熟迟。
人到便须抛世事，稻田还拟种灵芝。

卷 361_38 【自江陵沿流道中】

刘禹锡

三千三百西江水，自古如今要路津。月夜歌谣有渔父，
风天气色属商人。沙村好处多逢寺，山叶红时觉胜春。
行到南朝征战地，古来名将尽为神。

卷 361_39 【别夔州官吏】

刘禹锡

三年楚国巴城守，一去扬州扬子津。青帐联延喧驿步，
白头俯偻到江滨。巫山暮色常含雨，峡水秋来不恐人。
惟有九歌词数首，里中留与赛蛮神。

卷 361_40 【鱼复江中】

刘禹锡

扁舟尽室贫相逐，白发藏冠镊更加。远水自澄终日绿，
晴林长落过春花。客情浩荡逢乡语，诗意留连重物华。
风檣好住贪程去，斜日青帘背酒家。

卷 361_41 【巫山神女庙】

刘禹锡

巫山十二郁苍苍，片石亭亭号女郎。晓雾乍开疑卷幔，
山花欲谢似残妆。星河好夜闻清佩，云雨归时带异香。
何事神仙九天上，人间来就楚襄王。

卷 361_42 【柳絮】

刘禹锡

飘飏南陌起东邻，漠漠濛濛暗度春。花巷暖随轻舞蝶，
玉楼晴拂艳妆人。萦回谢女题诗笔，点缀陶公漉酒巾。
何处好风偏似雪，隋河堤上古江津。

卷 361_43 【赠同年陈长史员外】

刘禹锡

明州长史外台郎，忆昔同年翰墨场。一自分襟多岁月，
相逢满眼是凄凉。推贤有愧韩安国，论旧唯存盛孝章。
所叹谬游东阁下，看君无计出恓惶。

卷 361_44 【送周鲁儒赴举诗】

刘禹锡

宋日营阳内史孙，因家占得九疑村。童心便有爱书癖，
手指今馀把笔痕。自握蛇珠辞白屋，欲凭鸡卜谒金门。
若逢广坐问羊酪，从此知名在一言。

卷 361_45 【送曹璩归越中旧隐诗】

刘禹锡

行尽潇湘万里馀，少逢知己忆吾庐。数间茅屋闲临水，
一盏秋灯夜读书。地远何当随计吏，策成终自诣公车。
剡中若问连州事，唯有千山画不如。

卷 361_46 【白鹰】

刘禹锡

毛羽斓斒白纁裁，马前擎出不惊猜。轻抛一点入云去，
喝杀三声掠地来。绿玉觜攒鸡脑破，玄金爪擘兔心开。
都缘解搦生灵物，所以人人道俊哉。

卷三百六十二

卷 362_1【送工部张侍郎入蕃吊祭】

刘禹锡

月窟宾诸夏，云官降九天。饰终邻好重，锡命礼容全。
水咽犹登陇，沙鸣稍极边。路因乘驿近，志为饮冰坚。
毳帐差池见，乌旗摇曳前。归来赐金石，荣耀自编年。

卷 362_2【早秋送台院杨侍御归朝】

刘禹锡

仙署棣华春，当时已绝伦。今朝丹阙下，更入白眉人。
重振高阳族，分居要路津。一门科第足，五府辟书频。
鸷鸟得秋气，法星悬火旻。圣朝寰海静，所至不埋轮。

卷 362_3 【送陆侍御归淮南使府五韵】

刘禹锡

江左重诗篇，陆生名久传。凤城来已熟，羊酪不嫌膻。
归路芙蓉府，离堂玳瑁筵。泰山呈腊雪，隋柳布新年。
曾忝扬州荐，因君达短笺。

卷 362_4 【送令狐相公自仆射出镇南梁】

刘禹锡

夏木正阴成，戎装出帝京。沾襟辞阙泪，回首别乡情。
云树褰中路，风烟汉上城。前旌转谷去，后骑踏桥声。
久领鸳行重，无嫌虎绶轻。终提一麾去，再入福苍生。

卷 362_5 【奉送裴司徒令公自东都留守再命太原】

刘禹锡

星使出关东，兵符赐上公。山河归旧国，管籥换离宫。
行色旌旗动，军声鼓角雄。爱棠馀故吏，骑竹见新童。
汉垒三秋静，胡沙万里空。其如天下望，旦夕咏清风。

卷 362_6 【海阳湖别浩初师】

刘禹锡

近郭看殊境，独游常鲜欢。逢君驻缙锡，观貌称林峦。
湖满景方霁，野香春未阑。爱泉移席近，闻石辍棋看。
风止松犹韵，花繁露未干。桥形出树曲，岩影落池寒。
别路千嶂里，诗情暮云端。他年买山处，似此得隳官。

卷 362_7 【许给事见示哭工部刘尚书诗因命同作】

刘禹锡

汉室贤王后，孔门高第人。济时成国器，乐道任天真。
特达圭无玷，坚贞竹有筠。总戎宽得众，市义贵能贫。
护塞无南牧，驰心拱北辰。乞身来阙下，赐告卧漳滨。
荣耀初题剑，清羸已拖绅。宫星徒列位，隙日不回轮。
自昔追飞侣，今为侍从臣。素弦哀已绝，青简叹犹新。
未遂挥金乐，空悲撤瑟晨。凄凉竹林下，无复见清尘。

卷 362_8 【武陵书怀五十韵】

刘禹锡

西汉开支郡，南朝号戚藩。四封当列宿，百雉俯清沅。

高岸朝霞合，惊湍激箭奔。积阴春暗度，将霁雾先昏。
俗尚东皇祀，谣传义帝冤。桃花迷隐迹，楝叶慰忠魂。
户算资渔猎，乡豪恃子孙。照山畚火动，踏月俚歌喧。
拥楫舟为市，连薨竹覆轩。披沙金粟见，拾羽翠翘翻。
茗折苍溪秀，蘋生枉渚暄。禽惊格磔起，鱼戏噉喁繁。
沉约台榭故，李衡墟落存。湘灵悲鼓瑟，泉客泣酬恩。
露变蒹葭浦，星悬橘柚村。虎咆空野震，鼉作满川浑。
邻里皆迁客，儿童习左言。炎天无冽井，霜月见芳荪。
清白家传远，诗书志所敦。列科叨甲乙，从宦出丘樊。
结友心多契，驰声气尚吞。士安曾重赋，元礼许登门。
草檄嫖姚幕，巡兵戊己屯。筑台先自隗，送客独留髡。
遂结王畿绶，来观衢室樽。鸢飞入鹰隼，鱼目俪玕璠。
晓烛罗驰道，朝阳辟帝阍。王正会夷夏，月朔盛旗幡。
独立当瑶阙，传呵步紫垣。按章清犴狱，视祭洁蘋蘩。
御历昌期远，传家宝祚蕃。繇文光夏启，神教畏轩辕。
内禅因天性，雄图授化元。继明悬日月，出震统乾坤。
大孝三朝备，洪恩九族惇。百川宗渤澥，五岳辅昆仑。
何幸逢休运，微班识至尊。校缙资筦榷，复土奉山园。
一失贵人意，徒闻太学论。直庐辞锦帐，远守愧朱幡。
巢幕方犹燕，抢榆尚笑鲲。迢回过荆楚，流落感凉温。
旅望花无色，愁心醉不悁。春江千里草，暮雨一声猿。
问卜安冥数，看方理病源。带赊衣改制，尘涩剑成痕。
三秀悲中散，二毛伤虎贲。来忧御魑魅，归愿牧鸡豚。
就日秦京远，临风楚奏烦。南登无灞岸，旦夕上高原。

卷 362_9【早秋集贤院即事】

刘禹锡

金数已三伏，火星正西流。树含秋露晓，阁倚碧天秋。
灰琯应新律，铜壶添夜筹。商飙从朔塞，爽气入神州。

蕙草香书殿，愧花点御沟。山明真色见，水静浊烟收。
早岁忝华省，再来成白头。幸依群玉府，末路尚瀛洲。

卷 362_10【奉和吏部杨尚书太常李卿二相公策免后即事述怀赠
答十韵】

刘禹锡

文雅关西族，衣冠赵北都。有声真汉相，无颡胜隋珠。
当轴龙为友，临池凤不孤。九天开内殿，百辟看晨趋。

诚满澄欹器，成功别大垆。馀芳在公论，积庆是神扶。
步武离台席，徊翔集帝梧。铨材秉秦镜，典乐去齐竽。
潇洒风尘外，逢迎诗酒徒。唯应待华诰，更食万钱厨。

卷 362_11【晚岁登武陵城顾望水陆怅然有作】

刘禹锡

星象承乌翼，蛮陬想犬牙。俚人祠竹节，仙洞闭桃花。
城基历汉魏，江源自賁巴。华表廖王墓，菜地黄琼家。
霜轻菊秀晚，石浅水纹斜。樵音绕故垒，汲路明寒沙。
清风稍改叶，卢橘始含葩。野桥过驿骑，丛祠发迥笳。
跳鳞避举网，倦鸟寄行楂。路尘高出树，山火远连霞。
夕曛转赤岸，浮靄起苍葭。轧轧渡水桨，连连赴林鸦。
叫阍道非远，赐环期自赊。孤臣本危涕，乔木在天涯。

卷 362_12【罢郡归洛阳寄友人】

刘禹锡

远谪年犹少，初归鬓已衰。门闲故吏去，室静老僧期。
不见蜘蛛集，频为佝偻欺。颖微囊未出，寒甚谷难吹。
濩落唯心在，平生有己知。商歌夜深后，听者竟为谁。

卷 362_13【经伏波神祠】

刘禹锡

蒙蒙篁竹下，有路上壶头。汉垒麇鼯斗，蛮溪雾雨愁。
怀人敬遗像，阅世指东流。自负霸王略，安知恩泽侯。
乡园辞石柱，筋力尽炎洲。一以功名累，翻思马少游。

卷 362_14【和汴州令狐相公到镇改月偶书所怀】

刘禹锡

受脤新梁苑，和羹旧傅岩。援毫动星宿，垂钓取韬铃。
赫奕三川至，欢呼百姓瞻。绿油貔虎拥，青纸凤凰衔。
外垒曾无警，中厨亦罢监。推诚人自服，去杀令逾严。
赳赳容皆饰，幡幡口尽钳。为兄怜庾翼，选婿得萧咸。
郁倔咽喉地，骈臻水陆兼。度桥鸣绀幘，入肆飏云帆。
端月当中气，东风应远占。管弦喧夜景，灯烛掩寒蟾。
酒每倾三雅，书能发百函。词人羞布鼓，远客献貂襜。
歌榭白团扇，舞筵金缕衫。旌旗遥一簇，舄履近相搀。
花树当朱阁，晴河逼翠帘。衣风飘飒颭，烛泪滴巉岩。
玉笋虚频易，金炉暖更添。映钗窥艳艳，隔袖见纤纤。
谢傅何由接，桓伊定不凡。应怜郡斋老，旦夕镊霜髭。

卷 362_15【遥贺白宾客分司初到洛中，戏呈冯尹】

刘禹锡

西辞望苑去，东占洛阳才。度岭无愁思，看山不懊来。
冥鸿何所慕，辽鹤乍飞回。洗竹通新径，携琴上旧台。
尘埃长者辙，风月故人杯。闻道龙门峻，还因上客开。

卷 362_16【白侍郎大尹自河南寄示池北新葺水斋即事招宾十四韵，兼命同作】

刘禹锡

公府有高政，新斋池上开。再吟佳句后，一似画图来。
结构疏林下，夤缘曲岸隈。绿波穿户牖，碧甃叠琼瑰。
幽异当轩满，清光绕砌回。潭心澄晚镜，渠口起晴雷。
瑶草缘堤种，松烟上岛栽。游鱼惊拨刺，浴鹭喜毵毹。
为客烹林笋，因僧采石苔。酒瓶常不罄，书案任成堆。
檐外青雀舫，坐中鹦鹉杯。蒲根抽九节，莲萼捧重台。
芳讯此时到，胜游何日陪。共讥吴太守，自占洛阳才。

卷 362_17【和令狐相公谢太原李侍中寄蒲桃】

刘禹锡

珍果出西域，移根到北方。昔年随汉使，今日寄梁王。
上相芳缄至，行台绮席张。鱼鳞含宿润，马乳带残霜。
染指铅粉腻，满喉甘露香。酝成十日酒，味敌五云浆。
咀嚼停金盏，称嗟响画堂。惭非末至客，不得一枝尝。

卷 362_18【和令狐相公玩白菊】

刘禹锡

家家菊尽黄，梁国独如霜。莹静真琪树，分明对玉堂。
仙人披雪氅，素女不红妆。粉蝶来难见，麻衣拂更香。
向风摇羽扇，含露滴琼浆。高艳遮银井，繁枝覆象床。
桂丛惭并发，梅蕊妒先芳。一入瑶华咏，从兹播乐章。

卷 362_19【令狐相公见示新栽蕙兰二草之什，兼命同作】

刘禹锡

上国庭前草，移来汉水浔。朱门虽易地，玉树有余阴。
艳彩凝还泛，清香绝复寻。光华童子佩，柔软美人心。

惜晚含远思，赏幽空独吟。寄言知音者，一奏风中琴。

卷 362_20 【和令狐相公南斋小宴听阮咸】

刘禹锡

阮巷久芜沉，四弦有遗音。雅声发兰室，远思含竹林。

座绝众宾语，庭移芳树阴。飞觞助真气，寂听无流心。

影似白团扇，调谐朱弦琴。一毫不平意，幽怨古犹今。

卷 362_21 【和令狐相公九日对黄白二菊花见怀】

刘禹锡

素萼迎寒秀，金英带露香。繁华照旄钺，荣盛对银黄。

琮璧交辉映，衣裳杂彩章。晴云遥盖覆，秋蝶近悠扬。

空想逢九日，何由陪一觞。满丛佳色在，未肯委严霜。

卷 362_22【令狐仆射与余投分素深，纵山川阻修然音问相继，今年十一月仆射疾不起，闻予已承讣书，寝门长恸。后日有使者两辈持书并诗，计其日时已是卧疾，手笔盈幅翰墨尚新，律词一篇音韵弥切，收泪握管以成报章。虽广陵之弦于今绝矣，而盖泉之感犹庶闻焉。焚之~ 帐之前，附于旧编之末】

刘禹锡

前日寝门恸，至今悲有余。已嗟万化尽，方见八行书。
满纸传相忆，裁诗怨索居。危弦音有绝，哀玉韵犹虚。

忽叹幽明异，俄惊岁月除。文章虽不朽，精魄竟焉如。
零泪沾青简，伤心见素车。凄凉从此后，无复望双鱼。

卷 362_23【和乐天闲园独赏八韵，前以蜂鹤拙句寄呈，今辱蜗蚁妍词见答，因成小巧以取大咍】

刘禹锡

永日无人事，芳园任兴行。陶庐树可爱，潘宅雨新晴。
傅粉琅玕节，熏香菡萏茎。榴花裙色好，桐子药丸成。

柳蠹枝偏亚，桑空叶再生。睢盱欲斗雀，索漠不言莺。
动植随四气，飞沉含五情。抢榆与水击，小大强为名。

卷 362_24 【奉和裴令公新成绿野堂即书】

刘禹锡

蔼蔼鼎门外，澄澄洛水湾。堂皇临绿野，坐卧看青山。
位极却忘贵，功成欲爱闲。官名司管籥，心术去机关。

禁苑凌晨出，园花及露攀。池塘鱼拨刺，竹径鸟绵蛮。
志在安潇洒，尝经历险艰。高情方造适，众意望征还。
好客交珠履，华筵舞玉颜。无因随贺燕，翔集画梁间。

卷 362_25 【三月三日与乐天及河南李尹奉陪裴令公泛洛禊饮各赋十二韵】

刘禹锡

洛下今修禊，群贤胜会稽。盛筵陪玉铉，通籍尽金闺。
波上神仙妓，岸傍桃李蹊。水嬉如鹭振，歌响杂莺啼。

历览风光好，沿洄意思迷。棹歌能俪曲，墨客竞分题。
翠幄连云起，香车向道齐。人夸绦步障，马惜锦障泥。

尘暗宫墙外，霞明苑树西。舟形随鹢转，桥影与虹低。
川色晴犹远，乌声暮欲栖。唯馀踏青伴，待月魏王堤。

卷 362_26 【乐天少傅五月长斋，广延缁徒谢绝文友，坐成瞬间因以戏之】

刘禹锡

五月长斋戒，深居绝送迎。不离通德里，便是法王城。
举目皆僧事，全家少俗情。精修无上道，结念未来生。
宾阁缁衣占，书堂信鼓鸣。戏童为塔象，啼鸟学经声。
黍用青菰角，葵承玉露烹。马家供薏苡，刘氏饷芜菁。
暗网笼歌扇，流尘晦酒铛。不知何次道，作佛几时成。

卷 362_27 【酬乐天晚夏闲居欲相访先以诗见贻】

刘禹锡

池榭堪临泛，翛然散郁陶。步因驱鹤缓，吟为听蝉高。
林密添新竹，枝低绾晚桃。酒醅晴易熟，药圃夏频薅。
老是班行旧，闲为乡里豪。经过更何处，风景属吾曹。

卷 362_28 【酬乐天醉后狂吟十韵】

刘禹锡

散诞人间乐，逍遥地上仙。诗家登逸品，释氏悟真筌。

制诰留台阁，歌词入管弦。处身于木雁，任世变桑田。
吏隐情兼遂，儒玄道两全。八关斋适罢，三雅兴尤偏。
文墨中年旧，松筠晚岁坚。鱼书曾替代，香火有因缘。
欲向醉乡去，犹为色界牵。好吹杨柳曲，为我舞金钿。

卷 362_29【牛相公见示新什，谨依本韵次用以抒下情】

刘禹锡

剧韵新篇至，困难始见能。雨天龙变化，晴日凤鸾腾。
游海惊何极，闻韶素不曾。愜心时拊髀，击节日麾肱。
符彩添隃墨，波澜起剡藤。拣金光熠熠，累壁势层层。
珠媚多藏贾，花撩欲定僧。封来真宝物，寄与愧交朋。
已老无时疾，长贫望岁登。雀罗秋寂寂，虫翅晓兢兢。
羸骥方辞绊，虚舟已绝絙。荣华甘死别，健美亦生憎。
玉柱琤琮韵，金觥滃凸棱。何时良宴会，促膝对华灯。

卷 362_30【奉和中书崔舍人八月十五日夜玩月二十韵】

刘禹锡

暮景中秋爽，阴灵既望圆。浮精离碧海，分照接虞渊。
迥见孤轮出，高从倚盖旋。二仪含皎澈，万象共澄鲜。
整御当西陆，舒光丽上玄。从星变风雨，顺日助陶甄。
远近同时望，晶荧此夜偏。运行调玉烛，洁白应金天。

曲沼疑瑶镜，通衢若象筵。逢人尽冰雪，遇景即神仙。
引素吞银汉，凝清洗绿烟。皋禽警露下，邻杵思风前。
水是还珠浦，山成种玉田。剑沉三尺影，灯罢九枝然。
象外形无迹，寰中影有迁。稍当云阙正，未映斗城悬。
静对挥宸翰，闲临褰彩笺。境同牛渚上，宿在凤池边。
兴掩寻安道，词胜命仲宣。从今纸贵后，不复咏陈篇。

卷 362_31【奉和淮南李相公早秋即事，寄成都武相公】

刘禹锡

八柱共承天，东西别隐然。远夷争慕化，真相故临边。
并进夔龙位，仍齐龟鹤年。同心舟已济，造膝壁常联。
对领专征寄，遥持造物权。斗牛添气色，井络静氛烟。
献可通三略，分甘出万钱。汉南趋节制，赵北赐山川。
玉帐观渝舞，虹旌猎楚田。步嫌双绶重，梦入九城偏。
秋雨离情动，新诗乐府传。聆音还窃抃，不觉抚么弦。

卷 362_32【元和癸巳岁仲秋，诏发江陵偏师问罪蛮，徼后命宣慰释兵归降，凯旋之辰，率尔成咏，寄荆南严司空】

刘禹锡

蛮水阻朝宗，兵符下渚宫。前筹得上策，无战已成功。
汉使星飞入，夷心草偃同。歌谣开竹栈，拜舞戢桑弓。

就日知冰释，投人念鸟穷。网罗三面解，章奏九门通。
卉服联操袂，雕题尽鞠躬。降幡秋练白，驿骑昼尘红。

火号休传警，机桥罢亘空。登山不见虏，振旆自生风。
江远烟波静，军回气色雄。伫看闻喜后，金石赐元戎。

卷三百六十三

卷 363_1【和李六侍御文宣王庙释奠作】

刘禹锡

叹息鲁先师，生逢周室卑。有心律天道，无位救陵夷。
历聘不能用，领徒空尔为。儒风正礼乐，旅象入蓍龟。
西狩非其应，中都安足施。世衰由我贱，泣下为人悲。
遗教光文德，兴王叶梦期。土田封后胤，冕服饰虚仪。
钟鼓胶庠荐，牲牢郡邑祠。闻君喟然叹，偏在上丁时。

卷 363_2【和窦中丞晚入容江作】

刘禹锡

汉郡三十六，郁林东南遥。人伦选清臣，天外颁诏条。
桂水步秋浪，火山凌雾朝。分圻辨风物，入境闻讴谣。
莎岸见长亭，烟林隔丽谯。日落舟益驶，川平旗自飘。
珠浦远明灭，金沙晴动摇。一吟道中作，离思悬层霄。

卷 363_3【南海马大夫见惠著述三通勒成四帙，上自邃古达于国朝，采其菁华至简如富，钦受嘉贶诗以谢之】

刘禹锡

红旗阅五兵，绛帐领诸生。味道轻鼎食，退公犹笔耕。
青箱传学远，金匮纳书成。一瞬见前事，九流当抗行。
编蒲曾苦思，垂竹愧无名。今日承芳讯，谁言赠袞荣。

卷 363_4【和杨侍郎初至郴州纪事书情题郡斋八韵】

刘禹锡

旌节下朝台，分圭从北回。城头鹤立处，驿树凤栖来。
旧路芳尘在，新恩駟骑催。里閭风偃草，鼓舞抃成雷。
吏散山禽噪，庭香夏蕊开。郡斋堪四望，壁记有三台。
人讶征黄晚，文非吊屈哀。一吟梁甫曲，知是卧龙才。

卷 363_5【和东川王相公新涨驿池八韵】

刘禹锡

今日池塘上，初移造物权。苞藏成别岛，沿浊致清涟。
变化生言下，蓬瀛落眼前。泛觴惊翠羽，开幕对红莲。

远写风光入，明含气象全。渚烟笼驿树，波日漾宾筵。
曲岸留缁骑，中流转彩船。无因接元礼，共载比神仙。

卷 363_6 【酬杨八庶子喜韩吴兴与余同迁见赠】

刘禹锡

早遇圣明朝，雁行登九霄。文轻傅武仲，酒逼盖宽饶。
舍矢同瞻鹄，当筵共赛皋。琢磨三益重，唱和五音调。
台柏烟常起，池荷香暗飘。星文辞北极，旗影度东辽。
直道由来黜，浮名岂敢要。三湘与百越，雨散又云摇。
远守惭侯籍，征还荷诏条。悴容唯舌在，别恨几魂销。
满眼悲陈事，逢人少旧僚。烟霞为老伴，蒲柳任先凋。
虎绶悬新印，龙舳理去桡。断肠天北郡，携手洛阳桥。
幢盖今虽贵，弓旌会见招。其如草玄客，空宇久寥寥。

卷 363_7 【和兵部郑侍郎省中四松诗十韵】

刘禹锡

右相历中台，移松武库栽。紫茸抽组绶，青实长玫瑰。
便有干霄势，看成构厦材。数分天柱半，影逐日轮回。
旧赏台阶去，新知谷口来。息阴常仰望，玩境几裴回。
翠粒晴悬露，苍鳞雨起苔。凝音助瑶瑟，飘蕊泛金罍。

月桂花遥烛，星榆叶对开。终须似鸡树，荣茂近昭回。

卷 363_8 【酬郑州权舍人见寄二十韵】

刘禹锡

朱户凌晨启，碧梧含早凉。人从桔柣至，书到漆沮傍。
抃会因佳句，情深取断章。惬心同笑语，入耳胜笙簧。
忆昔三条路，居邻数仞墙。学堂青玉案，彩服紫罗囊。
麟角看成就，龙驹见抑扬。毂中飞一箭，云际落双鷗。
甸邑叨前列，天台愧后行。鲤庭传事业，鸡树遂翱翔。
书殿连鵷鹄，神池接凤凰。追游蒙尚齿，惠好结中肠。
铩翮方抬举，危根易损伤。一麾怜弃置，五字借恩光。
汝海崆峒秀，溱流芍药芳。风行能偃草，境静不争桑。
转旆趋关右，颁条匝渭阳。病吟犹有思，老醉已无狂。
尘满鸿沟道，沙惊白狄乡。伫闻黄纸诏，促召紫微郎。

卷 363_9 【和牛相公题姑苏所寄太湖石兼寄李苏州】

刘禹锡

震泽生奇石，沉潜得地灵。初辞水府出，犹带龙宫腥。
发自江湖国，来荣卿相庭。从风夏云势，上汉古查形。
拂拭鱼鳞见，铿锵玉韵聆。烟波含宿润，苔藓助新青。
嵌穴胡雏貌，纤铓虫篆铭。孱颜傲林薄，飞动向雷霆。

烦热近还散，馀醒见便醒。凡禽不敢息，浮璫莫能停。
静称垂松盖，鲜宜映鹤翎。忘忧常目击，素尚与心冥。
眇小欺湘燕，团圆笑落星。徒然想融结，安可测年龄。
采取询乡耆，搜求按旧经。垂钩入空隙，隔浪动晶荧。
有获人争贺，欢谣众共听。一州惊阅宝，千里远扬舲。
睹物洛阳陌，怀人吴御亭。寄言垂天翼，早晚起沧溟。

卷 363_10【浙西李大夫述梦四十韵，并浙东元相公酬和，斐然继声】

刘禹锡

位是才能取，时因际会遭。羽仪呈鸞鷟，铓刃试豪曹。
洛下推年少，山东许地高。门承金铉鼎，家有玉璫韬。
海浪扶鹏翅，天风引骥髦。便知蓬阁閤，不识鲁衣褒。
兴发春塘草，魂交益部刀。形开犹抱膝，烛尽遽挥毫。
昔仕当初筮，逢时咏载囊。怀铅辨虫蠹，染素学鹅毛。
车骑方休汝，归来欲效陶。南台资謏谥，内署选风骚。
羽化如乘鲤，楼居旧冠鳌。美香焚湿麝，名果赐干萄。
议赦蝇栖笔，邀歌蚁泛醪。代言无所戏，谢表自称叨。
兰焰凝芳泽，芝泥莹玉膏。对频声价出，直久梦魂劳。
草诏令归马，批章答献獐。银花悬院榜，翠羽映帘绦。
讽谏欣然纳，奇觚率尔操。禁中时謏謏，天下免忉忉。
左顾龟成印，双飞鹄织袍。谢宾缘地密，洁己是心豪。
五日思归沐，三春羨众邀。茶炉依绿笋，棋局就红桃。
溟海桑潜变，阴阳炭暗熬。仙成脱屣去，臣恋捧弓号。

建节辞乌柏，宣风看鹭涛。土山京口峻，铁瓮郡城牢。
曲岛花千树，官池水一篙。莺来和丝管，雁起拂麾旄。
宛转倾罗扇，回旋堕玉搔。罚筹长竖纛，觥盞样如舩。
山是千重障，江为四面濠。卧龙曾得雨，孤鹤尚鸣皋。
剑用雄开匣，弓闲蛰受弰。凤姿尝在竹，鸚羽不离蒿。
吴越分双镇，东西接万艘。今朝比潘陆，江海更滔滔。

卷 363_11【和浙西李大夫伊川卜居】

刘禹锡

早入八元数，尝承三接恩。飞鸣天上路，镇压海西门。
清望寰中许，高情物外存。时来诚不让，归去每形言。
洛下思招隐，江干厌作藩。按经修道具，依样买山村。
开凿随人化，幽阴为律暄。远移难得树，立变旧荒园。
绝塞通潜径，平泉占上原。烟霞遥在想，簿领益为繁。
丹禁虚东閤，苍生望北辕。徒令双白鹤，五里自翩翻。

卷 363_12【省试风光草际浮】

刘禹锡

熙熙春景霁，草绿春光丽。的历乱相鲜，葳蕤互亏蔽。
乍疑芊绵里，稍动丰茸际。影碎翻崇兰，浮香转丛蕙。
含烟绚碧彩，带露如珠缀。幸因采掇日，况此临芳岁。

卷 363_13【历阳书事七十韵】

刘禹锡

一夕为湖地，千年列郡名。霸王迷路处，亚父所封城。
汉置东南尉，梁分肘腋兵。本吴风俗剽，兼楚语音伦。
沸井今无涌，乌江旧有名。土台游柱史，石室隐彭铿。
曹操祠犹在，濡须坞未平。海潮随月大，江水应春生。
忆昨深山里，终朝看火耕。鱼书来北阙，鹢首下南荆。
云雨巫山暗，蕙兰湘水清。章华树已失，鄂渚草来迎。
庐阜香炉出，湓城粉堞明。雁飞彭蠡暮，鸦噪大雷晴。
平野分风使，恬和趁夜程。贵池登陆峻，春谷渡桥鸣。
骆驿主人问，悲欢故旧情。几年方一面，卜昼便三更。
助喜杯盘盛，忘机笑语訇。管清疑警鹤，弦巧似娇莺。
炽炭烘蹲兽，华茵织斗鲸。回裾飘雾雨，急节堕琼英。
敛黛凝愁色，施钿耀翠晶。容华本南国，妆束学西京。
日落方收鼓，天寒更炙笙。促筵交履舄，痛饮倒簪缨。
谑浪容优孟，娇怜许智琼。蔽明添翠帟，命烛挂金茎。
坐久罗衣皱，杯频粉面赪。兴来从请曲，意堕即飞觥。
令急重须改，欢馀醉尽呈。诘朝还选胜，来日又寻盟。
道别殷勤惜，邀筵次第争。唯闻嗟短景，不复有馀酲。
众散扃朱户，相携话素诚。晤言犹亹亹，残漏自丁丁。
出祖千夫拥，行厨五熟烹。离亭临野水，别思入哀箏。
接境人情洽，方冬馔具精。中流为界道，隔岸数飞甍。
沙浦王浑镇，沧洲谢朓城。望夫人化石，梦帝日环珰。
半渡趋津吏，缘堤簇郡氓。场黄堆晚稻，篱碧见冬菁。

里社争来献，壶浆各自擎。醵夷倾底写，粃粒斗成□。
采石风传柝，新林暮击钲。蜚纶牵拨刺，犀焰照澄泓。
露冕观原野，前驱抗旆旌。分庭展宾主，望阙拜恩荣。
比屋惇耆辈，连年水旱并。遐思常后已，下令必先庚。
远岫低屏列，支流曲带萦。湖鱼香胜肉，官酒重于饴。
忆昔泉源变，斯须地轴倾。鸡笼为石颗，龟眼入泥坑。
事系人风重，官从物论轻。江春俄澹荡，楼月几亏盈。
柳长千丝宛，田塍一线耕。游鱼将婢从，野雉见媒惊。
波净攒凫鹄，洲香发杜蘅。一钟菰葑米，千里水葵羹。
受谴时方久，分忧政未成。比琼虽碌碌，于铁尚铮铮。
早忝登三署，曾闻奏六英。无能甘负弩，不慎在提衡。
口语成中遣，毛衣阻上征。时闻关利钝，智亦有聋盲。
昔愧山东妙，今惭海内兄。后来登甲乙，早已在蓬瀛。
心托秦明镜，才非楚白珩。齿衰亲药物，宦薄傲公卿。
捧日皆元老，宣风尽大彭。好令朝集使，结束赴新正。

卷 363_14 【和武中丞秋日寄怀简诸僚故】

刘禹锡

退朝还公府，骑吹息繁阴。吏散秋庭寂，鸟啼烟树深。
威生奉白简，道胜外华簪。风物清远目，功名怀寸阴。
云衢念前侣，彩翰写冲襟。凉菊照幽径，败荷攒碧浔。
感时江海思，报国松筠心。空愧寿陵步，芳尘何处寻。

卷 363_15 【和令狐相公春日寻花有怀白侍郎阁老】

刘禹锡

芳菲满雍州，鸾凤许同游。花径须深入，时光不少留。
色鲜由树嫩，枝亚为房稠。静对仍持酒，高看特上楼。
晴宜连夜赏，雨便一年休。共忆秋官处，馀霞曲水头。

卷三百六十四

卷 364_1【荆州歌二首】

刘禹锡

渚宫杨柳暗，麦城朝雉飞。可怜踏青伴，乘暖著轻衣。
今日好南风，商旅相催发。沙头檣竿上，始见春江阔。

卷 364_2【纪南歌】

刘禹锡

风烟纪南城，尘土荆门路。天寒多猎骑，走上樊姬墓。

卷 364_3【视刀环歌】

刘禹锡

常恨言语浅，不如人意深。今朝两相视，脉脉万重心。

卷 364_4 【三阁辞四首】

刘禹锡

贵人三阁上，日晏未梳头。不应有恨事，娇甚却成愁。
珠箔曲琼钩，仔细见扬州。北兵那得度，浪话判悠悠。

沉香帖阁柱，金缕画门楣。回首降幡下，已见黍离离。
三人出晋井，一身登槛车。朱门漫临水，不可见鲈鱼。

卷 364_5 【纥那曲二首】

刘禹锡

杨柳郁青青，竹枝无限情。周郎一回顾，听唱纥那声。
踏曲兴无穷，调同词不同。愿郎千万寿，长作主人翁。

卷 364_6 【淮阴行五首】

刘禹锡

簇簇淮阴市，竹楼缘岸上。好日起樯竿，乌飞惊五两。
今日转船头，金乌指西北。烟波与春草，千里同一色。

船头大铜镮，摩挲光阵阵。早早使风来，沙头一眼认。
何物令侬羨，羨郎船尾燕。衔泥趁橈竿，宿食长相见。
隔浦望行船，头昂尾幪幪。无奈晚来时，清淮春浪软。

卷 364_7 【浑侍中宅牡丹】

刘禹锡

径尺千余朵，人间有此花。今朝见颜色，更不向诸家。

卷 364_8 【咏红柿子】

刘禹锡

晓连星影出，晚带日光悬。本因遗采掇，翻自保天年。

卷 364_9 【吕八见寄郡内书怀因而戏和】

刘禹锡

文苑振金声，循良冠百城。不知今史氏，何处列君名。

卷 364_10 【秋风引】

刘禹锡

何处秋风至，萧萧送雁群。朝来入庭树，孤客最先闻。

卷 364_11 【柳花词三首】

刘禹锡

开从绿条上，散逐香风远。故取花落时，悠扬占春晚。

轻飞不假风，轻落不委地。撩乱舞晴空，发人无限思。

晴天闇闇雪，来送青春暮。无意似多情，千家万家去。

卷 364_12 【路傍曲】

刘禹锡

南山宿雨晴，春入凤凰城。处处闻弦管，无非送酒声。

卷 364_13【君山怀古】

刘禹锡

属车八十一，此地阻长风。千载威灵尽，赭山寒水中。

卷 364_14【庭竹】

刘禹锡

露涤铅粉节，风摇青玉枝。依依似君子，无地不相宜。

卷 364_15【唐郎中宅与诸公同饮酒看牡丹】

刘禹锡

今日花前饮，甘心醉数杯。但愁花有语，不为老人开。

卷 364_16【题寿安甘棠馆二首】

刘禹锡

公馆似仙家，池清竹径斜。山禽忽惊起，冲落半岩花。

门前洛阳道，门里桃花路。尘土与烟霞，其间十馀步。

卷 364_17【古词二首】

刘禹锡

轩后初冠冕，前旒为蔽明。安知从复道，然后见人情。

簿领乃俗士，清谈信古风。吾观苏令绰，朱墨一何工。

卷 364_18【寓兴二首】

刘禹锡

常谈即至理，安事非常情。寄语何平叔，无为轻老生。

世途多礼数，鹏鷃各逍遥。何事陶彭泽，抛官为折腰。

卷 364_19【咏史二首】

刘禹锡

骠骑非无势，少卿终不去。世道剧颓波，我心如砥柱。

贾生明王道，卫绾工车戏。同遇汉文时，何人居贵位。

卷 364_20 【经檀道济故垒】

刘禹锡

万里长城坏，荒营野草秋。秣陵多士女，犹唱白符鸠。

卷 364_21 【伤段右丞】

刘禹锡

江海多豪气，朝廷有直声。何言马蹄下，一旦是佳城。

卷 364_22 【伤独孤舍人】

刘禹锡

昔别矜年少，今悲丧国华。远来同社燕，不见早梅花。

卷 364_23 【再伤庞尹】

刘禹锡

京兆归何处，章台空暮尘。可怜鸾镜下，哭杀画眉人。

卷 364_24 【敬酬微公见寄二首】

刘禹锡

凄凉沃州僧，憔悴柴桑宰。别来二十年，唯馀两心在。

越江千里镜，越岭四时雪。中有逍遥人，夜深观水月。

卷 364_25 【鄂渚留别李二十一表臣大夫】

刘禹锡

高檣起行色，促柱动离声。欲问江深浅，应如远别情。

卷 364_26 【答表臣赠别二首】

刘禹锡

昔为瑶池侣，飞舞集蓬莱。今作江汉别，风雪一徘徊。
嘶马立未还，行舟路将转。江头暝色深，挥袖依稀见。

卷 364_27 【始发鄂渚寄表臣二首】

刘禹锡

祖帐管弦绝，客帆西风生。回车已不见，犹听马嘶声。
晓发柳林戍，遥城闻五鼓。忆与故人眠，此时犹晤语。

卷 364_28 【出鄂州界怀表臣二首】

刘禹锡

离席一挥杯，别愁今尚醉。迟迟有情处，却恨江帆驶。
梦觉疑连榻，舟行忽千里。不见黄鹤楼，寒沙雪相似。

卷 364_29 【和游房公旧竹亭闻琴绝句】

刘禹锡

尚有竹间路，永无綦下尘。一闻流水曲，重忆餐霞人。

卷 364_30 【西州李尚书知愚与元武昌有旧，远示二篇吟之泫然，因以继和二首】

刘禹锡

如何赠琴日，已是绝弦时。无复双金报，空馀挂剑悲。

宝匣从此闲，朱弦谁复调。只应随玉树，同向土中销。

卷 364_31 【别苏州二首】

刘禹锡

三载为吴郡，临岐祖帐开。虽非谢桀黠，且为一裴回。

流水阊门外，秋风吹柳条。从来送客处，今日自魂销。

卷 364_32 【罢和州游建康】

刘禹锡

秋水清无力，寒山暮多思。官闲不计程，遍上南朝寺。

卷 364_33 【九日登高】

刘禹锡

世路山河险，君门烟雾深。年年上高处，未省不伤心。

卷 364_34 【答柳子厚】

刘禹锡

年方伯玉早，恨比四愁多。会待休车骑，相随出罽罗。

卷 364_35 【馆娃宫在旧郡西南砚石山前，瞰姑苏台傍有采香径，梁天监中置佛寺曰灵岩，即故宫也，信为绝境因赋二章】

刘禹锡

宫馆贮娇娃，当时意大夸。艳倾吴国尽，笑入楚王家。
月殿移椒壁，天花代舜华。唯馀采香径，一带绕山斜。

卷三百六十五

卷 365_1【听琴】

刘禹锡

禅思何妨在玉琴，真僧不见听时心。
秋堂境寂夜方半，云去苍梧湘水深。

卷 365_2【魏宫词二首】

刘禹锡

日晚长秋帘外报，望陵歌舞在明朝。
添炉欲爇熏衣麝，忆得分时不忍烧。

日映西陵松柏枝，下台相顾一相思。
朝来乐府长歌曲，唱著君王自作词。

卷 365_3 【杨枝词二首】

刘禹锡

迎得春光先到来，浅黄轻绿映楼台。
只缘袅娜多情思，更被春风长倩猜。
巫峡巫山杨柳多，朝云暮雨远相和。
因想阳台无限事，来君回唱竹枝歌。

卷 365_4 【竹枝词二首】

刘禹锡

杨柳青青江水平，闻郎江上唱歌声。
东边日出西边雨，道是无晴却有晴。
楚水巴山江雨多，巴人能唱本乡歌。
今朝北客思归去，回入纥那披绿罗。

卷 365_5 【堤上行三首】

刘禹锡

酒旗相望大堤头，堤下连樯堤上楼。
日暮行人争渡急，桨声幽轧满中流。

江南江北望烟波，入夜行人相应歌。
桃叶传情竹枝怨，水流无限月明多。

春堤缭绕水徘徊，酒舍旗亭次第开。
日晚上楼招估客，轲峨大艑落帆来。

卷 365_6 【踏歌词四首】

刘禹锡

春江月出大堤平，堤上女郎连袂行。
唱尽新词欢不见，红霞映树鹧鸪鸣。

桃蹊柳陌好经过，灯下妆成月下歌。
为是襄王故宫地，至今犹自细腰多。

新词宛转递相传，振袖倾鬟风露前。
月落乌啼云雨散，游童陌上拾花钿。

日暮江头闻竹枝，南人行乐北人悲。
自从雪里唱新曲，直到三春花尽时。

卷 365_7 【步虚词二首】

刘禹锡

阿母种桃云海际，花落子成三千岁。
海风吹折最繁枝，跪捧琼盘献天帝。

华表千年一鹤归，凝丹为顶雪为衣。
星星仙语人听尽，却向五云翻翅飞。

卷 365_8 【阿娇怨】

刘禹锡

望见葳蕤举翠华，试开金屋扫庭花。
须臾宫女传来信，言幸平阳公主家。

卷 365_9 【秋词二首】

刘禹锡

自古逢秋悲寂寥，我言秋日胜春朝。
晴空一鹤排云上，便引诗情到碧霄。

山明水净夜来霜，数树深红出浅黄。
试上高楼清入骨，岂如春色撩人狂。

卷 365_10 【秋扇词】

刘禹锡

莫道恩情无重来，人间荣谢递相催。
当时初入君怀袖，岂念寒炉有死灰。

卷 365_11 【竹枝词九首】

刘禹锡

白帝城头春草生，白盐山下蜀江清。
南人上来歌一曲，北人莫上动乡情。

山桃红花满上头，蜀江春水拍山流。
花红易衰似郎意，水流无限似侬愁。

江上朱楼新雨晴，瀼西春水縠纹生。
桥东桥西好杨柳，人来人去唱歌行。

日出三竿春雾消，江头蜀客驻兰桡。
凭寄狂夫书一纸，家住成都万里桥。

两岸山花似雪开，家家春酒满银杯。
昭君坊中多女伴，永安宫外踏青来。

城西门前滟滪堆，年年波浪不能摧。
懊恼人心不如石，少时东去复西来。

瞿塘嘈嘈十二滩，人言道路古来难。
长恨人心不如水，等闲平地起波澜。

巫峡苍苍烟雨时，清猿啼在最高枝。
个里愁人肠自断，由来不是此声悲。

山上层层桃李花，云间烟火是人家。
银钏金钗来负水，长刀短笠去烧畲。

卷 365_12【杨柳枝词九首】

刘禹锡

塞北梅花羌笛吹，淮南桂树小山词。
请君莫奏前朝曲，听唱新翻杨柳枝。

南陌东城春早时，相逢何处不依依。
桃红李白皆夸好，须得垂杨相发挥。

凤阙轻遮翡翠帟，龙池遥望麴尘丝。

御沟春水相辉映，狂杀长安年少儿。

金谷园中莺乱飞，铜驼陌上好风吹。
城中桃李须臾尽，争似垂杨无限时。

花萼楼前初种时，美人楼上斗腰肢。
如今抛掷长街里，露叶如啼欲向谁。

炀帝行宫汴水滨，数枝杨柳不胜春。
晚来风起花如雪，飞入宫墙不见人。

御陌青门拂地垂，千条金缕万条丝。
如今绾作同心结，将赠行人知不知。

城外春风吹酒旗，行人挥袂日西时。
长安陌上无穷树，唯有垂杨管别离。

轻盈袅娜占年华，舞榭妆楼处处遮。
春尽絮花留不得，随风好去落谁家。

卷 365_13【浪淘沙九首】

刘禹锡

九曲黄河万里沙，浪淘风簸自天涯。
如今直上银河去，同到牵牛织女家。

洛水桥边春日斜，碧流清浅见琼砂。
无端陌上狂风急，惊起鸳鸯出浪花。

汴水东流虎眼纹，清淮晓色鸭头春。
君看渡口淘沙处，渡却人间多少人。

鸂鶒洲头浪贴沙，青楼春望日将斜。
衔泥燕子争归舍，独自狂夫不忆家。

濯锦江边两岸花，春风吹浪正淘沙。
女郎剪下鸳鸯锦，将向中流匹晚霞。

日照澄洲江雾开，淘金女伴满江隈。
美人首饰侯王印，尽是沙中浪底来。

八月涛声吼地来，头高数丈触山回。
须臾却入海门去，卷起沙堆似雪堆。

莫道谗言如浪深，莫言迁客似沙沉。
千淘万漉虽辛苦，吹尽狂沙始到金。

流水淘沙不暂停，前波未灭后波生。
令人忽忆潇湘渚，回唱迎神三两声。

卷 365_14 【洛中送韩七中丞之吴兴口号五首】

刘禹锡

昔年意气结群英，几度朝回一字行。
海北江南零落尽，两人相见洛阳城。

自从云散各东西，每日欢娱却惨凄。
离别苦多相见少，一生心事在书题。

今朝无意诉离杯，何况清弦急管催。
本欲醉中轻远别，不知翻引酒悲来。

骆驼桥上蘋风急，鹦鹉杯中箬下春。
水碧山青知好处，开颜一笑向何人。

溪中士女出笆篱，溪上鸳鸯避画旗。
何处人间似仙境，春山携妓采茶时。

卷 365_15 【送寥参谋东游二首】

刘禹锡

九陌逢君又别离，行云别鹤本无期。
望嵩楼上忽相见，看过花开花落时。

繁花落尽君辞去，绿草垂杨引征路。
东道诸侯皆故人，留连必是多情处。

卷 365_16 【洛中春末送杜录事赴蕲州】

刘禹锡

樽前花下长相见，明日忽为千里人。
君过午桥回首望，洛城犹自有残春。

卷 365_17 【夜燕福建卢侍郎宅因送之镇】

刘禹锡

暂驻旌旗洛水堤，绮筵红烛醉兰闺。
美人美酒长相逐，莫怕猿声发建溪。

卷 365_18 【重送鸿举师赴江陵谒马逢侍御】

刘禹锡

西北秋风凋蕙兰，洞庭波上碧云寒。
茂陵才子江陵住，乞取新诗合掌看。

卷 365_19 【赠长沙讚头陀】

刘禹锡

外道邪山千万重，真言一发尽摧峰。

有时明月无人夜，独向昭潭制恶龙。

卷 365_20 【送霄韵上人游天台】

刘禹锡

曲江僧向松江见，又到天台看石桥。

鹤恋故巢云恋岫，比君犹自不逍遥。

卷 365_21 【台城怀古】

刘禹锡

清江悠悠王气沉，六朝遗事何处寻。

宫墙隐嶙围野泽，鹳鹄夜鸣秋色深。

卷 365_22 【戏赠崔千牛】

刘禹锡

学道深山许老人，留名万代不关身。

劝君多买长安酒，南陌东城占取春。

卷 365_23 【扬州春夜，李端公益张侍御登段侍御平路密县李少府秘书张正字复元同会于水馆，对酒联句，追刻烛击铜钵故事，迟辄举觥以饮之，逮夜艾群公沾醉纷然就枕，余偶独醒，因题诗于段君枕上，以志其事】

刘禹锡

寂寂独看金烬落，纷纷只见玉山颓。

自羞不是高阳侣，一夜星星骑马回。

卷 365_24 【逢王十二学士入翰林，因以诗赠】

刘禹锡

厩马翩翩禁外逢，星槎上汉杳难从。

定知欲报淮南诏，促召王褒入九重。

卷 365_25 【阙下口号呈柳仪曹】

刘禹锡

彩仗神旗猎晓风，鸡人一唱鼓蓬蓬。

铜壶漏水何时歇，如此相催即老翁。

卷 365_26 【监祠夕月坛书事】

刘禹锡

西皞司分昼夜平，羲和停午太阴生。

铿锵揖让秋光里，观者如云出凤城。

卷 365_27 【元和甲午岁诏书尽征江湘逐客，余自武陵赴京，宿于都亭，有怀续来诸君子】

刘禹锡

雷雨江山起卧龙，武陵樵客蹑仙踪。

十年楚水枫林下，今夜初闻长乐钟。

卷 365_28【元和十一年自朗州召至京，戏赠看花诸君子】

刘禹锡

紫陌红尘拂面来，无人不道看花回。

玄都观里桃千树，尽是刘郎去后栽。

卷 365_29【再游玄都观】

刘禹锡

百亩庭中半是苔，桃花净尽菜花开。

种桃道士归何处，前度刘郎今又来。

卷 365_30【与歌者米嘉荣】

刘禹锡

唱得凉州意外声，旧人唯数米嘉荣。

近来时世轻先辈，好染髭须事后生。

卷 365_31 【望夫石】

刘禹锡

终日望夫夫不归，化为孤石苦相思。

望来已是几千载，只似当时初望时。

卷 365_32 【听旧宫中乐人穆氏唱歌】

刘禹锡

曾随织女渡天河，记得云间第一歌。

休唱贞元供奉曲，当时朝士已无多。

卷 365_33 【金陵五题 · 石头城】

刘禹锡

山围故国周遭在，潮打空城寂寞回。

淮水东边旧时月，夜深还过女墙来。

卷 365_34【金陵五题·乌衣巷】

刘禹锡

朱雀桥边野草花，乌衣巷口夕阳斜。

旧时王谢堂前燕，飞入寻常百姓家。

卷 365_35【金陵五题·台城】

刘禹锡

台城六代竞豪华，结绮临春事最奢。

万户千门成野草，只缘一曲后庭花。

卷 365_36【金陵五题·生公讲堂】

刘禹锡

生公说法鬼神听，身后空堂夜不扃。

高坐寂寥尘漠漠，一方明月可中庭。

卷 365_37【金陵五题·江令宅】

刘禹锡

南朝词臣北朝客，归来唯见秦淮碧。

池台竹树三亩馀，至今人道江家宅。

卷 365_38【韩信庙】

刘禹锡

将略兵机命世雄，苍黄钟室叹良弓。

遂令后代登坛者，每一寻思怕立功。

卷 365_39【李贾二大谏拜命后寄杨八寿州】

刘禹锡

谏省新登二直臣，万方惊喜捧丝纶。

则知天子明如日，肯放淮南高卧人。

卷 365_40 【美温尚书镇定兴元以诗寄贺】

刘禹锡

旌旗入境犬无声，戮尽鲸鲵汉水清。

从此世人开耳目，始知名将出书生。

卷 365_41 【酬瑞州吴大夫夜泊湘川见寄一绝】

刘禹锡

夜泊湘川逐客心，月明猿苦血沾襟。

湘妃旧竹痕犹浅，从此因君染更深。

卷 365_42 【征还京师见旧番官冯叔达】

刘禹锡

前者匆匆襆被行，十年憔悴到京城。

南宫旧吏来相问，何处淹留白发生。

卷 365_43 【与歌者何戡】

刘禹锡

二十余年别帝京，重闻天乐不胜情。

旧人唯有何戡在，更与殷勤唱渭城。

卷 365_44 【与歌童田顺郎】

刘禹锡

天下能歌御史娘，花前叶底奉君王。

九重深处无人见，分付新声与顺郎。

卷 365_45 【燕尔馆破，屏风所画至精，人多叹赏题之】

刘禹锡

画时应遇空亡日，卖处难逢识别人。

唯有多情往来客，强将衫袖拂埃尘。

卷 365_46 【赏牡丹】

刘禹锡

庭前芍药妖无格，池上芙蕖净少情。

唯有牡丹真国色，花开时节动京城。

卷 365_47 【题欹器图】

刘禹锡

秦国功成思税驾，晋臣名遂叹危机。

无因上蔡牵黄犬，愿作丹徒一布衣。

卷 365_48 【伤桃源薛道士】

刘禹锡

坛边松在鹤巢空，白鹿闲行旧径中。

手植红桃千树发，满山无主任春风。

卷 365_49 【王思道碑堂下作】

刘禹锡

苍苍宰树起寒烟，尚有威名海内传。
四府旧闻多故吏，几人垂泪拜碑前。

卷 365_50 【伤愚溪三首】

刘禹锡

溪水悠悠春自来，草堂无主燕飞回。
隔帘惟见中庭草，一树山榴依旧开。
草圣数行留坏壁，木奴千树属邻家。

唯见里门通德榜，残阳寂寞出樵车。
柳门竹巷依然在，野草青苔日日多。
纵有邻人解吹笛，山阳旧侣更谁过。

卷 365_51 【伤循州浑尚书】

刘禹锡

贵人沦落路人哀，碧海连天丹旆回。

遥想长安此时节，朱门深巷百花开。

卷 365_52 【代靖安佳人怨二首】

刘禹锡

宝马鸣珂踏晓尘，鱼文匕首犯车茵。
适来行哭里门外，昨夜华堂歌舞人。
秉烛朝天遂不回，路人弹指望高台。
墙东便是伤心地，夜夜流萤飞去来。

卷 365_53 【碧涧寺见元九侍御和展上人诗，有三生之句因以和】

刘禹锡

廊下题诗满壁尘，塔前松树已皴鳞。
古来唯有王文度，重见平生竺道人。

卷 365_54 【思黯南墅赏牡丹】

刘禹锡

偶然相遇人间世，合在增城阿姥家。
有此倾城好颜色，天教晚发赛诸花。

卷 365_55 【和浙西尚书闻常州杨给事制新楼因寄之作】

刘禹锡

文昌星象尽东来，油幕朱门次第开。

且上新楼看风月，会乘云雨一时回。

卷 365_56 【后梁宣明二帝碑堂下作】

刘禹锡

玉马朝周从此辞，园陵寂寞对丰碑。

千行宰树荆州道，暮雨萧萧闻子规。

卷 365_57 【赠李司空妓】

刘禹锡

高髻云鬟宫样妆，春风一曲杜韦娘。

司空见惯浑闲事，断尽苏州刺史肠。

卷 365_58 【和西川李尚书伤孔雀及薛涛之什】

刘禹锡

玉儿已逐金钿葬，翠羽先随秋草萎。
唯见芙蓉含晓露，数行红泪滴清池。

卷 365_59 【同乐天登栖灵寺塔】

刘禹锡

步步相携不觉难，九层云外倚阑干。
忽然笑语半天上，无限游人举眼看。

卷 365_60 【有所嗟二首】

刘禹锡

庾令楼中初见时，武昌春柳似腰肢。
相逢相笑尽如梦，为雨为云今不知。

鄂渚濛濛烟雨微，女郎魂逐暮云归。
只应长在汉阳渡，化作鸳鸯一只飞。

卷 365_61 【和裴相公傍水闲行】

刘禹锡

为爱逍遥第一篇，时时闲步赏风烟。

看花临水心无事，功业成来二十年。

卷 365_62 【杏园花下酬乐天见赠】

刘禹锡

二十馀年作逐臣，归来还见曲江春。

游人莫笑白头醉，老醉花间有几人。

卷 365_63 【和乐天春词】

刘禹锡

新妆面面下朱楼，深锁春光一院愁。

行到中庭数花朵，蜻蜓飞上玉搔头。

卷 365_64 【和严给事闻唐昌观玉蕊花下有游仙二绝】

刘禹锡

玉女来看玉蕊花，异香先引七香车。
攀枝弄雪时回顾，惊怪人间日易斜。

雪蕊琼丝满院春，衣轻步步不生尘。
君平帘下徒相问，长伴吹箫别有人。

卷 365_65 【忆乐天】

刘禹锡

寻常相见意殷勤，别后相思梦更频。
每遇登临好风景，羡他天性少情人。

卷 365_66 【醉答乐天】

刘禹锡

洛城洛城何日归，故人故人今转稀。
莫嗟雪里暂时别，终拟云间相逐飞。

卷 365_67【虎丘寺见元相公二年前题名怆然有咏】

刘禹锡

浣水送君君不还，见君题字虎丘山。

因知早贵兼才子，不得多时在世间。

卷 365_68【寄赠小樊】

刘禹锡

花面丫头十三四，春来绰约向人时。

终须买取名春草，处处将行步步随。

卷 365_69【吟乐天自问怆然有作】

刘禹锡

亲友关心皆不见，风光满眼倍伤神。

洛阳城里多池馆，几处花开有主人。

卷 365_70 【和令狐相公别牡丹】

刘禹锡

平章宅里一栏花，临到开时不在家。

莫道两京非远别，春明门外即天涯。

卷 365_71 【和令狐相公闻思帝乡有感】

刘禹锡

当初造曲者为谁，说得思乡恋阙时。

沧海西头旧丞相，停杯处分不须吹。

卷 365_72 【酬令狐相公见寄】

刘禹锡

群玉山头住四年，每闻笙鹤看诸仙。

何时得把浮丘袖，白日将升第九天。

卷 365_73 【令狐相公春思见寄】

刘禹锡

一纸书封四句诗，芳晨对酒远相思。

长吟尽日西南望，犹及残春花落时。

卷 365_74 【城内花园颇曾游玩，令公居守亦有素期，适春霜一夕委谢书实以答令狐相公见谑】

刘禹锡

楼下芳园最占春，年年结侣采花频。

繁霜一夜相撩治，不似佳人似老人。

卷 365_75 【奉和裴晋公凉风亭睡觉】

刘禹锡

骊龙睡后珠元在，仙鹤行时步又轻。

方寸莹然无一事，水声来似玉琴声。

卷 365_76 【答裴令公雪中讶白二十二与诸公不相访之什】

刘禹锡

玉树琼楼满眼新，的知开閤待诸宾。
迟迟未去非无意，拟作梁园坐右人。

卷 365_77 【吴方之见示听江西故吏朱幼恭歌三篇，颇有怀故林之想，吟讽不足因而和之】

刘禹锡

侯家故吏歌声发，逸处能高怨处低。
今岁洛中无雨雪，眼前风景是江西。

卷 365_78 【裴令公见示谗乐天寄奴买马绝句斐言仰和且戏乐天】

刘禹锡

常奴安得似方回，争望追风绝足来。
若把翠娥酬騄耳，始知天下有奇才。

卷 365_79 【酬思黯代书见戏】

刘禹锡

官冷如浆病满身，凌寒不易过天津。
少年留取多情兴，请待花时作主人。

卷 365_80 【答张侍御贾喜再登科后，自洛赴上都赠别】

刘禹锡

又被时人写姓名，春风引路入京城。
知君忆得前身事，分付莺花与后生。

卷 365_81 【赴连州途经洛阳，诸公置酒相送，张员外贾以诗见赠，率尔酬之】

刘禹锡

谪在三湘最远州，边鸿不到水南流。
如今暂寄樽前笑，明日辞君步步愁。

卷 365_82 【赠元九侍御文石枕以诗奖之】

刘禹锡

文章似锦气如虹，宜荐华簪绿殿中。

纵使凉飙生旦夕，犹堪拂拭愈头风。

卷 365_83 【酬元九院长自江陵见寄】

刘禹锡

无事寻花至仙境，等闲栽树比封君。

金门通籍真多士，黄纸除书每日闻。

卷 365_84 【酬杨侍郎凭见寄】

刘禹锡

翔鸾阙底谢皇恩，纓上沧浪旧水痕。

疏傅挥金忽相忆，远擎长句与招魂。

卷 365_85 【酬马大夫登涯口戍见寄】

刘禹锡

新辞将印拂朝缨，临水登山四体轻。
犹念天涯未归客，瘴云深处守孤城。

卷 365_86 【答杨八敬之绝句】

刘禹锡

饱霜孤竹声偏切，带火焦桐韵本悲。
今日知音一留听，是君心事不平时。

卷 365_87 【重寄表臣二首】

刘禹锡

对酒临流奈别何，君今已醉我蹉跎。
分明记取星星鬓，他日相逢应更多。

世间人事有何穷，过后思量尽是空。
早晚同归洛阳陌，卜邻须近祝鸡翁。

卷 365_88 【重寄绝句】

刘禹锡

淮西既是平安地，鸦路今无羽檄飞。

闻道唐州最清静，战场耕尽野花稀。

卷 365_89 【酬杨八副使将赴湖南途中见寄一绝】

刘禹锡

知逐征南冠楚材，远劳书信到阳台。

明朝若上君山上，一道巴江自此来。

卷 365_90 【遥和韩睦州元相公二君子】

刘禹锡

玉人紫绶相辉映，却要霜须一两茎。

其奈无成空老去，每临明镜若为情。

卷 365_91 【吴兴敬郎中见惠斑竹杖兼示一绝聊以谢之】

刘禹锡

一茎炯炯琅玕色，数节重重玳瑁文。

拄到高山未登处，青云路上愿逢君。

卷 365_92 【奉和裴令公夜宴】

刘禹锡

天下苍生望不休，东山虽有但时游。

从来海上仙桃树，肯逐人间风露秋。

卷 365_93 【秋夜安国观闻笙】

刘禹锡

织女分明银汉秋，桂枝梧叶共飕飕。

月露满庭人寂寂，霓裳一曲在高楼。

卷 365_94 【酬仆射牛相公，晋国池上别后至甘棠馆，忽梦同游，因成口号见寄】

刘禹锡

已嗟池上别魂惊，忽报梦中携手行。
此夜独归还乞梦，老人无睡到天明。

卷 365_95 【裴侍郎大尹雪中遗酒一壶，兼示喜眼疾平一绝，有闲行把酒之句，斐然仰酬】

刘禹锡

卷尽轻云月更明，金罍不用且闲行。
若倾家酿招来客，何必池塘春草生。

卷 365_96 【和滑州李尚书上巳忆江南禊事】

刘禹锡

白马津头春日迟，沙州归雁拂旌旗。
柳营唯有军中戏，不似江南三月时。

卷 365_97 【酬柳柳州家鸡之赠】

刘禹锡

日日临池弄小雏，还思写论付官奴。

柳家新样元和脚，且尽姜芽敛手徒。

卷 365_98 【答前篇】

刘禹锡

小儿弄笔不能嗔，浣壁书窗且当勤。

闻彼梦熊犹未兆，女中谁是卫夫人。

卷 365_99 【答后篇】

刘禹锡

昔日慵工记姓名，远劳辛苦写西京。

近来渐有临池兴，为报元常欲抗行。

卷 365_100 【重答柳柳州】

刘禹锡

弱冠同怀长者忧，临岐回想尽悠悠。

耦耕若便遗身老，黄发相看万事休。

卷 365_101 【登清晖楼】

刘禹锡

浔阳江色潮添满，彭蠡秋声雁送来。

南望庐山千万仞，共夸新出栋梁材。

卷 365_102 【赴和州于武昌县再遇毛仙翁十八兄因成一绝】

刘禹锡

武昌山下蜀江东，重向仙舟见葛洪。

又得案前亲礼拜，大罗天诀玉函封。

卷 365_103【寄毗陵杨给事三首】

刘禹锡

挥毫起制来东省，蹑足修名谒外台。
好著囊鞬莫惆怅，出文入武是全才。
曾主鱼书轻刺史，今朝自请左鱼来。
青云直上无多地，却要斜飞取势回。
东城南陌昔同游，坐上无人第二流。
屈指如今已零落，且须欢喜作邻州。

卷 365_104【陪崔大尚书及诸阁老宴杏园】

刘禹锡

更将何面上春台，百事无成老又催。
唯有落花无俗态，不嫌憔悴满头来。

卷 365_105【曹刚】

刘禹锡

大弦嘈囋小弦清，喷雪含风意思生。
一听曹刚弹薄媚，人生不合出京城。

卷 365_106 【寄湖州韩中丞】

刘禹锡

老郎日日忧苍鬓，远守年年厌白蘋。

终日相思不相见，长频相见是何人。

卷 365_107 【杨柳枝】

刘禹锡

杨子江头烟景迷，隋家宫树拂金堤。

嵯峨犹有当时色，半蘸波中水鸟栖。

卷 365_108 【田顺郎歌】

刘禹锡

清歌不是世间音，玉殿尝闻称主心。

唯有顺郎全学得，一声飞出九重深。

卷 365_109【夜闻商人船中箏】

刘禹锡

大艚高帆一百尺，新声促柱十三弦。

扬州市里商人女，来占江西明月天。

卷 365_110【闻道士弹思归引】

刘禹锡

仙公一奏思归引，逐客初闻自泫然。

莫怪殷勤悲此曲，越声长苦已三年。

卷 365_111【喜康将军见访】

刘禹锡

谪居愁寂似幽栖，百草当门茅舍低。

夜猎将军忽相访，鹧鸪惊起绕篱啼。

卷 365_112 【赠刘景擢第】

刘禹锡

湘中才子是刘郎，望在长沙住桂阳。

昨日鸿都新上第，五陵年少让清光。

卷 365_113 【赴连山途次德宗山陵寄张员外】

刘禹锡

常时并冕奉天颜，委佩低簪彩仗间。

今日独来张乐地，万重云水望桥山。

卷 365_114 【尝茶】

刘禹锡

生拍芳丛鹰觜芽，老郎封寄谪仙家。

今宵更有湘江月，照出菲菲满碗花。

卷 365_115【梁国祠】

刘禹锡

梁国三郎威德尊，女巫箫鼓走乡村。

万家长见空山上，雨气苍茫生庙门。

卷 365_116【望洞庭】

刘禹锡

湖光秋月两相和，潭面无风镜未磨。

遥望洞庭山水翠，白银盘里一青螺。

卷 365_117【杨柳枝】

刘禹锡

春江一曲柳千条，二十年前旧板桥。

曾与美人桥上别，恨无消息到今朝。

卷 365_118 【楼上】

刘禹锡

江上楼高二十梯，梯梯登遍与云齐。

人从别浦经年去，天向平芜尽处低。

卷 365_119 【洛滨病卧，户部李侍郎见惠药物，谿以文星之句，斐然仰谢】

刘禹锡

隐几支颐对落晖，故人书信到柴扉。

周南留滞商山老，星象如今属少微。

卷 365_120 【故洛城古墙】

刘禹锡

粉落椒飞知几春，风吹雨洒旋成尘。

莫言一片危基在，犹过无穷来往人。

卷 365_121【句】

刘禹锡

湖上收宿雨。

故国思如此，若为天外心。

东屯沧海阔，南让洞庭宽。

翠粒照晴露。

银花垂院榜，翠羽撼绛铃。

卷三百六十六

卷 366_1 【山亭怀古】

张弘靖

丛石依古城，悬泉洒清池。高低袤丈内，衡霍相蔽亏。
归田竟何因，为郡岂所宜。谁能辨人野，寄适聊在斯。

卷 366_2 【和张相公太原山亭怀古诗】

韩察

公府政多暇，思与仁智全。为山想岩穴，引水听潺湲。
轩冕迹自逸，尘俗无由牵。苍生方瞩目，讵得赋归田。

卷 366_3 【和张相公太原山亭怀古诗】

崔恭

高情乐闲放，寄迹山水中。朝霞铺座右，虚白贮清风。

潜窦激飞泉，石路跻且崇。步武有胜概，不与俗情同。

卷 366_4【和张相公太原山亭怀古诗】

陆灏

激水泻飞瀑，寄怀良在兹。如何谢安石，要结东山期。
入座兰蕙馥，当轩松桂滋。于焉悟幽道，境寂心自怡。

卷 366_5【和张相公太原亭怀古诗】

胡证

飞泉天台状，峭石蓬莱姿。潺湲与青翠，咫尺当幽奇。
居然尽精道，得以书妍词。岂无他山胜，懿此清轩墀。

卷 366_6【句】

胡证

诗书入京国，旌旆过乡关。

卷 366_7【和太原山亭怀古诗】

张贾

中庭起崖谷，漱玉下涟漪。丹丘谁云远，寓象得心期。
岂不贵钟鼎，至怀在希夷。唯当蓬莱阁，灵凤复来仪。

卷 366_8【和裴司空答张秘书赠马诗】

张贾

阁下从容旧客卿，寄来骏马赏高情。任追烟景骑仍醉，
知有文章倚便成。步步自怜春日影，萧萧犹起朔风声。
须知上宰吹嘘意，送入天门上路行。

卷 366_9【句】

张贾

夫子生知者，相期妙理中。

卷 366_10 【吴兴三绝】

张文规

蘋洲须觉池沼俗，苎布直胜罗纨轻。清风楼下草初出，
明月峡中茶始生。吴兴三绝不可舍，劝子强为吴会行。

卷 366_11 【湖州贡焙新茶】

张文规

凤辇寻春半醉回，仙娥进水御帘开。
牡丹花笑金钿动，传奏吴兴紫笋来。

卷 366_12 【句】

张文规

谁云隼旟吏，长对虎头岩。

卷三百六十七

卷 367_1【缙山鹤】

张仲素

羽客骖仙鹤，将飞驻碧山。映松残雪在，度岭片云还。
清唳因风远，高姿对水闲。笙歌忆天上，城郭叹人间。
几变霜毛洁，方殊藻质斑。迢迢烟路逸，奋翮讵能攀。

卷 367_2【夜闻洛滨吹笙】

张仲素

王子千年后，笙音五夜闻。逶迤绕清洛，断续下仙云。
泄泄飘难定，啾啾曲未分。松风助幽律，波月动轻文。
凤管听何远，鸾声若在群。暗空思羽盖，馀气自氛氲。

卷 367_3 【上元日听太清宫步虚】

张仲素

仙客开金箓，元辰会玉京。灵歌宾紫府，雅韵出层城。
磬杂音徐彻，风飘响更清。纤馀空外尽，断续听中生。
舞鹤纷将集，流云住未行。谁知九陌上，尘俗仰遗声。

卷 367_4 【玉绳低建章】

张仲素

迢迢玉绳下，芒彩正阑干。稍复临鵷鹊，方疑近露寒。
微明连粉堞，的皪映仙盘。横接河流照，低将夜色残。
天榆随影没，宫树与光攒。遐想西垣客，长吟欲罢难。

卷 367_5 【寒云轻重色】

张仲素

佳期当可许，托思望云端。鳞影朝犹落，繁阴暮自寒。
因风方袅袅，间石已漫漫。隐映看鸿度，霏微觉树攒。
凝空多似黛，引素乍如纨。每向愁中览，含毫欲状难。

卷 367_6【圣明乐】

张仲素

九陌祥烟合，千春瑞月明。宫花将苑柳，先发凤凰城。

卷 367_7【献寿词】

张仲素

玉帛殊方至，歌钟比屋闻。华夷今一贯，同贺圣朝君。

卷 367_8【宫中乐五首】

张仲素

网户交如绮，纱窗薄似烟。乐吹天上曲，人是月中仙。

翠匣开寒镜，珠钗挂步摇。妆成只畏晓，更漏促春宵。

红果瑶池实，金盘露井冰。甘泉将避暑，台殿晓光凝。

月采浮鸾殿，砧声隔凤楼。笙歌临水槛，红烛乍迎秋。

奇树留寒翠，神池结夕波。黄山一夜雪，渭水泻声多。

卷 367_9【春游曲三首】

张仲素

烟柳飞轻絮，风榆落小钱。濛濛百花里，罗绮竞秋千。

骋望登香阁，争高下砌台。林间踏青去，席上寄笺来。

行乐三春节，林花百和香。当年重意气，先占斗鸡场。

卷 367_10【春闺思】

张仲素

袅袅城边柳，青青陌上桑。提笼忘采叶，昨夜梦渔阳。

卷 367_11【春江曲二首】

张仲素

家寄征河岸，征人几岁游。不如潮水信，每日到沙头。

乘晓南湖去，参差叠浪横。前洲在何处，霜里雁嚶嚶。

卷 367_12【太平词】

张仲素

圣德超千古，皇威静四方。苍生今息战，无事觉时良。

卷 367_13【陇上行】

张仲素

行到黄云陇，唯闻羌戍鼙。不如山下水，犹得任东西。

卷 367_14【思君恩】

张仲素

紫禁香如雾，青天月似霜。云韶何处奏，只是在朝阳。

卷 367_15 【王昭君】

张仲素

仙娥今下嫁，骄子自同和。剑戟归田尽，牛羊绕塞多。

卷 367_16 【秋夜曲】

张仲素

丁丁漏水夜何长，漫漫轻云露月光。

秋逼暗虫通夕响，征衣未寄莫飞霜。

卷 367_17 【秋思赠远】

张仲素

博山沉燎绝馀香，兰烬金檠怨夜长。

为问青青河畔草，几回经雨复经霜。

卷 367_18【塞上曲】

张仲素

卷旆生风喜气新，早持龙节静边尘。
汉家天子图麟阁，身是当今第一人。

卷 367_19【塞下曲五首】

张仲素

三戍渔阳再渡辽，骍弓在臂剑横腰。
匈奴似若知名姓，休傍阴山更射雕。

猎马千行雁几双，燕然山下碧油幢。
传声漠北单于破，火照旌旗夜受降。

朔雪飘飘开雁门，平沙历乱卷蓬根。
功名耻计擒生数，直斩楼兰报国恩。

陇水潺湲陇树秋，征人到此泪双流。
乡关万里无因见，西戍河源早晚休。

阴碛茫茫塞草肥，桔槔烽上暮云飞。

交河北望天连海，苏武曾将汉节归。

卷 367_20 【秋思二首】

张仲素

碧窗斜日蔼深晖，愁听寒蛩泪湿衣。
梦里分明见关塞，不知何路向金微。

秋天一夜静无云，断续鸿声到晓闻。
欲寄征衣问消息，居延城外又移军。

卷 367_21 【汉苑行二首】

张仲素

回雁高飞太液池，新花低发上林枝。
年光到处皆堪赏，春色人间总不知。

春风淡荡景悠悠，莺啭高枝燕入楼。
千步回廊闻凤吹，珠帘处处上银钩。

卷 367_22 【天马辞二首】

张仲素

天马初从渥水来，郊歌曾唱得龙媒。
不知玉塞沙中路，苜蓿残花几处开。

躑躅宛驹齿未齐，摐金喷玉向风嘶。
来时欲尽金河道，猎猎轻风在碧蹄。

卷 367_23 【燕子楼诗三首】

张仲素

楼上残灯伴晓霜，独眠人起合欢床。
相思一夜情多少，地角天涯不是长。

北邙松柏锁愁烟，燕子楼人思悄然。
自埋剑履歌尘散，红袖香消已十年。

适看鸿雁岳阳回，又睹玄禽逼社来。
瑶瑟玉箫无意绪，任从蛛网任从灰。

卷三百六十八

卷 368_1【赋得冬日可爱】

庾承宣

宿雾开天霁，寒郊见初日。林疏照逾远，冰轻影微出。
岂假阳和气，暂忘玄冬律。愁抱望自宽，羁情就如失。
欣欣事几许，嚙嚙状非一。倾心倘知期，良愿自兹毕。

卷 368_2【赠毛仙翁】

郑澣

至道无名，至人长生。爰观绘事，似挹真形。方口渥丹，
浓眉刷青。松姿本秀，鹤质自轻。道德神仙，内蕴心灵。
红肌丝发，外彰华精。色如含芳，貌若和光。胚浑造化，
含吐阴阳。吾闻安期，隐见不常。或在世间，或游上苍。
猗欤真人，得非后身。写此仙骨，久而不磷。皎皎明眸，
了然如新。蔼蔼童颜，的然如春。金石可并，丹青不泯。
通天台上，有见常人。俗士观瞻，方悟幽尘。君子图之，
敬兮如神。

卷 368_3【和李德裕游汉州房公湖二首】

郑澣

太尉留琴地，时移重可寻。徽弦一掩抑，风月助登临。
荣驻青油骑，高张白雪音。祇言酬唱美，良史记王箴。
静对烟波夕，犹思栋宇清。卧龙空有处，驯鸟独忘情。
顾步襟期远，参差物象横。自宜雕乐石，爽气际青城。

卷 368_4【中书相公任兵部侍郎日，后阁植四松，逾数年澣忝此官，因献拙什】

郑澣

丞相当时植，幽襟对此开。人知舟楫器，天假栋梁材。
错落龙鳞出，褰褰鹤翅回。重阴罗武库，细响静山台。
得地公堂里，移根涧水隈。吴臣梦寐远，秦岳岁年摧。
转觉飞缨缪，何因继组来。几寻珠履迹，愿比角弓培。
柏悦犹依社，星高久照台。后凋应共操，无复问良媒。

卷 368_5【和李德裕房公旧竹亭闻琴】

郑澣

石室寒飙骛，孙枝雅器裁。坐来山水操，弦断吊遗埃。

卷 368_6 【句】

郑澣

但虑彩色污，无虞臂胛肥。

卷 368_7 【游栖霞寺】

张洎

跻险入幽林，翠微含竹殿。泉声无休歇，山色时隐见。
潮来杂风雨，梅落成霜霰。一从方外游，顿觉尘心变。

卷 368_8 【春风扇微和】

张洎

木德生和气，微微入曙风。暗催南向叶，渐翫北归鸿。
澹荡侵冰谷，悠扬转蕙丛。拂尘回广路，泛籁过遥空。
暖上烟光际，云移律候中。扶摇如可借，从此戾苍穹。

卷 368_9 【观藏冰】

张洎

寒气方穷律，阴精正结冰。体坚风带壮，影素月临凝。
冬赋凌人掌，春期命妇升。凿来壶色彻，纳处镜光澄。
鲁史曾留问，豳诗旧见称。同观里射享，王道颂还兴。

卷 368_10 【赋得春风扇微和】

陈通方

习习和风扇，悠悠淑气微。阳升知候改，律应喜春归。
池柳晴初拆，林莺暖欲飞。川原浮彩翠，台馆动光辉。
泛艳摇丹阙，扬芳入粉闱。发生当有分，枯朽幸因依。

卷 368_11 【金谷园怀古】

陈通方

缓步洛城下，轸怀金谷园。昔人随水逝，旧树逐春繁。
冉冉摇风弱，菲菲裊露翻。歌台岂易见，舞袖乍如存。
戏蝶香中起，流莺暗处喧。徒闻施锦帐，此地拥行轩。

卷 368_12 【句】

陈通方

应念路傍憔悴翼，昔年乔木幸同迁。

卷 368_13 【立春日晓望三素云】

李应

玄鸟初来日，灵仙望里分。冰容朝上界，玉辇拥朝云。
碧落流轻艳，红霓间彩文。带烟时缥缈，向斗更氤氲。
仿佛随风驭，迢遥出晓雰。兹辰三见后，希得从元君。

卷 368_14 【立春日晓望三素云】

陈师穆

晴晓初春日，高心望素云。彩光浮玉辇，紫气隐元君。
缥缈中天去，逍遥上界分。鸾骖攀不及，仙吹远难闻。
礼候于斯睹，明循在解纷。人归悬想处，霞色自氛氲。

卷 368_15【立春日晓望三素云】

李季何

霭霭青春曙，飞仙驾五云。浮轮初缥缈，承盖下氤氲。
薄影随风度，殊容向日分。羽毛纷共远，环珮杳犹闻。
静合烟霞色，遥将鸾鹤群。年年瞻此节，应许从元君。

卷 368_16【春台晴望】

李程

曲台送春目，景物丽新晴。霭霭烟收翠，忻忻木向荣。
静看迟日上，闲爱野云平。风慢游丝转，天开远水明。
登高尘虑息，观徼道心清。更有迁乔意，翩翩出谷莺。

卷 368_17【玉壶冰】

李程

琢玉性惟坚，成壶体更圆。虚心含众象，应物受寒泉。
温润资天质，清贞禀自然。日融光乍散，雪照色逾鲜。
至鉴功宁宰，无私照岂偏。明将水镜对，白与粉闱连。
拂拭终为美，提携伫见传。勿令毫发累，遗恨鲍公篇。

卷 368_18 【赋得竹箭有筠】

李程

常爱凌寒竹，坚贞可喻人。能将先进礼，义与后凋邻。
冉冉犹全节，青青尚有筠。陶钧二仪内，柯叶四时春。
待凤花仍吐，停霜色更新。方持不易操，对此欲观身。

卷 368_19 【观庆云图】

李程

五云从表瑞，藻绘宛成图。柯叶何时改，丹青此不渝。
非烟色尚丽，似盖状应殊。渥彩看犹在，轻阴望已无。
方将遇翠幄，那羨起苍梧。欲识从龙处，今逢圣合符。

卷 368_20 【赠毛仙翁】

李程

茫茫尘累愧腥膻，强把蜉蝣望列仙。闲指紫霄峰下路，
却归白鹿洞中天。吹箫凤去经何代，茹玉方传得几年。
他日更来人世看，又应东海变桑田。

卷 368_21 【省试春台晴望】

高弁

层台聊一望，遍赏帝城春。风暖闻啼鸟，冰开见跃鳞。
晴山烟外翠，香蕊日边新。已变青门柳，初销紫陌尘。
金汤千里国，车骑万方人。此处云霄近，凭高愿致身。

卷 368_22 【霜菊】

席夔

时令忽已变，行看被霜菊。可怜后时秀，当此凛风肃。
淅沥翠枝翻，凄清金蕊馥。凝姿节堪重，澄艳景非淑。
宁祛青女威，愿盈君子掬。持来泛樽酒，永以照幽独。

卷 368_23 【赋得竹箭有筠】

席夔

共爱东南美，青青叹有筠。贞姿众木异，秀色四时均。
枝叶当无改，风霜岂惮频。虚心如待物，劲节自留春。
鲜润期栖凤，婣娟可并人。可怜初箨卷，粉泽更宜新。

卷 368_24 【省试观庆云图】

李行敏

缣素传休祉，丹青状庆云。非烟凝漠漠，似盖乍纷纷。
尚驻从龙意，全舒捧日文。光因五色起，影向九霄分。
裂素观嘉瑞，披图贺圣君。宁同窥汗漫，方此睹氛氲。

卷 368_25 【赋得冬日可爱】

陈讽

寒日临清昼，寥天一望时。未消埋径雪，先暖读书帷。
属思光难驻，舒情影若遗。晋臣曾比德，谢客昔言诗。
散彩宁偏照，流阴信不追。馀辉如可就，回烛幸无私。

卷 368_26 【郡斋三月下旬作】

崔护

春事日已歇，池塘旷幽寻。残红披独坠，嫩绿间浅深。
偃仰卷芳褥，顾步爱新阴。谋春未及竟，夏初遽见侵。

卷 368_27 【五月水边柳】

崔护

结根挺涯涘，垂影覆清浅。睡脸寒未开，懒腰晴更软。
摇空条已重，拂水带方展。似醉烟景凝，如愁月露泫。
丝长鱼误恐，枝弱禽惊践。长别几多情，含春任攀搴。

卷 368_28 【三月五日陪裴大夫泛长沙东湖】

崔护

上巳馀风景，芳辰集远坰。彩舟浮泛荡，绣毂下娉婷。
林树回葱蒨，笙歌入杳冥。湖光迷翡翠，草色醉蜻蜓。
鸟弄桐花日，鱼翻谷雨萍。从今留胜会，谁看画兰亭。

卷 368_29 【山鸡舞石镜】

崔护

庐峰开石镜，人说舞山鸡。物象纤无隐，禽情只自迷。
景当烟雾歇，心喜锦翎齐。宛转乌呈彩，婆娑凤欲栖。
何言资羽族，在地得天倪。应笑翰音者，终朝饮败醯。

卷 368_30 【题都城南庄】

崔护

去年今日此门中，人面桃花相映红。
人面不知何处去，桃花依旧笑春风。

卷 368_31 【晚鸡】

崔护

黯黯严城罢鼓鼙，数声相续出寒栖。
不嫌惊破纱窗梦，却恐为奴半夜啼。

卷三百六十九

卷 369_1【赠药山高僧惟俨二首】

李翱

练得身形似鹤形，千株松下两函经。
我来问道无馀说，云在青霄水在瓶。

选得幽居惬野情，终年无送亦无迎。
有时直上孤峰顶，月下披云啸一声。

卷 369_2【赠毛仙翁】

李翱

紫霄仙客下三山，因救生灵到世间。龟鹤计年承甲子，
冰霜为质驻童颜。韬藏休咎传真箓，变化荣枯试小还。
从此便教尘骨贵，九霄云路愿追攀。

卷 369_3【拜禹歌】

李翱

惟天地之无穷兮，哀生人之常勤。往者吾弗及兮，
来者吾弗闻。已而，已而。

卷 369_4【广庆寺】

李翱

传者不足信，见景胜如闻。一水远赴海，两山高入云。
鱼龙晴自戏，猿狖晚成群。醉酒斜阳下，离心草自薰。

卷 369_5【奉酬刘言史宴光风亭】

李翱

闰馀春早景沉沉，楔饮风亭恣赏心。
红袖青娥留永夕，汉阴宁肯羨山阴。

卷 369_6【戏赠诗】

李翱

县君好砖渠，绕水恣行游。鄙性乐疏野，凿地便成沟。

两岸值芳草，中央漾清流。所尚既不同，砖凿可自修。
从他后人见，境趣谁为幽。

卷 369_7【题浯溪石】

皇甫湜

次山有文章，可惋只在碎。然长于指叙，约洁有馀态。
心语适相应，出句多分外。于诸作者间，拔戟成一队。
中行虽富剧，粹美若可盖。子昂感遇佳，未若君雅裁。
退之全而神，上与千载对。李杜才海翻，高下非可概。
文与一气间，为物莫与大。先王路不荒，岂不仰吾辈。
石屏立衙衙，溪口扬素濑。我思何人知，徙倚如有待。

卷 369_8【石佛谷】

皇甫湜

澶漫太行北，千里一块石。平腹有壑谷，深广数百尺。
土僧何为者，老草毛发白。寝处容身龕，足膝隐成迹。
金仙琢灵象，相好倚北壁。花座五云扶，玉毫六虚射。
文人留纪述，时事可辨析。鸟迹巧均分，龙骸极癯瘠。
枯松间槎枿，猛兽恣腾掷。蛭虫食纵，悬垂露凝滴。
精艺贯古今，穷岩谁爱惜。托师禅诵馀，勿使尘埃积。

卷 369_9【出世篇】

皇甫湜

生当为大丈夫，断羈罗，出泥涂。四散号呶，俶扰无隅。
埋之深渊，飘然上浮。骑龙披青云，泛览游八区。
经太山，绝大海，一长吁。西摩月镜，东弄日珠。
上括天之门，直指帝所居。群仙来迎塞天衢，
凤凰鸾鸟灿金舆。音声嘈嘈满太虚，旨饮食兮照庖厨。
食之不饫饫不尽，使人不陋复不愚。旦旦狎玉皇，
夜夜御天姝。当御者几人，百千为番，宛宛舒舒，
忽不自知。支消体化膏露明，湛然无色茵席濡。
俄而散漫，斐然虚无。翕然复抟，抟久而苏。
精神如太阳，霍然照清都。四肢为琅玕，五脏为璠玕。
颜如芙蓉，顶为醍醐。与天地相终始，浩漫为欢娱。
下顾人间，溷粪蝇蛆。

卷 369_10【蜀绵州越王楼诗】

樊宗师

危楼倚天门，如！星辰宫。橐薄龙虎怪，洄洄绕雷风。
徂秋试登临，大霭屯乔空。不见西北路，考怀益雕穷。
石濂薄溅溅，上山杳穹穹。昔人创为逝，所适酤颜红。
今我兹之来，犹校成岁功。辍田植科亩，游圃歌芳丛。

地财无丛厚，人室安取丰。既乏富庶能，千万惭文翁。

卷 369_11【催妆】

卢储

昔年将去玉京游，第一仙人许状头。
今日幸为秦晋会，早教鸾凤下妆楼。

卷 369_12【官舍迎内子有庭花开】

卢储

芍药斩新栽，当庭数朵开。东风与拘束，留待细君来。

卷 369_13【古松感兴】

皇甫松

皇天后土力，使我向此生。贵贱不我均，若为天地情。
我家世道德，旨意匡文明。家集四百卷，独立天地经。
寄言青松姿，岂羨朱槿荣。昭昭大化光，共此遗芳馨。

卷 369_14 【怨回纥歌】

皇甫松

白首南朝女，愁听异域歌。收兵颍利国，饮马胡芦河。
毳布腥膻久，穹庐岁月多。雕巢城上宿，吹笛泪滂沱。

卷 369_15 【江上送别】

皇甫松

祖席驻征棹，开帆候信潮。隔筵桃叶泣，吹管杏花飘。
船去鸥飞阁，人归尘上桥。别离惆怅泪，江路湿红蕉。

卷 369_16 【采莲子二首】

皇甫松

菡萏香连十顷陂，小姑贪戏采莲迟。
晚来弄水船头湿，更脱红裙裹鸭儿。

船动湖光滟滟秋，贪看年少信船流。
无端隔水抛莲子，遥被人知半日羞。

卷 369_17【抛球乐】

皇甫松

红拨一声飘，轻球坠越绡。带翻金孔雀，香满绣蜂腰。
少少抛分数，花枝正索饶。

金蹙花球小，真珠绣带垂。几回冲蜡烛，千度入春怀。
上客终须醉，觥杯自乱排。

卷 369_18【劝僧酒】

皇甫松

劝僧一杯酒，共看青青山。酣然万象灭，不动心印闲。

卷 369_19【登郭隗台】

皇甫松

燕相谋在兹，积金黄巍巍。上者欲何颜，使我千载悲。

卷 369_20 【杨柳枝词二首】

皇甫松

烂漫春归水国时，吴王宫殿柳丝垂。
黄莺长叫空闺畔，西子无因更得知。
春入行宫映翠微，玄宗侍女舞烟丝。
如今柳向空城绿，玉笛何人更把吹。

卷 369_21 【浪淘沙二首】

皇甫松

滩头细草接疏林，浪恶罾船半欲沉。
宿鹭眠洲非旧浦，去年沙觜是江心。
蛮歌豆蔻北人愁，松雨蒲风野艇秋。
浪起鸂鶒眠不得，寒沙细细入江流。

卷 369_22 【句】

皇甫松

夜入真珠室，朝游玳瑁宫。

卷 369_23 【送皇甫湜赴举】

马异

马蹄声特特，去入天子国。借问去是谁，秀才皇甫湜。
吞吐一腹文，八音兼五色。主文有崔李，郁郁为朝德。
青铜镜必明，朱丝绳必直。称意太平年，愿子长相忆。

卷 369_24 【贞元旱岁】

马异

赤地炎都寸草无，百川水沸煮虫鱼。
定应焦烂无人救，泪落三篇古尚书。

卷 369_25 【暮春醉中寄李干秀才】

马异

欢异且交亲，酒生开瓮春。不须愁犯卯，且乞醉过申。
折草为筹箸，铺花作锦裀。娇莺解言语，留客也殷勤。

卷 369_26 【答卢仝结交诗】

马异

有鸟自南翔，口衔一书扎，达我山之维。
开缄金玉焕陆离，乃是卢仝结交诗。此诗峭绝天边格，
力与文星色相射。长河拔作数条丝，太华磨成一拳石。
莫嗟独笑无往还，月中芳桂难追攀。况值乱邦不平年，
回陵倒谷如等闲。与君俯首大艰阻，喙长三尺不得语，
因君今日形章句。羨猕猴兮著衣裳，悲蚯蚓兮安翅羽。
上天不识察，仰我为辽天失所，将吾剑兮切淤泥，
使良骥兮捕老鼠。昨日脱身卑贱笼，卯星借与老人峰。
抱锄劬地芸芝朮，偃盖参天旧有松，朮与松兮保身世。
卧居居兮起于于，漱潺潺兮聆嚶嚶。道在其中可终岁，
不教辜负尧为帝。烧我荷衣摧我身，回看天地如砥平。
钢刀剉骨不辞去，卑躬君子今明明。俯首辞山心惨惻，
白云虽好恋不得。看云且拟直须臾，疾风又卷西飞翼。
为报覃怀心结交，死生富贵存后凋。我心不畏朱公叔，
君意须防刘孝标。以胶投漆苦不早，就中相去万里道。
河水悠悠山之间，无由把袂攄怀抱。忆仝吟能文，
洽臭成兰薰。不知何处清风夕，拟使张华见陆云。

卷三百七十

卷 370_1【白云起封中诗】

吕温

封开白云起，汉帝坐斋宫。望在泥金上，疑生秘玉中。
攒柯初缭绕，布叶渐蒙笼。日观祥光合，天门瑞气通。
无心已出岫，有势欲凌风。倘遣成膏泽，从兹遍大空。

卷 370_2【终南精舍月中闻磬声诗】

吕温

月峰禅室掩，幽磬静昏氛。思入空门妙，声从觉路闻。
泠泠满虚壑，杳杳出寒云。天籁疑难辨，霜钟谁可分。
偶来游法界，便欲谢人群。竟夕听真响，尘心自解纷。

卷 370_3 【青出蓝诗】

吕温

物有无穷好，蓝青又出青。朱研未比德，白受始成形。
袍袭宜从政，衿垂可问经。当时不采撷，作色几飘零。

卷 370_4 【奉和李相公早朝于中书候传点，偶书所怀奉呈门下武相公中书郑相公】

吕温

禁门留骑吹，内省正衣冠。稍辨旗常色，尚闻钟漏残。
九天炉气暖，六月玉声寒。宿雾开霞观，晨光泛露盘。
致君期反朴，求友得如兰。政自同归理，言成共不刊。
准绳临百度，领袖映千官。卧鼓流沙静，飞航涨海安。
尽规酬主意，偕赋代交欢。雅韵人间满，多惭窃和难。

卷 370_5 【奉和武中丞秋日台中寄怀简诸僚友】

吕温

圣朝思纪律，宪府得中贤。指顾风行地，仪形月丽天。
不仁恒自远，为政复何先。虚室唯生白，闲情却草玄。

迎霜红叶早，过雨碧苔鲜。鱼乐翻秋水，乌声隔暮烟。
旧游多绝席，感物遂成篇。更许穷荒谷，追歌白雪前。

卷 370_6【吐蕃别馆和周十一郎中杨七录事望白水山作】

吕温

纯精结奇状，皎皎天一涯。玉嶂拥清气，莲峰开白花。
半岩晦云雪，高顶澄烟霞。朝昏对宾馆，隐映如仙家。

夙闻蕴孤尚，终欲穷幽遐。暂因行役暇，偶得志所嘉。
明时无外户，胜境即中华。况今舅甥国，谁道隔流沙。

卷 370_7【奉和张舍人阁中直夜思闻雅琴因书事通简僚友】

吕温

迢递天上直，寂寞丘中琴。忆尔山水韵，起予仁智心。
凝情在正始，超想疏烦襟。凉生子夜后，月照禁垣深。
远风霭兰气，微露清桐阴。方袭缙衣庆，永奉南薰吟。

卷 370_8 【和舍弟惜花绝句】

吕温

去年无花看，今年未看花。更闻飘落尽，走马向谁家。

卷 370_9 【和恭听晓笼中山鹊】

吕温

掩抑中天意，凄怆触笼音。惊晓一闻处，伤春千里心。

卷 370_10 【和舍弟让笼中鹰】

吕温

未用且求安，无猜也不残。九天飞势在，六月目睛寒。

动触樊笼倦，闲消肉食难。主人憎恶鸟，试待一呼看。

卷 370_11【同恭夏日题寻真观李宽中秀才书院】

吕温

闭院开轩笑语阑，江山并入一壶宽。微风但觉杉香满，
烈日方知竹气寒。披卷最宜生白室，吟诗好就步虚坛。
愿君此地攻文字，如炼仙家九转丹。

卷 370_12【同舍弟恭岁暮寄晋州李六协律三十韵】

吕温

古人犹悲秋，况复岁暮时。急景迫流念，穷阴结长悲。
阳乌下西岭，月鹊惊南枝。揽衣步霜砌，倚杖临冰池。

恍恍若有失，悄悄良不怡。忽闻晨起吟，宛是同所思。
有美壮感激，无何远栖迟。摧藏变化用，掩抑扶摇姿。

时杰岂虚出，天道信可欺。巨川望汴济，寒谷待潜吹。
剑匣益精利，玉韬宁磷缁。戒哉轻沽诸，行矣自宠之。

伊我抱微尚，仲氏即心期。讨论自少小，形影相差池。
比来胸中气，欲耀天下奇。云雨沛萧艾，烟阁双萎蕤。

几年困方枘，一旦迷多岐。道因穷理悟，命以尽性知。

事去类绝弦，时来如转规。伊吕偶然得，孔墨徒尔为。
早行多露悔，强进触藩羸。功名岂身利，仁义非吾私。

万物自身化，一夫何驱驰。不如任行止，委命安所宜。
劝君休感叹，与予陶希夷。明年郊天后，庆泽岁华滋。

曲水杏花雪，香街青柳丝。良时且暂欢，樽酒聊共持。
闲过漆园叟，醉看五陵儿。寄言思隐处，不久来相追。

卷 370_13【青海西寄窦三端公】

吕温

时同事弗同，穷节厉阴风。我役流沙外，君朝紫禁中。
从容非所羡，辛苦竟何功。但示酬恩路，浮生任转蓬。

卷 370_14【蕃中拘留岁馀回至陇石先寄城中亲故】

吕温

蓬转星霜改，兰陔色养违。穷泉百死别，绝域再生归。
镜数成丝发，囊收拭血衣。酬恩有何力，只弃一毛微。

卷 370_15 【吐蕃别馆卧病寄朝中诸友】

吕温

星汉纵横车马喧，风摇玉佩烛花繁。

岂知羸卧穷荒外，日满深山犹闭门。

卷 370_16 【吐蕃别馆中和日寄朝中僚旧】

吕温

清时令节千官会，绝域穷山一病夫。

遥想满堂欢笑处，几人缘我向西隅。

卷 370_17 【及第后答潼关主人】

吕温

本欲云雨化，却随波浪翻。一沾太常第，十过潼关门。

志力且虚弃，功名谁复论。主人故相问，惭笑不能言。

卷 370_18【河中城南姚家浴后题赠主人】

吕温

新浴振轻衣，满堂寒月色。主人有美酒，况是曾相识。

卷 370_19【看浑中丞山桃花，初有他客不通，晚方得入，因有戏赠】

吕温

朝来驻马香街里，风度遥闻语笑声。
无事闭门教日晚，山桃落尽不胜情。

卷 370_20【赠友人】

吕温

南山双乔松，擢本皆千寻。夕流膏露津，朝被青云阴。
负雪出深涧，摇风倚高岑。明堂久不构，云干何森森。
匠意方雕巧，时情正夸淫。生材会有用，天地岂无心。

卷 370_21【道州夏日郡内北桥新亭书怀赠何元二处士】

吕温

结构池梁上，登临日几回。晴空交密叶，阴岸积苍苔。
爽气中央满，清风四面来。振衣生羽翰，高枕出尘埃。
齐物鱼何乐，忘机鸟不猜。闲销炎昼静，选胜火云开。
僻远宜羸性，优游赖废材。愿为长泛梗，莫作重然灰。
守道穷非过，先时动是灾。寄言徐孺子，宾榻且徘徊。

卷 370_22【道州弘道县主簿知县三年，颇著廉慎，秩满秩满县阁申使
请留，将赴衡州题其厅事】

吕温

为理赖同力，陟明非所任。废田方垦草，新柘未成阴。
术浅功难就，人疲感易深。烦君驻归棹，与慰不欺心。

卷 370_23【道州将赴衡州酬别江华毛令】

吕温

布帛精粗任土宜，疲人识信每先期。
明朝别后无他嘱，虽是蒲鞭也莫施。

卷 370_24 【道州夏日早访荀参军林园敬酬见赠】

吕温

高眠日出始开门，竹径旁通到后园。陶亮横琴空有意，
任棠置水竟无言。松窗宿翠含风薄，槿援朝花带露繁。
山郡本来车马少，更容相访莫辞喧。

卷 370_25 【道州敬酬何处士怀郡楼月夜之作】

吕温

清质悠悠素彩融，长川迥陆合为空。
佳人甚近山城闭，夏夜相望水镜中。

卷 370_26 【道州敬酬何处士书情见赠】

吕温

意气曾倾四国豪，偶来幽寺息尘劳。严陵钓处江初满，
梁甫吟时月正高。新识几人知杞梓，故园何岁长蓬蒿。
期君自致青云上，不用伤心叹二毛。

卷 370_27 【戏赠灵澈上人】

吕温

僧家亦有芳春兴，自是禅心无滞境。

君看池水湛然时，何曾不受花枝影。

卷 370_28 【二月一日是贞元旧节，有感绝句，寄黔南窦三洛阳卢七】

吕温

同事先皇立玉墀，中和旧节又支离。

今朝各自看花处，万里遥知掩泪时。

卷 370_29 【初发道州答崔三连州题海阳亭见寄绝句】

吕温

吏中习隐好跻攀，不扰疲人便自闲。

闻说殷勤海阳事，令人转忆舜祠山。

卷 370_30 【答段秀才】

吕温

尽日看花君不来，江城半夜与君开。

楼中共指南园火，红烬随花落碧苔。

卷 370_31 【宗礼欲往桂州，苦雨因以戏赠】

吕温

农人辛苦绿苗齐，正爱梅天水满堤。

知汝使车行意速，但令骢马著鄣泥。

卷 370_32 【道州奉寄襄阳裴相公】

吕温

悠悠世路自浮沉，岂问仁贤待物心。

最忆过时留宴处，艳歌催酒后亭深。

卷三百七十一

卷 371_1 【吐蕃别馆月夜】

吕温

三五穷荒月，还应照北堂。回身向暗卧，不忍见圆光。

卷 371_2 【望思台作】

吕温

浸润成宫蛊，苍黄弄父兵。人情疑始变，天性感还生。
宇县犹能洽，闺门讷不平。空令千载后，凄怆望思名。

卷 371_3 【孟冬蒲津关河亭作】

吕温

息驾非穷途，未济岂迷津。独立大河上，北风来吹人。

雪霜自兹始，草木当更新。严冬不肃杀，何以见阳春。

卷 371_4 【巩路感怀】

吕温

马嘶白日暮，剑鸣秋气来。我心浩无际，河上空徘徊。

卷 371_5 【题梁宣帝陵二首】

吕温

即雎终自翦，覆国岂为雄。假号孤城里，何殊在甬东。
祀夏功何薄，尊周义不成。凄凉庾信赋，千载共伤情。

卷 371_6 【岳阳怀古】

吕温

晨飙发荆州，落日到巴丘。方知剡剡利，可接鬼神游。
二湖豁南浸，九派驶东流。襟带三千里，尽在岳阳楼。
忆昔斗群雄，此焉争上游。吴昌屯虎旅，晋盛骛龙舟。
宋齐纷祸难，梁陈成寇雠。钟鼓长震耀，鱼龙不得休。
风雪一萧散，功业忽如浮。今日时无事，空江满白鸥。

卷 371_7 【道州途中即事】

吕温

零桂佳山水，茱阳旧自同。经途看不暇，遇境说难穷。
叠嶂青时合，澄湘漫处空。舟移明镜里，路入画屏中。

岩壑千家接，松萝一径通。渔烟生缥缈，犬吠隔笼葱。
戏鸟留馀翠，幽花吝晚红。光翻沙濑日，香散橘园风。

信美非吾土，分忧属贱躬。守愚资地僻，恤隐望年丰。
且保心能静，那求政必工。课终如免戾，归养洛城东。

卷 371_8 【登少陵原，望秦中诸川，太原王至德妙用】

吕温

少陵最高处，旷望极秋空。君山喷清源，脉散秦川中。
荷锺自成雨，由来非鬼工。如何盛明代，委弃伤豳风。

泾灞徒络绎，漆沮虚会同。东流滔滔去，沃野飞秋蓬。
大禹平水土，吾人得其宗。发机回地势，运思与天通。

早欲献奇策，丰财叙西戎。岂知年三十，未识大明宫。
卷尔出岫云，追吾入冥鸿。无为学惊俗，狂醉哭途穷。

卷 371_9【奉敕祭南岳十四韵】

吕温

皇家礼赤帝，谬获司风域。致斋紫盖下，宿设祝融侧。
鸣涧惊宵寐，清猿递时刻。澡洁事夙兴，簪佩思尽饰。

危坛象岳趾，秘殿翹翠翼。登拜不遑愿，酌献皆累息。
赞道仪匪繁，祝史词甚直。忽觉心魂悸，如有精灵逼。

漠漠云气生，森森杉柏黑。风吹虚箫韵，露洗寒玉色。
寂寞有至公，馨香在明德。礼成谢邑吏，驾言归郡职。
憩桑访蚕事，遵畴课农力。所愿风雨时，回首瞻南极。

卷 371_10【经河源军汉村作】

吕温

行行忽到旧河源，城外千家作汉村。樵采未侵征虏墓，
耕耘犹就破羌屯。金汤天险长全设，伏腊华风亦暗存。
暂驻单车空下泪，有心无力复何言。

卷 371_11 【题河州赤岸桥】

吕温

左南桥上见河州，遗老相依赤岸头。

匝塞歌钟受恩者，谁怜被发哭东流。

卷 371_12 【题阳人城】

吕温

忠驱义感即风雷，谁道南方乏武才。

天下起兵诛董卓，长沙子弟最先来。

卷 371_13 【晋王龙骧墓】

吕温

虎旗龙舰顺长风，坐引全吴入掌中。

孙皓小儿何足取，便令千载笑争功。

卷 371_14 【题石勒城二首】

吕温

长驱到处积人头，大旆连营压上游。
建业乌栖何足问，慨然归去王中州。

天生杰异固难驯，应变摧枯若有神。
夷甫自能疑倚啸，忍将虚诞误时人。

卷 371_15 【刘郎浦口号】

吕温

吴蜀成婚此水浔，明珠步障幄黄金。
谁将一女轻天下，欲换刘郎鼎峙心。

卷 371_16 【自江华之衡阳途中作】

吕温

孤棹迟迟怅有违，沿湘数日逗晴晖。
人生随分为忧喜，回雁峰南是北归。

卷 371_17 【吐蕃别馆送杨七录事先归】

吕温

愁云重拂地，飞雪乱遥程。莫虑前山暗，归人正眼明。

卷 371_18 【奉送范司空赴朔方】

吕温

筑坛登上将，膝席委前筹。虏灭南侵迹，朝分北顾忧。

抗旌回广漠，抚剑动旄头。坐见黄云暮，行看白草秋。

山横旧秦塞，河绕古灵州。戍守如无事，惟应猎骑游。

卷 371_19 【送文畅上人东游】

吕温

随缘聊振锡，高步出东城。水止无恒地，云行不计程。

到时为彼岸，过处即前生。今日临岐别，吾徒自有情。

卷 371_20 【喜俭北至送宗礼南行】

吕温

洞庭舟始泊，桂江帆又开。魂从会处断，愁向笑中来。
惝恍看残景，殷勤祝此杯。衡阳刷羽待，成取一行回。

卷 371_21 【送段九秀才归澧州】

吕温

湘南孤白芷，幽托在清浔。岂有馨香发，空劳知处深。
摧贤路已隔，赈乏力不任。惭我一言分，贞君千里心。
寸义薄联组，片诚敌兼金。方期践冰雪，无使弱思侵。

卷 371_22 【衡州送李十一兵曹赴浙东】

吕温

慷慨视别剑，凄清泛离琴。前程楚塞断，此恨洞庭深。
文字已久废，循良非所任。期君碧云上，千里一扬音。

卷 371_23 【临洮送袁七书记归朝】

吕温

忆年十五在江湄，闻说平凉且半疑。

岂料殷勤洮水上，却将家信托袁师。

卷 371_24 【江陵酒中留别坐客】

吕温

寻常纵恣倚青春，不契心期便不亲。

今日烟波九疑去，相逢尽是眼中人。

卷 371_25 【道州酬送何山人之容州】

吕温

匣有青萍筒有书，何门不可曳长裾。

应须定取真知者，遣对明君说子虚。

卷 371_26 【道州送戴简处士往贺州谒杨侍郎】

吕温

羸马孤童鸟道微，三千客散独南归。

山公念旧偏知我，今日因君泪满衣。

卷 371_27 【春日游郭驸马大安亭子】

吕温

戚里容闲客，山泉若化成。寄游芳径好，借赏彩船轻。

春至花常满，年多水更清。此中如传舍，但自立功名。

卷 371_28 【楚州追制后舍弟直长安县失囚花下共饮】

吕温

天子收郡印，京兆责狱囚。狂兄与狂弟，不解对花愁。

卷 371_29 【衡州岁前游合江亭，见山樱蕊未折，因赋含彩吝惊春】

吕温

山樱先春发，红蕊满霜枝。幽处竟谁见，芳心空自知。
似夺朝日照，疑畏暖风吹。欲问含彩意，恐惊轻薄儿。

卷 371_30 【衡州登楼望南馆临水花，呈房戴段李诸公】

吕温

夭桃临方塘，暮色堪秋思。托根岂求润，照影非自媚。
胃挂青柳丝，零落绿钱地。佳期竟何许，时有幽禽至。

卷 371_31 【合江亭槛前多高竹，不见远岸花，客命翦之，感而成咏】

吕温

吉凶岂前卜，人事何翻覆。缘看数日花，却剪凌霜竹。
常言契君操，今乃妨众目。自古病当门，谁言出幽独。

卷 371_32 【道州春游欧阳家林亭】

吕温

道州城北欧阳家，去郭一里占烟霞。主人虽朴甚有思，
解留满地红桃花。桃花成泥不须扫，明朝更访桃源老。
政成兴足告即归，门前便是家山道。

卷 371_33 【衡州早春偶游黄溪口号】

吕温

偶寻黄溪日欲没，早梅未尽山樱发。
无事江城闭此身，不得坐待花间月。

卷 371_34 【衡州夜后把火看花留客】

吕温

红芳暗落碧池头，把火遥看且少留。
半夜忽然风更起，明朝不复上南楼。

卷 371_35 【夜后把火看花南园，招李十一兵曹不至，呈座上诸公】

吕温

天桃红烛正相鲜，傲吏闲斋困独眠。
应是梦中飞作蝶，悠扬只在此花前。

卷 371_36 【顺宗至德大圣大安孝皇帝挽歌词三首】

吕温

遐视轻神宝，传归属圣猷。尧功终有待，文德本无忧。
坐受朝汾水，行看告岱丘。那知鼎成后，龙驭弗淹留。
监抚垂三纪，声徽洽万方。礼因驰道著，明自垦田彰。
积渐承鸿业，从容守太康。更留园寝诏，恭听有馀芳。
早秋同轨至，晨旆露华滋。挽度千夫咽，笳凝六马迟。
剑悲长闭日，衣望出游时。风起西陵树，凄凉满孝思。

卷 371_37 【咏蜀客石琴枕】

吕温

可怜他山石，几度负贞坚。推迁强为用，雕斫伤自然。

文含巴江浪，色起青城烟。更闻余玉声，时入朱丝弦。

卷 371_38【河南府试赎帖，赋得乡饮酒诗】

吕温

酌言修旧典，刈楚始登堂。百拜宾仪尽，三终乐奏长。
想同莺出谷，看似雁成行。礼罢知何适，随云入帝乡。

卷 371_39【赋得失群鹤】

吕温

杳杳冲天鹤，风排势暂违。有心长自负，无伴可相依。
万里宁辞远，三山讵忆归。但令毛羽在，何处不翻飞。

卷 371_40【道州南楼换柱】

吕温

鸿灾起无朕，有见非前知。蚁入不足恤，柱倾何可追。
良工操斤斧，沉吟方在斯。殚材事朽废，曷若新宏规。

卷 371_41 【道州北池放鹅】

吕温

我非好鹅癖，尔乏鸣雁姿。安得免沸鼎，澹然游清池。
见生不忍食，深情固在斯。能自远飞去，无念稻粱为。

卷 371_42 【回风有怀】

吕温

银宫翠岛烟霏霏，珠树玲珑朝日晖。
神仙望见不得到，却逐回风何处归。

卷 371_43 【蕃中答退浑词二首】

吕温

退浑儿，退浑儿，朔风长在气何衰。
万群铁马从奴虏，强弱由人莫叹时。

退浑儿，退浑儿，冰消青海草如丝。
明堂天子朝万国，神岛龙驹将与谁。

卷 371_44 【上官昭容书楼歌】

吕温

汉家婕妤唐昭容，工诗能赋千载同。自言才艺是天真，
不服丈夫胜妇人。歌阑舞罢闲无事，纵恣优游弄文字。
玉楼宝架中天居，絳奇秘异万卷馀。水精编帙绿钿轴，
云母捣纸黄金书。风吹花露清旭时，绮窗高挂红绡帷。
香囊盛烟绣结络，翠羽拂案青琉璃。吟披啸卷终无已，
皎皎渊机破研理。词萦彩翰紫鸾回，思耿寥天碧云起。
碧云起，心悠哉，境深转苦坐自摧。金梯珠履声一断，
瑶阶日夜生青苔。青苔秘空关，曾比群玉山。
神仙杳何许，遗逸满人间。君不见洛阳南市卖书肆，
有人买得研神记。纸上香多蠹不成，昭容题处犹分明，
令人惆怅难为情。

卷 371_45 【闻砧有感】

吕温

千门俨云端，此地富罗纨。秋月三五夜，砧声满长安。
幽人感中怀，静听泪洑澜。所恨捣衣者，不知天下寒。

卷 371_46 【早觉有感】

吕温

东方殊未明，暗室虫正飞。先觉忽先起，衣裳颠倒时。
严冬寒漏长，此夜如何其。不用思秉烛，扶桑有清晖。

卷 371_47 【冬日病中即事】

吕温

墙下长安道，嚣尘咫尺间。久牵身外役，暂得病中闲。
背喜朝阳满，心怜暮鸟还。吾庐在何处，南有白云山。

卷 371_48 【病中自户部员外郎转司封】

吕温

羸卧承新命，优容获所安。遣儿迎贺客，无力拂尘冠。
偃仰晴轩暖，支离晓镜寒。那堪报恩去，感激对衰兰。

卷 371_49 【久病初朝衢中即事】

吕温

沉疴旷十旬，还过直城闉。老马犹知路，羸童欲怕人。
久隳三径计，更强百年身。许国将何力，空生衣上尘。

卷 371_50 【道州城北楼观李花】

吕温

夜疑关山月，晓似沙场雪。曾使西域来，幽情望超越。
将念浩无际，欲言忘所说。岂是花感人，自怜抱孤节。

卷 371_51 【道州秋夜南楼即事】

吕温

谁念独坐愁，日暮此南楼。云去舜祠闭，月明潇水流。
猿声何处晓，枫叶满山秋。不分匣中镜，少年看白头。

卷 371_52 【道州观野火】

吕温

南风吹烈火，焰焰烧楚泽。阳景当昼迟，阴天半夜赤。
过处若彗扫，来时如电激。岂复辨萧兰，焉能分玉石。

虫蛇尽烁烂，虎兕出奔迫。积秽皆荡除，和气始融液。
尧时既敬授，禹稼斯肇迹。遍生合颖禾，大秀两岐麦。
家有京坻咏，人无沟壑戚。乃悟焚如功，来岁终受益。

卷 371_53 【衡州早春二首】

吕温

碧水何逶迤，东风吹沙草。烟波千万曲，不辨嵩阳道。
病肺不饮酒，伤心不看花。惟惊望乡处，犹自隔长沙。

卷 371_54 【郡内书怀寄刘连州窦夔州】

吕温

朱邑何为者，桐乡有古祠。我心常所慕，二郡老人知。

卷 371_55【偶然作二首】

吕温

栖栖复汲汲，忽觉年四十。今朝满衣泪，不是伤春泣。
中夜兀然坐，无言空涕洟。丈夫志气事，儿女安得知。

卷 371_56【古兴】

吕温

越欧百炼时，楚卞三泣地。二宝无人识，千龄皆弃置。
空岩起白虹，古狱生紫气。安得命世客，直来开奥秘。
剑任荆钟看，玉从投火试。必能绝疑惑，然后论奇异。

卷 371_57【风咏】

吕温

微风生青蘋，习习出金塘。轻摇深林翠，静猎幽径芳。
掩抑时未来，鸿毛亦无伤。一朝乘严气，万里号清霜。
北走摧邓林，东去落扶桑。扫却垂天云，澄清无私光。
悠然返空寂，晏海通舟航。

卷 371_58 【镜中叹白发】

吕温

年过潘岳才三岁，还见星星两鬓中。

纵使他时能早达，定知不作黑头公。

卷 371_59 【友人邀听歌有感】

吕温

文章抛尽爱功名，三十无成白发生。

辜负壮心羞欲死，劳君贵买断肠声。

卷 371_60 【贞元十四年旱甚，见权门移芍药花】

吕温

绿原青垄渐成尘，汲井开园日日新。

四月带花移芍药，不知忧国是何人。

卷 371_61 【冬夜即事】

吕温

百忧攒心起复卧，夜长耿耿不可过。

风吹雪片似花落，月照冰文如镜破。

卷 371_62 【道州郡斋卧疾寄东馆诸贤】

吕温

东池送客醉年华，闻道风流胜习家。

独卧郡斋寥落意，隔帘微雨湿梨花。

卷 371_63 【读小弟诗有感，因口号以示之】

吕温

忆吾未冠赏年华，二十年间在咄嗟。

今来羡汝看花岁，似汝追思昨日花。

卷 371_64 【读句践传】

吕温

丈夫可杀不可羞，如何送我海西头。

更生更聚终须报，二十年间死即休。

卷 371_65 【道州月叹】

吕温

别馆月，犁牛冰河金山雪。道州月，霜树子规啼是血。

壮心感此孤剑鸣，沉火在灰殊未灭。

卷 371_66 【风叹】

吕温

青海风，飞沙射面随惊蓬。洞庭风，危墙欲折身若空。

西驰南走有何事，会须一决百年中。

卷 371_67 【道州感兴】

吕温

当代知文字，先皇记姓名。七年天下立，万里海西行。
苦节终难辨，劳生竟自轻。今朝流落处，啸水绕孤城。

卷 371_68 【和李使君三郎早秋城北亭宴崔司士，因寄关中张评事】

吕温

黄花古城路，上尽见青山。桑柘晴川口，牛羊落照间。
野情随卷幔，尘事隔重关。道合偏重赏，官微独不闲。
鹤分琴久罢，书到雁应还。为谢登临客，琼林寄一攀。

卷 371_69 【题从叔园林】

吕温

阮宅闲园暮，窗中见树阴。樵歌依野草，僧语过长林。
鸟向花间井，人弹竹里琴。自嫌身未老，已有住山心。

卷 371_70 【送僧归漳州】

吕温

几夏京城住，今朝独远归。修行四分律，护净七条衣。
溪寺黄橙熟，沙田紫芋肥。九龙潭上路，同去客应稀。

卷三百七十二

卷 372_1【列女操】

孟郊

梧桐相待老，鸳鸯会双死。贞女贵徇夫，舍生亦如此。
波澜誓不起，妾心井中水。

卷 372_2【灞上轻薄行】

孟郊

长安无缓步，况值天景暮。相逢灞浞间，亲戚不相顾。
自叹方拙身，忽随轻薄伦。常恐失所避，化为车辙尘。
此中生白发，疾走亦未歇。

卷 372_3【长安羁旅行】

孟郊

十日一理发，每梳飞旅尘。三旬九过饮，每食唯旧贫。

万物皆及时，独余不觉春。失名谁肯访，得意争相亲。
直木有恬翼，静流无躁鳞。始知喧竞场，莫处君子身。
野策藤竹轻，山蔬薇蕨新。潜歌归去来，事外风景真。

卷 372_4【长安道】

孟郊

胡风激秦树，贱子风中泣。家家朱门开，得见不可入。
长安十二衢，投树鸟亦急。高阁何人家，笙簧正喧吸。

卷 372_5【送远吟】

孟郊

河水昏复晨，河边相送频。离杯有泪饮，别柳无枝春。
一笑忽然敛，万愁俄已新。东波与西日，不惜远行人。

卷 372_6【古薄命妾】

孟郊

不惜十指弦，为君千万弹。常恐新声至，坐使故声残。
弃置今日悲，即是昨日欢。将新变故易，持故为新难。

青山有蘼芜，泪叶长不干。空令后人，采掇幽思攒。

卷 372_7 【古离别】

孟郊

松山云缭绕，萍路水分离。云去有归日，水分无合时。
春芳役双眼，春色柔四支。杨柳织别愁，千条万条丝。

卷 372_8 【杂怨】

孟郊

忆人莫至悲，至悲空自衰。寄人莫剪衣，剪衣未必归。
朝为双蒂花，莫为四散飞。花落还绕树，游子不顾期。

天桃花清晨，游女红粉新。天桃花薄暮，游女红粉故。
树有百年花，人无一定颜。花送人老尽，人悲花自闲。

贫女镜不明，寒花日少容。暗蛩有虚织，短线无长缝。
浪水不可照，狂夫不可从。浪水多散影，狂夫多异踪。
持此一生薄，空成万恨浓。

卷 372_9 【静女吟】

孟郊

艳女皆妒色，静女独检踪。任礼耻任妆，嫁德不嫁容。
君子易求聘，小人难自从。此志谁与谅，琴弦幽韵重。

卷 372_10 【归信吟】

孟郊

泪墨洒为书，将寄万里亲。书去魂亦去，兀然空一身。

卷 372_11 【山老吟】

孟郊

不行山下地，唯种山上田。腰斧斫旅松，手瓢汲家泉。
讵知文字力，莫记日月迁。蟠木为我身，始得全天年。

卷 372_12 【游子吟】

孟郊

慈母手中线，游子身上衣。临行密密缝，意恐迟迟归。
谁言寸草心，报得三春晖。

卷 372_13 【小隐吟】

孟郊

我饮不在醉，我欢长寂然。酌溪四五盏，听弹两三弦。
炼性静栖白，洗情深寄玄。号怒路傍子，贪败不贪全。

卷 372_14 【苦寒吟】

孟郊

天寒色青苍，北风叫枯桑。厚冰无裂文，短日有冷光。
敲石不得火，壮阴夺正阳。苦调竟何言，冻吟成此章。

卷 372_15【猛将吟】

孟郊

拟脍楼兰肉，蓄怒时未扬。秋鼙无退声，夜剑不隐光。
虎队手驱出，豹篇心卷藏。古今皆有言，猛将出北方。

卷 372_16【伤哉行】

孟郊

众毒蔓贞松，一枝难久荣。岂知黄庭客，仙骨生不成。
春色舍芳蕙，秋风绕枯茎。弹琴不成曲，始觉知音倾。
馆月改旧照，吊宾写馀情。还舟空江上，波浪送铭旌。

卷 372_17【怨诗】

孟郊

试妾与君泪，两处滴池水。看取芙蓉花，今年为谁死。

卷 372_18【湘弦怨】

孟郊

昧者理芳草，蒿兰同一锄。狂飙怒秋林，曲直同一枯。
嘉木忌深蠹，哲人悲巧诬。灵均入回流，靳尚为良谟。
我愿分众泉，清浊各异渠。我愿分众巢，枭鸾相远居。
此志谅难保，此情竟何如。湘弦少知音，孤响空踟蹰。

卷 372_19【楚竹吟酬卢虔端公见和湘弦怨】

孟郊

握中有新声，楚竹人未闻。识音者谓谁，清夜吹赠君。
昔为潇湘引，曾动潇湘云。一叫凤改听，再惊鹤失群。
江花匪秋落，山日当昼曛。众浊响杂沓，孤清思氛氲。
欲知怨有形，愿向明月分。一掬灵均泪，千年湘水文。

卷 372_20【远愁曲】

孟郊

飘飘何所从，遗冢行未逢。东西不见人，哭向青青松。
此地有时尽，此哀无处容。声翻太白云，泪洗蓝田峰。

水涉七八曲，山登千万重。愿邀玄夜月，出视白日踪。

卷 372_21 【贫女词寄从叔先辈简】

孟郊

蚕女非不勤，今年独无春。二月冰雪深，死尽万木身。
时令自逆行，造化岂不仁。仰企碧霞仙，高控沧海云。
永别劳苦场，飘飘游无垠。

卷 372_22 【边城吟】

孟郊

西城近日天，俗禀气候偏。行子独自渴，主人仍卖泉。
烧烽碧云外，牧马青坡巅。何处鹞突梦，归思寄仰眠。

卷 372_23 【新平歌送许问】

孟郊

边柳三四尺，暮春离别歌。早回儒士驾，莫饮土番河。
谁识匣中宝，楚云章句多。

卷 372_24 【杀气不在边】

孟郊

杀气不在边，凜然中国秋。道险不在山，平地有摧輶。
河南又起兵，清浊俱锁流。岂唯私客艰，拥滞官行舟。
况余隔晨昏，去家成阻修。忽然两鬓雪，同是一日愁。
独寝夜难晓，起视星汉浮。凉风荡天地，日夕声飕飕。
万物无少色，兆人皆老忧。长策苟未立，丈夫诚可羞。
灵响复何事，剑鸣思戮讎。

卷 372_25 【结爱】

孟郊

心心复心心，结爱务在深。一度欲离别，千回结衣襟。
结妾独守志，结君早归意。始知结衣裳，不如结心肠。
坐结行亦结，结尽百年月。

卷 372_26 【弦歌行】

孟郊

驱傩击鼓长笛，瘦鬼染面惟齿白。暗中 拽茅鞭，
裸足朱 行戚戚。相顾笑声冲庭燎，桃弧射矢时独叫。

卷 372_27 【覆巢行】

孟郊

荒城古木枝多枯，飞禽嗷嗷朝哺雏。枝倾巢覆雏坠地，
乌鸢下啄更相呼。阳和发生均孕育，鸟兽有情知不足。

枝危巢小风雨多，未容长成已先覆。灵枝珍木满上林，
凤巢阿阁重且深。尔今所托非本地，乌鸢何得同尔心。

卷 372_28 【出门行】

孟郊

长河悠悠去无极，百龄同此可叹息。秋风白露沾人衣，
壮心凋落夺颜色。少年出门将诉谁，川无梁兮路无岐。

一闻陌上苦寒奏，使我伫立惊且悲。君今得意厌梁肉，
岂复念我贫贱时。

海风萧萧天雨霜，穷愁独坐夜何长。驱车旧忆太行险，
始知游子悲故乡。美人相思隔天阙，长望云端不可越。

手持琅玕欲有赠，爱而不见心断绝。南山峨峨白石烂，
碧海之波浩漫漫。参辰出没不相待，我欲横天无羽翰。

卷 372_29 【湘妃怨】

孟郊

南巡竟不返，二妃怨逾积。万里丧蛾眉，潇湘水空碧。
冥冥荒山下，古庙收贞魄。乔木深青春，清光满瑶席。
攀芳徒有荐，灵意殊脉脉。玉珮不可亲，徘徊烟波夕。

卷 372_30 【巫山曲】

孟郊

巴江上峡重复重，阳台碧峭十二峰。荆王猎时逢暮雨，
夜卧高丘梦神女。轻红流烟湿艳姿，行云飞去明星稀。
目极魂断望不见，猿啼三声泪滴衣。

卷 372_31 【巫山高】

孟郊

见尽数万里，不闻三声猿。但飞萧萧雨，中有亭亭魂。
千载楚王恨，遗文宋玉言。至今晴明天，云结深闺门。

卷 372_32 【楚怨】

孟郊

秋入楚江水，独照汨罗魂。手把绿荷泣，意愁珠泪翻。

九门不可入，一犬吠千门。

卷 372_33 【塘下行】

孟郊

塘边日欲斜，年少早还家。徒将白羽扇，调妾木兰花。

不是城头树，那栖来去鸦。

卷 372_34 【临池曲】

孟郊

池中春蒲叶如带，紫菱成角莲子大。

罗裙蝉鬓倚迎风，双双伯劳飞向东。

卷 372_35 【车遥遥】

孟郊

路喜到江尽，江上又通舟。舟车两无阻，何处不得游。
丈夫四方志，女子安可留。郎自别日言，无令生远愁。

旅雁忽叫月，断猿寒啼秋。此夕梦君梦，君在百城楼。
寄泪无因波，寄恨无因鞦。愿为驭者手，与郎回马头。

卷 372_36 【征妇怨】

孟郊

良人昨日去，明月又不圆。别时各有泪，零落青楼前。
君泪濡罗巾，妾泪满路尘。罗巾长在手，今得随妾身。
路尘如得风，得上君车轮。

渔阳千里道，近如中门限。中门逾有时，渔阳长在眼。
生在绿罗下，不识渔阳道。良人自戍来，夜夜梦中到。

卷 372_37 【空城雀】

孟郊

一雀入官仓，所食宁损几。只虑往覆频，官仓终害尔。

鱼网不在天，鸟罗不张水。饮啄要自然，可以空城里。

卷 372_38 【闲怨】

孟郊

妾恨比斑竹，下盘烦冤根。有笋未出土，中已含泪痕。

卷 372_39 【羽林行】

孟郊

朔雪寒断指，朔风劲裂冰。胡中射雕者，此日犹不能。

翩翩羽林儿，锦臂飞苍鹰。挥鞭快白马，走出黄河凌。

卷 372_40 【古意】

孟郊

河边织女星，河畔牵牛郎。未得渡清浅，相对遥相望。

卷 372_41 【古别离】

孟郊

欲别牵郎衣，郎今到何处。不恨归来迟，莫向临邛去。

卷 372_42 【游侠行】

孟郊

壮士性刚决，火中见石裂。杀人不回头，轻生如暂别。
岂知眼有泪，肯白头上发。半生无恩酬，剑闲一百月。

卷 372_43 【黄雀吟】

孟郊

黄雀舞承尘，倚恃主人仁。主人忽不仁，买弹弹尔身。

何不远飞去，蓬蒿正繁新。蒿粒无人争，食之足为珍。
莫觑翻车粟，觑翻罪有因。黄雀不知言，赠之徒殷勤。

卷 372_44【有所思】

孟郊

桔槔烽火昼不灭，客路迢迢信难越。古镇刀攒万片霜，
寒江浪起千堆雪。此时西去定如何，空使南心远凄切。

卷 372_45【求仙曲】

孟郊

仙教生为门，仙宗静为根。持心若妄求，服食安足论。
铲惑有灵药，饵真成本源。自当出尘网，驭凤登昆仑。

卷 372_46【婵娟篇】

孟郊

花婵娟，泛春泉。竹婵娟，笼晓烟。妓婵娟，不长妍。
月婵娟，真可怜。夜半姮娥朝太一，人间本自无灵匹。
汉宫承宠不多时，飞燕婕妤相妒嫉。

卷 372_47【南浦篇】

孟郊

南浦桃花亚水红，水边柳絮由春风。鸟鸣啾啾烟濛濛，
自从远送对悲翁。此翁已与少年别，唯忆深山深谷中。

卷 372_48【清东曲】

孟郊

樱桃花参差，香雨红霏霏。含笑竞攀折，美人湿罗衣。
采采清东曲，明眸艳珪玉。青巾舫上郎，上下看不足。
南阳公首词，编入新乐录。

卷 372_49【望远曲】

孟郊

朝朝候归信，日日登高台。行人未去植庭梅，
别来三见庭花开。庭花开尽复几时，春光骀荡阻佳期。
愁来望远烟尘隔，空怜绿鬓风吹白。何当归见远行客。·

卷三百七十三

卷 373_1【织妇辞】

孟郊

夫是田中郎，妾是田中女。当年嫁得君，为君秉机杼。
筋力日已疲，不息窗下机。如何织纨素，自著蓝缕衣。
官家榜村路，更索栽桑树。

卷 373_2【古意】

孟郊

荡子守边戍，佳人莫相从。去来年月多，苦愁改形容。
上山复下山，踏草成古踪。徒言采蘼芜，十度一不逢。
鉴独是明月，识志唯寒松。井桃始开花，一见悲万重。
人颜不再春，桃色有再浓。捐气入空房，无憀乍从容。
启贴理针线，非独学裁缝。手持未染彩，绣为白芙蓉。
芙蓉无染污，将以表心素。欲寄未归人，当春无信去。
无信反增愁，愁心缘陇头。愿君如陇水，冰镜水还流。

宛宛青丝线，纤纤白玉钩。玉钩不亏缺，青丝无断绝。
回还胜双手，解尽心中结。

卷 373_3 【折杨柳】

孟郊

杨柳多短枝，短枝多别离。赠远屡攀折，柔条安得垂。
青春有定节，离别无定时。但恐人别促，不怨来迟迟。
莫言短枝条，中有长相思。朱颜与绿杨，并在别离期。
楼上春风过，风前杨柳歌。枝疏缘别苦，曲怨为年多。
花惊燕地云，叶映楚池波。谁堪别离此，征戍在交河。

卷 373_4 【和丁助教塞上吟】

孟郊

哭雪复吟雪，广文丁夫子。江南万里寒，曾未及如此。
整顿气候谁，言从生灵始。无令恻隐者，哀哀不能已。

卷 373_5【古怨别】

孟郊

飒飒秋风生，愁人怨离别。含情两相向，欲语气先咽。
心曲千万端，悲来却难说。别后唯所思，天涯共明月。

卷 373_6【古别曲】

孟郊

山川古今路，纵横无断绝。来往天地间，人皆有离别。
行衣未束带，中肠已先结。不用看镜中，自知生白发。

欲陈去留意，声向言前咽。愁结填心胸，茫茫若为说。
荒郊烟莽苍，旷野风凄切。处处得相随，人那不如月。

卷 373_7【戏赠陆大夫十二丈】

孟郊

莲子不可得，荷花生水中。犹胜道傍柳，无事荡春风。
渌萍与荷叶，同此一水中。风吹荷叶在，渌萍西复东。
莲叶未开时，苦心终日卷。春水徒荡漾，荷花未开展。

卷 373_8【劝善吟】

孟郊

瘦郭有志气，相衰老龙钟。劝我少吟诗，俗窄难尔容。
一口百味别，况在醉会中。四座正当喧，片言何由通。

顾余昧时调，居止多疏慵。见书眼始开，闻乐耳不聪。
视听互相隔，一身且莫同。天疾难自医，诗癖将何攻。

见君如见书，语善千万重。自悲咄咄感，变作烦恼翁。
烦恼不可欺，古剑涩亦雄。知君方少年，少年怀古风。

藏书拄屋脊，不惜与凡聋。我愿拜少年，师之学崇崇。
从他笑为矫，矫善亦可宗。

卷 373_9【望夫石】

孟郊

望夫石，夫不来兮江水碧。
行人悠悠朝与暮，千年万年色如故。

卷 373_10【寒江吟】

孟郊

冬至日光白，始知阴气凝。寒江波浪冻，千里无平冰。
飞鸟绝高羽，行人皆晏兴。荻洲素浩渺，碛岸澌峻嶒。
烟舟忽自阻，风帆不相乘。何况异形体，信任为股肱。
涉江莫涉凌，得意须得朋。结交非贤良，谁免生爱憎。
冻水有再浪，失飞有载腾。一言纵丑词，万响无善应。
取鉴谅不远，江水千万层。何当春风吹，利涉吾道弘。

卷 373_11【审交】

孟郊

种树须择地，恶土变木根。结交若失人，中道生谤言。
君子芳桂性，春荣冬更繁。小人槿花心，朝在夕不存。
莫蹉冬冰坚，中有潜浪翻。唯当金石交，可以贤达论。

卷 373_12【怨别】

孟郊

一别一回老，志士白发早。在富易为容，居贫难自好。

沉忧损性灵，服药亦枯槁。秋风游子衣，落日行远道。
君问去何之，贱身难自保。

卷 373_13【百忧】

孟郊

萱草女儿花，不解壮士忧。壮士心是剑，为君射斗牛。
朝思除国讎，暮思除国讎。计尽山河画，意穷草木筹。

智士日千虑，愚夫唯四愁。何必在波涛，然后惊沉浮。
伯伦心不醉，四皓迹难留。出处各有时，众议徒啾啾。

卷 373_14【路病】

孟郊

病客无主人，艰哉求卧难。飞光赤道路，内火焦肺肝。
欲饮井泉竭，欲医囊用单。稚颜能几日，壮志忽已残。
人子不言苦，归书但云安。愁环在我肠，宛转终无端。

卷 373_15【衰松】

孟郊

近世交道衰，青松落颜色。人心忌孤直，木性随改易。
既摧栖日干，未展擎天力。终是君子材，还思君子识。

卷 373_16【遣兴】

孟郊

弦贞五条音，松直百尺心。贞弦含古风，直松凌高岑。
浮声与狂葩，胡为欲相侵。

卷 373_17【退居】

孟郊

退身何所食，败力不能闲。种稻耕白水，负薪斫青山。
众听喜巴唱，独醒愁楚颜。日暮静归时，幽幽扣松关。

卷 373_18【卧病】

孟郊

贫病诚可羞，故床无新裘。春色烧肌肤，时餐苦咽喉。
倦寝意蒙昧，强言声幽柔。承颜自俯仰，有泪不敢流。
默默寸心中，朝愁续暮愁。

卷 373_19【隐士】

孟郊

本末一相返，漂浮不还真。山野多馁士，市井无饥人。
虎豹忌当道，麋鹿知藏身。奈何贪竞者，日与患害亲。

颜貌岁岁改，利心朝朝新。孰知富生祸，取富不取贫。
宝玉忌出璞，出璞先为尘。松柏忌出山，出山先为薪。

君子隐石壁，道书为我邻。寝兴思其义，澹泊味始真。
陶公自放归，尚平去有依。草木择地生，禽鸟顺性飞。
青青与冥冥，所保各不违。

卷 373_20 【独愁】

孟郊

前日远别离，昨日生白发。欲知万里情，晓卧半床月。
常恐百虫鸣，使我芳草歇。

卷 373_21 【春日有感】

孟郊

雨滴草芽出，一日长一日。风吹柳线垂，一枝连一枝。
独有愁人颜，经春如等闲。且持酒满杯，狂歌狂笑来。

卷 373_22 【将见故人】

孟郊

故人季夏中，及此百馀日。无日不相思，明镜改形色。
宁知仲冬时，忽有相逢期。振衣起踯躅，赭鲤跃天池。

卷 373_23 【伤时】

孟郊

常闻贫贱士之常，嗟尔富者莫相笑。男儿得路即荣名，
邂逅失途成不调。古人结交而重义，今人结交而重利。
劝人一种种桃李，种亦直须遍天地。一生不爱嘱人事，
嘱即直须为生死。我亦不羡季伦富，我亦不笑原宪贫。
有财有势即相识，无财无势同路人。因知世事皆如此，
却向东溪卧白云。

卷 373_24 【寓言】

孟郊

谁言碧山曲，不废青松直。谁言浊水泥，不污明月色。
我有松月心，俗骋风霜力。贞明既如此，摧折安可得。

卷 373_25 【偶作】

孟郊

利剑不可近，美人不可亲。利剑近伤手，美人近伤身。
道险不在广，十步能摧轮。情爱不在多，一夕能伤神。

卷 373_26 【劝学】

孟郊

击石乃有火，不击元无烟。人学始知道，不学非自然。
万事须己运，他得非我贤。青春须早为，岂能长少年。

卷 373_27 【赠农人】

孟郊

劝尔勤耕田，盈尔仓中粟。劝尔伐桑株，减尔身上服。
清霜一委地，万草色不绿。狂飙一入林，万叶不著木。
青春如不耕，何以自结束。

卷 373_28 【长安早春】

孟郊

旭日朱楼光，东风不惊尘。公子醉未起，美人争探春。
探春不为桑，探春不为麦。日日出西园，只望花柳色。
乃知田家春，不入五侯宅。

卷 373_29 【罪松】

孟郊

虽为青松姿，霜风何所宜。二月天下树，绿于青松枝。
勿谓贤者喻，勿谓愚者规。伊吕代封爵，夷齐终身饥。
彼曲既在斯，我正实在兹。泾流合渭流，清浊各自持。
天令设四时，荣衰有常期。荣合随时荣，衰合随时衰。
天令既不从，甚不敬天时。松乃不臣木，青青独何为。

卷 373_30 【感兴】

孟郊

拔心草不死，去根柳亦荣。独有失意人，恍然无力行。
昔为连理枝，今为断弦声。连理时所重，断弦今所轻。
吾欲进孤舟，三峡水不平。吾欲载车马，太行路峥嵘。
万物根一气，如何互相倾。

卷 373_31 【感怀】

孟郊

秋气悲万物，惊风振长道。登高有所思，寒雨伤百草。
平生有亲爱，零落不相保。五情今已伤，安得自能老。

晨登洛阳坂，目极天茫茫。群物归大化，六龙颓西荒。
豺狼日已多，草木日已霜。饥年无遗粟，众鸟去空场。
路傍谁家子，白首离故乡。含酸望松柏，仰面诉穹苍。
去去勿复道，苦饥形貌伤。

徘徊不能寐，耿耿含酸辛。中夜登高楼，忆我旧星辰。
四时互迁移，万物何时春。唯忆首阳路，永谢当时人。
长安佳丽地，宫月生蛾眉。阴气凝万里，坐看芳草衰。

玉堂有玄鸟，亦以从此辞。伤哉志士叹，故国多迟迟。
深宫岂无乐，扰扰复何为。朝见名与利，莫还生是非。
姜牙佐周武，世业永巍巍。

举才天道亲，首阳谁采薇。去去荒泽远，落日当西归。
羲和驻其轮，四海借馀晖。极目何萧索，惊风正离披。
鸱鸢鸣高树，众鸟相因依。东方有一士，岁暮常苦饥。

主人数相问，脉脉今何为。贫贱亦有乐，且愿掩柴扉。
火云流素月，三五何明明。光曜侵白日，贤愚迷至精。
四时更变化，天道有亏盈。常恐今已没，须臾还复生。

河梁暮相遇，草草不复言。汉家正离乱，王粲别荆蛮。
野泽何萧条，悲风振空山。举头是星辰，念我何时还。
亲爱久别散，形神各离迁。未为生死诀，长在心目间。
有鸟东西来，哀鸣过我前。愿飞浮云外，饮啄见青天。

卷 373_32 【达士】

孟郊

四时如逝水，百川皆东波。青春去不还，白发镊更多。
达人识元化，变愁为高歌。倾产取一醉，富者奈贫何。
君看土中宅，富贵无偏颇。

卷 373_33 【暮秋感思】

孟郊

西风吹垂杨，条条脆如藕。上有噪日蝉，催人成皓首。
亦恐旅步难，何独朱颜丑。欲慰一时心，莫如千日酒。

优哉遵渚鸿，自得养身旨。不啄太仓粟，不饮方塘水。
振羽戛浮云，置罗任徒尔。

卷 373_34 【古兴】

孟郊

楚血未干衣，荆虹尚埋辉。痛玉不痛身，抱璞求所归。

卷 373_35 【劝友】

孟郊

至白涅不缁，至交淡不疑。人生静躁殊，莫厌相箴规。
胶漆武可接，金兰文可思。堪嗟无心人，不如松柏枝。

卷 373_36 【夷门雪赠主人】

孟郊

夷门贫士空吟雪，夷门豪士皆饮酒。酒声欢闲入雪销，
雪声激切悲枯朽。悲欢不同归去来，万里春风动江柳。

卷 373_37 【尧歌】

孟郊

尔室何不安，尔孝无与齐。一言应对姑，一度为出妻。
往辙才晚钟，还辙及晨鸡。往还迹徒新，很戾竟独迷。
娥女无礼数，污家如粪泥。父母吞声哭，禽鸟亦为啼。
如何天与恶，不得和鸣栖。
山色挽心肝，将归尽日看。村肩篮舆子，野坐白发官。
莺弄方短短，花明碎攒攒。琉璃堆可掬，琴瑟饶多欢。
翠韵仙窈窕，岚漪出无端。养馆洞庭秋，响答虚吹弹。

卷三百七十四

卷 374_1 【乱离】

孟郊

天下无义剑，中原多疮痍。哀哀陆大夫，正直神反欺。
子路已成血，嵇康今尚嗤。为君每一恸，如剑在四肢。
折羽不复飞，逝水不复归。直松摧高柯，弱蔓将何依。
朝为春日欢，夕为秋日悲。泪下无尺寸，纷纷天雨丝。
积怨成疾疹，积恨成狂痴。怨草岂有边，恨水岂有涯。
怨恨驰我心，茫茫日何之。

卷 374_2 【劝酒】

孟郊

白日无定影，清江无定波。人无百年寿，百年复如何。
堂上陈美酒，堂下列清歌。劝君金曲卮，勿谓朱颜酡。
松柏岁岁茂，丘陵日日多。君看终南山，千古青峨峨。

卷 374_3 【去妇】

孟郊

君心匣中镜，一破不复全。妾心藕中丝，虽断犹牵连。
安知御轮士，今日翻回辕。一女事一夫，安可再移天。
君听去鹤言，哀哀七丝弦。

卷 374_4 【君子勿郁郁士有谤毁者作诗以赠之】

孟郊

君子勿郁郁，听我青蝇歌。人间少平地，森耸山岳多。
折鞘不在道，覆舟不在河。须知一尺水，日夜增高波。
叔孙毁仲尼，臧仓掩孟轲。兰艾不同香，自然难为和。
良玉烧不热，直竹文不颇。自古皆如此，其如道在何。
日往复不见，秋堂暮仍学。玄发不知白，晓入寒铜觉。
为林未离树，有玉犹在璞。谁把碧梧枝，刻作云门乐。

卷 374_5 【闻砧】

孟郊

杜鹃声不哀，断猿啼不切。月下谁家砧，一声肠一绝。

杵声不为客，客闻发白。杵声不为衣，欲令游子归。

卷 374_6【游子】

孟郊

萱草生堂阶，游子行天涯。慈亲倚堂门，不见萱草花。

卷 374_7【自叹】

孟郊

愁与发相形，一愁白数茎。有发能几多，禁愁日日生。
古若不置兵，天下无战争。古若不置名，道路无欹倾。
太行耸巍峨，是天产不平。黄河奔浊浪，是天生不清。
四蹄日日多，双轮日日成。二物不在天，安能免营营。

卷 374_8【求友】

孟郊

北风临大海，坚冰临河面。下有大波澜，对之无由见。
求友须在良，得良终相善。求友若非良，非良中道变。
欲知求友心，先把黄金炼。

卷 374_9【投所知】

孟郊

苦心知苦节，不容一毛发。炼金索坚贞，洗玉求明洁。
自惭所业微，功用如鸠拙。何殊嫫母颜，对彼寒塘月。

君存古人心，道出古人辙。尽美固可扬，片善亦不遏。
朝向公卿说，暮向公卿说。谁谓黄钟管，化为君子舌。

一说清嶰竹，二说变嶰谷。三说四说时，寒花拆寒木。
晔晔家道路，灿灿我衣服。岂直辉友朋，亦用慰骨肉。

一暖荷匹素，一饱荷升粟。而况大恩恩，此身报得足。
且将食檠芳，酬之作金刀。

卷 374_10【病客吟】

孟郊

主人夜呻吟，皆入妻子心。客子昼呻吟，徒为虫鸟音。
妻子手中病，愁思不复深。僮仆手中病，忧危独难任。

丈夫久漂泊，神气自然沉。况于滞疾中，何人免嘘]。
大海亦有涯，高山亦有岑。沉忧独无极，尘泪互盈襟。

卷 374_11【感怀】

孟郊

孟冬阴气交，两河正屯兵。烟尘相驰突，烽火日夜惊。
太行险阻高，挽粟输连营。奈何操弧者，不使泉巢倾。
犹闻汉北儿，怙乱谋纵横。擅摇干戈柄，呼叫豺狼声。
白日临尔躯，胡为丧丹诚。岂无感激士，以致天下平。
登高望寒原，黄云郁峥嵘。坐驰悲风暮，叹息空沾纓。

卷 374_12【离思】

孟郊

不寐亦不语，片月秋稍举。孤鸿忆霜群，独鹤叫云侣。
怨彼浮花心，飘飘无定所。高张系絳帆，远过梅根渚。
回织别离字，机声有酸楚。

卷 374_13【结交】

孟郊

铸镜须青铜，青铜易磨拭。结交远小人，小人难姑息。
铸镜图鉴微，结交图相依。凡铜不可照，小人多是非。

卷 374_14【伤春】

孟郊

两河春草海水清，十年征战城郭腥。乱兵杀儿将女去，
二月三月花冥冥。千里无人旋风起，莺啼燕语荒城里。

春色不拣墓傍株，红颜皓色逐春去。春去春来那得知，
今人看花古人墓，令人惆怅山头路。

卷 374_15【择友】

孟郊

兽中有人性，形异遭人隔。人中有兽心，几人能真识。
古人形似兽，皆有大圣德。今人表似人，兽心安可测。

虽笑未必和，虽哭未必戚。面结口头交，肚里生荆棘。
好人常直道，不顺世间逆。恶人巧谄多，非义苟且得。

若是效真人，坚心如铁石。不谄亦不欺，不奢复不溺。
面无吝啬容，心无诈忧惕。君子大道人，朝夕恒的的。

卷 374_16 【夜忧】

孟郊

岂独科斗死，所嗟文字捐。蒿蔓转骄弄，菱荇减婵娟。
未遂摆鳞志，空思吹浪旋。何当再霖雨，洗濯生华鲜。

卷 374_17 【惜苦】

孟郊

于鹄值谏议，以球不能官。焦蒙值舍人，以杯不得完。
可惜大雅旨，意此小团栾。名回不敢辨，心转实是难。
不惜为君转，转非君子观。转之复转之，强转谁能欢。
哀哉虚转言，不可穷波澜。

卷 374_18 【寒地百姓吟】

孟郊

无火炙地眠，半夜皆立号。冷箭何处来，棘针风骚劳。
霜吹破四壁，苦痛不可逃。高堂搥钟饮，到晓闻烹炮。
寒者愿为蛾，烧死彼华膏。华膏隔仙罗，虚绕千万遭。
到头落地死，踏地为游遨。游遨者是谁，君子为郁陶。

卷 374_19【出东门】

孟郊

饿马骨亦耸，独驱出东门。少年一日程，衰叟十日奔。
寒景不我为，疾走落平原。眇默荒草行，恐惧夜魄翻。
一生自组织，千首大雅言。道路如抽蚕，宛转羁肠繁。

卷 374_20【教坊歌儿】

孟郊

十岁小小儿，能歌得朝天。六十孤老人，能诗独临川。
去年西京寺，众伶集讲筵。能嘶竹枝词，供养绳床禅。
能诗不如歌，怅望三百篇。

卷 374_21【访疾】

孟郊

冷气入疮痛，夜来痛如何。疮从公怒生，岂以私恨多。
公怒亦非道，怒消乃天和。古有焕辉句，嵇康闲婆娑。
请君吟啸之，正气庶不讹。

卷 374_22 【酒德】

孟郊

酒是古明镜，辗开小人心。醉见异举止，醉闻异声音。
酒功如此多，酒屈亦以深。罪人免罪酒，如此可为箴。

卷 374_23 【冬日】

孟郊

老人行人事，百一不及周。冻马四蹄吃，陟卓难自收。
短景仄飞过，午光不上头。少壮日与辉，衰老日与愁。
日愁疑在日，岁箭迸如雠。万事有何味，一生虚自囚。
不知文字利，到死空遨游。

卷 374_24 【饥雪吟】

孟郊

饥乌夜相啄，疮声互悲鸣。冰肠一直刀，天杀无曲情。
大雪压梧桐，折柴堕峥嵘。安知鸾凤巢，不与枭鸱倾。
下有幸灾儿，拾遗多新争。但求彼失所，但夸此经营。
君子亦拾遗，拾遗非拾名。将补鸾凤巢，免与枭鸱并。

因为饥雪吟，至晓竟不平。

卷 374_25 【偷诗】

孟郊

饿犬齧枯骨，自吃馋饥涎。今文与古文，各各称可怜。
亦如婴儿食，饧桃口旋旋。唯有一点味，岂见逃景延。
绳床独坐翁，默览有所传。终当罢文字，别著逍遥篇。
从来文字净，君子不以贤。

卷 374_26 【晚雪吟】

孟郊

贫富喜雪晴，出门意皆饶。镜海见纤悉，冰天步飘飘。
一一仙子行，家家尘声销。小儿击玉指，大耋歌圣朝。
睿气流不尽，瑞仙何寥寥。始知望幸色，终疑异礼招。
市井亦清洁，闾阎耸岩峩。苍生愿东顾，翠华仍西遥。
天念岂薄厚，宸衷多忧焦。忧焦致太平，以兹时比尧。
古耳有未通，新词有潜韶。甘为酒伶宾，坐耻歌女娇。
选音不易言，裁正逢今朝。今朝前古文，律异同一调。
愿于尧琤中，奏尽郁抑谣。

卷 374_27 【自惜】

孟郊

倾尽眼中力，抄诗过与人。自悲风雅老，恐被巴竹嗔。
零落雪文字，分明镜精神。坐甘冰抱晚，永谢酒怀春。
徒有言言旧，惭无默默新。始惊儒教误，渐与佛乘亲。

卷 374_28 【老恨】

孟郊

无子抄文字，老吟多飘零。有时吐向床，枕席不解听。
斗蚁甚微细，病闻亦清冷。小大不自识，自然天性灵。

卷 374_29 【湖州取解述情】

孟郊

霁水徒清深，照影不照心。白鹤未轻举，众鸟争浮沉。
因兹挂帆去，遂作归山吟。

卷 374_30 【落第】

孟郊

晓月难为光，愁人难为肠。谁言春物荣，独见叶上霜。
雕鹗失势病，鸱鹯假翼翔。弃置复弃置，情如刀剑伤。

卷 374_31 【咏怀】

孟郊

浊水心易倾，明波兴初发。思逢海底人，乞取蚌中月。
此兴若未谐，此心终不歇。

卷 374_32 【病起言怀】

孟郊

强行寻溪水，洗却残病姿。花景晚晚尽，麦风清冷吹。
交道贱来见，世情贫去知。高闲思楚逸，澹泊厌齐儿。
终伴碧山侣，结言青桂枝。

卷 374_33 【秋夕贫居述怀】

孟郊

卧冷无远梦，听秋酸别情。高枝低枝风，千叶万叶声。

浅井不供饮，瘦田长废耕。今交非古交，贫语闻皆轻。

卷 374_34 【夜感自遣】

孟郊

夜学晓未休，苦吟神鬼愁。如何不自闲，心与身为雠。

死辱片时痛，生辱长年羞。清桂无直枝，碧江思旧游。

卷 374_35 【再下第】

孟郊

一夕九起嗟，梦短不到家。两度长安陌，空将泪见花。

卷 374_36 【下第东归留别长安知己】

孟郊

共照日月影，独为愁思人。岂知鷓鴣鸣，瑶草不得春。
一片两片云，千里万里身。云归嵩之阳，身寄江之滨。
弃置复何道，楚情吟白蘋。

卷 374_37 【失意归吴因寄东台刘复侍御】

孟郊

自念西上身，忽随东归风。长安日下影，又落江湖中。
离娄岂不明，子野岂不聪。至宝非眼别，至音非耳通。
因缄俗外词，仰寄高天鸿。

卷 374_38 【下第东南行】

孟郊

越风东南清，楚日潇湘明。试逐伯鸾去，还作灵均行。
江蓠伴我泣，海月投人惊。失意容貌改，畏途性命轻。
时闻丧侣猿，一叫千愁并。

卷 374_39【叹命】

孟郊

三十年来命，唯藏一卦中。题诗还问易，问易蒙复蒙。
本望文字达，今因文字穷。影孤别离月，衣破道路风。
归去不自息，耕耘成楚农。

卷 374_40【远游】

孟郊

慈乌不远飞，孝子念先归。而我独何事，四时心有违。
江海恋空积，波涛信来稀。长为路傍食，著尽家中衣。
别剑不割物，离人难作威。远行少僮仆，驱使无是非。
为性玩好尽，积愁心绪微。始知时节驶，夏日非长辉。

卷 374_41【商州客舍】

孟郊

商山风雪壮，游子衣裳单。四望失道路，百忧攒肺肝。
日短觉易老，夜长知至寒。泪流潇湘弦，调苦屈宋弹。
识声今所易，识意古所难。声意今讵辨，高明鉴其端。

卷 374_42 【长安旅情】

孟郊

尽说青云路，有足皆可至。我马亦四蹄，出门似无地。

玉京十二楼，峨峨倚青翠。下有千朱门，何门荐孤士。

卷 374_43 【长安羁旅】

孟郊

听乐别离中，声声入幽肠。晓泪滴楚瑟，夜魄绕吴乡。

几回羁旅情，梦觉残烛光。

卷 374_44 【渭上思归】

孟郊

独访千里信，回临千里河。家在吴楚乡，泪寄东南波。

卷 374_45【登科后】

孟郊

昔日龌龊不足夸，今朝放荡思无涯。
春风得意马蹄疾，一日看尽长安花。

卷 374_46【初于洛中选】

孟郊

尘土日易没，驱驰力无馀。青云不我与，白首方选书。
宦途事非远，拙者取自疏。终然恋皇邑，誓以结吾庐。
帝城富高门，京路绕胜居。碧水走龙蛇，蜿蜒绕庭除。
寻常异方客，过此亦踟蹰。

卷 374_47【乙酉岁舍弟扶侍归兴义庄居后独止舍待替人】

孟郊

谁言旧居止，主人忽成客。僮仆强与言，相惧终脉脉。
出亦何所求，入亦何所索。饮食迷精粗，衣裳失宽窄。
回风卷闲簾，新月生空壁。士有百役身，官无一姓宅。
丈夫耻自饰，衰须从飒白。兰交早已谢，榆景徒相迫。

惟予心中镜，不语光历历。

卷 374_48【西斋养病夜怀多感因呈上从叔子云】

孟郊

远客夜衣薄，厌眠待鸡鸣。一床空月色，四壁秋蛩声。

守淡遗众俗，养痾念馀生。方全君子拙，耻学小人明。

蚊蚋亦有时，羽毛各有成。如何骐驎迹，踖踖未能行。

西北有平路，运来无相轻。

卷三百七十五

卷 375_1【秋怀】

孟郊

孤骨夜难卧，吟虫相唧唧。老泣无涕洟，秋露为滴沥。
去壮暂如翦，来衰纷似织。触绪无新心，丛悲有馀忆。
讵忍逐南帆，江山践往昔。

秋月颜色冰，老客志气单。冷露滴梦破，峭风梳骨寒。
席上印病文，肠中转愁盘。疑怀无所凭，虚听多无端。
梧桐枯峥嵘，声响如哀弹。

一尺月透户，仞粟如剑飞。老骨坐亦惊，病力所尚微。
虫苦贪剪色，鸟危巢焚辉。孀娥理故丝，孤哭抽余思。
浮年不可追，衰步多夕归。

秋至老更贫，破屋无门扉。一片月落床，四壁风入衣。
疏梦不复远，弱心良易归。商葩将去绿，缭绕争馀辉。
野步踏事少，病谋向物违。幽幽草根虫，生意与我微。

竹风相戛语，幽闺暗中闻。鬼神满衰听，恍惚难自分。
商叶堕干雨，秋衣卧单云。病骨可剸物，酸呻亦成文。
瘦攒如此枯，壮落随西曛。褰褰一线命，徒言系网缁。

老骨惧秋月，秋月刀剑棱。纤辉不可干，冷魂坐自凝。
羈雌巢空镜，仙飙荡浮冰。惊步恐自翻，病大不敢凌。
单床寤皎皎，瘦卧心兢兢。洗河不见水，透浊为清澄。
诗壮昔空说，诗衰今何凭。

老病多异虑，朝夕非一心。商虫哭衰运，繁响不可寻。
秋草瘦如发，贞芳缀疏金。晚鲜讵几时，驰景还易阴。
弱习徒自耻，莫知欲何任。露才一见谗，潜智早已深。
防深不防露，此意古所箴。

岁暮景气干，秋风兵甲声。织织劳无衣，嘒嘒徒自鸣。
商声耸中夜，蹇支废前行。青发如秋园，一剪不复生。
少年如饿花，瞥见不复明。君子山岳定，小人丝毫争。
多争多无寿，天道戒其盈。

冷露多瘁索，枯风晓吹嘘。秋深月清苦，虫老声粗疏。
赧珠枝累累，芳金蔓舒舒。草木亦趣时，寒荣似春馀。
悲彼零落生，与我心何如。

老人朝夕异，生死每日中。坐随一啜安，卧与万景空。
视短不到门，听涩讵逐风。还如刻削形，免有纤悉聪。
浪浪谢初始，皎皎幸归终。孤隔文章友，亲密蒿莱翁。
岁绿闵以黄，秋节进又穷。四时既相迫，万虑自然丛。

南逸浩淼际，北贫硤确中。曩怀沉遥江，衰思结秋嵩。
锄食难满腹，叶衣多丑躬。尘缕不自整，古吟将谁通。
幽竹啸鬼神，楚铁生虬龙。志士多异感，运郁由邪衷。
常思书破衣，至死教初童。习乐莫习声，习声多顽聾。
明明胸中言，愿写为高崇。

幽苦日日甚，老力步步微。常恐暂下床，至门不复归。
饥者重一食，寒者重一衣。泛广岂无涖，恣行亦有随。
语中失次第，身外生疮痍。桂蠹既潜朽，桂花损贞姿。
詈言一失香，千古闻臭词。将死始前悔，前悔不可追。
哀哉轻薄行，终日与驷驰。

流运闪欲尽，枯折皆相号。棘枝风哭酸，桐叶霜颜高。
老虫干铁鸣，惊兽孤玉咆。商气洗声瘦，晚阴驱景劳。
集耳不可遏，噫神不可逃。蹇行散馀郁，幽坐谁与曹。
拙壮无一线，剪怀盈千刀。清诗既名朏，金菊亦姓陶。
收拾昔所弃，咨嗟今比毛。幽幽岁晏言，零落不可操。

霜气入病骨，老人身生冰。衰毛暗相刺，冷痛不可胜。
鸛鸛伸至明，强强揽所凭。瘦坐形欲折，腹饥心将崩。
劝药左右愚，言语如见憎。耸耳噫神开，始知功用能。
日中视余疮，暗隙闻绳蝇。彼嗅一何酷，此味半点凝。
潜毒尔无厌，馀生我堪矜。冻飞幸不远，冬令反心惩。
出没各有时，寒热苦相凌。仰谢调运翁，请命愿有征。

黄河倒上天，众水有却来。人心不及水，一直去不回。
一直亦有巧，不肯至蓬莱。一直不知疲，唯闻至省台。

忍古不失古，失古志易摧。失古剑亦折，失古琴亦哀。
夫子失古泪，当时落淮淮。诗老失古心，至今寒皑皑。
古骨无浊肉，古衣如薜苔。劝君勉忍古，忍古销尘埃。

詈言不见血，杀人何纷纷。声如穷家犬，吠窦何閤閤。
詈痛幽鬼哭，詈侵黄金贫。言词岂用多，憔悴在一闻。
古詈舌不死，至今书云云。今人咏古书，善恶宜自分。
秦火不爇舌，秦火空爇文。所以詈更生，至今横綱缙。

卷 375_2【靖安寄居】

孟郊

寄静不寄华，爱兹嵒岨居。渴饮浊清泉，饥食无名蔬。
败菜不敢火，补衣亦写书。古云俭成德，今乃实起予。
戇叟戇不足，贤人贤有馀。役生皆促促，心竟谁舒舒。

万马踏风衢，众尘随奔车。高宾尽不见，大道夜方虚。
卧有洞庭梦，坐无长安储。英髦空骇耳，烟火独微如。
厚念恐伤性，薄田忆亲锄。承世不出力，冬竹肯抽菰。
外物莫相诱，约心誓从初。碧芳既似水，日日咏归欤。

卷 375_3 【雪】

孟郊

忽然太行雪，昨夜飞入来。峻嶒堕庭中，严白何皑皑。
奴婢晓开户，四肢冻徘徊。咽言词不成，告诉情状摧。
官给未入门，家人尽以灰。意劝莫笑雪，笑雪贫为灾。

将暖此残疾，典卖争致杯。教令再举手，夸曜馀生才。
强起吐巧词，委曲多新裁。为尔作非夫，忍耻轰喝雷。
书之与君子，庶免生嫌猜。

卷 375_4 【春愁】

孟郊

春物与愁客，遇时各有违。故花辞新枝，新泪落故衣。
日暮两寂寞，飘然亦同归。

卷 375_5 【懊恼】

孟郊

恶诗皆得官，好诗空抱山。抱山冷飐飐，终日悲颜颜。

好诗更相嫉，剑戟生牙关。前贤死已久，犹在咀嚼间。
以我残杪身，清峭养高闲。求闲未得闲，众谤瞋C C。

卷 375_6 【游城南韩氏庄】

孟郊

初疑潇湘水，锁在朱门中。时见水底月，动摇池上风。
清气润竹林，白光连虚空。浪簇霄汉羽，岸芳金碧丛。
何言数亩间，环泛路不穷。愿逐神仙侣，飘然汗漫通。

卷 375_7 【与二三友秋宵会话清上人院】

孟郊

何处山不幽，此中情又别。一僧敲一磬，七子吟秋月。
激石泉韵清，寄枝风啸咽。泠然诸境静，顿觉浮累灭。
扣寂兼探真，通宵讵能辍。

好鸟无杂栖，华堂有嘉携。琴樽互倾奏，歌赋相和谐。
但嘉鱼水合，莫令云雨乖。一为鸛鸡弹，再鼓壮士怀。
初景待谁晓，新春逐君来。愿言良友会，高驾不知回。

卷 375_8 【招文士饮】

孟郊

曹刘不免死，谁敢负年华。文士莫辞酒，诗人命属花。
退之如放逐，李白自矜夸。万古忽将似，一朝同叹嗟。
何言天道正，独使地形斜。南士愁多病，北人悲去家。
梅芳已流管，柳色未藏鸦。相劝罢吟雪，相从愁饮霞。
醒时不可过，愁海浩无涯。

卷 375_9 【陪侍御叔游城南山墅】

孟郊

夜坐拥肿亭，昼登崔巍岑。日窥万峰首，月见双泉心。
松气清耳目，竹氛碧衣襟。伫想琅玕字，数听枯槁吟。

卷 375_10 【登华岩寺楼望终南山赠林校书兄弟】

孟郊

地脊亚为崖，耸出冥冥中。楼根插迥云，殿翼翔危空。
前山胎元气，灵异生不穷。势吞万象高，秀夺五岳雄。
一望俗虑醒，再登仙愿崇。青莲三居士，昼景真赏同。

卷 375_11【游终南山】

孟郊

南山塞天地，日月石上生。高峰夜留景，深谷昼未明。
山中人自正，路险心亦平。长风驱松柏，声拂万壑清。
到此悔读书，朝朝近浮名。

卷 375_12【游终南龙池寺】

孟郊

飞鸟不到处，僧房终南巅。龙在水长碧，雨开山更鲜。
步出白日上，坐依清溪边。地寒松桂短，石险道路偏。
晚磬送归客，数声落遥天。

卷 375_13【南阳公请东樱桃亭子春宴】

孟郊

万木皆未秀，一林先含春。此地独何力，我公布深仁。
霜叶日舒卷，风枝远埃尘。初英濯紫霞，飞雨流清津。
赏异出嚣杂，折芳积欢忻。文心兹焉重，俗尚安能珍。
碧玉妆粉比，飞琼秾艳均。鸳鸯七十二，花态并相新。

常恐遗秀志，迨兹广宴陈。芳菲争胜引，歌咏竟良辰。
方知戏马会，永谢登龙宾。

卷 375_14 【游华山云台观】

孟郊

华岳独灵异，草木恒新鲜。山尽五色石，水无一色泉。
仙酒不醉人，仙芝皆延年。夜闻明星馆，时韵女萝弦。
敬兹不能寐，焚柏吟道篇。

卷 375_15 【喜与长文上人宿李秀才小山池亭】

孟郊

灯尽语不尽，主人庭砌幽。柳枝星影曙，兰叶露华浮。
块岭笑群岫，片池轻众流。更闻清净子，逸唱颇难俦。

卷 375_16 【邀花伴】

孟郊

边地春不足，十里见一花。及时须遨游，日暮饶风沙。

卷 375_17【石淙】

孟郊

岩谷不自胜，水木幽奇多。朔风入空曲，泾流无大波。
迢递径难尽，参差势相罗。雪霜有时洗，尘土无由和。
洁冷诚未厌，晚步将如何。

出曲水未断，入山深更重。泠泠若仙语，皎皎多异容。
万响不相杂，四时皆有浓。日月互分照，云霞各生峰。
久迷向方理，逮兹耸前踪。

荒策每恣远，戆步难自回。已抱苔藓疾，尚凌潺湲隈。
驿骥苦衔勒，笼禽恨摧颓。实力苟未足，浮夸信悠哉。
顾惟非时用，静言还自咍。

朔水刀剑利，秋石琼瑶鲜。鱼龙气不腥，潭洞状更妍。
磴雪入呀谷，掬星洒遥天。声忙不及韵，势疾多断涟。
输去虽有恨，躁气一何颠。蜿蜒相缠掣，荦确亦回旋。
黑草濯铁发，白苔浮冰钱。具生此云遥，非德不可甄。
何况被犀士，制之空以权。始知静刚猛，文教从来先。

空谷耸视听，幽湍泽心灵。疾流脱鳞甲，叠岸冲风霆。
丹巘堕环景，霁波灼虚形。淙淙逐厚轴，棱棱攒高冥。
弱栈跨旋碧，危梯倚凝青。飘飘鹤骨仙，飞动鳌背庭。
常闻夸大言，下顾皆细萍。

百尺明镜流，千曲寒星飞。为君洗故物，有色如新衣。
不饮泥土污，但饮雪霜饥。石棱玉纤纤，草色琼霏霏。
谷磴有馀力，溪舂亦多机。从来一智萌，能使众利归。
因之山水中，喧然论是非。

入深得奇趣，升险为良跻。搜胜有闻见，逃俗无踪蹊。
穴流恣回转，窍景忘东西。麋兽鲜猜惧，罗人巧置罍。
幽驰异处所，忍虑多端倪。虚获我何饱，实归彼非迷。
斯文浪云洁，此旨谁得齐。

屑珠泻潺湲，裂玉何威瑰。若调千瑟弦，未果一曲谐。
古骇毛发栗，险惊视听乖。二老皆劲骨，风趋缘欹崖。
地远有馀美，我游采弃怀。乘时幸勤鉴，前恨多幽霾。
弱力谢刚健，蹇策贵安排。始知随事静，何必当夕斋。

昔浮南渡飙，今攀朔山景。物色多瘦削，吟笑还孤永。
日月冻有棱，雪霜空无影。玉喷不生冰，瑶涡旋成井。
潜角时耸光，隐鳞乍漂罔。再吟获新胜，返步失前省。
愜怀虽已多，惕虑未能整。颓阳落何处，升魄衔疏岭。

圣朝搜岩谷，此地多遗玩。怠惰成远游，顽疏恣灵观。
劲飙刷幽视，怒水慑馀懦。曾是结芳诚，远兹勉流倦。
冰条耸危虑，霜翠莹遐眊。物诱信多端，荒寻谅难遍。
去矣朔之隅，邈然楚之甸。

卷 375_18【游韦七洞庭别业】

孟郊

洞庭如潇湘，叠翠荡浮碧。松桂无赤日，风物饶清激。
逍遥展幽韵，参差逗良觌。道胜不知疲，冥搜自无斲。
旷然青霞抱，永矣白云适。崆峒非凡乡，蓬瀛在仙籍。

无言从远尚，还思君子识。波涛漱古岸，铿锵辨奇石。
灵响非外求，殊音自中积。人皆走烦浊，君能致虚寂。
何以祛扰扰，叩调清淅淅。既惧豪华损，誓从诗书益。

一举独往姿，再摇飞遁迹。山深有变异，意惬无惊惕。
采翠夺日月，照耀迷昼夕。松斋何用扫，萝院自然涤。
业峻谢烦芜，文高追古昔。暂遥朱门恋，终立青史绩。
物表易淹留，人间重离析。难随洞庭酌，且醉横塘席。

卷 375_19【越中山水】

孟郊

日觉耳目胜，我来山水州。蓬瀛若仿佛，田野如泛浮。
碧嶂几千绕，清泉万馀流。莫穷合沓步，孰尽派别游。
越水净难污，越天阴易收。气鲜无隐物，目视远更周。
举俗媚葱蒨，连冬擷芳柔。菱湖有馀翠，茗圃无荒畴。

赏异忽已远，探奇诚淹留。永言终南色，去矣销人忧。

卷 375_20【春集越州皇甫秀才山亭】

孟郊

嘉宾在何处，置亭春山巅。顾余寂寞者，谬厕芳菲筵。
视听日澄澈，声光坐连绵。晴湖泻峰嶂，翠浪多萍蘩。
何以逞高志，为君吟秋天。

卷 375_21【和皇甫判官游琅琊溪】

孟郊

山中琉璃境，物外琅琊溪。房廊逐岩壑，道路随高低。
碧濂漱白石，翠烟含青蜺。客来暂游践，意欲忘簪珪。
树杪灯火夕，云端钟梵齐。时同虽可仰，迹异难相携。
唯当清宵梦，仿佛愿攀跻。

卷三百七十六

卷 376_1【汝州南潭陪陆中丞公宴】

孟郊

一雨百泉涨，南潭夜来深。分明碧沙底，写出青天心。
远客洞庭至，因兹涤烦襟。既登飞云舫，愿奏清风琴。
高岸立旗戟，潜蛟失浮沉。威棱护斯浸，魍魉逃所侵。
山态变初霁，水声流新音。耳目极眺听，潺湲与嶔岑。
谁言柳太守，空有白蘋吟。

卷 376_2【汝州陆中丞席喜张从事至同赋十韵】

孟郊

汝水无浊波，汝山饶奇石。大贤为此郡，佳士来如积。
有客乘白驹，奉义惬所适。清风荡华馆，雅瑟泛瑶席。
芳醕静无喧，金尊光有涤。纵情孰虑损，听论自招益。
愿折若木枝，却彼曜灵夕。贵贱一相接，忧惊忽转易。
会合勿言轻，别离古来惜。请君驻征车，良遇难再觌。

卷 376_3 【夜集汝州郡斋听陆僧辩弹琴】

孟郊

康乐宠词客，清宵意无穷。征文北山外，借月南楼中。
千里愁并尽，一樽欢暂同。胡为戛楚琴，淅沥起寒风。

卷 376_4 【同年春燕】

孟郊

少年三十士，嘉会良在兹。高歌摇春风，醉舞摧花枝。
意荡晚晚景，喜凝芳菲时。马迹攒骖裹，乐声韵参差。

视听改旧趣，物象含新姿。红雨花上滴，绿烟柳际垂。
淹中讲精义，南皮献清词。前贤与今人，千载为同期。

明鉴有皎洁，澄玉无磷缁。永与沙泥别，各整云汉仪。
盛气自中积，英名日四驰。塞鸿绝俦匹，海月难等夷。

郁抑忽已尽，亲朋乐无涯。幽蘅发空曲，芳杜绵所思。
浮迹自聚散，壮心谁别离。愿保金石志，无令有夺移。

卷 376_5【罗氏花下奉招陈侍御】

孟郊

眼在枝上春，落地成埃尘。不是风流者，谁为攀折人。
宁辞波浪阔，莫道往来频。拾紫岂宜晚，掇芳须及晨。
劳收贾生泪，强起屈平身。花下本无俗，酒中别有神。
游蜂不饮故，戏蝶亦争新。万物尽如此，过时非所珍。

卷 376_6【游石龙涡】

孟郊

石龙不见形，石雨如散星。山下晴皎皎，山中阴泠泠。
水飞林木杪，珠缀莓苔屏。畜异物皆别，当晨景欲暝。
泉芳春气碧，松月寒色青。险力此独壮，猛兽亦不停。
日暮且回去，浮心恨未宁。

卷 376_7【浮石亭】

孟郊

曾是风雨力，崔巍漂来时。落星夜皎洁，近榜朝逶迤。
翠潋递明灭，清濑泻欹危。况逢蓬岛仙，会合良在兹。

卷 376_8 【看花】

孟郊

家家有芍药，不妨至温柔。温柔一同女，红笑笑不休。
月娥双双下，楚艳枝枝浮。洞里逢仙人，绰约青宵游。

芍药谁为媚，人人不敢来。唯应待诗老，日日殷勤开。
玉立无气力，春凝且裴徊。将何谢青春，痛饮一百杯。

芍药吹欲尽，无奈晓风何。余花欲谁待，唯待谏郎过。
谏郎不事俗，黄金买高歌。高歌夜更清，花意晚更多。

饮之不见底，醉倒深红波。红波荡谏心，谏心终无它。
独游终难醉，挈榼徒经过。问花不解语，劝得酒无多。

三年此村落，春色入心悲。料得一孀妇，经时独泪垂。

卷 376_9 【济源春】

孟郊

太行横偃脊，百里芳崔巍。济滨花异颜，枋口云如裁。
新画彩色湿，上界光影来。深红缕草木，浅碧珩溯洄。
千家门前饮，一道传楔杯。玉鳞吞金钩，仙璇琉璃开。

朴童茂言语，善俗无惊猜。狂吹寝恒宴，晓清梦先回。
治生鲜惰夫，积学多深材。再游讵癡慧，一洗惊尘埃。

卷 376_10【济源寒食】

孟郊

风巢袅袅春鸦鸦，无子老人仰面嗟。
柳弓苇箭觑不见，高红远绿劳相遮。

女婵童子黄短短，耳中闻人惜春晚。
逃蜂匿蝶踏地来，抛却斋糜一瓷碗。

一日踏春一百回，朝朝没脚走芳埃。
饥童饿马扫花喂，向晚饮溪三两杯。

莓苔井上空相忆，辘轳索断无消息。
酒人皆倚春发绿，病叟独藏秋发白。

长安落花飞上天，南风引至三殿前。
可怜春物亦朝谒，唯我孤吟渭水边。

枋口花间掣手归，嵩阳为我留红晖。
可怜踯躅千万尺，柱地柱天疑欲飞。

蜜蜂为主各磨牙，咬尽村中万木花。
君家瓮瓮今应满，五色冬笼甚可夸。

卷 376_11【游枋口】

孟郊

一步复一步，出行千里幽。为取山水意，故作寂寞游。
太行青巔高，枋口碧照浮。明明无底镜，泛泛忘机鸥。
老逸不自限，病狂不可周。恣闲饶淡薄，怠玩多淹留。

芳物竞畹晚，绿梢挂新柔。和友莺相绕，言语亦以稠。
始知万类然，静躁难相求。

耸我残病骨，健如一仙人。镜中照千里，镜浪洞百神。
此神日月华，不作寻常春。三十夜皆明，四时昼恒新。
鸟声尽依依，兽心亦忻忻。澄幽出所怪，闪异坐微絪。
可来复可来，此地灵相亲。

卷 376_12【与王二十一员外涯游枋口柳溪】

孟郊

万株古柳根，拏此磷磷溪。野榜多屈曲，仙谿无端倪。
春桃散红烟，寒竹含晚凄。晓听忽以异，芳树安能齐。

共疑落镜中，坐泛红景低。水意酒易醒，浪情事非迷。
小儒峭章句，大贤嘉提携。潜窦韵灵瑟，翠崖鸣玉珪。
主人稷卨翁，德茂芝朮畦。凿出幽隐端，气象皆升跻。

曾是清乐抱，逮兹几省溪。宴位席兰草，滥觞惊鳬鹭。
灵味荐鲂瓣，金花屑橙齏。江调摆衰俗，洛风远尘泥。
徒言奏狂狷，讵敢忘笏蹄。

卷 376_13【与王二十一员外涯游昭成寺】

孟郊

洛友寂寂约，省骑霏霏尘。游僧步晚磬，话茗含芳春。
瑶策冰入手，粉壁画莹神。赫廓芙蓉雾，碧殿琉璃匀。

玄讲岛岳尽，渊咏文字新。屡笑寒竹宴，况接青云宾。
顾惭馀眷下，衰瘵婴残身。

卷 376_14【嵩少】

孟郊

沙弥舞袈裟，走向蹏躅飞。闲步亦惺惺，芳援相依依。
噎塞春咽喉，蜂蝶事光辉。群嬉且已晚，孤引将何归。
流艳去不息，朝英亦疏微。

卷 376_15【旅次洛城东水亭】

孟郊

水竹色相洗，碧花动轩楹。自然逍遥风，荡涤浮竞情。
霜落叶声燥，景寒人语清。我来招隐亭，衣上尘暂轻。

卷 376_16【洛桥晚望】

孟郊

天津桥下冰初结，洛阳陌上人行绝。
榆柳萧疏楼阁闲，月明直见嵩山雪。

卷 376_17【北郭贫居】

孟郊

进乏广莫力，退为蒙笼居。三年失意归，四向相识疏。
地僻草木壮，荒条扶我庐。夜贫灯烛绝，明月照吾书。
欲识贞静操，秋蝉饮清虚。

卷 376_18【题陆鸿渐上饶新开山舍】

孟郊

惊彼武陵状，移归此岩边。开亭拟贮云，凿石先得泉。
啸竹引清吹，吟花成新篇。乃知高洁情，摆落区中缘。

卷 376_19【题韦承总吴王故城下幽居】

孟郊

才饱身自贵，巷荒门岂贫。韦生堪继相，孟子愿依邻。
夜思琴语切，昼情茶味新。霜枝留过鹊，风竹扫蒙尘。
郢唱一声发，吴花千片春。对君何所得，归去觉情真。

卷 376_20【苏州昆山惠聚寺僧房】

孟郊

昨日到上方，片云挂石床。锡杖莓苔青，袈裟松柏香。
晴磬无短韵，古灯含永光。有时乞鹤归，还访逍遥场。

卷 376_21【题从叔述灵岩山壁】

孟郊

换却世上心，独起山中情。露衣凉且鲜，云策高复轻。
喜见夏日来，变为松景清。每将逍遥听，不厌飕飕声。
远念坐未宗，未疏俗间名。桂枝妄举手，萍路空劳生。
仰谢开净弦，相招时一鸣。

卷 376_22【题林校书花严寺书窗】

孟郊

隐咏不夸俗，问禅徒净居。翻将白云字，寄向青莲书。
拟古投松坐，就明开纸疏。昭昭南山景，独与心相如。

卷 376_23【蓝溪元居士草堂】

孟郊

市井不容义，义归山谷中。夫君宅松桂，招我栖蒙笼。
人朴情虑肃，境闲视听空。清溪宛转水，修竹徘徊风。
木倦采樵子，土劳稼穡翁。读书业虽异，敦本志亦同。
蓝岸青漠漠，蓝峰碧崇崇。日昏各命酒，寒蛩鸣蕙丛。

卷 376_24【新卜清罗幽居奉献陆大夫】

孟郊

黔娄住何处，仁邑无馁寒。岂悟旧羁旅，变为新闲安。
二倾有馀食，三农行可观。笼禽得高巢，辙鲋还层澜。
翳翳桑柘墟，纷纷田里欢。兵戈忽消散，耦耕非艰难。
嘉木偶良酌，芳阴庇清弹。力农唯一事，趣世徒万端。
静觉本相厚，动为末所残。此外有余暇，锄荒出幽兰。

卷 376_25【题韦少保静恭宅藏书洞】

孟郊

高意合天制，自然状无穷。仙华凝四时，玉藓生数峰。
书秘漆文字，匣藏金蛟龙。闲为气候肃，开作云雨浓。
洞隐谅非久，岩梦诚必通。将缀文士集，贯就真珠丛。

卷 376_26【生生亭】

孟郊

滩闹不妨语，跨溪仍置亭。置亭嵴崁头，开窗纳遥青。
遥青新画出，三十六扇屏，裊裊立平地，棱棱浮高冥。

一日数开扉，仙闪目不停。徒夸远方岫，曷若中峰灵。
拔意千余丈，浩言永堪铭。浩言无愧同，愧同忍丑醒。
致之未有力，力在君子听。

卷 376_27【寒溪】

孟郊

霜洗水色尽，寒溪见纤鳞。幸临虚空镜，照此残悴身。
潜滑不自隐，露底莹更新。豁如君子怀，曾是危陷人。
始明浅俗心，夜结朝已津。净漱一掬碧，远消千虑尘。
始知泥步泉，莫与山源邻。

洛阳岸边道，孟氏庄前溪。舟行素冰折，声作青瑶嘶。
绿水结绿玉，白波生白珪。明明宝镜中，物物天照齐。
仄步下危曲，攀枯闻孺啼。霜芬稍稍歇，凝景微茫齐。
痴坐直视听，戇行失踪蹊。岸童劬棘劳，语言多悲凄。

晓饮一杯酒，踏雪过清溪。波澜冻为刀，剗割皂与骍。
宿羽皆翦弃，血声沉沙泥。独立欲何语，默念心酸嘶。
冻血莫作春，作春生不齐。冻血莫作花，作花发孺啼。
幽幽棘针村，冻死难耕犁。

篙工碓玉星，一路随进萤。朔冻哀彻底，獠馋咏潜鯢。
冰齿相磨啮，风音酸铎铃。清悲不可逃，洗出纤悉听。
碧潏卷已尽，彩缕飞飘零。下蹊滑不定，上栖折难停。

哮嘍呶啞冤，仰诉何时宁。

一曲一直水，白龙何鳞鳞。冻飙杂碎号，齏音坑谷辛。
枫榭吃无力，飞走更相仁。猛弓一折弦，余喘争来宾。
大严此之立，小杀不复陈。皎皎何皎皎，氤氲复氤氲。
瑞晴刷日月，高碧开星辰。独立两脚雪，孤吟千虑新。
天幬徒昭昭，箕舌虚断断。尧圣不听说，孔微亦有臣。
谏书竟成章，古义终难陈。

因冻死得食，杀风仍不休。以兵为仁义，仁义生刀头。
刀头仁义腥，君子不可求。波澜抽剑冰，相劈如仇雠。
尖雪入鱼心，鱼心明恹恹。恍如罔两说，似诉割切由。
谁使异方气，入此中土流。翦尽一月春，闭为百谷幽。
仰怀新霁光，下照疑忧愁。

溪老哭甚寒，涕泗冰珊珊。飞死走死形，雪裂纷心肝。
剑刃冻不割，弓弦强难弹。常闻君子武，不食天杀残。
劓玉掩骼鬻，吊琼哀阑干。

溪风摆余冻，溪景衔明春。玉消花滴滴，虬解光鳞鳞。
悬步下清曲，消期濯芳津。千里冰裂处，一勺暖亦仁。
凝精互相洗，漪涟竞将新。忽如剑疮尽，初起百战身。

卷 376_28【立德新居】

孟郊

立德何亭亭，西南耸高隅。阳崖泄春意，井圃留冬芜。
胜引即纡道，幽行岂通衢。碧峰远相揖，清思谁言孤。
寺秩虽贵家，浊醪良可哺。

耸城架霄汉，洁宅涵絪縕。开门洛北岸，时锁嵩阳云。
夜高星辰大，昼长天地分。厚韵属疏语，薄名谢嚣闻。
兹焉有殊隔，永矣难及群。

宾秩已觉厚，私储常恐多。清贫聊自尔，素责将如何。
俭教先勉力，修襟无余佗。良栖一枝木，灵巢片叶荷。
仰笑鸱鸢辈，委身拂天波。

疏门不掩水，洛色寒更高。晓碧流视听，夕清濯衣袍。
为於仁义得，未觉登陟劳。远岸雪难莫，劲枝风易号。
霜禽各啸侣，吾亦爱吾曹。

崎岖有悬步，委曲饶荒寻。远树足良木，疏巢无争禽。
素魄衔夕岸，绿水生晓浔。空旷伊洛视，仿佛潇湘心。
何必尚远异，忧劳满行襟。

悬途多仄足，崎圃无修畦。芳兰与宿艾，手撷心不迷。
品子懒读书，辕驹难服犁。虚食日相投，夸肠讵能低。

耻从新学游，愿将古农齐。

都城多耸秀，爱此高县居。伊雒绕街巷，鸳鸯飞閤闾。
翠景何的砾，霜飈飘空虚。突出万家表，独治二亩蔬。
一旬一手版，十日九手锄。

手锄手自勸，激劝亦已饶。畏彼梨栗儿，空资玩弄骄。
夜景卧难尽，昼光坐易消。治旧得新义，耕荒生嘉苗。
锄治苟愜适，心形俱逍遥。

玉蹄裂鸣水，金绶忽照门。拂拭贫士席，拜候丞相辕。
德疏未为高，礼至方觉尊。岂唯耀兹日，可以荣远孙。
如何一阳朝，独荷众瑞繁。

东南富水木，寂寥蔽光辉。此地足文字，及时隘骅骝。
仄雪踏为平，涩行变如飞。令畦生气色，嘉绿新霏微。
天意资厚养，贤人肯相违。

卷三百七十七

卷 377_1【西上经灵宝观】

孟郊

道士无白发，语音灵泉清。青松多寿色，白石恒夜明。
放步雾霞起，振衣华风生。真文秘中顶，宝气浮四楹。
一片古关路，万里今人行。上仙不可见，驱策徒西征。

卷 377_2【泛黄河】

孟郊

谁开昆仑源，流出混沌河。积雨飞作风，惊龙喷为波。
湘瑟飕飕弦，越宾呜咽歌。有恨不可洗，虚此来经过。

卷 377_3【往河阳宿峡陵，寄李侍御】

孟郊

暮天寒风悲屑屑，啼鸟绕树泉水噎。行路解鞍投古陵，
苍苍隔山见微月。鸱鸣犬吠霜烟昏，开囊拂巾对盘飧。
人生穷达感知己，明日投君申片言。

卷 377_4【鸦路溪行，呈陆中丞】

孟郊

鸦路不可越，三十六渡溪。有物饮碧水，高林挂青蜩。
历览道更险，驱使迹频暌。视听易常主，心魂互相迷。
浪石忽摇动，沙堤信难跻。危峰紫霄外，古木浮云齐。
出阻望汝郡，大贤多招携。疲马恋旧秣，羁禽思故栖。
应怜泣楚玉，弃置如尘泥。

卷 377_5【独宿岘首忆长安故人】

孟郊

月迥无隐物，况复大江秋。江城与沙村，人语风飕飕。
岘亭当此时，故人不同游。故人在长安，亦可将梦求。

卷 377_6 【自商行谒复州卢使君虔】

孟郊

一身绕千山，远作行路人。未遂东吴归，暂出西京尘。
仲宣荆州客，今余竟陵宾。往迹虽不同，托意皆有因。

商岭莓苔滑，石坂上下频。江汉沙泥洁，永日光景新。
独泪起残夜，孤吟望初晨。驱驰竟何事，章句依深仁。

卷 377_7 【梦泽中行】

孟郊

楚山争蔽亏，日月无全辉。楚路饶回惑，旅人有迷归。
骐驎思北首，鸛鹄愿南飞。我怀京洛游，未厌风尘衣。

卷 377_8 【京山行】

孟郊

众虻聚病马，流血不得行。后路起夜色，前山闻虎声。
此时游子心，百尺风中旌。

卷 377_9【旅次湘沅有怀灵均】

孟郊

分拙多感激，久游遵长途。经过湘水源，怀古方踟蹰。
旧称楚灵均，此处殒忠躯。侧聆故老言，遂得旌贤愚。

名参君子场，行为小人儒。骚文衒贞亮，体物情崎岖。
三黜有愠色，即非贤哲模。五十爵高秩，谬膺从大夫。

胸襟积忧愁，容鬓复凋枯。死为不吊鬼，生作猜谤徒。
吟泽洁其身，忠节宁见输。怀沙灭其性，孝行焉能俱。

且闻善称君，一何善自殊。且闻过称己，一何过不渝。
悠哉风土人，角黍投川隅。相传历千祀，哀悼延八区。

如今圣明朝，养育无羁孤。君臣逸雍熙，德化盈纷敷。
巾车徇前侣，白日犹昆吾。寄君臣子心，戒此真良图。

卷 377_10【过彭泽】

孟郊

扬帆过彭泽，舟人讶叹息。不见种柳人，霜风空寂历。

卷 377_11【过分水岭】

孟郊

山壮马力短，马行石齿中。十步九举辔，回环失西东。
溪水变为雨，悬崖阴濛濛。客衣飘飘秋，葛花零落风。
白日舍我没，征途忽然穷。

卷 377_12【分水岭别夜示从弟寂】

孟郊

南中少平地，山水重叠生。别泉万余曲，迷舟独难行。
四际乱峰合，一眺千虑并。潺湲冬夏冷，光彩昼夜明。
赏心难久胜，离肠忽自惊。古木摇霁色，高风动秋声。
饮尔一樽酒，慰我百忧轻。嘉期何处定，此晨堪寄情。

卷 377_13【连州吟】

孟郊

春风朝夕起，吹绿日日深。试为连州吟，泪下不可禁。
连山何连连，连天碧岑岑。哀猿哭花死，子规裂客心。
兰芷结新佩，潇湘遗旧音。怨声能翦弦，坐抚零落琴。

羽翼不自有，相迫力难任。唯凭方寸灵，独夜万里寻。
方寻魂飘飘，南梦山岖嶔。仿佛惊魍魉，悉窅闻枫林。
正直被放者，鬼魅无所侵。贤人多安排，俗士多虚钦。
孤怀吐明月，众毁铄黄金。愿君保玄曜，壮志无自沉。

朝亦连州吟，暮亦连州吟。连州果有信，一纸万里心。
开缄白云断，明月堕衣襟。南风嘶舜琯，苦竹动猿音。
万里愁一色，潇湘雨淫淫。两剑忽相触，双蛟恣浮沉。
斗水正回斡，倒流安可禁。空愁江海信，惊浪隔相寻。

卷 377_14 【旅行】

孟郊

楚水结冰薄，楚云为雨微。野梅参差发，旅榜逍遥归。

卷 377_15 【上河阳李大夫】

孟郊

上将秉神略，至兵无猛威。三军当严冬，一抚胜重衣。
霜剑夺众景，夜星失长辉。苍鹰独立时，恶鸟不敢飞。
武牢锁天关，河桥纽地机。大将奚以安，守此称者稀。
贫士少颜色，贵门多轻肥。试登山岳高，方见草木微。
山岳恩既广，草木心皆归。

卷 377_16 【投赠张端公】

孟郊

君子量不极，胸吞百川流。嫉邪霜气直，问俗春辞柔。
日户昼辉静，月杯夜景幽。咏惊芙蓉发，笑激风飏秋。
鸾步独无侶，鹤音仍寡俦。幸沾分寸顾，散此千万忧。

卷 377_17 【赠苏州韦郎中使君】

孟郊

谢客吟一声，霜落群听清。文含元气柔，鼓动万物轻。
嘉木依性植，曲枝亦不生。尘埃徐庾词，金玉曹刘名。
章句作雅正，江山益鲜明。萍蘋一浪草，菰蒲片池荣。
曾是康乐咏，如今攀其英。顾惟菲薄质，亦愿将此并。

卷 377_18 【上张徐州】

孟郊

为水不入海，安得浮天波。为木不在山，安得横日柯。
再来君子傍，始觉精义多。大德唯一施，众情自偏颇。
至乐无宫徵，至声遗讴歌。愿鼓空桑弦，永使万物和。

顾己诚拙讷，干名已蹉跎。献词惟在口，所欲无余佗。
乍作支泉石，乍作翳松萝。一不改方圆，破质为琢磨。
贱子本如此，大贤心若何。岂是无异途，异途难经过。

卷 377_19【上包祭酒】

孟郊

岳岳冠盖彦，英英文字雄。琼音独听时，尘韵固不同。
春云生纸上，秋涛起胸中。时吟五君咏，再举七子风。
何幸松桂侣，见知勤苦功。愿将黄鹤翅，一借飞云空。

卷 377_20【赠别崔纯亮】

孟郊

食荠肠亦苦，强歌声无欢。出门即有碍，谁谓天地宽。
有碍非遐方，长安大道傍。小人智虑险，平地生太行。
镜破不改光，兰死不改香。始知君子心，交久道益彰。
君心与我怀，离别俱回遑。譬如浸蘖泉，流苦已日长。
忍泣目易衰，忍忧形易伤。项籍岂不壮，贾生岂不良。
当其失意时，涕泗各沾裳。古人劝加餐，此餐难自强。
一饭九祝噎，一嗟十断肠。况是儿女怨，怨气凌彼苍。
彼苍若有知，白日下清霜。今朝始惊叹，碧落空茫茫。

卷 377_21【赠文应上人】

孟郊

栖迟青山巅，高静身所便。不践有命草，但饮无声泉。
斋性空转寂，学情深更专。经文开贝叶，衣制垂秋莲。
厌此俗人群，暂来还却旋。

卷 377_22【严河南】

孟郊

赤令风骨峭，语言清霜寒。不必用雄威，见者毛发攒。
我有赤令心，未得赤令官。终朝衡门下，忍志将筑弹。
君从西省郎，正有东洛观。洛民萧条久，威恩悯抚难。
苦竹声啸雪，夜斋闻千竿。诗人偶寄耳，听苦心多端。
多端落杯酒，酒中方得欢。隐士多饮酒，此言信难刊。
取次令坊沽，举止务在宽。何必红烛娇，始言清宴阑。
丈夫莫矜庄，矜庄不中看。

卷 377_23【赠李观】

孟郊

谁言形影亲，灯灭影去身。谁言鱼水欢，水竭鱼枯鳞。

昔为同恨客，今为独笑人。舍予在泥辙，飘迹上云津。
卧木易成蠹，弃花难再春。何言对芳景，愁望极萧晨。
埋剑谁识气，匣弦日生尘。愿君语高风，为余问苍旻。

卷 377_24【吴安西馆赠从弟楚客】

孟郊

蒙笼杨柳馆，中有南风生。风生今为谁，湘客多远情。
孤枕楚水梦，独帆楚江程。觉来残恨深，尚与归路并。
玉匣五弦在，请君时一鸣。

卷 377_25【赠章仇将军】

孟郊

将军不夸剑，才气为英雄。五岳拽力内，百川倾意中。
本立谁敢拔，飞文自难穷。前时天地翻，已有扶正功。

卷 377_26【赠道月上人】

孟郊

僧貌净无点，僧衣宁缀华。寻常昼日行，不使身影斜。

饭术煮松柏，坐山敷云霞。欲知禅隐高，缉薜为袈裟。

卷 377_27【抒情因上郎中二十二叔监察十五叔，兼呈李益端公、柳缙评事】

孟郊

方凭指下弦，写出心中言。寸草贱子命，高山主人恩。
游边风沙意，梦楚波涛魂。一日引别袂，九回沾泪痕。

自悲何以然，在礼阙晨昏。名利时转甚，是非宵亦喧。
浮情少定主，百虑随世翻。举此胸臆恨，幸从贤哲论。
明明三飞鸾，照物如朝暾。

卷 377_28【赠城郭道士】

孟郊

望里失却山，听中遗却泉。松枝休策云，药囊翻贮钱。
曾依青桂邻，学得白雪弦。别来意未回，世上为隐仙。

卷 377_29【桐庐山中赠李明府】

孟郊

静境无浊氛，清雨零碧云。千山不隐响，一叶动亦闻。
即此佳志士，精微谁相群。欲识楚章句，袖中兰茝薰。

卷 377_30【献汉南樊尚书】

孟郊

天下昔崩乱，大君识贤臣。众木尽摇落，始见竹色真。
兵势走山岳，阳光潜埃尘。心开玄女符，面缚清波人。

异俗既从化，浇风亦归淳。自公理斯郡，寒谷皆变春。
旗影卷赤电，剑锋匣青鳞。如何嵩高气，作镇楚水滨。
云镜忽开霁，孤光射无垠。乃知寻常鉴，照影不照神。

卷 377_31【赠转运陆中丞】

孟郊

掌运职既大，摧邪名更雄。鹏飞簸曲云，鹗怒生直风。
投彼霜雪令，翦除荆棘丛。楚仓倾向西，吴米发自东。

帆影咽河口，车声聒关中。尧知才策高，人喜道路通。
皆经内史力，继得酈侯功。莱子真为少，相如未免穷。
衣花野菡萏，书叶山梧桐。不是宗匠心，谁怜久栖蓬。

卷 377_32【赠万年陆郎中】

孟郊

天子忧剧县，寄深华省郎。纷纷风响珮，蛰蛰剑开霜。
旧事笑堆案，新声唯雅章。谁言百里才，终作横天梁。
江鸿耻承眷，云津未能翔。徘徊尘俗中，短翮无辉光。

卷 377_33【擢第后东归书怀，献座主吕侍御】

孟郊

昔岁辞亲泪，今为恋主泣。去住情难并，别离景易戢。
夭矫大空鳞，曾为小泉蛰。幽意独沉时，震雷忽相及。
神行既不宰，直致非所执。至运本遗功，轻生各自立。
大君思此化，良佐自然集。宝镜无私光，时文有新习。
慈亲诚志就，贱子归情急。擢第谢灵台，牵衣出皇邑。
行襟海日曙，逸抱江风入。蒹葭得波浪，芙蓉红岸湿。
云寺势动摇，山钟韵嘘吸。旧游期再践，悬水得重挹。
松萝虽可居，青紫终当拾。

卷 377_34 【古意赠梁肃补阙】

孟郊

曲木忌日影，谗人畏贤明。自然照烛间，不受邪佞轻。
不有百炼火，孰知寸金精。金铅正同炉，愿分精与粗。

卷 377_35 【赠黔府王中丞楚】

孟郊

旧说天下山，半在黔中青。又闻天下泉，半落黔中鸣。
山水千万绕，中有君子行。儒风一以扇，污俗心皆平。
我愿中国春，化从异方生。昔为阴草毒，今为阳华英。
嘉实缀绿蔓，凉湍泻清声。逍遥物景胜，视听空旷并。
困骥犹在辕，沉珠尚隐精。路遐莫及眄，泥污日已盈。
岁晏将何从，落叶甘自轻。

卷 377_36 【上达奚舍人】

孟郊

北山少日月，草木苦风霜。贫士在重坎，食梅有酸肠。
万俗皆走圆，一身犹学方。常恐众毁至，春叶成秋黄。

大贤秉高鉴，公烛无私光。暗室晓未及，幽行涕空行。

卷 377_37【赠主人】

孟郊

斗水泻大海，不如泻枯池。分明贤达交，岂顾豪华儿。
海有不足流，豪有不足资。枯鳞易为水，贫士易为施。
幸睹君子席，会将幽贱期。侧闻清风议，饫如黄金卮。
此道与日月，同光无尽时。

卷 377_38【赠建业契公】

孟郊

师住青山寺，清华常绕身。虽然到城郭，衣上不栖尘。

卷 377_39【献襄阳于大夫】

孟郊

襄阳青山郭，汉江白铜堤。谢公领兹郡，山水无尘泥。
铁马万霜雪，绛旗千虹霓。风漪参差泛，石板重叠跻。
旧泪不复堕，新欢居然齐。还耕竟原野，归老相扶携。

物色增暧暧，寒芳更萋萋。渊清有遐略，高躅无近蹊。
即此富苍翠，自然引翔栖。曩游常抱忆，夙好今尚睽。
愿言从逸辔，暇日凌清溪。

卷 377_40【赠郑夫子鲂】

孟郊

天地入胸臆，吁嗟生风雷。文章得其微，物象由我裁。
宋玉逞大句，李白飞狂才。苟非圣贤心，孰与造化该。
勉矣郑夫子，骊珠今始胎。

卷 377_41【大隐坊·崔从事郾以直隳职】

孟郊

古人留清风，千载遥赠君。破松见贞心，裂竹见直文。
残月色不改，高贤德常新。家怀诗书富，宅抱草木贫。
安得一蹄泉，来化千尺鳞。含意永不语，钓璜幽水滨。

卷 377_42 【大隐坊·章仇将军良弃功守贫】

孟郊

饮君江海心，讵能辨浅深。挹君山岳德，谁能齐嶠岑。
东海精为月，西岳气凝金。进则万景昼，退则群物阴。
我欲荐此言，天门峻沉沉。风飏亦感激，为我飏飏吟。

卷 377_43 【大隐坊·赵记室倬在职无事】

孟郊

卑静身后老，高动物先摧。方圆水任器，刚劲木成灰。
大道母群物，达人腹众才。时吟尧舜篇，心向无为开。
彼隐山万曲，我隐酒一杯。公庭何所有，日日清风来。

卷 377_44 【赠韩郎中愈】

孟郊

何以定交契，赠君高山石。何以保贞坚，赠君青松色。
贫居过此外，无可相彩饰。闻君硕鼠诗，吟之泪空滴。
硕鼠既穿墉，又啮机上丝。穿墉有闲土，啮丝无余衣。
朝吟枯桑柘，暮泣空杼机。岂是无巧妙，丝断将何施。

众人尚肥华，志士多饥羸。愿君保此节，天意当察微。
前日远别离，今日生白发。欲知万里情，晓卧半床月。
常恐百虫秋，使我芳草歇。

卷 377_45【戏赠无本】

孟郊

长安秋声干，木叶相号悲。瘦僧卧冰凌，嘲咏含金痍。
金痍非战痕，峭病方在兹。诗骨耸东野，诗涛涌退之。
有时踉跄行，人惊鹤阿师。可惜李杜死，不见此狂痴。
燕僧耸听词，袈裟喜新翻。北岳厌利杀，玄功生微言。
天高亦可飞，海广亦可源。文章杳无底，剏掘谁能根。
梦灵仿佛到，对我方与论。拾月鲸口边，何我免为吞。
燕僧摆造化，万有随手奔。补缀杂霞衣，笑傲诸贵门。
将明文在身，亦尔道所存。朔雪凝别句，朔风飘征魂。
再期嵩少游，一访蓬萝村。春草步步绿，春山日日暄。
遥莺相应吟，晚听恐不繁。相思塞心胸，高逸难攀援。

卷三百七十八

卷 378_1【寄张籍】

孟郊

夜镜不照物，朝光何时升。黯然秋思来，走入志士膺。
志士惜时逝，一宵三四兴。清汉徒自朗，浊河终无澄。
旧爱忽已远，新愁坐相凌。君其隐壮怀，我亦逃名称。
古人贵从晦，君子忌党朋。倾败生所竞，保全归懵懵。
浮云何当来，潜虬会飞腾。

卷 378_2【忆周秀才、素上人，时间各在一方】

孟郊

东西分我情，魂梦安能定。野客云作心，高僧月为性。
浮云自高闲，明月常空净。衣敝得古风，居山无俗病。
吟听碧云语，手把青松柄。羡尔欲寄书，飞禽杳难倩。

卷 378_3 【舟中喜遇从叔简别后寄上，时从叔初擢第归江南，郊不从行】

孟郊

一意两片云，暂合还却分。南云乘庆归，北云与谁群。
寄声千里风，相唤闻不闻。

卷 378_4 【怀南岳隐士】

孟郊

见说祝融峰，擎天势似腾。藏千寻布水，出十八高僧。
古路无人迹，新霞吐石棱。终居将尔叟，一一共余登。

千峰映碧湘，真叟此中藏。饭不煮石吃，眉应似发长。
枫杞榼酒瓮，鹤虱落琴床。强效忘机者，斯人尚未忘。

卷 378_5 【春夜忆萧子真】

孟郊

半夜不成寐，灯尽又无月。独向阶前立，子规啼不歇。
况我有金兰，忽尔为胡越。争得明镜中，久长无白发。

卷 378_6【寄院中诸公】

孟郊

奕奕秋水傍，駸駸绿云蹄。月仙有高曜，灵凤无卑栖。
翠色绕云谷，碧华凝月溪。竹林递历览，云寺行攀跻。
冠豸犹屈蠖，匣龙期掣犀。千山惊月晓，百里闻霜颿。
戎府多秀异，谢公期相携。因之仰群彦，养拙固难齐。

卷 378_7【寄洛州李大夫】

孟郊

自从蓟师反，中国事纷纷。儒道一失所，贤人多在军。
鸟巢忧迸射，鹿耳骇惊闻。剑折唯恐匣，弓贪不让勋。
方知省事将，动必谢前群。鹤阵常先罢，鱼符最晚分。
步闲洛水曲，笑激太行云。诗叟未相识，竹儿争见君。
殷勤越谈说，记尽古风文。

卷 378_8【寄卢虔使君】

孟郊

霜露再相换，游人犹未归。岁新月改色，客久线断衣。

有鹤冰在翅，竟久力难飞。千家旧素沼，昨日生绿辉。
春色若可借，为君步芳菲。

卷 378_9【寄崔纯亮】

孟郊

百川有馀水，大海无满波。器量各相悬，贤愚不同科。
群辩有姿语，众欢无行歌。唯余洛阳子，郁郁恨常多。
时读过秦篇，为君涕滂沱。

卷 378_10【汴州离乱后忆韩愈、李翱】

孟郊

会合一时哭，别离三断肠。残花不待风，春尽各飞扬。
欢去收不得，悲来难自防。孤门清馆夜，独卧明月床。
忠直血白刃，道路声苍黄。食恩三千士，一旦为豺狼。
海岛士皆直，夷门士非良。人心既不类，天道亦反常。
自杀与彼杀，未知何者臧。

卷 378_11【寄张籍】

孟郊

未见天子面，不如双盲人。贾生对文帝，终日犹悲辛。
夫子亦如盲，所以空泣麟。有时独斋心，仿佛梦称臣。

梦中称臣言，觉后真埃尘。东京有眼富不如，
西京无眼贫西京。无眼犹有耳隔墙，时闻天子车辚辚。

辚辚车声辗冰玉，南郊坛上礼百神。西明寺后穷瞎张太祝，
纵尔有眼谁尔珍。天子咫尺不得见，不如闭眼且养真。

卷 378_12【寄义兴小女子】

孟郊

江南庄宅浅，所固唯疏篱。小女未解行，酒弟老更痴。
家中多吴语，教尔遥可知。山怪夜动门，水妖时弄池。

所忧痴酒肠，不解委曲辞。渔妾性崛强，耕童手皴厘。
想兹为襁褓，如鸟拾柴枝。我咏元鲁山，胸臆流甘滋。
终当学自乳，起坐常相随。

卷 378_13【忆江南弟】

孟郊

白首眼垂血，望尔唯梦中。筋力强起时，魂魄犹在东。
眼光寄明星，起来东望空。望空不见人，江海波无穷。
衰老无气力，呼叫不成风。孑然忆忆言，落地何由通。
常师共被教，竟作生离翁。生离不可诉，上天何曾聪。
未忍对松柏，自鞭残朽躬。自鞭亦何益，知教非所崇。
努力拄杖来，余活与尔同。不然死后耻，遗死亦有终。

卷 378_14【宿空侄院寄澹公】

孟郊

夜坐冷竹声，二三高人语。灯窗看律钞，小师别为侣。
雪檐晴滴滴，茗碗华举举。磬音多风飏，声韵闻江楚。
官街不相隔，诗思空愁予。明日策杖归，去住两延伫。

卷 378_15【寄陕府邓给事】

孟郊

陕城临大道，馆宇屹几鲜。候谒随芳语，铿词芬蜀笺。

从来镜目下，见尽道心前。自谓古诗量，异将新学偏。
戇人年六十，每月请三千。不敢等闲用，愿为长寿钱。
非关亦洁尔，将以救羸然。孤省痴皎皎，默吟写绵绵。
病书凭昼日，驿信寄宵鞭。疾诉将何谕，肆鳞今倒悬。
尘鲤见枯浪，土鬣思干泉。感感无绪荡，愁愁作□边。
贞元文祭酒，比谨学韦玄。满坐风无杂，当朝雅独全。
见知嘱徐孺，赏句类陶渊。一顾生鸿羽，再言将鹤翩。
宣扬隘车马，君子凑骈阗。曾是此同眷，至今应赐怜。
磨墨零落泪，楷字贡仁贤。

卷 378_16 【送谏议十六叔至孝义渡后奉寄】

孟郊

晓渡明镜中，霞衣相飘飘。浪皤惊亦双，蓬客将谁僚。
别饮孤易醒，离忧壮难销。文清虽无敌，儒贵不敢骄。
江吏捧紫泥，海旗剪红蕉。分明太守礼，跨蹠毗陵桥。
伊洛去未回，遐瞩空寂寥。

卷 378_17 【至孝义渡寄郑军事唐二十五】

孟郊

咫尺不得见，心中空嗟嗟。官街泥水深，下脚道路斜。
嵩少玉峻峻，伊雒碧华华。岸亭当四迥，诗老独一家。

洵叟何所如，郑石唯有些。何当来说事，为君开流霞。

卷 378_18【答友人】

孟郊

白日照清水，浅深无隐姿。君子业高文，怀抱多正思。
砥行碧山石，结交青松枝。碧山无转易，青松难倾移。
落落出俗韵，琅琅大雅词。自非随氏掌，明月安能持。
千里不可倒，一返无近期。如何非意中，良觌忽在兹。
道语必疏散，儒风易凌迟。愿存坚贞节，勿为霜霰欺。

卷 378_19【酬友人见寄新文】

孟郊

为客栖未定，况当玄月中。繁云翳碧霄，落雪和清风。
郊陌绝行人，原隰多飞蓬。耕牛返村巷，野鸟依房栊。
我无饥冻忧，身托莲花宫。安闲赖禅伯，复得疏尘蒙。
览君郢曲文，词彩何冲融。讴吟不能已，顿觉形神空。

卷 378_20 【答韩愈、李观别，因献张徐州】

孟郊

富别愁在颜，贫别愁销骨。懒磨旧铜镜，畏见新白发。
古树春无花，子规啼有血。离弦不堪听，一听四五绝。
世途非一险，俗虑有千结。有客步大方，驱车独迷辙。

故人韩与李，逸翰双皎洁。哀我摧折归，赠词纵横设。
徐方国东枢，元戎天下杰。衿生投刺游，王粲吟诗谒。

高情无遗照，朗抱开晓月。有土不埋冤，有仇皆为雪。
愿为直草木，永向君地列。愿为古琴瑟，永向君听发。
欲识丈夫心，曾将孤剑说。

卷 378_21 【答昼上人止谗作】

孟郊

烈烈鸞鸞吟，铿铿琅玕音。泉摧明月啸，鹤起清风心。
渭水不可浑，泾流徒相侵。俗侣唱桃叶，隐士鸣桂琴。
子野真遗却，浮浅藏渊深。

卷 378_22 【答姚怱见寄】

孟郊

日月不同光，昼夜各有宜。贤哲不苟合，出处亦待时。
而我独迷见，意求异士知。如将舞鹤管，误向惊鳬吹。
大雅难具陈，正声易漂沦。君有丈夫泪，泣人不泣身。
行吟楚山玉，义泪沾衣巾。

卷 378_23 【答郭郎中】

孟郊

松柏死不变，千年色青青。志士贫更坚，守道无异营。
每弹潇湘瑟，独抱风波声。中有失意吟，知者泪满缨。
何以报知者，永存坚与贞。

卷 378_24 【答卢虔故园见寄】

孟郊

访旧无一人，独归清雒春。花闻哭声死，水见别容新。
乱后故乡宅，多为行路尘。因悲楚左右，谤玉不知珉。

卷 378_25 【汝坟蒙从弟楚材见赠，时郊将入秦，楚材适楚】

孟郊

朝为主人心，暮为行客吟。汝水忽凄咽，汝风流苦音。
北阙秦门高，南路楚石深。分泪洒白日，离肠绕青岑。
何以寄远怀，黄鹤能相寻。

卷 378_26 【同从叔简酬卢殷少府】

孟郊

梅尉吟楚声，竹风为凄清。深虚冰在性，高洁云入情。
借水洗闲貌，寄蕉书逸名。羞将片石文，斗此双琼英。

卷 378_27 【酬李侍御书记秋夕雨中病假见寄】

孟郊

秋风绕衰柳，远客闻雨声。重兹阻良夕，孤坐唯积诚。
果枉移疾咏，中含嘉虑明。洗涤烦浊尽，视听昭旷生。
未觉衾枕倦，久为章奏婴。达人不宝药，所保在闲情。

卷 378_28 【答卢仝】

孟郊

楚屈入水死，诗孟踏雪僵。直气苟有存，死亦何所妨。
日劈高查牙，清棱含冰浆。前古后古冰，与山气势强。
闪怪千石形，异状安可量。有时春镜破，百道声飞扬。

潜仙不足言，朗客无隐肠。为君倾海宇，日夕多文章。
天下岂无缘，此山雪昂藏。烦君前致词，哀我老更狂。
狂歌不及狂，歌声缘凤凰。凤兮何当来，消我孤直疮。

君文真凤声，宣隘满铿锵。洛友零落尽，逮兹悲重伤。
独自奋异骨，将骑白角翔。再三劝莫行，寒气有刀枪。
仰惭君子多，慎勿作芬芳。

卷 378_29 【奉报翰林张舍人见遗之诗】

孟郊

百虫笑秋律，清削月夜闻。晓棱视听微，风剪叶已纷。
君子鉴大雅，老人非俊群。收拾古所弃，俯仰补空文。
孤韵耻春俗，馀响逸零雰。自然蹈终南，涤暑凌寒氛。

岩霰不知午，涧澌镇含曛。曾是醒古醉，所以多隐沦。

江调乐之远，溪谣生徒新。众蕴有馀采，寒泉空哀呻。
南谢竟莫至，北宋当时珍。赜灵各自异，酌酒谁能均。

昔咏多写讽，今词讵无因。品松何高翠，宫殿没荒榛。
苔趾识宏制，沙濂游崩津。忽吟陶渊明，此即羲皇人。
心放出天地，形拘在风尘。前贤素行阶，夙嗜青山勤。

达士立明镜，朗言为近臣。将期律万有，倾倒甄无垠。
鸢鷖应蟋蟀，丝毫意皆申。况于三千章，哀叩不为神。

卷 378_30 【送从弟郢东归】

孟郊

尔去东南夜，我无西北梦。谁言贫别易，贫别愁更重。
晓色夺明月，征人逐群动。秋风楚涛高，旅榜将谁共。

卷 378_31 【山中送从叔简赴举】

孟郊

石根百尺杉，山眼一片泉。倚之道气高，饮之诗思鲜。
于此逍遥场，忽奏别离弦。却笑薜萝子，不同鸣跃年。

卷 378_32 【送别崔寅亮下第】

孟郊

天地唯一气，用之自偏颇。忧人成苦吟，达士为高歌。
君子识不浅，桂枝忧更多。岁晏期攀折，时归且婆娑。
素质如削玉，清词若倾河。虬龙未化时，鱼鳖同一波。
去矣当自适，故乡饶薜萝。

卷 378_33 【大梁送柳淳先入关】

孟郊

青山辄为尘，白日无闲人。自古推高车，争利西入秦。
王门与侯门，待富不待贫。空携一束书，去去谁相亲。

卷 378_34 【送无怀道士游富春山水】

孟郊

造化绝高处，富春独多观。山浓翠滴洒，水折珠摧残。
溪镜不隐发，树衣长遇寒。风猿虚空飞，月狖叫啸酸。
信此神仙路，岂为时俗安。煮金阴阳火，囚怪星宿坛。
花发我未识，玉生忽丛攒。蓬莱浮荡漾，非道相从难。

卷 378_35【送温初下第】

孟郊

日落浊水中，夜光谁能分。高怀无近趣，清抱多远闻。
欲识丈夫志，心藏孤岳云。长安风尘别，咫尺不见君。

卷 378_36【送卢虔端公守复州】

孟郊

师旷听群木，自然识孤桐。正声逢知音，愿出大朴中。
知音不韵俗，独立占古风。忽挂触邪冠，逮逐南飞鸿。

肃肃太守章，明明华毂熊。商山无平路，楚水有惊濑。
日月千里外，光阴难载同。新愁徒自积，良会何由通。

卷 378_37【送任载、齐古二秀才自洞庭游宣城】

孟郊

洞庭非人境，道路行虚空。二客月中下，一帆天外风。
鱼龙波五色，金碧树千丛。闪怪如可惧，在诚无不通。

扣奇知浩淼，采异访穹崇。物表即高韵，人间访仙公。
宣城文雅地，谢守声闻融。证玉易为力，辨珉谁不同。
从兹阮籍泪，且免泣途穷。

卷 378_38【送晓公归庭山】

孟郊

庭山何崎岖，寺路缘翠微。秋霁山尽出，日落人独归。
云生高高步，泉洒田田衣。枯巢无还羽，新木有争飞。
兹焉不可继，梦寐空清辉。

卷 378_39【送豆卢策归别墅】

孟郊

短松鹤不巢，高石云不栖。君今潇湘去，意与云鹤齐。
力买奇险地，手开清浅溪。身披薜荔衣，山陟莓苔梯。
一卷冰雪文，避俗常自携。

卷 378_40【送清远上人归楚山旧寺】

孟郊

波中出吴境，霞际登楚岑。山寺一别来，云萝三改阴。

诗夸碧云句，道证青莲心。应笑泛萍者，不知松隐深。

卷 378_41【山中送从叔简】

孟郊

莫以手中琼，言邀世上名。莫以山中迹，久向人间行。
松柏有霜操，风泉无俗声。应怜枯朽质，惊此别离情。

卷 378_42【送萧炼师入四明山】

孟郊

闲于独鹤心，大于高松年。迥出万物表，高栖四明巅。
千寻直裂峰，百尺倒泻泉。绛雪为我饭，白云为我田。
静言不语俗，灵踪时步天。

卷三百七十九

卷 379_1【感别送从叔校书简再登科东归】

孟郊

长安车马道，高槐结浮阴。下有名利人，一人千万心。
黄鹄多远势，沧溟无近浔。怡怡静退姿，泠泠思归吟。

菱唱忽生听，芸书回望深。清风散言笑，余花缀衣襟。
独恨鱼鸟别，一飞将一沉。

卷 379_2【送玄亮师】

孟郊

兰泉涤我襟，杉月栖我心。茗啜绿净花，经诵清柔音。
何处笑为别，淡情愁不侵。

卷 379_3 【送李尊师玄】

孟郊

口诵碧简文，身是青霞君。头冠两片月，肩披一条云。
松骨轻自飞，鹤心高不群。

卷 379_4 【同昼上人送郭秀才江南寻兄弟】

孟郊

地上春色生，眼前诗彩明。手携片宝月，言是高僧名。
溪转万曲心，水流千里声。飞鸣向谁去，江鸿弟与兄。

卷 379_5 【春日同韦郎中使君送邹儒立少府扶侍赴云阳】

孟郊

离思著百草，绵绵生无穷。侧闻畿甸秀，三振词策雄。
太守不韵俗，诸生皆变风。郡斋敞西清，楚瑟惊南鸿。
海畔帝城望，云阳天色中。酒酣正芳景，诗缀新碧丛。
服彩老莱并，侍车江革同。过隋柳憔悴，入洛花蒙笼。
高步讵留足，前程在层空。独惭病鹤羽，飞送力难崇。

卷 379_6【送从叔校书简南归】

孟郊

长安别离道，宛在东城隅。寒草根未死，愁人心已枯。
促促水上景，遥遥天际途。生随昏晓中，皆被日月驱。
北骑达山岳，南帆指江湖。高踪一超越，千里在须臾。

卷 379_7【送韩愈从军】

孟郊

志士感恩起，变衣非变性。亲宾改旧观，僮仆生新敬。
坐作群书吟，行为孤剑咏。始知出处心，不失平生正。
凄凄天地秋，凛凛军马令。驿尘时一飞，物色极四静。
王师既不战，庙略在无竞。王粲有所依，元瑜初应命。
一章喻檄明，百万心气定。今朝旌鼓前，笑别丈夫盛。

卷 379_8【同茅郎中使君送河南裴文学】

孟郊

河南有归客，江风绕行襟。送君无尘听，舞鹤清瑟音。
菱蔓缀楚棹，日华正嵩岑。如何谢文学，还起会云吟。

卷 379_9【送李翱习之】

孟郊

习之势翩翩，东南去遥遥。赠君双履足，一为上皋桥。
皋桥路逶迤，碧水清风飘。新秋折藕花，应对吴语娇。
千巷分绿波，四门生早潮。湖榜轻袅袅，酒旗高寥寥。
小时履齿痕，有处应未销。旧忆如雾星，恍见于梦消。
言之烧人心，事去不可招。独孤宅前曲，笠篲醉中谣。
壮年俱悠悠，逮兹各焦焦。执手复执手，唯道无枯凋。

卷 379_10【送丹霞子阮芳颜上人归山】

孟郊

松色不肯秋，玉性不可柔。登山须正路，饮水须直流。
倩鹤附书信，索云作衣裘。仙村莫道远，枉策招交游。

卷 379_11【送从舅端适楚地】

孟郊

归情似泛空，飘荡楚波中。羽扇扫轻汗，布帆筛细风。
江花折菡萏，岸影泊梧桐。元舅唱离别，贱生愁不穷。

卷 379_12【送卢汀侍御归天德幕】

孟郊

仲宣领骑射，结束皆少年。匹马黄河岸，射雕清霜天。
旌旗防日北，道路上云巅。古雪无销铄，新冰有堆填。
清溪徒耸峭，白璧自招贤。岂比重恩者，闭门方独全。

卷 379_13【送草书献上人归庐山】

孟郊

狂僧不为酒，狂笔自通天。将书云霞片，直至清明巅。
手中飞黑电，象外泻玄泉。万物随指顾，三光为回旋。
聚书云霭，洗砚山晴鲜。忽怒画蛇虺，喷然生风烟。
江人愿停笔，惊浪恐倾船。

卷 379_14【和薛先辈送独孤秀才上都赴嘉会得青字】

孟郊

秦云攀窈窕，楚桂搴芳馨。五色岂徒尔，万枝皆有灵。
仙谣天上贵，林咏雪中青。持此一为赠，送君翔杳冥。

卷 379_15【送崔爽之湖南】

孟郊

江与湖相通，二水洗高空。定知一日帆，使得千里风。
雪唱与谁和，俗情多不通。何当逸翮纵，飞起泥沙中。

卷 379_16【送超上人归天台】

孟郊

天台山最高，动蹑赤城霞。何以静双目，扫山除妄花。
何以洁其性，滤泉去泥沙。灵境物皆直，万松无一斜。
月中见心近，云外将俗赊。山兽护方丈，山猿捧袈裟。
遗身独得身，笑我牵名华。

卷 379_17【同李益、崔放送王炼师还楼观，兼为群公先营山居】

孟郊

十年白云士，一卷紫芝书。来结崆峒侣，还期缥缈居。
霞冠遗彩翠，月帔上空虚。寄谢泉根水，清冷闲有余。

卷 379_18【张徐州席送岑秀才】

孟郊

振振芝兰步，升自君子堂。泠泠松桂吟，生自楚客肠。
羁鸟无定栖，惊蓬在他乡。去兹门馆闲，即彼道路长。
雨馀山川净，麦熟草木凉。楚泪滴章句，京尘染衣裳。
赠君无馀佗，久要不可忘。

卷 379_19【送黄构擢第后归江南】

孟郊

澹澹沧海气，结成黄香才。幼龄思奋飞，弱冠游灵台。
一鶚顾乔木，众禽不敢猜。一骥骋长衢，众兽不敢陪。
遂得会风雨，感通如云雷。至矣小宗伯，确乎心不回。
能令幽静人，声实喧九垓。却忆江南道，祖筵花里开。
春风不能别，别罢空徘徊。

卷 379_20【送道士】

孟郊

千年山上行，山上无遗踪。一日人间游，六合人皆逢。

自有意中侣，白寒徒相从。

卷 379_21【送孟寂赴举】

孟郊

烈士不忧身，为君吟苦辛。男儿久失意，宝剑亦生尘。
浮俗官是贵，君子道所珍。况当圣明主，岂乏证玉臣。
浊水无白日，清流鉴苍旻。贤愚皎然别，结交当有因。

卷 379_22【同溧阳宰送孙秀才】

孟郊

废瑟难为弦，南风难为歌。幽幽拙疾中，忽忽浮梦多。
清韵始啸侣，雅言相与和。讼闲每往招，祖送奈若何。
牵苦强为赠，邦邑光峨峨。

卷 379_23【溧阳唐兴寺观蔷薇花，同诸公饯陈明府】

孟郊

忽惊红琉璃，千艳万艳开。佛火不烧物，净香空徘徊。
花下印文字，林间咏觞杯。群官饯宰官，此地车马来。

卷 379_24 【送柳淳】

孟郊

青山临黄河，下有长安道。世上名利人，相逢不知老。

卷 379_25 【送殷秀才南游】

孟郊

诗句临离袂，酒花薰别颜。水程千里外，岸泊几宵间。

风叶乱辞木，雪猿清叫山。南中多古事，咏遍始应还。

卷 379_26 【送青阳上人游越】

孟郊

秋风吹白发，微官自萧索。江僧何用叹，溪县饶寂寞。

楚思物皆清，越山胜非薄。时看镜中月，独向衣上落。

多谢入冥鸿，笑予在笼鹤。

卷 379_27 【奉同朝贤送新罗使】

孟郊

森森望远国，一萍秋海中。恩传日月外，梦在波涛东。
浪兴豁胸臆，泛程舟虚空。既兹吟仗信，亦以难私躬。
实怪赏不足，异鲜悦多丛。安危所系重，征役谁能穷。
彼俗媚文史，圣朝富才雄。送行数百首，各以铿奇工。
冗隶窃抽韵，孤属思将同。

卷 379_28 【留弟郢不得送之江南】

孟郊

刚有下水船，白日留不得。老人独自归，苦泪满眼黑。

卷 379_29 【送陆畅归湖州，因凭题故人皎然塔、陆羽坟】

孟郊

森森雪寺前，白蘋多清风。昔游诗会满，今游诗会空。
孤吟玉凄恻，远思景蒙笼。杼山砖塔禅，竟陵广宵翁。
饶彼草木声，仿佛闻馀聪。因君寄数句，遍为书其丛。
追吟当时说，来者实不穷。江调难再得，京尘徒满躬。

送君溪鸳鸯，彩色双飞东。东多高静乡，芳宅冬亦崇。
手自撷甘旨，供养欢冲融。待我遂前心，收拾使有终。
不然洛岸亭，归死为大同。

卷 379_30【送淡公】

孟郊

燕本冰雪骨，越淡莲花风。五言双宝刀，联响高飞鸿。
翰苑钱舍人，诗韵铿雷公。识本未识淡，仰咏嗟无穷。
清恨生物表，郎玉倾梦中。常于冷竹坐，相语道意冲。
嵩洛兴不薄，稽江事难同。明年若不来，我作黄蒿翁。
何以兀其心，为君学虚空。

坐爱青草上，意含沧海滨。渺渺独见水，悠悠不问人。
镜浪洗手绿，剡花入心春。虽然防外触，无奈饶衣新。
行当译文字，慰此吟殷勤。

铜斗饮江酒，手拍铜斗歌。侬是拍浪儿，饮则拜浪婆。
脚踏小船头，独速舞短蓑。笑伊渔阳操，空恃文章多。
闲倚青竹竿，白日奈我何。

短蓑不怕雨，白鹭相争飞。短楫画菰蒲，斗作豪横归。
笑伊水健儿，浪战求光辉。不如竹枝弓，射鸭无是非。

射鸭复射鸭，鸭惊菰蒲头。鸳鸯亦零落，彩色难相求。

依是清浪儿，每踏清浪游。笑伊乡贡郎，踏土称风流。
如何卮角翁，至死不裹头。

师得天文章，所以相知怀。数年伊雒同，一旦江湖乖。
江湖有故庄，小女啼啾啾。我忧未相识，乳养难和谐。
幸以片佛衣，诱之令看斋。斋中百福言，催促西归来。

伊洛气味薄，江湖文章多。坐缘江湖岸，意识鲜明波。
铜斗短蓑行，新章其奈何。兹焉激切句，非是等闲歌。
制之附驿回，勿使馀风讹。都城第一寺，昭成屹嵯峨。
为师书广壁，仰咏时经过。徘徊相思心，老泪双滂沱。

江南邑中寺，平地生胜山。开元吴语僧，律韵高且闲。
妙药溪岸平，桂榜往复还。树石相斗生，红绿各异颜。
风味我遥忆，新奇师独攀。

报恩兼报德，寺与山争鲜。橙橘金盖槛，竹蕉绿凝禅。
经章音韵细，风磬清泠翩。离肠绕师足，旧忆随路延。
不知几千尺，至死方绵绵。

乡在越镜中，分明见归心。镜芳步步绿，镜水日日深。
异刹碧天上，古香清桂岑。朗约徒在昔，章句忽盈今。
幸因西飞叶，书作东风吟。落我病枕上，慰此浮恨侵。

牵师袈裟别，师断袈裟归。问师何苦去，感吃言语稀。
意恐被诗饿，欲住将底依。卢殷刘言史，饿死君已噫。
不忍见别君，哭君他是非。

诗人苦为诗，不如脱空飞。一生空鹜气，非谏复非讥。
脱枯挂寒枝，弃如一唾微。一步一步乞，半片半片衣。
倚诗为活计，从古多无肥。诗饥老不怨，劳师泪霏霏。

卷 379_31【送魏端公入朝】

孟郊

东洛尚淹玩，西京足芳妍。大宾威仪肃，上客冠剑鲜。
岂惟空恋阙，亦以将朝天。局促尘末吏，幽老病中弦。
徒怀青云价，忽至白发年。何当补风教，为荐三百篇。

卷 379_32【送卢郎中汀】

孟郊

洛水春渡阔，别离心悠悠。一生空吟诗，不觉成白头。
向事每计较，与山实绸缪。太华天上开，其下车辙流。

县街无尘土，过客多淹留。坐饮孤驿酒，行思独山游。
逸关岚气明，照渭空漪浮。玉珂摆新欢，声与鸾凤俦。
朝谒大家事，唯余去无由。

卷 379_33 【送郑仆射出节山南】

孟郊

国老出为将，红旗入青山。再招门下生，结束馀病孱。
自笑骑马丑，强从驱驰间。顾顾磨天路，袅袅镜下颜。
文魄既飞越，宦情唯等闲。羡他白面少，多是清朝班。
惜命非所报，慎行诚独艰。悠悠去住心，两说何能删。

卷 379_34 【别妻家】

孟郊

芙蓉湿晓露，秋别南浦中。鸳鸯卷新赠，遥恋东床空。
碧水不息浪，清溪易生风。参差坐成阻，飘飘去无穷。
孤云目虽断，明月心相通。私情讵销铄，积芳在春丛。

卷 379_35 【赠姚怱别】

孟郊

美人废琴瑟，不是无巧弹。闻君郢中唱，始觉知音难。
惊蓬无还根，驰水多分澜。倦客厌出门，疲马思解鞍。
何以写此心，赠君握中丹。

卷 379_36 【赠竟陵卢使君虔别】

孟郊

赤日千里火，火中行子心。孰不苦焦灼，所行为贫侵。
山木岂无凉，猛兽蹲清阴。归人忆平坦，别路多岖嶔。
赖得竟陵守，时闻建安吟。赠别折楚芳，楚芳摇衣襟。

卷 379_37 【与韩愈、李翱、张籍话别】

孟郊

朱弦奏离别，华灯少光辉。物色岂有异，人心顾将违。
客程殊未已，岁华忽然微。秋桐故叶下，寒露新雁飞。
远游起重恨，送人念先归。夜集类饥鸟，晨光失相依。
马迹绕川水，雁书还闺闱。常恐亲朋阻，独行知虑非。

卷 379_38 【监察十五叔东斋招李益端公会别】

孟郊

欲知惜别离，泻水还清池。此地有君子，芳兰步葳蕤。
手掇杂英珮，意摇春夜思。莫作绕山云，循环无定期。

卷 379_39 【汴州留别韩愈】

孟郊

不饮浊水澜，空滞此汴河。坐见绕岸水，尽为还海波。
四时不在家，弊服断线多。远客独憔悴，春英落婆娑。
汴水饶曲流，野桑无直柯。但为君子心，叹息终靡他。

卷 379_40 【赠别殷山人说易后归幽墅】

孟郊

夫子说天地，若与灵龟言。幽幽人不知，一一予所敦。
秋月吐白夜，凉风韵清源。旁通忽已远，神感寂不喧。
一悟祛万结，夕怀倾朝烦。旅鞅无停波，别马嘶去辕。
殷勤荒草土，会有知己论。

卷 379_41 【寿安西渡奉别郑相公】

孟郊

洛河向西道，石波横磷磷。清风送君子，车远无还尘。
春别亦萧索，况兹冰霜晨。零落景易入，郁抑抱难申。
百宵华灯宴，一旦星散人。岁去弦吐箭，忧来蚕抽纶。

绵绵无穷事，各各驰绕身。徘徊黄缥缈，倏忽春霜宾。
相为物表物，永谢区中姻。日嗟来教士，仰望无由亲。

东都清风减，君子西归朝。独抱岁晏恨，泗吟不成谣。
贵游意多味，贱别情易消。回雁忆前叫，浪鳧念后漂。

悠悠孤飞景，耸耸衔霜条。昧趣多滞涩，懒朋寡新僚。
病深理方悟，悔至心自烧。寂静道何在，忧勤学空饶。

乃知减闻见，始遂情逍遥。文字徒营织，声华谅疑骄。
顾惭耕稼士，朴略气韵调。善士有余食，佳畦冬生苗。
养人在养身，此旨清如韶。愿贡高古言，敢望锡类招。

卷三百八十

卷 380_1【宇文秀才斋中海柳咏】

孟郊

玉缕青葳蕤，结为芳树姿。忽惊明月钩，钩出珊瑚枝。
灼灼不死花，蒙蒙长生丝。饮柏泛仙味，咏兰拟古词。
霜风清飕飕，与君长相思。

卷 380_2【摇柳】

孟郊

弱弱本易惊，看看势难定。因风似醉舞，尽日不能正。
时邀咏花女，笑辍春妆镜。

卷 380_3【晓鹤】

孟郊

晓鹤弹古舌，婆罗门叫音。应吹天上律，不使尘中寻。

虚空梦皆断，歆唏安能禁。如开孤月口，似说明星心。
既非人间韵，枉作人间禽。不如相将去，碧落窠巢深。

卷 380_4 【和蔷薇花歌】

孟郊

仙机札札织凤凰，花开七十有二行。天霞落地攒红光，
风枝袅袅时一飏，飞散葩馥绕空王。忽惊锦浪洗新色，
又似宫娃逞妆饰。终当一使移花根，还比蒲桃天上植。

卷 380_5 【邀人赏蔷薇】

孟郊

蜀色庶可比，楚丛亦应无。醉红不自力，狂艳如索扶。
丽蕊惜未扫，宛枝长更纡。何人是花侯，诗老强相呼。

卷 380_6 【和宣州钱判官使院厅前石楠树】

孟郊

大朴既一剖，众材争万殊。懿兹南海华，来与北壤俱。
生长如自惜，雪霜无凋渝。笼笼抱灵秀，簇簇抽芳肤。

寒日吐丹艳，赭子流细珠。鸳鸯花数重，翡翠叶四铺。
雨洗新妆色，一枝如一姝。耸异敷庭际，倾妍来坐隅。
散彩饰机案，馀辉盈盘盂。高意因造化，常情逐荣枯。
主公方寸中，陶植在须臾。养此奉君子，赏觐日为娱。
始觉石楠咏，价倾赋两都。棠颂庶可比，桂词难以逾。
因谢丘墟木，空采落泥涂。时来开佳姿，道去卧枯株。
争芳无由缘，受气如郁纁。抽肝在郢匠，叹息何踟蹰。

卷 380_7 【酬郑毗踯躅咏】

孟郊

不似人手致，岂关地势偏。孤光袅馀翠，独影舞多妍。
迸火烧闲地，红星堕青天。忽惊物表物，嘉客为留连。

卷 380_8 【品松】

孟郊

追悲谢灵运，不得殊常封。纵然孔与颜，亦莫及此松。
此松天格高，耸异千万重。抓拏巨灵手，擘裂少室峰。
擘裂风雨狞，抓拏指爪傭。道入难抱心，学生易堕踪。
时时数点仙，袅袅一线龙。霏微岚浪际，游戏颢兴浓。
品松徒高高，雌鸣讵啾啾。赏异尚可贵，赏潜谁能容。
名华非典实，翦弃徒纤茸。刻削大雅文，所以不敢慵。

卷 380_9 【答李员外小榼味】

孟郊

一拳芙蓉水，倾玉何泠泠。仙情夙已高，诗味今更馨。
试啜月入骨，再衔愁尽醒。荷君道古诚，使我善飞翎。

卷 380_10 【井上枸杞架】

孟郊

深锁银泉甃，高叶架云空。不与凡木并，自将仙盖同。
影疏千点月，声细万条风。迸子邻沟外，飘香客位中。
花杯承此饮，椿岁小无穷。

卷 380_11 【蜘蛛讽】

孟郊

万类皆有性，各各禀天和。蚕身与汝身，汝身何太讹。
蚕身不为己，汝身不为佗。蚕丝为衣裳，汝丝为网罗。
济物几无功，害物日已多。百虫虽切恨，其将奈尔何。

卷 380_12 【蚊】

孟郊

五月中夜息，饥蚊尚营营。但将膏血求，岂觉性命轻。
顾己宁自愧，饮人以偷生。愿为天下幘，一使夜景清。

卷 380_13 【烛蛾】

孟郊

灯前双舞蛾，厌生何太切。想尔飞来心，恶明不恶灭。
天若百尺高，应去掩明月。

卷 380_14 【和钱侍郎甘露】

孟郊

玄天何以言，瑞露青松繁。忽见垂书迹，还惊涌澧源。
春枝晨袅袅，香味晓翻翻。子礼忽来献，臣心固易敦。
清风惜不动，薄雾肯蒙昏。嘉昼色更晶，仁慈久乃存。
一方难独占，天下恐争论。侧听飞中使，重荣华德门。
从公乐万寿，余庆及儿孙。

卷 380_15【和令狐侍郎、郭郎中题项羽庙】

孟郊

碧草凌古庙，清尘锁秋窗。当时独宰割，猛志谁能降。
鼓气雷作敌，剑光电为双。新悲徒自起，旧恨空浮江。

卷 380_16【读张碧集】

孟郊

天宝太白殁，六义已消歇。大哉国风本，丧而王泽竭。
先生今复生，斯文信难缺。下笔证兴亡，陈词备风骨。
高秋数奏琴，澄潭一轮月。谁作采诗官，忍之不挥发。

卷 380_17【听琴】

孟郊

飒飒微雨收，翻翻橡叶鸣。月沉乱峰西，寥落三四星。
前溪忽调琴，隔林寒琤琤。闻弹正弄声，不敢枕上听。
回烛整头簪，漱泉立中庭。定步履齿深，貌禅目冥冥。
微风吹衣襟，亦认宫徵声。学道三十年，未免忧死生。
闻弹一夜中，会尽天地情。

卷 380_18 【闻夜啼赠刘正元】

孟郊

寄泣须寄黄河泉，此中怨声流彻天。

愁人独有夜灯见，一纸乡书泪滴穿。

卷 380_19 【喜雨】

孟郊

朝见一片云，暮成千里雨。凄清湿高枝，散漫沾荒土。

卷 380_20 【终南山下作】

孟郊

见此原野秀，始知造化偏。山村不假阴，流水自雨田。

家家梯碧峰，门门锁青烟。因思蜕骨人，化作飞桂仙。

卷 380_21 【观种树】

孟郊

种树皆待春，春至难久留。君看朝夕花，谁免离别愁。
心意已零落，种之仍未休。胡为好奇者，无事自买忧。

卷 380_22 【春雨后】

孟郊

昨夜一霎雨，天意苏群物。何物最先知，虚庭草争出。

卷 380_23 【答友人赠炭】

孟郊

青山白屋有仁人，赠炭价重双乌银。驱却坐上千重寒，
烧出炉中一片春。吹霞弄日光不定，暖得曲身成直身。

卷 380_24 【烂柯石】

孟郊

仙界一日内，人间千载穷。双棋未遍局，万物皆为空。
樵客返归路，斧柯烂从风。唯馀石桥在，犹自凌丹虹。

卷 380_25 【寻言上人】

孟郊

万里莓苔地，不见驱驰踪。唯开文字窗，时写日月容。
竹韵漫萧屑，草花徒蒙茸。披霜入众木，独自识青松。

卷 380_26 【喷玉布】

孟郊

去尘咫尺步，山笑康乐岩。天开紫石屏，泉缕明月帘。
仙凝刻削迹，灵绽云霞纤。悦闻若有待，瞥见终无厌。
俗玩讵能近，道嬉方可淹。踏着不死机，欲归多浮嫌。
古醉今忽醒，今求古仍潜。古今相共失，语默两难恬。
赠君喷玉布，一濯高崭崭。

卷 380_27【姑蔑城】

孟郊

劲越既成土，强吴亦为墟。皇风一已被，兹邑信平居。
抚俗观旧迹，行春布新书。兴亡意何在，绵叹空踌蹰。

卷 380_28【峥嵘岭】

孟郊

疏凿顺高下，结构横烟霞。坐啸郡斋肃，玩奇石路斜。
古树浮绿气，高门结朱华。始见峥嵘状，仰止逾可嘉。

卷 380_29【寻裴处士】

孟郊

涉水更登陆，所向皆清真。寒草不藏径，灵峰知有人。
悠哉炼金客，独与烟霞亲。曾是欲轻举，谁言空隐沦。
远心寄白月，华发回青春。对此钦胜事，胡为劳我身。

卷 380_30 【子庆诗】

孟郊

王家事已奇，孟氏庆无涯。献子还生子，羲之又有之。
凤兮且莫叹，鲤也会闻诗。小小豫章甲，纤纤玉树姿。
人来唯仰乳，母抱未知慈。我欲拣其养，放麀者是谁。

卷 380_31 【憩淮上观公法堂】

孟郊

动觉日月短，静知时岁长。自悲道路人，暂宿空闲堂。
孤烛让清昼，纱巾敛辉光。高僧积素行，事外无刚强。
我有岩下桂，愿为炉中香。不惜青翠姿，为君扬芬芳。
淮水色不污，汴流徒浑黄。且将琉璃意，净缀芙蓉章。
明日还独行，羁愁来旧肠。

卷 380_32 【江邑春霖奉赠陈侍御】

孟郊

江上花木冻，雨中零落春。应由放忠直，在此成漂沦。
嘉艳皆损污，好音难殷勤。天涯多远恨，雪涕盈芳辰。

坐哭青草上，卧吟幽水滨。兴言念风俗，得意唯波鳞。
枕席病流湿，檐楹若飞津。始知吴楚水，不及京洛尘。
风浦荡归棹，泥陂陷征轮。两途日无遂，相赠唯沾巾。

卷 380_33【溧阳秋霁】

孟郊

晚雨晓犹在，萧寥激前阶。星星满衰鬓，耿耿入秋怀。
旧识半零落，前心骤相乖。饱泉亦恐醉，惕宦肃如斋。
上客处华池，下寮宅枯崖。叩高占生物，龃齬回难谐。

卷 380_34【列仙文·方诸青童君】

孟郊

大霞霏晨晖，元气无常形。玄轸飞霄外，八景乘高清。
手把玉皇袂，携我晨中生。玄庭自嘉会，金书拆华名。
贤女密所妍，相期洛水耕。

卷 380_35【列仙文·清虚真人】

孟郊

欵驾空清虚，徘徊西华馆。琼轮暨晨抄，虎骑逐烟散。

惠风振丹旌，明烛朗八焕。解襟墉房内，神铃鸣璀璨。
栖景若林柯，九弦空中弹。遗我积世忧，释此千载叹。
怡眇无极已，终夜复待旦。

卷 380_36【列仙文·金母飞空歌】

孟郊

驾我八景舆，欻然入玉清。龙群拂霄上，虎旗摄朱兵。
逍遥三弦际，万流无暂停。哀此去留会，劫尽天地倾。
当寻无中景，不死亦不生。体彼自然道，寂观合大冥。
南岳挺直干，玉英曜颖精。有任靡期事，无心自虚灵。
嘉会绛河内，相与乐朱英。

卷 380_37【列仙文·安度明】

孟郊

丹霞焕上清，八风鼓太和。回我神霄輶，遂造岭玉阿。
咄嗟天地外，九围皆我家。上采白日精，下饮黄月华。
灵观空无中，鹏路无间邪。顾见魏贤安，浊气伤汝和。
勤研玄中思，道成更相过。

卷 380_38 【夏日谒智远禅师】

孟郊

吾师当几祖，说法云无空。禅心三界外，宴坐天地中。
院静鬼神去，身与草木同。因知护王国，满钵盛毒龙。
抖擞尘埃衣，谒师见真宗。何必千万劫，瞬息去樊笼。
盛夏火为日，一堂十月风。不得为弟子，名姓挂儒宫。

卷 380_39 【访嵩阳道士不遇】

孟郊

先生五兵游，文焰藏金鼎。日下鹤过时，人间空落影。
常言一粒药，不堕生死境。何当列御寇，去问仙人请。

卷 380_40 【听蓝溪僧为元居士说维摩经】

孟郊

古树少枝叶，真僧亦相依。山木自曲直，道人无是非。
手持维摩偈，心向居士归。空景忽开霁，雪花犹在衣。
洗然水溪昼，寒物生光辉。

卷 380_41【借车】

孟郊

借车载家具，家具少于车。借者莫弹指，贫穷何足嗟。
百年徒役走，万事尽随花。

卷 380_42【喜符郎诗有天纵】

孟郊

念符不由级，屹得文章阶。白玉抽一毫，绿珉已难排。
偷笔作文章，乞墨潜磨揩。海鲸始生尾，试摆蓬壶涡。
幸当禁止之，勿使恣狂怀。自悲无子嗟，喜妒双喈喈。

卷 380_43【凭周况先辈于朝贤乞茶】

孟郊

道意勿乏味，心绪病无惊。蒙茗玉花尽，越瓯荷叶空。
锦水有鲜色，蜀山饶芳丛。云根才翦绿，印缝已霏红。
曾向贵人得，最将诗叟同。幸为乞寄来，救此病劣躬。

卷 380_44 【上昭成阁不得，于从侄僧悟空院叹嗟】

孟郊

欲上千级阁，问天三四言。未尺数十登，心目风浪翻。
手手把惊魄，脚脚踏坠魂。却流至旧手，傍掣犹欲奔。
老病但自悲，古蠹木万痕。老力安可夸，秋海萍一根。
孤叟何所归，昼眼如黄昏。常恐失好步，入彼市井门。
结僧为亲情，策竹为子孙。此诚徒切切，此意空存存。
一寸地上语，高天何由闻。

卷 380_45 【魏博田兴尚书听嫂命不立非夫人诗】

孟郊

君子耽古礼，如馋鱼吞钩。昨闻敬嫂言，掣心东北流。
魏博田尚书，与礼相绸缪。善词闻天下，一日一再周。

卷 380_46 【读经】

孟郊

垂老抱佛脚，教妻读黄经。经黄名小品，一纸千明星。
曾读大般若，细感肸蚨听。当时把斋中，方寸抱万灵。

忽复入长安，蹴踏日月宁。老方却归来，收拾可丁丁。
拂拭尘几案，开函就孤亭。儒书难借索，僧签饶芳馨。
驿驿不开手，铿铿闻异铃。得善如焚香，去恶如脱腥。
安得颜子耳，曾未如此听。听之何有言，德教贵有形。
何言中国外，有国如海萍。海萍国教异，天声各泠泠。
安排未定时，心火竞荧荧。将如庶几者，声尽形元冥。

卷 380_47【谢李輶再到】

孟郊

等闲拜日晚，夫妻犹相疮。况是贤人冤，何必哭飞扬。
昨夜梦得剑，为君藏中肠。会将当风烹，血染布衣裳。
劳君又叩门，词句失寻常。我不忍出厅，血字湿土墙。
血字耿不灭，我心惧惶惶。会有铿锵夫，见之目生光。
生光非等闲，君其且安详。

卷 380_48【忽不贫，喜卢仝书船归洛】

孟郊

贫孟忽不贫，请问孟何如。卢仝归洛船，崔嵬但载书。
江潮清翻翻，淮潮碧徐徐。夜信为朝信，朝信良卷舒。
江淮君子水，相送仁有余。我去官色衫，肩经入君庐。
喃喃肩经郎，言语倾琪琚。琪琚铿好词，鸟鹊跃庭除。

书船平安归，喜报乡里间。我愿拾遗柴，巢经于空虚。
下免尘土侵，上为云霞居。日月更相锁，道义分明储。
不愿空岩峤，但愿实工夫。实空二理微，分别相起予。
经书荒芜多，为君勉勉锄。勉勉不敢专，传之方在诸。